

সিপাহি যুদ্ধের ইতিহাস।

প্রথম ভাগ।

শ্রীরজনীকান্ত গুপ্ত প্রণীত।

দ্বিতীয় সংস্করণ।

কলিকাতা।

২০১ কর্ণওয়ালিস স্ট্রীট ~~বেঙ্গল~~ মেডিকেল লাইব্রেরী হইতে

শ্রীগুরুদাস চট্টোপাধ্যায় কর্তৃক প্রকাশিত

এবং

২১০/১ কর্ণওয়ালিস স্ট্রীট ভিক্টোরিয়া প্রেসে,

শ্রীমণিমোহন রক্ষিত দ্বারা মুদ্রিত।

১৮৮৬

মূল্য ২৬ ছই টাকা।

বিজ্ঞাপন ।

সিপাহি যুদ্ধের ইতিহাসের প্রথম ভাগে যুদ্ধের কাণ্ড সমূহ এবং সিপাহি-সৈন্যের উৎপত্তি ও উন্নতির বিষয় সবিস্তর বর্ণিত হইয়াছে ।

অলুমান চারিভাগে ইতিহাসের পরিসমাপ্তি হইবে । দ্বিতীয়, তৃতীয় ও চতুর্থ ভাগে যথাক্রমে যুদ্ধসম্বন্ধীয় ঘটনাবলির বর্ণনা থাকিবে ।

প্রসিদ্ধ পুস্তক, রাজকীয় শাসনপত্র, লৌকিক বার্তা প্রভৃতি হইতে ইতিহাসের বিবরণ সংগৃহীত হইয়াছে । কোন কোন বৈদেশিকের হস্তে ভাব-ভীর ঐতিহাসিকচিত্র স্থলবিশেষে অতিরঞ্জিত বা অরঞ্জিত হইয়া উঠিয়াছে । বর্তমান গ্রন্থে তাদৃশ বৈষম্য পরিহার করিতে যথাশক্তি যত্ন করিয়াছি । গ্রন্থে যে যে বিষয়ের প্রবর্তনা করা গিয়াছে, তৎসমুদয় শ্রায়, সত্য ও উদারতার-সম্মান রক্ষা কবিয়াই বর্ণনা করা হইয়াছে ।

আমাদের ভাষায় একখানিও প্রকৃত ইতিহাস দৃষ্ট হয় না । বর্তমান ইতিহাসে এই অভাবের পূরণ হইবে কি না, তাহা বলিতে আমার কোন স্পষ্টতা বা সাহস নাই । মাতৃভাষার অভাব মোচনে আমার শ্রায় ক্ষুদ্রবুদ্ধি ও ক্ষুদ্র-শক্তি ব্যক্তি একান্ত অক্ষম । “আমি বামন হইয়া উন্নত-পুরুষ-লভ্য ফল লাভের উদ্দেশে এই চাপল্য প্রদর্শন করিলাম” ।

শ্রীরজনীকান্ত গুপ্ত ।

সূচী ।

প্রথম অধ্যায় ।

গ্রহের হুচনা—লর্ড ডালহৌসীর শাসনকাল—প্রথমশিখযুদ্ধ—কসুর-
সন্ধি—রাজা লালসিংহের পতন—বাইরাবলসন্ধি—প্রতিনিধিশাসন-প্রণালী
—মহারানী কিন্ননের নির্কাসন—মূলতানের গোলযোগ—দ্বিতীয়শিখযুদ্ধ—
পঞ্জাব অধিকার । ১—৫৬

দ্বিতীয় অধ্যায় ।

লর্ড ডালহৌসীর রাজ্যশাসনের অনুরক্তি—ব্রহ্মযুদ্ধ—পেশু অধিকার—
উত্তরাধিকারিশূত্র আশ্রিত রাজ্যের অধিকার বিষয়ক বিধি—সেতারী—
বাংলী—নাগপুর—কেরোলী—হয়দরাবাদের নিজাম—কর্ণাটের নবাব—
ভাঞ্জোর—মম্বলপুর—পেশবা—ধন্দুপস্থ নানা সাহেব । ... ৫৭—১১৬

তৃতীয় অধ্যায় ।

ডালহৌসীর রাজ্য-শাসনের অনুরক্তি—অযোধ্যা—উহার পূর্বতন
সৌভাগ্য—মুসলমানদিগের আধিপত্য—নবাবের সহিত ব্রিটিশ গবর্ণমেন্টের
সন্ধি—নবাব স্ফাজাউদৌলা—আসফউদৌলা—মির্জাআলি—সাদত আলি
—গাজিউদ্দীন হায়দর—নসিরুদ্দীন হায়দর—মহম্মদ আলিসাহ—১৮৩৭
অবধের সন্ধি—আমজুদআলীশাহ—ওয়াজিদ আলিশাহ—অযোধ্যার শাসন
সংক্রান্ত অবাবস্থিততার অপবাদ—কর্ণেল শ্লিমানের রিপোর্ট—আউটাম—
অযোধ্যা অধিকার । ১১৭—১৪৩

চতুর্থ অধ্যায় ।

লর্ড ডালহৌসীর রাজ্য-শাসনের অনুরক্তি—ভূস্বামিদিগের অধঃপতন—
রাজস্বঘটিত অবস্থা—উত্তরপশ্চিমাঞ্চলের ভূমির বন্দোবস্ত—তালুকদারী স্বত্ব—
ভূমিক্রোক—বোম্বাইর ইনাম কমিশন—দেওয়ানী আদালতের বিচার কার্য
—জ্যোতিঃ প্রসাদের বিচার—সমাজের অভ্যন্তরীণ অবস্থা । ... ১৪৩—১৭০

পঞ্চম অধ্যায় ।

ব্রিটিশ কোম্পানির সিপাহি সৈন্ত—ইহার উৎপত্তি ও উন্নতি—ইহার
অসন্তোষের কারণ—ভারতবর্ষীয় আফিসরদিগের অবনতি—বেলোড়ে সৈন্ত-
গণের অসন্তোষ—ভারতবর্ষীয় ও ইউরোপীয় সৈন্ত—অর্দ্ধ বাটা—সিদ্ধ ও
পঞ্জাব অধিকার—রাজ্য-বুদ্ধির কল—লর্ড ডালহৌসী ও স্তার চার্লস্ নেপিয়ার
—ভারত—বর্ষ পরিত্যাগ করিয়া ডালহৌসীর স্বদেশ গমন—ঊহার কৃতি
কীর্তি—ঊহার উত্তরাধিকারি নিয়োগ । ১৭০—২৫২

পঞ্চম অধ্যায় ।

ব্রিটিশ কোম্পানির সিপাহি-সৈন্য—ইহার উৎপত্তি ও উন্নতি—ইহার অসন্তোষের কারণ—ভারতবর্ষীয় আর্মিরদিগের অবনতি—বেলোড়ৈ সৈন্যগণের অসন্তোষ—ভারতবর্ষীয় ও ইউরোপীয় সৈন্য—অর্ধবাটা—সিন্ধু ও পঞ্জাব অধিকার—রাজ্য-বৃদ্ধির ফল—লর্ড ডালহৌসী ও স্যার চার্লস মেপিন্স—ভারতবর্ষ পরিত্যাগ করিয়া ডালহৌসীর স্বদেশে গমন—ভাঁহার কৃতি ও কাঁসি—ভাঁহার উত্তরাধিকারি-নিয়োগ ।

ভূস্বামী-সম্প্রদায় ও সমাজের অভ্যন্তরীণ ধর্ম্মশাসন যেমন এক
দিকে পূর্বতন অবস্থা-ভ্রষ্ট ও পূর্বতন গৌরব-
চ্যুত হয়, তেমনই অন্যদিকে অল্প এক সম্প্রদায়

১৭৫৬-১৮৫৬ অব্দ ।

উৎপন্ন ও উন্নত হইয়া রাজ্য-শাসনের অঙ্গীভূত হইয়া উঠে । রাজ-শক্তি অক্ষুণ্ণ রাখিবার উদ্দেশে এই সম্প্রদায়ের সৃষ্টি হয়, ভবিষ্য অনিষ্টের নিবারণ লক্ষ্য ইহা পরিপুষ্ট ও পরিবর্দ্ধিত হয়, এবং সর্বত্র শাস্তিস্থাপনার্থ ইহা বিভিন্ন স্থলে বিভিন্ন দলে বিভক্ত হইয়া উঠে । ব্রিটিশ রাজপুরুষগণ ভাবিতেন, ভারতবর্ষ তরবারির সাহায্যে অধিকৃত হইয়াছে, এবং ভবিষ্যতে ইহা তরবারির সাহায্যেই রক্ষিত হইবে । স্মরণ্য বাবৎ এই অসি দৃঢ়রূপে হস্ত-নিবদ্ধ থাকিবে, তাবৎ কোন রূপ অনিষ্টের আশঙ্কা নাই । অসির এইরূপ মহৎ প্রয়োজন দেখিয়া, ভাঁহার বহুসংখ্যক অসি-রক্ষক নিযুক্ত করেন । ব্রিটেনিয়ার প্রাচ্য সাম্রাজ্য এইরূপে প্রায় তিন লক্ষ অস্ত্রধারী সৈন্যে সুরক্ষিত হইয়া উঠে ।

কিন্তু এই তিন লক্ষ সৈন্যের অতি অল্প অংশই ব্রিটিশ স্বীপ হইতে সংগৃহীত ও সমানীত হয় । ইঙ্গলণ্ডের মনুষ্য-সংখ্যা অথবা ভারতবর্ষের রাজস্ব, কখন কেবল ব্রিটিশ সৈন্যদ্বারা ভারতবর্ষ শাসন করিতে সমর্থ নহে । এক্ষণ অধিকাংশ সৈন্য ইংরেজী পদ্ধতি-অনুসারে শিক্ষিত, সজ্জিত ও ব্যব-

স্থিত হইয়া, ভারতবর্ষরক্ষায় নিয়োজিত হয়। ভারতের যে অল্প সংখ্যক সৈন্য রবর্ত ক্লাইবকে বিজয়-পতাকায় শোভিত করে, তাহা ক্রমে একটি প্রকাণ্ড সম্প্রদায়ে পরিণত হইয়া উঠে। এই সম্প্রদায়, সাহসে অনমনীয়, তেজস্বিতায় অপ্রতিহত ও রণপাণ্ডিত্যে ব্রিটিশ সেনার সমকক্ষ হইয়া অন্তর্বিপ্লব ও বহিঃশত্রুর আক্রমণ হইতে কোম্পানির মূলুক রক্ষা করিতে যত্নশীল হয়। বীরত্ব-প্রসিদ্ধ ভারতবর্ষ অধিস্বামিগণের সাহায্যার্থ এইরূপে আপনাদের সম্মানদিগকে সামরিক বেশে সুসজ্জিত করিয়া, স্বীয় গৌরবের পরিচয় দিতে থাকে।

সিপাহিগণ যেমন বীরত্ব ও রণপাণ্ডিত্যে সমাদৃত হয়, তেমনই অটল বিশ্বাস ও অসামান্য প্রভুভক্তিতেও বরণীয় হইয়া উঠে। সকলেই প্রফুল্ল-চিত্তে ইহাদের প্রশংসাবাদে সাধারণের হৃদয়ে অচিস্তনীয় ও অনাস্বাদিত-পূর্ব প্রীতিরস সঞ্চারিত করিয়া থাকেন। একজন সদাশয় ব্যক্তি একদা ভারতের গবর্ণরজেনারেলের নিকট ভারতীয় সিপাহিদিগের সম্বন্ধে লিখিয়া ছিলেন, “তাহারা (সিপাহিগণ) যে, জীবিত কাল পর্য্যন্ত আমাদের প্রতি বিশ্বাসী, সে বিষয়ে কোন সংশয় নাই। তাহারা এবং তাহাদের পূর্বপুরুষগণ আমাদের জন্ত একটি বিস্তৃত সাম্রাজ্য অধিকার করিয়াছে, তাহারা ঘোর অন্ধকারময় বিপত্তি-পূর্ণ সময়ে—যে সময়ে আমাদের শাসন-বিশ্বস্ত-প্রায় বোধ হইয়াছিল,—আমাদের পার্শ্বে দণ্ডায়মান রহিয়াছে, তাহারা আমাদের পরাজয় সূক্ষ্ম বোধ হইলেও বিপক্ষ দলের উৎকোচ গ্রহণের বিরোধী হইয়াছে। তাহারা ইহা অপেক্ষাও গুরুতর কার্য সাধন করিয়াছে। তাহারা আমাদের আদেশে, তাহাদের প্রাচীন অধিস্বামীদিগের বিরুদ্ধে, তাহাদের স্বদেশের বিরুদ্ধে, এবং তাহাদের আত্মীয়গণের বিরুদ্ধে যুদ্ধ করিয়াছে *।”

ব্রিটিশ সেনার সহিত ভারতীয় সেনার তুলনা হইতে পারে না। নানা কারণে ও নানা বিষয়ে উভয়ে, উভয় হইতে বহুদূর অন্তরে অবস্থিত। এক জন বৈদেশিক প্রভুর, দেশ, জাতি, বর্ণ ও ধর্ম্মানুশাসনে, সর্ব্বভোভাবে বৈদেশিকের ভৃত্যত্ব করে, অল্প জন তাহার স্বদেশীয়-রাজার ও স্বদেশের কার্যসাধনে নিয়োজিত থাকে; এক জন অধিকাংশ সময়ে

* Why is the Native Army disaffected—An address to the Right Honorable the Governor-General of India, by an old Indian, p. 2.

তাহার স্বজাতির, স্বদেশের ও স্বজাতির বিরুদ্ধে দণ্ডায়মান হয়, অথ জন সকল সময়ে, ভিন্ন দেশের, ভিন্ন দেশের ও ভিন্ন বর্ণের বিরুদ্ধে সম্মিলিত হইয়া থাকে; এক জনের প্রভুত্ব প্রভু-দত্ত বেতনে সমুৎপন্ন ও প্রভুর সদাচরণে পরিবর্দ্ধিত হয়, অথ জনের প্রভুত্ব, আপনার পরিপুষ্টির সহিত পরিপুষ্ট হয়, এবং আপনার উন্নতির সহিত উন্নত হইয়া থাকে। কিন্তু এইরূপ পার্থক্য থাকিলেও—ভারতীয় সৈন্য ব্রিটিশরাজের আজ্ঞানুবর্তী। অর্থ ও সদাচরণের বিনিময়ে যে প্রভুত্ব ক্রীত হয়, তাহা অনেক সময়ে ও অনেক স্থলে, প্রভুর স্বদেশীয় সৈন্যের কর্তব্যনিষ্ঠাকেও অধঃকৃত করিয়া থাকে।

বহুবিধ কষ্ট বা অস্থিভেদী পরিশ্রমের প্রয়োজন হইলেও সিপাহি কখনও কর্তব্য-পালনে পরাশ্রুত হয় না। বাঙ্‌নিষ্পত্তি না করিয়া, সিপাহি সর্ব প্রকার কষ্ট-ভার বহনে প্রবৃত্ত হয়, এবং বাঙ্‌নিষ্পত্তি না করিয়া, সমীহিত সাধনে উদ্যত হইয়া থাকে। কোন অর্থাৎ বা কোন অনিচ্ছা ইহাকে কর্তব্য-পথ হইতে অপসারিত করিতে সমর্থ হয় না। ভিন্ন দেশের, ভিন্ন জাতির ও ভিন্ন ব্যবহার-পদ্ধতির অধিনায়কের অধীনে থাকিয়া, সিপাহি সর্বদাপ্রকুর চিন্তে ও উৎসাহসহকারে কর্তব্য পালনে অগ্র-সর হইয়া থাকে। সে অসন্দিগ্ধ ভাবে এই ভিন্ন দেশীয় অধিনায়কের প্রতি বিশ্বাস স্থাপন কবে, অকুণ্ঠিতচিত্তে তাহার সহিত প্রীতি সূত্রে আবদ্ধ হয়, এবং অগ্নানভাবে তাহার আদেশপালনে উদ্যত হইয়া থাকে। কিছুতেই তাহার সাধনা প্রতিহত হয় না, এবং কিছুতেই তাহার সহিষ্ণুতা অবনত হইয়া পড়ে না। সে বিপত্তি-সময়ে নিদারুণ ক্ষুধার্ত হইয়াও, আপ-নার যৎসামান্য খাদ্য দ্রব্য দ্বারা সতীর্থ ব্রিটিশ সেনার তৃপ্তি সাধনে অগ্র-সর হয়, সে, ইউরোপীয়ের সাহস ও তেজস্বিতা যে স্থানে অগ্রসর হইতে বৃদ্ধিত হয়, সে স্থানেও অবাধে ও অসঙ্কোচে উপনীত হইয়া, আপন দলের পতাকা স্থাপিত করে, এবং সে যুদ্ধের সময়ে আপনার বহু পরিশ্রম-লভ্য যৎকিঞ্চিৎ বেতনের অংশ দিয়া, ব্রিটিশ রাজের সাহায্য করিয়া থাকে। পবিত্র ইতিহাসের প্রতি পত্রে তাহার পবিত্র বিশ্বাস ও পবিত্র প্রভুত্ব জাজ্জল্যমান রহিয়াছে। তাহার মহত্ব, তাহার একপ্রাণতা, তাহার কর্তব্য বুদ্ধি, তাহার স্বার্থত্যাগ অনন্তকাল তাহাকে ইতিহাসের বরণীয় করিয়া রাখিয়াছে। হিমালয়ের শৃঙ্গপাতেও তাহার গৌরব স্তম্ভ বিচূর্ণ

বা বিক্ষিপ্ত হইবে না, এবং ভারত-মহাসাগরের বারিতেও তাহার কীৰ্ত্তি-চিহ্ন বিলুপ্ত বা বিধৌত হইবে না।

দক্ষিণাপথে যখন ইঙ্গরেজ ও ফরাসিগণ পরস্পরের বিক্রমস্পর্ধী হইয়া যুদ্ধ আরম্ভ করেন, তখন কোম্পানির সিপাহি-সৈন্য সৃষ্ট ও ব্যবস্থিত হয়। সুদূর-বিস্তৃত ভারত সাম্রাজ্যের দক্ষিণাংশই সিপাহি সৈন্যের উৎপত্তি, স্থিতি ও বিস্তৃতির ক্ষেত্র। এই সিপাহি সৈন্য প্রথমে অসঙ্গসংখ্যক হইলেও প্রতি-দ্বন্দ্বীর আক্রমণে কোম্পানির অধিকার অক্ষুণ্ণ রাখিতে বিমুখ হঙ্গ নাই। ক্রমে রণপারদর্শিতা ও ক্ষমতাবলে ইহারা উচ্চতর শ্রেণীতে আরোহণ করে, গুরুতর কর্তব্যসাধনের যোগ্য হয়, এবং সমরক্ষেত্রে ইউরোপীয় বীর-পুরুষের সমকক্ষ হইয়া উঠে। ইঙ্গরেজ সেনাপতি কতুক ইঙ্গরেজী প্রণালীতে শিক্ষিত ও ইঙ্গরেজী প্রণালীতে পরিচালিত হইয়া, এই উচ্চ শ্রেণীর রাজপুত্র ও উচ্চ শ্রেণীর মুসলমানগণ গৌরবে উন্নত হয়, এবং বিজয়-শ্রীতে সম্বন্ধিত হইয়া যুদ্ধ-ব্যবসায়ে দ্বিগুণ উৎসাহান্বিত হইয়া উঠে। তাহারাই মতুরা আক্রমণে কিরূপ পরাক্রম প্রকাশ করিয়াছিল, আর্কট রক্ষণে কিরূপ সাহস দেখাইয়াছিল, কডালুরে কিরূপ সূকৌশলে সর্বোৎকৃষ্ট ফরাসী সৈন্যের সহিত সঙ্গিনে সঙ্গিনে যুদ্ধ করিয়াছিল, ঐতিহাসিকগণ তাহা আফ্লাদ ও শ্রীতির সহিত বর্ণনা করিয়া থাকেন। সর্ব প্রকার ক্ষমতা, সর্ব প্রকার দায়িত্ব, সর্ব প্রকার সম্মান ও সর্ব প্রকার পুষ্কাব, সে সময়ে কেবল ইঙ্গরেজ সেনাপতিদিগের আয়ত্ত ছিল। সুশিক্ষিত সুব্যবস্থিত ও সুপটু ভারতবর্ষীয় সৈনিকগণও সে সকলের অংশ-ভোগী হইয়াছিল। শ্বেতকায় সৈনিক-প্রধানগণ ভারতীয় সেনাপতির হস্তে ভারতীয় সৈন্যগণের পরিচালন-ভার সমর্পণ করিতে সঙ্কুচিত হন নাই। কৃষ্ণকায় সেনাপতিগণ তাহাদের শ্বেত-কায় সতীর্থদিগের ত্রায় অখারোহণে আপন আপন সৈন্যদল পরিচালন করিয়াছেন। সাহসে, পরাক্রমে ও কৌশলে এবিষয়ে শ্বেতকায় ও কৃষ্ণকায়ের মধ্যে কোনও বিভিন্নতা লক্ষিত হয় নাই। উষ্ণীষের আশ্রিত সৈন্যগণ গোলাকার টুপির আশ্রিত সৈন্যগণের ত্রায়, সাহসিকতা ও রণদক্ষতার গুণ সম্মানিত ও সম্বন্ধিত হইয়াছে।

যে সময়ে অন্ধকূপ-হত্যার লোমহর্ষণ সংবাদ মাদ্রাজে উপস্থিত হয়, এক জন দৃঢ়কায় তরুণ বয়স্ক পুরুষ যে সময়ে ভবিষ্য সৌভাগ্যের রেখাপাত করিতে মাদ্রাজ হইতে কলিকাতায় যাত্রা করেন, সে সময়ে ইঙ্গরেজদের

ভাগীরথীর তটবর্তী বাণিজ্য-ক্ষেত্রে কোন ভারতবর্ষীয় সৈন্ত ছিল না। কিন্তু মাদ্রাজে ১৪ দল ভারতীয় সৈন্ত অবস্থিতি করিতেছিল। ইহার প্রতিদলে এক হাজার করিয়া সৈন্ত ছিল। ক্লাইব ইহাদিগকে সঙ্গে করিয়া জাহাজে আরোহণ করেন, এবং সুনীল বার্নি-রাশি অতিক্রম করিয়া, কলিকাতায় উপনীত হন। কলিকাতা সহজেই অধিকৃত হয়। এই সময় হইতেই ক্লাইব বাঙ্গালায় সৈন্তদল সংগঠিত করিতে আরম্ভ করেন। তাঁহার দৃঢ়প্রতিজ্ঞতা ও পারদর্শিতাশুণে বাঙ্গালার সৈনিক দল ক্রমেই পরিপুষ্ট ও পরিবর্দ্ধিত হইতে থাকে। এই সৈন্তগণ পলাশীর ক্ষেত্রে তাহাদের মাদ্রাজ-দেশীয় ভ্রাতৃগণের সহিত তুল্যবিক্রমে ও তুল্যদক্ষতায় যুদ্ধ করিয়াছিল। ইহার আট বৎসর পরে ঐ এক দল সৈন্তের স্থলে নয় দল হয়, এবং মাদ্রাজের শ্রায় প্রতিদলে সহস্র পরিমিত সৈনিক পুরুষ বর্তমান থাকে।

যাহারা সুশিক্ষিত ও সুব্যবস্থিত ইউরোপীয় সৈন্ত পরিদর্শন করিয়াছেন, তাহাদের কেহই বাঙ্গালার এই সিপাহিদিগকে উৎকৃষ্ট সৈন্ত বলিয়া নির্দেশ করিতে সক্ষম হন নাই। ইঙ্গরেজ পদ্ধতি অনুসারে শিক্ষিত ও ইঙ্গরেজী রীতিতে পরিচালিত হইয়া এই সেনাগণ ইঙ্গরেজ সৈন্তের ক্ষমতাম্পর্কী হইয়া উঠে। ইঙ্গরেজেরা এই সৈন্তদিগের প্রতি কোনও ওঁদাসীন্দ্ৰ দেখান নাই। যে প্রণালী ইহাদের ধর্ম, জাতি বা অহুশাসনের বিরোধী হইতে পারে, তাহা কখনও প্রবর্তিত হয় নাই। সিপাহিগণ আপনাদের অবস্থায় সন্তুষ্ট থাকিত, এবং সন্তুষ্ট থাকিয়াই রণস্থলে ব্রিটিশ রাজের পক্ষ সমর্থন করিত। তাহারা আপনাদের প্রণালী অনুসারে পৃথক্ ভাবে অবস্থিতি করিত, পৃথক্ ভাবে রক্ষণ করিত, এবং পৃথক্ ভাবে ভোজন করিত। তাহাদের কণ্ঠী ধারণে, তাহাদের কর্ণ-ভূষণ পরিধানে, এবং তাহাদের জাতিগত শ্রেষ্ঠতা-জ্ঞাপক তিলকব্যবহারে কেহই বিরক্ত হইত না, এবং কেহই তাহাদিগকে ঐ সমস্ত চিহ্ন পরিত্যাগ করিয়া, শ্বেত-পুরুষের দলে সম্মিলিত হইতে অমুরোধ করিত না। শ্বেতকায়গণ যে, তাহাদিগকে আপনাদের ধর্মে দীক্ষিত করিবেন, এ আশঙ্কা কখনই তাহাদের হৃদয়ে স্থান পাইত না। স্মৃতরাং তাহারা সন্তুষ্ট থাকিত, সেনাপতির আজ্ঞাবাহক হইত, এবং আপনাদের গবর্ণমেন্টের প্রতি সর্বদা বিশ্বস্ততা দেখাইত।

সিপাহিগণ কখনই নিমক্‌হারাম ছিল না; তাহারা যাহাদের লুণ খাইয়াছে, তাহাদের প্রতি কখনই অকৃতজ্ঞ হইত না, এবং যাহাদের

হস্ত তাহাদের গ্রাসাচ্ছাদন সংগ্রহ করিতে উন্মুখ রহিয়াছে, কখনই তাহাদের বিরুদ্ধে অভ্যুত্থিত হইত না। কৃতজ্ঞতা, প্রভুভক্তি ও প্রভু-বিশ্বাসে তাহারা সর্বদা গৌরবান্বিত থাকিত। কিন্তু যদি তাহারা দেখিত, তাহাদের প্রতিপালক, তাহাদের বিরুদ্ধ-মতবর্তী হইয়াছেন, তাহারা অপরিসীম সাহস ও অটল বিশ্বাসের সহিত এত দিন যাহার পক্ষ সমর্থন করিয়া আসিয়াছে, তিনিই তাহাদের প্রতিকূলতা সাধনে অগ্রসর হইয়াছেন, তাহা হইলে তাহারা ক্ষোভে ও বিরাগে মগ্ন হইয়া পড়িত। এ ক্ষোভ ও বিরাগ শীঘ্র বিশ্বাসিলে নিমজ্জিত হইত না। উহা তাহাদের হৃদয়ের প্রতিস্তর দগ্ধ করিতে থাকিত।

বাঙ্গালার সিপাহি সৈন্ত এক্ষণে সপ্তম বর্ষে পদার্পণ করিয়াছিল। এই সময়ে তাহাদের মধ্যে অসন্তোষের চিহ্ন লক্ষিত হয়। কিন্তু সিপাহি-সৈন্তদল ঐ অসন্তোষের উদ্ভব-ক্ষেত্র নহে। ইউরোপীয় সৈনিক সম্প্রদায় হইতে ঐ অসন্তোষ সিপাহি সৈন্তে সংক্রান্ত হইয়াছিল। কোম্পানির সৈন্তদিগের নিমিত্ত মীরজাফরের প্রদত্ত অর্থ আদিতে বিলম্ব হওয়াতে ইউরোপীয় সৈনিকগণ সান্তিশয় বিরক্ত ও অসন্তুষ্ট হইয়া উঠে। কিন্তু যখন টাকা আসিয়া উপস্থিত হয়, তখন সিপাহিগণ উহার অংশ হইতে বঞ্চিত হইবে ভাবিয়া, অসন্তুষ্ট হইয়া উঠে। তাহাদের এই বিরক্তি অकारণে জন্মে নাই। তাহারা ইউরোপীয় সৈন্তের সহিত তুল্য পরাক্রমে, তুল্য সাহসে কোম্পানির কার্য করিয়াছিল, সুতরাং উহার পুরস্কার তাহারা ইউরোপীয় সৈন্যের সহিত সমানভাবে পাইবার প্রত্যাশী হইয়াছিল। কিন্তু বর্ণ, জাতি ও বর্ণের বিভিন্নতার ন্যায় এ বিষয়েও ইউরোপীয়গণ ও তাহাদের মধ্যে বিভিন্নতা হইয়াছিল*। সুতরাং এই অকারণ পার্থক্যবিধানে তাহারা সন্তুষ্ট হয় নাই এবং এই অসন্তোষও তাহারা শীঘ্র শীঘ্র হৃদয় হইতে অপসারিত করিতে পারে নাই। যে বন্ধি-রেখা তাহাদের শরীরে প্রবিষ্ট হইয়াছিল, তাহা অমূনি নির্দোষিত হইল না। বৎসর শেষ হইবার পূর্বেই একদল সৈন্ত বিটিশ আফিসরদিগকে আক্রমণ ও অবরোধ করিল, এবং দৃঢ়তার সহিত কহিল, তাহারা কখনই কোম্পানি

* ইউরোপীয় সৈন্তদলের এক জন সামান্য সৈনিক (Private) যখন চল্লিশ টাকা পায়, তখন সিপাহিকে ছয় টাকা দিবার প্রস্তাব হয়। অবশেষে ইহাদের অংশে কুড়ি টাকা করিয়া পড়িয়াছিল। Kaye, Sepoy War, I., p. 206, note.

অধীনে কার্য্য করিবে না। কিন্তু কঠোর হস্ত, কঠোর বিচার-প্রণালী সিপাহিদিগের এ অবাধ্যতা প্রতিরোধ করিতে নিরস্ত থাকিল না। ২৪ জন সিপাহি বিদ্রোহ-অপরাধে অভিযুক্ত হইল, ছাপরার সৈনিকবিচারালয়ে ইহাদের বিচার কার্য্য চলিতে লাগিল, পরিশেষে ইহারা দোষী বলিয়া স্থির হইল, এবং অপরাধের শাস্তি স্বরূপ ইহাদিগকে কামানে উড়াইয়া দিবার আদেশ প্রচার হইল।

এক শত বৎসরের অধিক কাল হইল, এই আদেশ কার্য্যে পরিণত হইয়াছে, এক শত বৎসরেরও অধিক কাল হইল, চব্বিশ জন সিপাহি স্বশ্রেণীর, সতীর্থদিগের সমক্ষে অকাতরে অগ্নানভাবে মানবলীলা সম্বরণ করিয়াছে। সিপাহিগণ অনেক বিশ্বয়কর ও অনেক লোমহর্ষণ ঘটনা দেখিয়াছিল, কিন্তু ঐ শোচনীয় ও ভয়াবহ কাণ্ড অপেক্ষা তাহাদের পূর্বস্মৃতিতে আর কোন ভয়ঙ্কর দৃশ্য প্রতিভাসিত হয় নাই এ দৃশ্য যেমন ভয়ঙ্কর, তেমনই গভীর সন্ত্রাস ও গভীর মনোবেদনার উদ্দীপক। ভারতবর্ষীয় ও ইউরোপীয় সৈন্তগণ প্রশস্ত ক্ষেত্রে সমবেত হইল, কামানগুলি গোলাপূর্ণ হইয়া, ভয়ঙ্কর সময়ের ভয়ঙ্করত্ব প্রতিপাদন করিতে লাগিল, এবং অবরুদ্ধ ও দণ্ডার্ক সিপাহিগণ দণ্ড গ্রহণ করিতে ঐ স্থানে উপস্থাপিত হইল। বান্দালার সৈন্তদলের অধ্যক্ষ মেজর মনুরো ঐ লোমহর্ষণ, ভীষণ ঘটনার প্রধান পরিচালক হইলেন। তাঁহার আদেশে প্রথম চারি জন অপরাধী কামানের মুখে আবদ্ধ হইল, এবং তাঁহার আদেশে কয়েক জন ভীষণমূর্ত্তি কামান-রক্ষক শেবকার্য্য সম্পাদনার্থ দণ্ডায়মান হইল। এই শেষকার্য্য সম্পন্ন হইতে কাল-বিলম্ব হইত না। মনুরোর আদেশে কামানে আবদ্ধ চারি জন বিশাল-দেহ, ভীষণ-মূর্ত্তি সিপাহির প্রাণ-বায়ু অনন্ত অসীম বায়ুপ্রবাহে মিশিয়া গেল।

এই ভীষণ সময়ে, ভীষণ কার্য্যের রঙ্গ-ভূমিতে, ভীষণ অভিনয় দেখিয়া, সিপাহিদিগের প্রতিজ্ঞনের মুখেই এক অভূতপূর্ব ও অনির্কচনীয় কালিমা বিকাশ পাইতে লাগিল, এবং প্রতিজ্ঞনেরই গণ্ডদেশ, অশ্রু-প্রবাহে প্লাবিত হইল। ব্রিটিশ সৈন্তগণের সমক্ষে ব্রিটিশ সেনাপতির আদেশে তাহাদের স্বজাতির এইরূপ শোচনীয় পরিণাম দর্শনে তাহারা নিদারুণ মর্শ-পীড়ায় হত-জ্ঞান হইয়া উঠিল। একে একে কুড়ি জন এই রূপে কামানের মুখে আবদ্ধ হইয়া, নীরবে ধীরভাবে আত্মপ্রাণ বিসর্জন

করিল, এবং একে একে সমুদয় সৈন্তদল নীরবে ধীর ভাবে এই শোচনীয় কাণ্ড চাহিয়া দেখিল। অবশিষ্ট চারি জনকে, স্থলান্তরের সিপাহিদিগকে ব্রিটিশ সিংহের অক্ষুণ্ণ প্রতাপ জানাইবার নিমিত্ত, পূর্বের শ্রায়, মৃত্যুমুখে পাতিত করিবার নিমিত্ত রাখা রহিল। কিন্তু ইহাতেই এই ভয়ঙ্কর অভিনয় পর্য্যবসিত হয় নাই। বাঁকীপুরে আরও ছয় জন সিপাহির বিচার হয়, এবং তাহাদেরও জীবন-স্রোত এইরূপে অনন্ত কাল-স্রোতে বিলীন হইয়া যায়। এই কার্য্য দয়া ও ক্ষমার বিরোধী হইলেও ব্রিটিশ গবর্ণমেন্ট সাধারণেব মধ্যে শাস্তি স্থাপনার্থ ইহা সম্পন্ন করিতে সঙ্কুচিত হন নাই, দয়া ও ক্ষমা নীরবে ও গ্লানমুখে এই কার্য্য চাহিয়া দেখিল, নীরবে ও গ্লানমুখে ইহাতে দীর্ঘ নিঃশ্বাস ত্যাগ করিল এবং নীরবে ও গ্লানমুখে শাস্তির বিষ দূরীকরণ জন্ত ইহার অনুমোদন করিল।

এই কঠোর শিক্ষা ও কঠোর শাস্তি-দান নিষ্ফল হয় নাই। সিপাহিগণ এই অবধিই কোম্পানির অক্ষুণ্ণ প্রতাপের নিকট মস্তক অবনত করে, এবং এই অবধিই বাঙালি সম্প্রদায় না করিয়া সকল বিষয়েই কোম্পানির আনুগত্য করিতে প্রস্তুত থাকে। তাহারা এই অবধি বুঝিতে পারিল, যেই হুকুম, কোম্পানির বিরুদ্ধাচারী হইলে, তাহাকে হত-সর্ব্বস্ব হতমান ও হত-জীবন হইতে হইবে। ব্রিটিশ দণ্ড-নীতি, জাতিবিচার, শ্রেণী বিচার, ও প্রণালী-বিচার না করিয়া সকলকেই অজ্ঞানের ফল-ভোগী করিবে। এই ধারণা ও এই বিশ্বাস পরিণামে অনেক মঙ্গলের কারণ হইয়াছিল। ক্লাইবের সময় ইউরোপীয় সৈন্তগণ যখন অসন্তুষ্ট হইয়া উঠে, তখন দেশীয় সৈন্তগণ তাহাদের পরিপোষক হয় নাই। ক্লাইব এই বিশ্বস্ত ও প্রভুভক্ত সিপাহি লইয়াই ইউরোপীয় সৈন্তের অশান্তভাব নিবারণ করিয়াছিলেন। যদি এই সময়ে সিপাহি সৈন্ত ইউরোপীয় অফিসরদিগের সাহায্য করিত, তাহা হইলে গবর্ণমেন্ট নিঃসন্দেহ অনেক কষ্ট ও অস্ব-বিধায় পতিত হইতেন। কিন্তু সিপাহিগণ আশ্রয়-দাতা ও প্রতিপালক-কর্তার প্রতি আর অবিশ্বাসী হয় নাই, কিংবা হঠকারিতা ও অবাধ্যতা উদ্ভে-জিত হইয়া, আপনাদের চিরস্তন ধর্ম্মে আর জলাঞ্জলি দেয় নাই। তাহারা কোম্পানির লুন খাইয়াছিল, স্মরণ্য প্রতিকূলপক্ষীরদিগকে পরিত্যাগ করিয়া, কোম্পানির পক্ষ সমর্থনেই উদ্যত হইল। সিপাহিদিগের এই অটল বিশ্বাস ও প্রভুভক্তি ক্লাইবের অবিদিত ছিল না। ক্লাইব কেবল এই

সিপাহিদিগের উপর বিশ্বাস করিয়াই, বিশিষ্ট দৃঢ়তার সহিত তাঁহার সহ-যোগী স্মিথ ও ফেচরকে ইউরোপীয় অফিসরদিগের অসন্তোষ দূরীভূত করিতে লিখিয়াছিলেন। সিপাহিগণ আপনাদের চিরন্তন পদ্ধতি অনুসারে সেনাপতির আদেশে বিদ্রোহোন্মুখ ইউরোপীয় অফিসরদিগকেও গুলি করিতে উদ্যত হইয়াছিল* । সিপাহিদিগের এই দৃঢ়তা দেখিয়া, ক্লাইব স্তম্ভিত হইলেন। তিনি নিশ্চিত বুঝিলেন, বিপদের আশঙ্কা অতীত হইয়াছে ; নিশ্চিত বুঝিলেন, যদি সমস্ত ইউরোপীয় সৈন্য বিদ্রোহী হয়, তাহা হইলেও তিনি এই কৃষ্ণবর্ণ সিপাহিদিগের সাহায্যে সে বিদ্রোহাগ্নি নির্বাণ করিতে সমর্থ হইবেন ।

বঙ্গালার সিপাহিগণ কেবল যুদ্ধ-ব্যবসায়ী বলিয়া প্রসিদ্ধ ছিল না, তাহারা উচ্চ শ্রেণীর ব্রাহ্মণ ও উচ্চ শ্রেণীর ক্ষত্রিয় বলিয়াও সমাজে সম্মানিত ছিল। ইহারা কুলমর্যাদায় গৌরবান্বিত ছিল, এবং পুরুষাধিগত ধর্ম্মানুশাসন রক্ষা করিতে যত্নপর থাকিত। দক্ষিণাঞ্চলের সেনাগণও এইরূপে বিভিন্ন জাতিতে বিভক্ত থাকিয়া আপন আপন ধর্ম্মপদ্ধতির অনুরূপ কার্য্য-সুষ্ঠান করিত। ইহাদের নিয়ম অথবা ব্যবহারপ্রণালীর প্রতি এ পর্য্যন্ত কেহ হস্তক্ষেপ করেন নাই। কিন্তু শেষে সৈনিক বিভাগের কর্তৃপক্ষ এক শৃঙ্খলার পর আর এক শৃঙ্খলা প্রবর্ত্তিত করিতে লাগিলেন, প্রতি শৃঙ্খলাতেই নূতন ধারণা, নূতন প্রস্তাবের আবির্ভাব হইতে লাগিল। কর্তৃপক্ষ দক্ষিণাভ্য সৈন্যদলে নূতন প্রস্তাব কার্য্যে পরিণত করিলেন। এই সেনাদল ইঙ্গরেজী রীতিতে শিক্ষিত হইল, ইঙ্গরেজী রীতিতে সজ্জিত হইল, এবং ইঙ্গরেজী রীতিতে ক্ষৌর কার্য্য সম্পন্ন করিতে লাগিল। কেবল ইহাতেই প্রবর্ত্তমান শৃঙ্খলার সমাপ্তি হইল না। সিপাহিগণ, যে কর্ণভূষণ ও তিলক ব্যবহার করিয়া আসিতেছিল, যাহাকে তাহারা জাতীয় গৌরবের একটি প্রধান চিহ্ন মনে করিত, তাহা হইতেও বিচ্যুত হইল †। ইহার

* Browne, History of the Bengal Army Vol. I., p. 589.

ক্লাইব এসম্বন্ধে স্মিথ সাহেবকে লিখিয়াছিলেন,—“এই ঘটনায় কৃষ্ণবর্ণ সিপাহি অফিসরেরা বিষমস্ততা ও কার্য্যক্ষমতার বিশিষ্ট প্রমাণ দেখাইয়াছে। তাহারা বাৎসরিক এইরূপ বিষমস্ত ও কার্য্যক্ষম থাকিবে ইউরোপীয় সৈন্যেরা বিদ্রোহোন্মুখ হইলেও তাবৎ কোন অনিষ্টের আশঙ্কা নাই।” *Clive to Smith, May 15, 1760, M. S. Records. Comp. Kaye, Sepoy War. Vol. I., 210 note.*

† Standing Orders of Madras Army, Para. 10, Sec. 11. সিপাহিরা যখন

পর তাহাদের উষ্ণীকৃত্তে অপসারিত হইল, এবং উহার স্থলে ইঙ্গরেজী প্রণালীর অনুযায়ী গোল টুপি স্থান পরিগ্রহ করিল ।

সিপাহিগণ তব্ধক বা কারণানুসন্ধায়ী নহে । তাহারা সদা কোতূ-
হলপর ও সদা সন্নিহিত । এই কোতূহল ও সন্দেহে তাহারা অনেক সময়ে
গ্রাম্যমার্গ পরিভাগ করিয়া অগ্রায় পথে পরিচালিত হইত । নূতনপ্রকার
টুপিব্যবহারের আদেশ প্রচারিত হওয়াতে তাহারা ধর্মনাশ ও জাতি-
নাশের আশঙ্কায় ব্যাকুল হইয়া উঠিল । ইঙ্গরেজী প্রণালীর টুপি দেখিয়া
তাহারা মনে ভাবিল, গবর্ণমেন্ট এবার তাহাদের সকলকেই খ্রীষ্টীয়ধর্মে দীক্ষিত
করিবার কল্পনা করিয়াছেন । ইহার পর আর এক ধারণা আসিয়া তাহা-
দের পূর্বে আশঙ্কা দ্বিগুণ করিয়া তুলিল । তাহারা মনে ভাবিল, ঐ সকল টুপি
গভী ও শূকরের চর্মে নির্মিত হইয়াছে, সুতরাং উহা হিন্দু ও মুসলমান,
উভয়েরই তুল্যরূপ অস্পৃশ্য । ঋক্ষচ্ছেদন, কর্ণ-ভূষণ অপসারণ ও তিলক-
ব্যবহারের নিষেধে সিপাহিগণের গভীর আতঙ্ক ও গভীর সন্ত্রাস ক্রমেই
গভীরতর হইতে লাগিল । হিন্দু সিপাহিগণ যেমন তিলক ব্যবহারের
নিষেধে ক্রুদ্ধ ও অসন্তুষ্ট হইল, মুসলমান সিপাহিগণ ঋক্ষচ্ছেদন ও কর্ণ-
ভূষণের অপসারণে তেমনি বিরক্ত হইয়া উঠিল ।

এইরূপে উভয় শ্রেণীর সিপাহিগণই মনোবেদনায় অস্থির হইয়া
কোম্পানিরাজকে অনিষ্টকারী ও অব্যস্তিত বলিয়া মনে করে । ১৮০৬ অব্দের
বসন্ত কালে তাহারা পরস্পর আপনাদের জাতি ও ধর্ম-শাসনরক্ষা-সম্বন্ধীয়
কথোপকথনে প্রবৃত্ত হয় । এপ্রেল ও মে মাসে সিপাহিগণ অনেক অব-
কাশ পাইয়াছিল । ঐ সময়ে ইঙ্গরেজ আফিসরেরা আপন আপন সেনা-
দ্বিগকে কদাচিত্ত পরিদর্শন করিতেন, এবং কদাচিত্ত সৈন্য-শ্রেণীর প্যারেডে
উপস্থিত হইতেন । সুতরাং সিপাহিরা প্রায়ই নিঃস্বা থাকিয়া আমোদ-
আহ্লাদে মগ্ন হইত অথবা অভ্যাগত ব্রহ্মচারী ও ফকীরদের নিকটে নানা
প্রকার গল্প শুনিয়া, অবকাশ-কাল অতিবাহিত করিত । এইরূপ অবস্থায়
তাহারা প্রায়ই টুপিধারণ-প্রকৃতি বিষয়ের আন্দোলনে প্রবৃত্ত থাকিত,
প্রায়ই বাজারের গল্প ও ফকীরদের নিকটে ধর্ম-বিলোপের সংবাদ শুনিয়া,
সৈনিক বেশ পরিধান করিবে, তখন কেহই তিলক, ফোঁটা অথবা কর্ণভূষণ রাখিতে পারিবে
না । অধিকন্তু প্যারেডের সময়ে হন্দুদের কেশ চাঁচিয়া ফেলিতে হইবে । Comp. Kaye,
Sepoy War. Vol. I., 218 note.

অধিকতর শঙ্কাস্থিত ও সন্ত্রস্ত হইয়া উঠিত। সুতরাং দৈনন্দিন অবকাশ ও বৈষয়িক ব্যাপারে দৈনন্দিন অনাসক্তি তাহাদের অসন্তোষ, বিরাগ ও শত্রুবুদ্ধির উত্তেজনার প্রধান কারণ হইয়া উঠিয়াছিল।

কোম্পানির কার্যের সম্বন্ধে সিপাহিদিগের অনেক অভিযোগ বর্তমান ছিল। তাহারা যদি কায়মনোবাক্যে গবর্ণমেন্টের কার্য সাধন করিয়া সমস্ত জীবন অতিবাহিত করে, তাহা হইলেও সুবাদার অপেক্ষা উচ্চতর পদ তাহাদের অদৃষ্টে ঘটয়া উঠে না। এক সময়ে সিপাহিরা বিশ্বস্ততা ও সংকারণের বলে উচ্চ পদে অধিকৃত হইত, কিন্তু সে সময় শীঘ্রই অন্তর্হিত হয়। সিপাহি আফিসরেরা উন্নত না হইয়া প্রকৃত প্রস্তাবে অবনত হইয়া পড়ে। যে মর্যাদায় তাহারা আপন আপন দলে আধিপত্য করিয়াছিল, যে মর্যাদায় তাহারা অপরের নিকটে গৌরবাস্থিত থাকিত, এবং যে মর্যাদা তাহাদের আত্মদরের উদ্দীপক ছিল, ইঞ্জরেজদের ক্ষমতায় তাহাদের সে মর্যাদা বিনষ্ট হয়। তাহারা এক্ষণে আপন আপন দলে পূর্বতন গৌরবের ভগ্ন-প্রায় কঙ্কাল ও পূর্বতন সম্মানের বিলুপ্ত প্রায় ছায়া স্বরূপ অবস্থিতি করিত। সিপাহিরা যখন কার্যে নিযুক্ত থাকে, তখন ইঞ্জরেজ আফিসর দেখিলেই অস্ত্র সঞ্চালন দ্বারা তাহাদিগকে অভিবাদন করিয়া থাকে। কিন্তু এক জন ইঞ্জরেজ সৈন্য, সিপাহি আফিসরদিগের সমক্ষে একরূপ শিষ্টতার পরিচর দেয় না। তাহারা কোন প্রকার অভিবাদন না করিয়া, ইহাদের সম্মুখ দিয়া চলিয়া যায়। এইরূপ শীলতা-হানি কেবল ইউরোপীয় সৈন্যদিগের মধ্যেই দৃষ্ট হইয়া থাকে। প্যারেড-ভূমিতে ইঞ্জরেজ আফিসরেরা ভুলক্রমে অশুদ্ধ আদেশ-জ্ঞাপক বাক্য উচ্চারণ করেন, অথচ নির্দোষ সিপাহিদিগের স্বক্ষে ঐ দোষ-ভাব নিক্ষিপ্ত হয়। যে সকল সিপাহি আফিসর কোম্পানির কার্য করিয়া কেশ গুলু করিয়াছেন, তাহাদিগকেও সামান্ত ইউরোপীয় সৈনিকগণ নিন্দা বা বিক্রম করে। অভিযান-সময়ে সিপাহি আফিসরদিগকে বাধ্য হইয়া সামান্ত সৈনিকদিগের সহিত একত্র এক শিবিরে অবস্থিতি করিতে হইয়া থাকে। যদি তাহারা নিজ ব্যয়ে ঘোড়াকারোহণে গমন করেন, তাহা হইলেও ইঞ্জরেজ আফিসরদের হস্তে তাহাদের নিস্তার থাকে না। সিপাহিরা স্পষ্টাক্ষরে কহিয়া থাকে, নিজাম ও মারহাট্টা অধিপতিদের সিপাহিরা তাহাদের সুবাদার অপেক্ষা অনেক গুণে শ্রেষ্ঠ। অধিকন্তু ব্রিটিশ কোম্পানি কার্গ্যান্বেশে সিপাহিদিগকে অনেক দূর দেশে লইয়া যান। তাহারা এই

অজ্ঞাত, অদৃষ্ট পূর্বে ও অপরিচিত স্থানে যদি কালের করলশায়ী হয়, তাহা হইলে তাহাদের, স্ত্রী, পুত্র ও কণ্ঠাগণের ছুরবহুর অবধি থাকে না। তাহারা দারুণ দৈন্ত-গ্রস্ত হইয়া, ভিখারীর অবস্থায় পতিত হইয়া থাকে। ভারতের রাজারা কোন প্রদেশ অধিকার করিলে উৎকৃষ্ট সৈন্যদিগকে পুরস্কার স্বরূপ ভূমি দান করিয়া থাকেন; কিন্তু কোম্পানি উহার পরিবর্তে তাহাদিগকে কেবল মিষ্ট কথা দিয়াই শাস্ত করিয়া রাখে। ইউরোপীয় সম্রাট লোকের সহিসেরাও কোম্পানির সিপাহি অপেক্ষা অধিক বেতন পায়, এবং অধিক সূখে থাকে। সিপাহিরা অনেক সময়ে সামান্য পণ্ডর ছায় পদদলিত ও অবহেলিত হইয়া থাকে। একপও কথিত হইয়া থাকে যে, সৈন্যাদ্যক্ষ আর্থর ওয়েলেসলি তাঁহার আহত সিপাহিদিগকে গুলি করিয়া নির্দয়রূপে হত্যা করিতে অনুমতি দিয়াছিলেন।

সিপাহিদিগের এই অভিযোগ কাল্পনিক ঘটনার পরিপূর্ণ হইলেও উহার অভ্যন্তরে যে, অনেক সত্য গূঢ়ভাবে রহিয়াছে, তদ্বিষয়ে কোনও সংশয় নাই। কিন্তু বিরাগ ও অসন্তোষ সিপাহিরা দীর্ঘকাল সহ্য করিয়া আসিয়াছে, এবং দীর্ঘকাল উহা আপনাদের হৃদয়ে গোপন করিয়া রাখিয়াছে। এই হৃদয় নিহিত বিরাগ ও অসন্তোষের উদ্দীপনায় কোনও আকস্মিক বিপ্লব সজ্জিত হয় নাই। শেষে গোল টুপি পরিধানের আদেশ প্রচার হওয়াতে এবং ফোটা ও কর্ণ-ভূষণের অপসারণে তাহারা স্থির থাকিতে পারিল না। তাহারা ভাবিল, তাহাদের সম্মম নষ্ট ও জাতি নষ্ট হইবার সূত্রপাত হইয়াছে। তাহারা ভাবিল, ব্রিটিশ কোম্পানি তাহাদিগকে আপনাদের জাতিতে আপনাদের ধর্ম্মানুশাসনে আনিবার সঙ্কল্প করিয়াছেন; ইহার পর তাহারা ভাবিল, তাহাদের ভীষণ অন্ধকারময় নরক-যাতনার সময় নিকটবর্তী হইয়াছে। যে ভবিষ্য সূত্র, ভবিষ্য আমোদ ও ভবিষ্য তৃপ্তি তাহাদের সম্মুখে নয়নরঞ্জন দৃশ্য বিস্তার করিয়া রাখিয়াছিল, তাহা ক্রমে ক্রমে অস্তহিত হইতে লাগিল, এবং ঘোর অন্ধকারময় ভয়ঙ্কর বিভীষিকা তাহাদের সম্মুখে আগন্তুক কালের করাল মূর্তির ছায়া প্রস্ফারিত করিল। সে সন্তোষ, সে প্রীতি ও সে অমুরাগ অতীত সময়ের গর্ভে বিলোল হইল, তাহার পরিবর্তে, অসন্তোষ, বিরাগ ও শত্রু-বুদ্ধি তাহাদের হৃদয় কালীময় করিয়া তুলিল। তাহারা বুকিল, এক্ষণে তাহাদের জাতি ও সম্মম রক্ষা করিবার সময় উপস্থিত হইয়াছে। সূত্রাৎ তাহারা স্থির থাকিতে পারিল না, জীবন পর্য্যন্ত গণ করিয়া

আপনাদের বংশ-মর্যাদা রক্ষা করিতে উদ্যত হইল । একভাব হিন্দু ও মুসলমানদিগকে এক স্ত্রে সম্বন্ধ করিয়াছিল ; সুতরাং হিন্দু ও মুসলমান সিপাহি একপ্রাণ হইয়া আপনাদের শেষ প্রতিজ্ঞা রক্ষা করিতে দণ্ডায়মান হইল । এই অভূতখানের অধিনেতা ও শিক্ষাদাতাও দ্ববর্তী ছিলেন না । মহীশূরে মুসলমান রাজত্ব বিলুপ্ত হইয়াছিল, যে হায়দর আলির প্রতাপ এক সময়ে সমস্ত দক্ষিণাপথে বাপিয়া পড়িয়াছিল, তাহা বর্তমান সময়ে কেবল পূর্বস্মৃতিতেই প্রতিকলিত হইত । নিয়তিনেমিব নিদারুণ পরিবর্তনে ও সর্ব-সংহারক কালের আক্রমণে হায়দর বংশধরগণ সিংহাসন-ভ্রষ্ট হইয়া বিলোড়ের দুর্গে অবস্থিতি করিতেছিলেন । তাঁহাদের অধীনে বহুসংখ্য অর্থ ও বহুসংখ্য স্বঘর্ষাবলম্বী অনুচর ছিল । তাঁহারা এক্ষণে এই দুর্গের আলম্ববন্ধক সুখ-শয্যায় সমাসীন হইয়া বিনষ্ট রাজ্যের পুনরুদ্ধারের স্বপ্ন দেখিতে লাগিলেন । সিপাহিদিগের সাহায্য ব্যতীত এই সুখ-স্বপ্ন অপ্রতিহত রাখিতে তাঁহারা সমর্থ ছিলেন না । সুতরাং এই সিপাহিদিগকেই স্থান-ভ্রষ্ট করিবার কল্পনা হইতে লাগিল । সময় শুভকর ছিল, অবিলম্বে কার্য আরম্ভ হইল ।

এই কার্য অনায়াসে সম্পাদনীয় ছিল না । সিপাহিরা ইস্তরেজ আফিসরদিগের সহিত ঘনিষ্ঠতায় আবদ্ধ ছিল ।

১৮০৬ খৃঃ

কিন্তু বর্তমান সময়ে অনেক আফিসর দীর্ঘকাল ব্যাপী পরিশ্রম করিয়া, শাস্তি-সুখ লাভের আশায় শেষে পেন্সন গ্রহণ করিয়াছিলেন । ইহাদের স্থলে এক অদূরদর্শী সম্প্রদায় সিপাহিদিগের অধিনায়ক হইয়াছিলেন । ইহাদের সাহিত সৈন্যদিগের কোন রূপ ঘনিষ্ঠতা ছিল না, অনেক স্থলে ইহারা আপন আপন দলের সিপাহিদিগকেও চিনিয়া লইতে পারিতেন না । সুতরাং এই নূতন অসন্তোষের সময় নূতন আফিসরগণ সিপাহিদিগকে সুব্যবস্থিত বা স্নগ্ধ রাখিতে পারিলেন না । তাঁহারা প্যারেডের সময় সিপাহিদিগকে আগন্তুক বা অপরিচিত লোকের ছায় দেখিতেন, সিপাহিরাও আপনাদের অধিনায়কদিগকে আগন্তুক বা অপরিচিত বলিয়া মনে করিত । সেই জগ্গেই উল্লিখিত হইয়াছে, সময় শুভকর ছিল, অবিলম্বে কার্য আরম্ভ হইল ।

মে মাসের প্রথম সপ্তাহের শেষ ভাগে আডজুটান্ট জেনেরল আর্থু সাহেব সেন্টজর্জ দুর্গে থাকিয়া, স্বকর্তব্য কামা প্রায় শেষ করিয়াছেন, এমন সময়ে বিলোড়ের সিপাহিদিগের অস্তোষের সংবাদ তাঁহার নিকটে উপস্থিত

হইল। এক দল সৈন্ত ইহার মধ্যেই প্রকৃত্ত ভাবে শক্রতাচরণে সমুখিত হইয়াছিল। মাদ্রাজের সেনাপতি স্যার জন ক্রাডক নগরের নিকটবর্তী তাঁহার উদ্যান-বাটীতে গিয়াছিলেন; স্মৃতরাং আগ্নু কালবিলম্ব না করিয়া, তাঁহার সহিত সাক্ষাৎ করিতে গমন করিলেন। কিছু দিনের মধ্যেই ক্রাডক বেলোড়ে উপনীত হইলেন। এখানে আসিয়া যাত্রা দেখিলেন, তাহাতে আগ্নু যে সংবাদ তাঁহাকে জানাইয়াছিলেন, তাহার কিছুই অত্যুক্তি বোধ হইল না। এবিষয়ে সন্ধিবেচনা বা ধীরতার অসম্মান হইল না। ধীরভাবে ও সন্ধিবেচনা সহকারে যাত্রা করিতে হয়, যথাগাধ্য তাহার অনুষ্ঠান আরম্ভ হইল। যে সকল সৈন্ত শক্রতাচরণে প্রবৃত্ত হইয়াছিল, তাহাদিগকে মাদ্রাজে পাঠান হইল, অত্রান্ত সৈন্তদল আসিয়া তাহাদের স্থান পরিগ্রহ করিল। সৈনিক বিচারালয় সেনা-নিবেশের শাস্তি ও শৃঙ্খলা-বিধানে তৎপর হইলেন, দুই জন প্রধান বড়যন্ত্রকারীর প্রতি বেজা-ঘাত দণ্ড বিহিত হইল। কিন্তু উৎসাহে সংক্রামকতা-দোষ ভিরোহিত হইল না। ব্রিটিশ গবর্ণমেন্টের প্রতি বিদ্বেষবুদ্ধি ও বিরুদ্ধ ভাব ক্রমে সমস্ত সেনাদলে সংক্রান্ত হইয়া উঠিল।

এই সংক্রামক রোগ নিবারণে কোন রূপ চেষ্টা হয় নাই, কোন রূপ সতর্কতা ভবিষ্য আশঙ্কার উন্মূলন জন্ত অবলম্বিত হয় নাই। বেলোড় এক্ষণে শাস্তিপূর্ণ বলিয়া মনে করা হইয়াছিল। নিদারুণ শক্রভাব যে, অলক্ষ্য-ভাবে আপনার গতি প্রসারিত করিতেছে, তাহা কর্তৃপক্ষের কেহই বুঝিতে পারেন নাই, অথবা বুঝিতে পারিয়াও তাহার প্রতিবিধানার্থ মনোযোগ দেন নাই। সিপাহিগণ অনেকের মুখে আপনাদের ধর্মানাশের কারণ শুনিয়া, গবর্ণমেন্টের বিরুদ্ধে ক্রমেই উদ্ভিক্ত হইয়া উঠিতেছিল। বেলোড়ের ব্রিটিশ সৈন্ত রক্ষার জন্ত কোন রূপ কার্য্য হয় নাই, কোন রূপ চেষ্টা মহী-শুরের পদচূত স্থলতানের বংশধরদিগের সহিত সিপাহি সৈন্তের যোগাযোগ নিবারণে অবলম্বিত হয় নাই। স্মৃতরাং এই পদচূত রাজবংশীয়গণ অবাধে সিপাহিদিগের ধ্মায়মান বিল্লোমানল উদ্ধীপিত করিতে প্রয়াস পাইতে ছিলেন, এবং অবাধে ধর্মানাশ ও জাতিনাশের ভয় দেখাইয়া, তাহাদিগকে কোম্পানির বিরুদ্ধে অস্ত্র ধারণ করিতে পরামর্শ দিতেছিলেন। এদিকে অপরাপর লোকে গোলাকার টুপি দেখাইয়া, নির্দেশ করিতেছিল যে, শীঘ্রই সিপাহিগণ ফিরিঙ্গিদের ধর্মান্জাস্ত হইবে, এবং শীঘ্রই তাহার

জাতিভ্রষ্ট হইয়া পতিত হইয়া রহিবে। ক্রমে এই টুপি সকলকেই পরিতে হইবে, এবং ক্রমে সকল দেশই কিরিষ্টিদের ধর্মে নষ্ট হইয়া, যাইবে। হুর্নের অভ্যন্তরে ও হুর্নের বহির্ভাগে সর্বদা এইরূপ আন্দোলন ও এইরূপ কথোপকথন হইতে লাগিল। শেষে এই গোলাকার টুপি হিন্দু ও মুসলমান, উভয়েরই ধর্ম্মনাশের আশঙ্কায় হইয়া উভয়কেই শত্রুতাচরণে প্রবর্তিত করিল।

এই সমস্ত ঘটনা, এই সমস্ত আন্দোলন বেলোড়ের ইঞ্জরেজ আফিসরগণ অতি অল্প পরিমাণেই জানিতে পারিয়াছিলেন, এবং অতি অল্প পরিমাণেই উহার প্রতিবিধান জন্ত সতর্ক হইয়াছিলেন। তাঁহারা এবিষয়ে একরূপ অমনোযোগী ও একরূপ সতর্কতা-শূন্য ছিলেন যে, এক জন সিপাহি, সৈন্ত-দলের বিদ্রোহভাব ও শত্রুতাচরণ একজন ইঞ্জরেজ আফিসরের গোচর করাত্তে তাহাকে বাতুল বলিয়া লোহ শূন্যে আবদ্ধ করিয়া রাখা হইয়াছিল। সমস্ত সৈন্ত-দলের প্রতি এইরূপ কলঙ্কের কালিমা অর্পণ করাত্তে এতদ্দেশীয় আফিসরেরা, তাহাকে কঠোর দণ্ডের যোগ্য বলিয়া নির্দেশ করিয়াছিলেন। কিন্তু শেষে এমন সময় আসিল, যখন অনিষ্টের ভবিষ্যদ্বাণী সফল হইল। এই অনিষ্টের শিক্ষাদাতা গৌরবে উন্নত ও পুরস্কৃত হইল। এই ব্যক্তি প্রথমে ইঞ্জরেজদের বিরুদ্ধে, পরিশেষে স্বদলের বিরুদ্ধে ষড়যন্ত্র করাত্তে একরূপ স্মৃণিত ও অশ্রদ্ধেয় হইয়াছিল যে, তাহার নামোচ্চারণ ও ভারতীয় সৈন্তগণ নহাপাপ বলিয়া মনে করিত, এবং তাহার প্রতি যে অহুগ্রহ প্রদর্শিত হইয়াছে, তাহা সাতিশয় বিরাগ ও অশ্রদ্ধার মূল হইয়া উঠিয়াছিল। এই জন্ত সিপাহিগণ কহিত, “কোম্পানির ইঞ্জরেজ কর্ম্মচারিগণের প্রকৃতি এবং তাঁহাদের গবর্ণমেণ্টের ধর্ম্মই এই যে, তাহারা চোরকে স্তম্ভী করেন, এবং সাধু ব্যক্তিকে হুঃখে দগ্ধ করিয়া থাকেন * ।”

* হয়দরাবাদের সিপাহি সৈন্তদল আডজুটাণ্ট জেনেরল আণ্ড্রু নিকটে হিন্দুহানীতে একখানি পত্র প্রেরণ করে, তাহাতে লিখিত ছিল, বেলোড়ের ঘটনায়, মুস্তাফাবেগ নামক এক জন সিপাহির প্ররোচনায় সিপাহিরা প্রথমে ইঞ্জরেজদিগের বিরুদ্ধে অভ্যুত্থিত হইয়াছিল। রাজপুরুষগণ ইহাকেই সুবাদারের শ্রেণীতে আরোহিত করিয়াছিলেন, এবং সাধারণ ধনাগার হইতে বশ সহস্র প্যাগডা (ভারতবর্ষের একপ্রকার মুদ্রা) পুরস্কার দিয়াছিলেন। এই মুস্তাফাবেগই প্রথমে সিপাহিদিগকে বিদ্রোহ উপস্থিত করিতে ইঙ্গিত করে। শেষে কোম্পানি এই ব্যক্তির প্রতিই অহুগ্রহ দেখাইয়াছিলেন। Kaye, Sepoy War. Vol. I., p. 227, note.

১০ই জুলাই বিপক্ষদিগের একটি কুলা হঠাৎ ক্ষুটিত হইয়া উঠিল। এস্থলে স্মরণ করিতে হইবে যে, উহার পূর্ব দিন অপরাহ্নে বহুসংখ্যক লোক অস্বাভাবিক ও পদব্রজে গল্প এবং আমোদ করিতে করিতে দুর্গে গিয়াছিল, সেই দিন সিপাহিগণ ইঞ্জরেজদের বিরুদ্ধে অনেক কথা কহিতে আগ্রহ প্রকাশ করিয়াছিল, কিন্তু ষড়যন্ত্রকারিগণ শেষ কার্যসম্পাদনার্থ তখনও প্রস্তুত হইতে পারে নাই। উহার দুই কিংবা তিন দিবস পরে সিপাহিগণ প্রকৃত প্রস্তাবে ব্রিটিশ সৈন্তের বিরুদ্ধে অস্ত্র সঞ্চালন করে *।

এই সময়ে বেলোড় চারি দল মাত্র ইউরোপীয় সৈন্ত ছিল। গভীর নিশীথে ইহাদিগকে আক্রমণ করিয়া পর্য্যুদস্ত করা সিপাহিদিগের অসাধ্য ছিল না। দ্বিপ্রহর রাত্রির দুই ঘণ্টা পরে কার্য আরম্ভ হইল। যে যে সৈনিক পাহারা-কার্যে নিযুক্ত ছিল, বিরুদ্ধাচারী সিপাহিরা গুলি করিয়া, তাহাদিগকে বধ করিল, অস্ত্র সৈন্তগণও এইরূপে মৃত্যুমুখে পাতিত হইল। চিকিৎসালয়ে যে সমস্ত ইউরোপীয় ছিল, তাহারা নির্ধুর হত্যাকারীর হস্তে আত্ম-প্রাণ বিসর্জন করিল। এই ভয়ঙ্কর নিশীথে এক্ষণে অভূতপূর্ব ও অদৃষ্টচর বিপ্লব উপস্থিত হইল। গভীর রজনীতে বন্ধুকের আকস্মিক শব্দ শুনিয়া, অফিসরগণ সসম্মমে শয্যা হইতে উঠিয়া কারণ জানিবার উদ্দেশে গৃহবহির্ভূত হইলেন, কিন্তু তাহাদের অনেকের আর চৈতন্ত হইল না। উন্নত সিপাহিগণ গুলি করিয়া তাহাদিগকে একে একে ধরাশায়ী করিতে লাগিল। ইহাদের দুই কিংবা তিন জন কোন প্রকারে আত্ম-রক্ষা করিয়া, ইউরোপীয় সেনা-নিবাসে উপস্থিত হইলেন, এবং বাহারা নিদারুণ হত্যা কাণ্ড হইতে পরিত্রাণ পাইয়া-ছিল, তাহাদের পরিচালকত্বভার গ্রহণ করিয়া বিপক্ষদিগকে প্রতিরোধ করিতে চেষ্টা করিতে লাগিলেন। কিন্তু যুদ্ধোন্নত সিপাহিদিগের সংখ্যা

* এই সময়ে যে সমস্ত পত্রাদি লিখিত হয়, তাহাতে জানা যায়, ১৪ই তারিখ বেলোড়ের বিপ্লব সজ্জাটি হয়। বেলোড়ের বিপ্লবের কারণামুসন্ধান জন্ত যে সমিতি প্রতিষ্ঠিত হয়, তাহার অনুসন্ধান জানা যায় যে, মহীশূরের পতাকা প্রাসাদে উড়তীন করিতে প্রস্তুত করিবার ১৫ দিন পরে এই বিপ্লবের দিন স্থির হইয়াছিল। পক্ষান্তরে কথিত হইয়াছে, মেজর অর্মস্ট্রং বেলোড়ে কিছু কাল অনুপস্থিত ছিলেন। তিনি ১০ই তারিখ রাত্রিতে তথায় উপনীত হন, কিন্তু দুর্গের বহির্ভাগের লোকেরা তাহাকে দুর্গাভ্যন্তরে প্রবেশ করিতে নিষেধ করে, যেহেতু দুর্গে কোন রূপ আকস্মিক ঘটনা সজ্জাটি হইবার সুত্রপাত হইতেছিল। Kaye, Sepoy War. Vol. I. p. 228, note.

ক্রমেই বৃদ্ধি পাইতে লাগিল ; সুতরাং ইহাদের আক্রমণ হইতে আত্মরক্ষা করা ইউরোপীয়দিগের স্নাধ্য হইল না । এই বিপ্লব নিরবচ্ছিন্ন সিপাহিদিগের অভ্যুত্থান-মূলক হয় নাই । পুলিশের কক্ষচারিগণও সিপাহিদিগের বীর্ষ্যবলি উদ্দীপ্ত করিতেছিল । পদচ্যুত সুলতানদিগের অধ্যুষিত গৃহ হইতে পরিশ্রান্ত সিপাহিদিগের তৃপ্তিসাধনার্থ নানা প্রকার খাদ্য সামগ্রী প্রেরিত হইতে লাগিল, এবং তাহাদের একাগ্রতা ও শারীরিক তেজস্বিতা বিধানার্থ অনেক উৎসাহ-বাক্য ও অনেক পুরস্কারের প্রতিশ্রুতি বিজ্ঞাপিত হইল । টিপুসুলতানের তৃতীয় পুত্র স্বয়ং ঘটনা-স্থলে উপনীত হইয়া, সিপাহিদিগকে উৎসাহিত করিতে ক্রটি করিলেন না, তিনি নিজ হস্তে তাহাদিগকে তাহ্মূল দিতে লাগিলেন, এবং নিজ মুখে, মুসলমান বংশ পুনঃ প্রতিষ্ঠিত হইলে অনেক পুরস্কার দিবেন বলিয়া, অঙ্গীকাব করিলেন । যখন চারি দিকে এইরূপ ভয়ঙ্কর কাণ্ড সম্ভাটিত হইতেছিল, যখন উন্নত সৈন্যদলের ভয়ঙ্কর কলরব নৈশ গগনে বিস্তৃত হইয়া গভীর নিশীথের গভীর নিস্তন্ধতা ভঙ্গ করিতেছিল, যখন ঘাতকের উত্তোলিত অসির প্রহারে অথবা ঘাতকের প্রতিক্রিষ্ট গুলির আঘাতে, ইউরোপীয়দিগের জীবন-শ্রোত কালের অনন্ত শ্রোতে মিশিয়া যাইতেছিল, এবং যখন হুর্গের চতুর্দিক নরশোণিত-প্রবাহে রঞ্জিত হইতেছিল, তখন মুসলমান সৈন্যগণের উৎসাহ পূর্ণ বিকট “দিন দিন” শব্দের মধ্যে সুলতানের এক জন বিশ্বস্ত ভৃত্য মহীশূরের ব্যাঘ্রলাঙ্ঘিত পতাকা প্রাসাদ-প্রাচীরে স্থাপন করে । পদচ্যুত সুলতানগণ পুনর্বার আপনাদের পুরুবাধিগত পতাকা স্বদেশীয়গণের বিক্রমে ও সাহায্যে আপনাদের প্রাসাদোপরি উড্ডীন দেখিয়া আশ্চর্য হইলেন । এক্ষণে তাঁহারা ভাবিলেন, তাঁহাদের বিলুপ্ত বংশের গৌরব রক্ষা পাইল, ঘেতবায়ের পরাক্রম স্বদেশীয়দিগের পরাক্রমে পশুদস্ত হইয়া পড়িল, এবং আপনাদের আধিপত্য ও আপনাদের প্রভুশক্তি পুনর্বার অপ্রতিহত হইয়া উঠিল । উক্ত সিপাহিগণ প্রথমে হত্যা-কাণ্ডে মনোনিবেশ করে, শেষে সুলতানের লোকে আফ্লাদসহকারে বিলুপ্ত বংশভূবার সজ্জিত হইয়া, তাহাদের পথাসুবর্তী ও উৎসাহকারী হয় । কিয়ৎক্ষণ পরে সিপাহিরাও বিলুপ্ত মনোবোধী হয় । হুর্গে যে সমস্ত ইঙ্গরেজ মহিলা অবস্থিতি করিত-ছিলেন, তাঁহারা এই শোচনীয় ও ভয়ঙ্কর আক্রমণ হইতে পরিত্রাণ পাইলেন বটে, কিন্তু তাঁহাদের দেহ নিকৃষ্টতর কার্য সাধনের জন্ত করাল সংহার-

মুর্শির হস্ত হইতে রক্ষিত হইল। মুলতানের অমুচরগণ তাঁহাদিগকে হত্যা করিতে নিষেধ করিল, যেহেতু তাঁহার। পরিশেষে মুসলমানদিগেরঃ অন্তঃ-পুরের শোভাবর্দ্ধন করিতে পারিবেন * ।

যখন দুর্গের অভ্যন্তরে এইরূপ শোচনীয় কাণ্ডের অভিনয় হইতে-ছিল, যখন ইউরোপীয়গণ গভীর নিশীথে মৃত্যুমুখে পতিত হইতে-ছিলেন, তখন ব্রিটিশ জাতির হস্ত নিশ্চল হইয়া থাকে নাই, অথবা ব্রিটিশগণ আপনাদের ক্ষমতা অক্ষুণ্ণ রাখিতে চেষ্টা-হীন বা উৎসাহ-শূন্য হইয়া পড়েন নাই। মেজর কোট্‌স নামক ইঞ্জরেজ সৈন্যদলের এক জন আফিসর দুর্গের বহির্ভাগের কার্যে নিযুক্ত ছিলেন। দুর্গের অভ্যন্তরের কল-রথ ও বন্দুকের শব্দ তাঁহার শ্রুতি-প্রবিষ্ট হইল; তিনি আকস্মিক বিপ্লব ও আকস্মিক বিপদের বিষয় স্পষ্টরূপে বুঝিতে পারিলেন, এবং কাল বিলম্ব না করিয়া, এই সংবাদ জানাইতে অতি প্রত্যায়ে আর্কটের সেনা-নিবাসের অভিমুখে প্রস্থান করিলেন। আর্কটে এই সময়ে কর্ণেল জিলিস্পির অধীনে এক দল ব্রিটিশ সৈন্য ছিল, পূর্বাঙ্ক সাতটার সময় মেজর কোট্‌স বেলেডের নিদারুণ সংবাদ জানান, উহার পনের মিনিট পরে জিলিস্পি আপনার সৈন্যদলের কিয়দংশ লইয়া বেলেডের অভিমুখে প্রস্থান করেন। অবশিষ্ট সৈন্যগণ সজ্জিত হইয়া থাকে। কামানগুলি শীঘ্র শীঘ্র পাঠাইয়া দেওয়া হয়। এক দল ভারতবর্ষীয় অস্বারোহী সৈন্য ছিল, তাহারাও ভেড়ীর শব্দ শ্রবণে ইউরোপীয় সৈন্যের ত্রায় সত্বরতা ও ইউরো-পীয় সৈন্যের ত্রায় পটুতাসহকারে সজ্জিত ও ব্যবস্থিত হইয়া বেলেডের হতভাগ্য ইউরোপীয়দিগকে রক্ষা করিতে উন্মুখ হয়। এই সময়ে সর্ব প্রকার শৃঙ্খলা ও সর্ব প্রকার ব্যবস্থিততা যথাসাধ্য রক্ষিত হইল। অল্প বিলম্ব, অল্প বিশৃঙ্খলা অথবা অল্প ব্যবস্থিততা হইলেই সমূহ বিপদের সম্ভাবনা ছিল, সুতরাং জিলিস্পি বিশেষ সত্বরতার সহিত আপনার সৈন্যদল সমভি-বাগারে বেলেডের অভিমুখে যাত্রা করিলেন।

জিলিস্পি বেলেডের দুর্গ-প্রাচীরের নিকট উপস্থিত হইয়া দুর্গাভ্যন্তরে প্রবেশ করিবার উপায় দেখিতে লাগিলেন। দুর্গের বাহিরের রূপাট উন্মো-

* এই হত্যাকাণ্ডে ১৪ জন আফিসর এবং ২০ জন সৈন্য গতস্থ হয়। ইহা ভিন্ন আরও কয়েক জন আফিসর ও সৈন্য আহত হয়। এই শোচনীয় ব্যক্তিদিগের কয়েক জনের আঘাত সংঘাতিক হইয়া উঠে।

চিত ছিল, কিন্তু ভিতরের কপাট অবরুদ্ধ ও বিপক্ষদের অধিকৃত থাকাতে কামানের সাহায্য ব্যতীত গন্তব্য পথ বিমুক্ত করিবার সম্ভাবনা ছিল না। কামানও দ্রুতগতিতে আসিতেছিল। দুর্গের অভ্যন্তরে অনেকগুলি ইউরোপীয় ছিল, এক জন সূদক্ষ অধিনেতা থাকিলেই ইহাদের দ্বারা শত্রু পক্ষের আক্রমণ প্রতিরোধ করিতে পারা যাইত। সুতরাং যখন দুর্গ আক্রমণের চেষ্টা হইতেছিল, তখন জিলিম্পি একাকীই অভ্যন্তরে প্রবেশ করিবার সক্ষম করিলেন। সমুদ্রত দুর্গ-প্রাচীরে উঠিবার নিমিত্ত কোন রূপ অধিরোহণী ছিল না। অগত্যা দুর্গের সেনাগণ এক গাছি সূদৃঢ় রজ্জু উপর হইতে নামাইয়া দিল। জিলিম্পি ঐ রজ্জু ধরিয়া অক্ষতশরীরে ও ইউরোপীয় সৈনিকদিগের আনন্দ ধ্বনির মধ্যে প্রাচীরের উপর আরোহিত হইলেন। দুর্গ-প্রাচীরে উঠিয়াই জিলিম্পি সৈন্যাদ্যক্ষতা গ্রহণ করিলেন, এদিকে নিদ্রিষ্ট কামান গুলি আসিয়া উপস্থিত হইল, ইউরোপীয়গণ জিলিম্পির অধীনে শত্রুদের আক্রমণ নিরস্ত করিতে সজ্জিত হইল। সূদক্ষ অধিরোহণের পরাক্রমে, দুর্দর্ষ কামানের তীব্রবেগে জয়শ্রী অনায়াসেই জিলিম্পির হস্তগত হইল। অনেকে ব্রিটিশ সৈনিকদের অসির আঘাতে গতাসু হইল, এবং অনেকে ব্রিটিশ সিংহের দুর্বার পরাক্রম সহিতে না পারিয়া ইতস্ততঃ পলাইতে লাগিল। এতক্ষণে টিপুসুলতানের পুত্রদ্বয়ের সুখ-স্বপ্ন ভঙ্গ হইল। তাঁহারা বিজয়-গৌরবে স্কীত হইয়া, ব্রিটিশের পরাক্রম, কালের অতল সাগরে নিমজ্জিত হইল বলিয়া, ভাবিতেছিলেন, এক্ষণে সে ভাবনা দূরে অন্তর্দান করিল। প্রনষ্ট রাজ্য পুনর্বার পদানত হইল ভাবিয়া, তাঁহারা কন্ননার নেত্রে যে উৎসব-বেশ দেখিতে ছিলেন, তাহা অন্ধকারে মিশিয়া গেল। তাঁহারা এক্ষণে ইঙ্গরেজদের করুণার ভিখারী হইলেন। টিপুসুলতানের বংশধরগণ কর্ণেল মেরিয়টের অধীনে রক্ষিত ছিলেন। রক্ষাকর্তা মেরিয়টের অলুকাপ্যম তাঁহাদিগকে আর সামরিক বিধির অধীন হইয়া কোনরূপ গুরুতর দণ্ড গ্রহণ করিতে হইল না। টিপুসুলতানের পুত্রদ্বয় ব্রিটিশ সিংহের নিকট করুণা-প্রার্থী হইয়াছিলেন, এক্ষণে তাঁহারা সে করুণা হইতে বঞ্চিত হইলেন না*

* কে সাহেবের সংগৃহীত বিবরণ অবলম্বন করিয়া এই অংশ লিপিত হইল। উহার সহিত-প্রস্তাবিত বিষয় সম্বন্ধীয় অজ্ঞানা গ্রন্থোক্ত বিবরণের একতা লক্ষিত হইবে না। কথিত আছে, যে গাফিসর আর্কটে সংবাদ লইয়া যান, তিনি হৃবিস্তৃত দুর্গ-পরিখা সম্ভরণ দ্বারা গার হন। কিন্তু গবর্ণমেন্টের বাণদ্যগত্রে লিপিত আছে যে, মেজর কোটস দুর্গের বাহিরে

সিপাহিদিগের এই আকস্মিক অভ্যুত্থান দেখিয়া, গবর্নমেন্ট অনেক শিফা পাইলেন। গভীর নিশীথে অচিস্তনীয় বিপ্লব রাজপুরুষদিগের হৃদয়ে পূর্ব-সাবধানতার গভীর রেখাপাত করিল। যে সকল আদেশে সিপাহিদিগের আপত্তি থাকিতে পারে, গবর্নমেন্ট তৎসমুদয় রহিত করিবার কল্পনা করিলেন। কিন্তু ইহাতে এ আশঙ্কা একবারে নিবারিত হইল না, যে অনল সিপাহিদিগের হৃদয়ে প্রবেশিত হইয়াছিল, তাহা ইহাতেও নির্কাপিত হইল না। স্বর্ণিত টুপি সিপাহিদিগের সমক্ষে অনলে দগ্ধ করা যাইতে পারে, কর্ণ-ভূষণ প্রত্যর্পিত হইতে পারে, ললাট-দেশ তিলকরাজিতে পুনর্বার শোভা ধারণ করিতে পারে, তথাপি প্রকৃত শান্তির রাজ্য বহুদূর অন্তরে অবস্থিতি করিয়া থাকে। সিপাহিগণ সাধারণ্যে যে গভীর উত্তেজনায় অসি ধারণ পূর্বক ব্রিটিশ কোম্পানির বিরুদ্ধে দণ্ডায়মান হইয়াছিল, সে উত্তেজনা শীঘ্র শীঘ্র নিবারিত হইবার নহে। বেলোড়ের দুর্গে সুলতান-বংশের ব্যাজ-লাঙ্কিত পতাকার পরিবর্তে পুনর্বার ব্রিটিশ সিংহের বিজয়-বৈজয়ন্তীতে শোভা পাইতেছিল, তথাপি আর হই এক স্থানে উত্তেজিত সিপাহিগণ, ব্রিটিশ সিংহের ক্ষমতা পর্য্যুদস্ত করিতে চেষ্টা করিতে লাগিল। কেবল মহীশূরে ও কর্ণাটে সিপাহিগণ অসন্তুষ্ট হইয়া গবর্নমেন্টের বিরুদ্ধে উত্তেজিত হয় নাই; অত্যাচ্য স্থানেও ইহাদের অসন্তোষ গাঢ়তর হইয়া উঠিয়াছিল। হয়দরাবাদে সৈন্যগণ এরূপ অসন্তুষ্ট হয় যে, তথায় ভয়ানক আকস্মিক বিপ্লবের আশঙ্কা করা হইয়াছিল। কিন্তু নিজাম ও তাঁহার সূদক্ষ মন্ত্রী নীর আলম ইঙ্গরেজদের সহিত বন্ধুত্ব-স্বত্রে আবদ্ধ থাকিয়া, সৌহার্দ্যোচিত কার্য্য করিয়াছিলেন। যখন চারি দিকে সিপাহিদিগের গুপ্ত পরামর্শ চলিতেছিল, যখন ভারতের মানচিত্র হইতে ব্রিটিশ অধিকারের সমস্ত চিহ্ন বিলুপ্ত করাই সিপাহিদিগের এক মাত্র লক্ষ্য হইয়া উঠিয়াছিল, যখন ইঙ্গরেজ প্রভুত্বের বিলোপসাধন উদ্দেশ্যে সিপাহিগণ ব্যতিব্যস্ত হইয়া পড়িয়াছিল, তখন নিজাম ও তাঁহার মন্ত্রী পবিত্র বিশ্বাস ও পবিত্র সুহৃৎপ্রেম হইতে বিচলিত হয় নাই। হয়দরাবাদের লোকে নিজামকে ইঙ্গরেজদিগের ছিলেন। সাধারণতঃ উক্ত হইয়া থাকে, জিলিম্পি অধিরোহণী বা রজ্জুর সাহায্যে দুর্গের আঁচীরে উঠেন নাই। দুর্গস্থ সৈনিক পুরুষগণ আপনাদের কটবন্ধনী পরস্পর জড়াইয়া জিলিম্পিকে টানিয়া উপরে তুলে। কিন্তু কে সাহেব জিলিম্পির স্বাক্ষরিত পত্রপাঠে অবগত হইয়াছেন যে, জিলিম্পি রজ্জুর সাহায্যে উঠিয়াছিলেন। Kaye, Sepoy War, Vol. I, p. 135, note.

সপক্ষ দেখিয়া, হয়দরাবাদের মুসলমান-রাজ্যের বিরুদ্ধেও বড়বস্ত্র করিতে কুষ্ঠিত হয় নাই * ।

এই সার্বজনীন আশঙ্কা ও ভীতির সময়ে ছই একটি কঠোর নিয়ম প্রবর্তিত হইয়া সিপাহিদিগকে অধিকতর উদ্বিগ্ন করিয়া ছুলে । একেই সেনাগণ অসন্তুষ্ট ও বিরক্ত হইয়া উঠিয়াছিল, ইহার পর কর্ণেল মণ্টেসরের আবির্ভাবে ঘটনাক্রম অধিকতর সংঘাতিক হইয়া উঠে । মণ্টেসর সৈন্যাধ্যক্ষ হইয়া কতিপয় ঘৃণিত ও অশ্রদ্ধেয় নিয়ম প্রবর্তিত করিতে সক্ষুচিত হইলেন না । তিনি বাজারে টমটম বাজাইবার নিয়ম রহিত করিলেন । এই অচিন্ত্য-পূর্বক নিয়মের প্রবর্তনায় হিন্দু সিপাহিদিগের মর্মে আঘাত লাগিল । তাহারা মনে করিল, কোম্পানি উৎসবাদিতেও তাহাদিগকে বাদ্য বাজাইতে নিষেধ করিতেছেন । স্মতরাং যে আশঙ্কা তাহারা এত দিন হৃদয়ে পোষণ করিয়া আসিয়াছিল, তাহা দ্বিগুণ হইয়া উঠিল, হয়দরাবাদের প্রতি রাস্তাতে প্রতি গলিতে একই আশঙ্কা একই ভীতি বিরাজ করিতে লাগিল এবং সিপাহিদিগের প্রতি জনের হৃদয়ই এক সময়ে এক বিষে কালীময় হইয়া উঠিল ।

ভারতীয় সৈনিকদিগের বিদ্বেষ ভাব এরূপ প্রবল ছিল, এবং আশঙ্কিত বিপদ এরূপ ভয়ঙ্কর বলিয়া বোধ হইয়া ছিল যে, প্রাচীন সিপাহি-আফিসরেরা মণ্টেসরকে অশ্রদ্ধেয় ও ঘৃণিত নিয়ম গুলি রহিত করিতে আগ্রহাতিশয়ে অনুরোধ করিয়াছিলেন । কিন্তু সেনাপতি ইহাতে আদৌ সন্মত হন নাই ; পরিশেষে ষণন বেলোড়ের নিদারুণ হত্যাকাণ্ডের সংবাদ উপস্থিত হইল, তখন তিনি বুরিতে পারিলেন, এইরূপ কঠোর বিধি প্রচলিত রাখিলে নিশ্চয়ই সিপাহিগণ বিরক্ত ও উত্তেজিত হইয়া উঠিবে, এবং নিশ্চয়ই মাদ্রাজ গবর্নমেন্ট অসন্তুষ্ট হইবেন ! স্মতরাং তিনি পূর্ব আজ্ঞা রহিত করিবার আবশ্যকতা অনুভব করিলেন । কিন্তু ইহাতেও সিপাহিগণ সন্তুষ্ট হইল

* হয়দরাবাদের রেসিডেন্ট কাপ্টেন সিডেনহাম একদা লিখিয়াছিলেন যে, তিনি হয়দরাবাদে বিষস্ত সূত্রে অবগত হইয়াছেন, সিপাহিরা বিদ্রোহী হইয়া, আপনাদের আফিসরদিগকে হত্যা করিতে অশুরুক হইয়াছিল । শীর আলম ও অপরাপর ইঙ্গরেজ পক্ষীয় ব্যক্তিকে নিহত, এবং নিজামকে পদচ্যুত ও অবরুদ্ধ করিয়া ফেরিদুম জাকে দেওয়ান অথবা হয়দরাবাদের গদিতে আরোহিত কবিবার প্রস্তাব হয় । *Captain Thomas Sydenham to Mr. Edmonstons, M. S. Correspondence. Comp. Kaye, War, Vol. I, p. 235, note*

না। তাহারা একরূপ উদ্ভিক্ত হইয়া উঠিয়াছিল যে, প্যারেডের সময় আপনাদের টুপি অবজ্ঞা-সহকারে ভুতলে নিক্ষেপ করিতে সঙ্কুচিত হইল না। চারি দিকে অসন্তোষ, চারিদিকে আকস্মিক বিপ্লবের ভয়ঙ্করী মুক্তি বিরাজ করিতে লাগিল। শেষে প্রগাঢ় চেষ্টা ও সূশ্বালায় হৃদয়বান্দ এই বিপ্লবের হস্ত হইতে রক্ষা পাইল এবং বিদ্রোহোদ্ভূত সৈনিকগণ ইউরোপীয় ও ভারতীয় সিপাহির প্রহরিতায় মছলীপটনে প্রেরিত হইল।

কিন্তু শান্তির সুখময় রাজ্য ইহাতেও সর্বত্র প্রতিষ্ঠিত হইল না। মহীশূর রাজ্যের মধ্যবর্তী নন্দিহুর্গে সিপাহিদিগের অসন্তোষ ও বিরাগ স্পষ্ট প্রকাশ পাইতে লাগিল। নন্দিহুর্গে সৈন্য সংখ্যা বেশী ছিল না। কিন্তু এখানকার হুর্গ পর্বততোপরি নিশ্চিত বলিয়া সুদৃঢ় ও দুরতিক্রমণীয় ছিল। অধিকন্তু বাঙ্গালোর, এই স্থান হইতে এক দিনের পথ, সূতরাং যুদ্ধোন্মত্ত সৈন্যগণ অন্যায়সে বাঙ্গালোর হইতে এই স্থানে আসিতে পারিত। এই স্থানের সৈন্যগণ অক্টোবর মাসে ব্রিটিশ কোম্পানির বিরুদ্ধে সজ্জিত হইল। হিন্দু ও মুসলমান সিপাহিগণ একত্র হইয়া এক উদ্দেশ্য সাধনের জন্য পরস্পর ভ্রাতৃত্বাবে সন্ধন হইয়া উঠিল।

যে দিন তাহারা ব্রিটিশ গবর্ণমেন্টকে পর্যুদস্ত করিতে অভ্যর্থিত হইবে, যে দিন তাহারা ব্রিটিশ আফিসরদিগের শোণিতে আপনাদের অসি রঞ্জিত করিবে, সে দিন পূর্বেই স্থিরীকৃত হইয়াছিল। ১৮ই অক্টোবর এই নিদারুণ ঘটনার সূত্রপাত হইবে বলিয়া সকলে পরামর্শ করে। সিপাহিরা আপন আপন পরিবারদিগকে হুর্গের বাহিরে পাঠাইয়া আপনাদের শেষ প্রতিজ্ঞা পালন করিতে সজ্জীভূত হইতে লাগিল। ১৮ই অক্টোবর গভীর নিশীথে সিপাহিরা দলবদ্ধ হইয়া নিশ্চয়ই ইঞ্জরেজ আফিসরদিগকে আক্রমণ করিত, এবং নিশ্চয়ই করাল করবাল প্রহারে তাহাদিগকে অনন্ত নিদ্রায় অভিভূত করিয়া রাখিত। কিন্তু ভাগ্যক্রমে এই নিদারুণ শোণিত-স্রোতে পৃথীদেহ আর কলঙ্কিত হইল না। সেই দিন অপরাহ্ন আটটার সময় এক জন ইঞ্জরেজ আফিসর অশ্বারোহণে দ্রুতগতিতে সেনাপতির গৃহে উপনীত হইয়া তাঁহাকে ভবিষ্যৎ বিপদের সংবাদ জানাইলেন। অশ্বারোহী আফিসর এই সংবাদ বলিতে না বলিতেই, এক জন প্রসিদ্ধ ভারতীয় বৃদ্ধ আফিসর পূর্বের জ্ঞান দ্রুতগতিতে সেই সংবাদ লইয়া সেই স্থানে উপনীত হইলেন। সূতরাং এক্ষণে সন্দেহের কারণ রহিল না, এবং বিলম্বেরও অবকাশ রহিল।

না। বিশিষ্ট সত্তরতা সহকারে বাঙ্গালোরে সংবাদ প্রেরিত হইল। এদিকে ইউরোপীয় সৈনিকগণ, যে স্থানে থাকিলে আপনাদিগকে রক্ষা করিতে পারা যায়, সেই স্থানে শত্রুপক্ষের আক্রমণ নিরস্ত করিবার জন্ত সজ্জিত হইয়া রহিল। বিনা আক্রমণে বিনা বাধায় ভয়ঙ্করী রাত্রি প্রভাত হইল। রাত্রি প্রভাতে কর্ণেল ডেবিসের নিকটে এই সংবাদ উপস্থিত হইল, অপরাহ্ন তিনটার সময় তাঁহার সৈন্যদল নন্দীচূর্ণের নিকট সমবেত হইতে লাগিল।

নন্দীচূর্ণে আর কোনও গোলযোগ রহিল না। নবেম্বর মাস সমাগত হইল, কিন্তু এই নূতন মাসের সহিত নূতনবিধ অস্থবিধা ও নূতন-বিধ অশান্তির আবির্ভাব হইতে লাগিল। পালামকোটে মেজর ওয়েলস্ ও ছয় জন আফিসরের অধীনে এক দল সিপাহি সৈন্য ছিল। ইহাদের অনেকের আত্মীয় বেলোড়ের যুদ্ধে নিহত হইয়াছিল, এই নিদারুণ মর্শ্বেদনা তাহাদিগকে ব্রিটিশ কোম্পানির পরম শত্রু করিয়া তুলিয়াছিল। নবেম্বর মাসের শেষে মুসলমান সিপাহিগণ ইউরোপীয়দিগকে হত্যা করিবার ষড়যন্ত্র করিতে লাগিল, কিরূপে ব্রিটিশ আফিসরদিগের গৃহে অগ্নি দিবে, কিরূপে অগ্নিকাণ্ডের গোলযোগে সকলকে মৃত্যু-মুখে পাতিত করিবে, কিরূপে চূর্ণ আক্রমণ করিতে হইবে, কি রূপে চূর্ণোপরি আপনাদের পতকা উড্ডীন করিবে, তাহা স্থির করিতে বিলম্ব হইল না। এক জন মলবার-দেশীয় লোক ছদ্মবেশে এই সংবাদ লইয়া, ব্রিটিশ সেনাপতিকে জানায়। মেজর ওয়েলস্ সংবাদ প্রাপ্তি মাত্র এই বৈরভাব বিনষ্ট করিতে দৃঢ়প্রতিজ্ঞ হন। তাঁহার দৃঢ়প্রতিজ্ঞা ও কার্য-নৈপুণ্যে ষড়যন্ত্রকারিগণ নিরস্ত হয়। ইহার দুইদিন পরে তিরুনেলুবলী বিভাগের সৈন্যাধ্যক্ষ কর্ণেল ডাইস্ পালামকোটে উপস্থিত হইয়া হিন্দু সিপাহিদিগকে একত্র করেন এবং তাহাদিগকে ব্রিটিশ কোম্পানির পক্ষ সমর্থন করিতে আদেশ দেন। হিন্দু সিপাহিগণ সকলেই ব্রিটিশ পতাকার অধীনে কার্য করিতে দৃঢ়প্রতিজ্ঞ হয়, সকলেই অটল প্রভুক্তি ও অনমনীয় বিশ্বাস প্রদর্শন করিতে প্রাণ পর্য্যন্ত পণ করে। এইরূপ দৃঢ়তা ও কর্তব্যকুশলতায় পালামকোট নরকধিরের বিকাশক্ষেত্র হয় নাই। এইরূপে মাদ্রাজ প্রেসিডেন্সির প্রধান প্রধান সেনানিবাসেই ভারতীয় সৈন্যদিগের বিশ্ববানল প্রধুমিত হয়, স্থান-বিশেষে উহা প্রজ্জ্বলিত হইয়া উঠে এবং স্থান-বিশেষে উহা সাবধানতা ও সূক্ষ্মতার বলে ধূমমাত্রেরই পর্য্যবেশিত হইয়া যায়।

এই সমস্ত নির্দারূণ ঘটনার ছয় মাস পরে মাদ্রাজ গবর্নমেন্টের চৈতন্য হইল। তাঁহারা তখন স্পষ্টতঃ বুঝিতে পারিলেন, দেশীয় সৈন্তেরা আপনাদের ধর্মলোপ ও জাতি লোপের আশঙ্কায় বেরূপ উদ্ভিক্ত হইয়া উঠিয়াছে, তাহাতে তাহাদের অসন্তোষকর নিয়ম প্রচলিত রাখা বিধেয় নহে। সুতরাং পূর্বে সিপাহিদিগের ঘৃণিত ও অশ্রদ্ধেয় যে নিয়ম প্রবর্তিত হইয়াছিল, তৎসমুদয় তিরোহিত হইল। গবর্নমেন্ট সিপাহিদিগকেও স্নেহ ও প্রীতি-পূর্ণ ভাবে সম্বোধন করিয়া তাহাদের জাতি, ধর্ম ও অনুরাগ রক্ষা করিতে প্রতিশ্রুত হইলেন। ২রা ডিসেম্বর বেণ্টিকের অধিষ্ঠিত গবর্নমেন্ট আপনাদের মন্ত্রি-সভায় এক খানি ঘোষণা-পত্রের প্রণয়ন ও অনুমোদন করিলেন। পরবর্তী দিবসে উহা প্রচারিত হইল, এবং হিন্দুস্থানী তামিল ও তেলগু ভাষায় অনূবাদিত হইয়া প্রতিসৈনিক দলে প্রেরণ করা গেল। ঐ ঘোষণা-পত্রে অনেক কথা লিখিত ছিল, সম্ভ্রম-হানি ও ধর্মলোপের অমূল্য আশঙ্কার বিষয় সুপ্রণালীতে স্মৃষ্টি সহকারে লিপিবদ্ধ হইয়াছিল। গবর্নমেন্ট ঐ ঘোষণাপত্রে নির্দেশ করিয়াছিলেন যে, তাঁহারা সিপাহিদিগের প্রতি সর্বদা যেরূপ অনুকম্পা ও উদারতা দেখাইয়া আসিতেছেন, তাহাতে তাহাদের সুখ-সৌভাগ্যের হানি হইবে না। একরূপ অনুকম্পা ও সৌজন্ম পৃথিবীর অত্র কোন অংশের সৈন্তগণ অত্র কোন গবর্নমেন্ট হইতে লাভ করে নাই। তাহারা লরেন্স ও কুটের সময়ে যে সদাচরণে প্রসিদ্ধ হইয়াছিল, গবর্নমেন্টের এই উদারতা অবশ্যই তাহাদিগকে সেই সদাচরণে অনুরক্ত করিবে। যদি তাহারা এইরূপ সদাচার-সম্পন্ন না হয়, তাহা হইলে গবর্নমেন্ট তাহাদিগকে যথানিয়মে দণ্ডিত করিতে অবশ্যই প্রস্তুত হইবেন। গবর্নমেন্ট এইরূপ ঘোষণাপত্র প্রচার করিয়া সিপাহিদিগকে শান্ত ও সুব্যবস্থিত করিলেন। এ দিকে দণ্ডবিধির অক্ষুণ্ণ শক্তি হত্যাকারিদিগকে শাস্তি প্রদানে উন্মুখ হইল। যাহারা হত্যাপরাধে অভিযুক্ত হইয়াছিল, তাহাদের প্রাণ-দণ্ড এবং অপরাধ কয়েক জন পদচ্যুত হইল। এই স্থলেই দণ্ডবিধির কার্য শেষ হইল না। হোম গবর্নমেন্ট এই বিপ্লবে সান্ত্বন্য বিরক্ত হইয়া উঠিলেন, এবং মাদ্রাজের গবর্নর, প্রধান সেনাপতি আর্ড জুটান্ট জেনেরলকে অযোগ্য ও অব্যবস্থিত বিবেচনায় পদচ্যুত করিলেন।

এক বৎসরেই এই আকস্মিক বিপ্লবের শাস্তি হইল, এক বৎসরেই

ব্রিটিশ সিংহের অপ্রতিহত প্রতাপ পুনর্বার সমস্ত

১৮৮ অঙ্ক ।

দক্ষিণপথে সকলের ভীতি-স্থল হইয়া উঠিল । নূতন বৎসরে এক্ষণে নূতনবিধ তর্ক ও নূতনবিধ আন্দোলনের আবির্ভাব হইল । কি কারণে এই বিপ্লবের সূত্রপাত হইল ? কাহার দোষে এই বিপ্লব সঙ্ঘটিত হইয়া কধির-স্রোত প্রবাহিত হইল ? ইহা কি রাজনীতি-ঘটিত অভ্যুত্থান ? না বহিঃস্থ লোকের ষড়যন্ত্র ? নিদারুণ বিপ্লব ও তন্নিবন্ধন নিদারুণ হত্যাকাণ্ডের পর এই সকল প্রশ্ন উঠিল, রাজনীতিজ্ঞ ও সৈনিক প্রধানদিগের মস্তিষ্ক আন্দোলিত করিয়া তুলিল । রাজনীতিজ্ঞগণ, ইঙ্গরেজী প্রণালীর অনুযায়ী গোল টুপিই এই বিপ্লবের প্রধান কারণ বলিয়া নির্দেশ করিতে লাগিলেন । কিন্তু নৈনিক বিভাগের কর্মচারিগণের সমক্ষে ঐ কারণ সমীচীন বোধ হইল না । তাঁহারা এই বিপ্লবের রাজনীতির চাতুরী দেখিতে পাইলেন । তাঁহারা স্পষ্টাঙ্গরে নির্দেশ করিতে লাগিলেন, অনেক সিপাহি নূতন প্রণালীর টুপি দর্শনে আক্লাদ প্রকাশ করিয়াছিল, এবং অনেকে তাহা পরিধান করিতে উৎসুক হইয়াছিল । সুতরাং ঐ টুপির জন্ম সিপাহিগণ উত্তেজিত হইয়া ব্রিটিশ কোম্পানির বিরুদ্ধে অস্ত্র ধারণ করে নাই । টিপুসুলতানের পদচ্যুত সন্তানদিগের মন্ত্রণাই তাহাদিগকে ঐ বিপ্লবের উৎপাদনে প্রবর্তিত করিয়াছিল । যদি পদচ্যুত সুলতানগণ পরামর্শ দিয়া বেলাড়ের সিপাহিদিগকে ব্রিটিশ কোম্পানির বিরুদ্ধে উত্তেজিত না করিতেন, যদি সুলতানদিগের প্রতিশ্রুত পুরস্কারের লোভে সিপাহিগণ উৎসাহযুক্ত না হইত, যদি তাহাদের অল্পচরবর্গ আপনাদের প্রণীত গৌরবের উদ্ধারের আশা হৃদয়ে সম্প্রাষণ না করিত, তাহা হইলে কখনই ঈদৃশ নিদারুণ কাণ্ড সঙ্ঘটিত হইত না । এইরূপে রাজ্যশাসন বিভাগের এক এক সম্ভ্রদায় দক্ষিণাত্য সিপাহিদিগের অভ্যুত্থানের এক এক কারণ নির্দেশ করিয়াছিলেন । রাজনৈতিক ও সৈনিক বিভাগ উভয়ই স্ব স্ব দায়িত্ব হইতে আপনাদিগকে রক্ষা করিতে প্রয়াস পাইয়াছেন । একতর দল টুপির উল্লেখ করিয়া সামরিক নীতিতে দোষাণ্ড করিয়াছেন, অন্যতর দল রাজ্যহরণের উল্লেখ করিয়া, রাজনীতিতে কলঙ্কারোপ করিয়াছেন ।

কিন্তু তৃতীয় দল প্রস্তাবিত বিষয় সম্বন্ধে অল্প একটি বিশ্ময়কর কারণের নির্দেশ করিয়াছেন । ইহাদের মতানুসারে চারি দিকে খ্রীষ্টধর্ম-প্রচার ও খ্রীষ্টীয় ধর্ম-মন্দির স্থাপিত হওয়াতে সাধারণের হৃদয় আপনাদের সনাতন

ধর্ম-নাশের আশঙ্কায় সমস্ত হইয়া উঠিয়াছিল, এবং সাধারণে এজন্ম ক্রিটশ গবর্ণমেন্টকে অবজ্ঞার চক্ষে দেখিতেছিল। ইহার পর একটি অভূত-পূর্ব বিশ্বয়কর কিংবদন্তী প্রচারিত হইয়া সাধারণকে শঙ্কিত করিয়া তুলে। সাধারণে ভাবিয়াছিল যে, কোম্পানি বাজারের সমস্ত লবণ ক্রয় করিয়া, স্তূপে স্তূপে সজ্জিত করিয়া রাখিয়াছেন, উহার এক স্তূপে গোরক্ষ ও অশ্ব-তর স্তূপে শূকর-রক্ত দেওয়া হইয়াছে, সুতরাং এতদ্বারা হিন্দু ও মুসলমান, উভয়েরই জাতিপাত করিবার অভিসন্ধি হইতেছে। এইরূপ কিংবদন্তীতে বিশ্বাস স্থাপন করিয়া ও এইরূপে ধর্ম-হানির আশঙ্কায় উত্তেজিত হইয়াই দক্ষিণাপথের সিপাহিগণ ব্রিটিশ গবর্ণমেন্টের বিরুদ্ধে অস্ত্র ধারণ করে।

বেলোড়ের বিপ্লব সম্বন্ধে যে সমিতি প্রতিষ্ঠিত হয়, সেই সমিতি কয়েকটি কারণের উল্লেখ করেন। হোম গবর্ণমেন্ট ঐ সমস্ত কারণের অনুমোদন করিয়াছিলেন। ভারতীয় সৈন্যদিগের পরিচ্ছদ ও বেশের পরিবর্তনকেই ইহারা এই বিপ্লবের একটি প্রধান কারণ বলিয়া নির্দেশ করিয়াছেন। দ্বিতীয় কারণ, টিপুসুলতানের পুত্রদিগের বেলোড়ে অবস্থিতি। টিপুর সম্ভানগণ বেলোড়ে থাকতেই সিপাহিরা তাহাদের প্ররোচনায় আফিসরদিগকে হত্যা করিতে যত্নপর হইয়াছিল। কিন্তু লিডনহল স্ট্রীটের বণিক প্রভুগণ উহা অপেক্ষাও দূরতর কারণ নির্দেশে প্রবৃত্ত হইলেন। অব্যবহিত কারণ-পরম্পরা তাঁহাদিগকে সন্তুষ্ট রাখিতে পারিল না। ইষ্ট ইণ্ডিয়া কোম্পানির সভাপতিদ্বয় বোর্ড অব্ কর্পোরেশনের অধ্যক্ষকে এক খানি অভিজ্ঞতা-পূর্ণ পত্র লিখিয়া চমকিত করিয়া তুলেন। তাঁহারা একবাক্যে নির্দেশ করিলেন, ভারতবর্ষ-সংক্রান্ত অল্প জ্ঞানের, ভারতবর্ষীয় অধিবাসীদের সহিত অল্প ঘনিষ্ঠতার ও অল্প সহিষ্ণুতার লোকে এক্ষণে সামরিক ও রাজনৈতিক বিভাগের প্রধান প্রধান পদগুলি ক্রমে অধিকার করিয়া তুলিতেছেন। এইজন্ম ভারতীয় সৈনিকদল ব্রিটিশ গবর্ণমেন্টের প্রতি ক্রমশঃ বিশ্বাস-শূন্য হইয়া পড়িতেছে। অধিকন্তু লর্ড ওয়েলেস্লির রাজ্য-গ্রহণ নীতিতে মহীশূরের মুসলমান-বংশ ভিখারীর অবস্থায় পতিত হইয়াছেন, এজন্ম সাধারণেও গবর্ণমেন্টের সহিষ্ণুতা ও বিশ্বাসের সম্বন্ধে আস্থা-শূন্য হইয়া পড়িয়াছে; এবং সকল বিষয়েই ইঙ্গরেজী প্রাণী ও ইঙ্গরেজী মত প্রবর্তিত করিতে শাসক ও শাসিতদিগের মধ্যে ক্রমেই দূরতর সম্বন্ধ ঘটয়া উঠিয়াছে। এই জন্মই বিদ্বেষতা ও বিজিতের মধ্যে তাদৃশ দৃষ্টান্ত ও তাদৃশ ঘনিষ্ঠতার

সফার হইতেছে না, এবং এই জন্তই ভারতবর্ষীয়গণ অনেক সময়ে উল্লেখিত হইয়া, ব্রিটিশ গবর্ণমেন্টের বিরুদ্ধে অভ্যুত্থিত হইতে সক্ষম হইয়া না • ।

বেলোড়ের বিপ্লবের পরেও অত্যাচার অনেকগুলি ঘটনাবশতঃ ভারতীয় সৈন্যদল আপনাদের আফিসর হইতে অনেক পরিমাণে দূরতর হইয়া পড়ে । সিপাহিগণ ভবিষ্য সুখ ও ভবিষ্য সৌভাগ্য লক্ষ্য করিয়া, ব্রিটিশ কোম্পানির অধীনে কার্য-ভার গ্রহণ করিয়া থাকে । আশা ও বিশ্বাস, উভয়ই একত্র হইয়া তাহাদের সম্মুখে সুখ ও শান্তির নয়ন-রঞ্জন দৃশ্য বিস্তার করে । এই সুখ ও শান্তির সম্বন্ধে ইঙ্গলণ্ডের সৈনিকগণ অপেক্ষা আমাদের দেশের সৈনিকগণ অনেক দূর সৌভাগ্যশালী । ইঙ্গলণ্ডের অতি অল্প লোকেই ভাবি সুখ ও সৌভাগ্যের আশায় বুক বাঁধিয়া, সৈনিক বিভাগে প্রবিষ্ট হয়, এবং অতি অল্প লোকেই যুদ্ধ ব্যবসায় করিয়া, সম্মান ও মর্যাদা প্রাপ্তির আশা করিয়া থাকে । বাহারা নির্দ্বন্দ্ব, নিঃসহায় ও নিঃসম্বল হইয়া পড়ে, অথবা নিদারুণ দশাবিপর্ষায় বাহাদিগকে সামাজিক সংস্রব-শূন্য করিয়া তুলে, তাহারা প্রায় ইঙ্গলণ্ডের সেনাদল পরিপুষ্ট করিয়া থাকে । ইঙ্গলণ্ডের সেনাগণ কোনও সুখ, কোনও সৌভাগ্যের প্রত্যাশী হয় না, কোনও শাস্তি তাহাদের ভাবি জীবনকে মধুময় ভাবে পরিপূর্ণ করে না, এবং কোন আশা বা কোনও আশ্বাস তাহাদের সম্মুখে নেত্রভূষ্টিকর দৃশ্য প্রচারিত করিয়া রাখে না । সে সমাজ-বহির্ভূত হইয়া অপরের প্ররোচনায় সৈনিক কর্ম গ্রহণ করে, এবং অপরের প্ররোচনায় পার্থিব বন্ধন-শূন্য আত্মাকে সামরিক কার্যে সংবত রাখিতে যত্ন করিয়া থাকে । অল্প লোকেই তাহার সংবাদের জন্ত লালায়িত হয়, এবং অল্প লোকেই তাহাকে অভ্যর্থনা ও সমাদর করিতে উৎসুক হইয়া থাকে । সে এইরূপ আশা-শূন্য, সৌভাগ্য শূন্য ও সংস্রব-শূন্য হইয়া অস্তিত্ব মাত্রে পর্য্যবসিত হয়, এবং জীবিত থাকিয়াও এক প্রকার মৃতের স্থায় অবস্থিতি করে । আপনাদের কেহ মহারাণীর সৈনিকদলে প্রবিষ্ট হইলে ইঙ্গলণ্ডের অনেক পরিবার, তাহা তাদৃশ গৌরব-কর বা প্লাষাকর বিবেচনা করেন না, এবং ঐদৃশ জীবন্মৃত ও অস্তিত্ব মাত্রে পর্য্যবসিত ব্যক্তিদের সহিত তাহাদের তাদৃশ সমবেদনা থাকে না ।

* The Chairman and Deputy Chairman of the East India Company (Mr. Parry and Mr. Grant) to the President of the Board of Control (Mr. Dundas.)—*M. S. Records. Comp. Kaye, Sepoy War, Vol. I p. 251.*

কিন্তু আমাদের দেশীয় সৈনিক এরূপ জীবনমৃত নহে, কিংবা এরূপ সামাজিক সংস্রব শূন্য ও অস্তিত্বমাত্রে পর্য্যবসিত নহে। সে সৈনিকদলে প্রবিষ্ট হইয়াও স্বজাতি বা স্ববন্ধু হইতে বিচ্যুত হয় না, অথবা যুদ্ধব্যবসায় করিয়াও কোন প্রকার স্বত্বাধিকার হইতে বঞ্চিত হইয়া পড়ে না। সে সৈনিক হইয়াও আপনার গৌরবে আপনি উন্নত থাকে, এবং সমরক্ষেত্রে কোম্পানির পক্ষ সমর্থন করিয়াও সর্ব প্রকার সূখশান্তির অধিকারী হইয়া থাকে। সে সময়ে সময়ে আপনার বাটীতে আইসে, সময় সময়ে পারিবারিক সূখ সম্ভোগ করে, এবং সময়ে সময়ে আপনার বেতনের অধিকাংশ বাড়ীতে পাঠাইয়া থাকে। সিপাহিগণ যে, পুরুষানুক্রমে কোম্পানির লুন খাইয়া আসিয়াছে, ইহা তাহাদের একটি প্রধান গৌরবের বিষয়। তাহাদের ভৃত, বর্তমান ও ভবিষ্যৎ, সকল সময়েই স্বর্গীয় সৌন্দর্যে পরিপূর্ণ থাকে, এবং সকল সময়েই তাহাদিগকে উৎকৃষ্টতর কার্য, মহত্তর সাধনা সম্পাদন করিতে উত্তেজিত করিয়া থাকে। কোন বিকার, কোন অশান্তি, তাহাদের পূর্বস্বতিকে কলুষিত করে না, অথবা কোন অভাব, কোন অনাশ্বাস তাহাদিগকে বর্তমানে তীব্র হুঃখানলে বিদগ্ধ করে না, এবং ভবিষ্যতেও তাহার সৌভাগ্যের অন্তরায় হয় না। সিপাহিদিগের অনেকে যত্নপূর্বক কোম্পানির পক্ষ সমর্থন করিয়া, অস্তিমে শান্তিসূখ ভোগের আশায় পেন্সন গ্রহণ পূর্বক পরম প্রীতিসহকারে কালাতিপাত করিয়া থাকে। তাহারা আবাসপন্নীতে সূক্ষ্মর সুবিস্তৃত বটতরুরমূলে গোষ্ঠীবদ্ধ হইয়া আপনাদের ভৃতপূর্ব কাহিনী কীর্তনে প্রবৃত্ত হয়। লরেন্স, কুট, মিডো কি প্রকার যোদ্ধা ছিলেন, ফরাসিদিগের সহিত কি প্রকার সংগ্রাম হইয়াছিল, হুদর হালি ও তাঁহার পুত্র টিপুসুলতানের সহিত কি প্রকার দীর্ঘকালব্যাপী যুদ্ধ ঘটয়াছিল, তাহারা ইহাই আপনাদের আত্মীয়গণের সমক্ষে কীর্তন করিয়া অপার আনন্দ উপভোগ করে। আপনাদের কার্যক্ষেত্রে তাহার যেকোন প্রফুল্ল-চিত্ত ও উৎসাহবৃদ্ধ থাকে, কার্যের অবসান হইলেও আপনাদের পরিবারমধ্যে সেইরূপ উৎসাহ ও সেইরূপ শান্তি তাহাদিগকে অমৃত প্রবাহে অভিযুক্ত করে। কোন সিপাহি জীবনের মাধ্যম্নিন অবস্থায় বিদায় গ্রহণ পূর্বক গৃহে আগমন করে, এবং পূর্বের শ্রায় পরিবার-বদ্ধ হইয়া বড় লাটের ভ্রাতা ছোট ওয়েলেস্লি সাহেব (আর্থর ওয়েলেস্লি) অথবা লিক সাহেবের (লর্ড লেকের) বীরত্ব-

কাহিনী বিবৃত করিয়া আত্মীয়দিগকে পরিতৃপ্ত করিয়া থাকে । এইরূপ স্মৃতি, এইরূপ শাস্তি ও এইরূপ আমোদে সিপাহিদিগের অবকাশ-কাল অতি-বাহিত হয়, তাহারা আপনার আবাস-পল্লীতে এইরূপ গণনীয়, এইরূপ প্রদ্বয় ও এইরূপ মাননীয় হইয়া স্মৃতি কালান্তিপাত করে । তাহাদের অনেকেই ভূসম্পত্তি থাকে, এবং অনেকেই সেই সম্পত্তি নির্বিবাদে ভোগ করিয়া আপনার অবস্থায় সর্বদা হৃষ্টচিত্ত ও প্রফুল্ল থাকে । সামরিক বেশ ও সামরিক ব্যবসায় কোম্পানির সিপাহিদিগের গৌরব, আত্মাদর ও আত্মগর্ভের প্রধান পরিচয়-স্থল । যে সকল সম্প্রদায় হইতে সিপাহিরা সংগৃহীত ও শ্রেণীবদ্ধ হইয়া সৈনিকদল পরিপুষ্ট করে, সে সকল সম্প্রদায় সর্বোপরি তন প্রভূশক্তির সহিত সংস্কৃষ্ট বলিয়া, আপনাকে শত গুণে আত্মাদিত ও গৌরবাধিত বিবেচনা করে । কোম্পানির অধীনে সৈনিক কার্য আমাদের দেশীয় লোকদিগের পক্ষে একটি গৌরবকর ব্যবসায় । দেশের সাহস-সম্পন্ন ও বীর্যবন্ত পুরুষেরা সকলেই এই ব্যবসায় প্রবৃত্ত হইতে আগ্রহান্বিত হয়, এবং সকলেই ইহা হইতে বিচ্যুত হইলে আপনাদিগকে অপমানিত, অপদস্থ ও অনাশ্রয় বিবেচনা করিয়া থাকে ।

পূর্বতন ইঙ্গরেজ আফিসরেরাও সহৃদয় অমায়িক ও সিপাহিদিগের অহুরক্ত ছিলেন । তাঁহারা সিপাহিদিগকে স্বগোষ্ঠীর লোক বলিয়া মনে করিতেন, অনেক সময়ে অনেক স্থলে তাহাদিগকে নিকটে আহ্বান করিয়া তাহাদের নিকট বাজারের গল্প ও প্রাচীন সময়ের কথা শুনিতেন, এবং সকল সময়ে তাহাদের স্মৃতি সৌভাগ্য ও তাহাদের আমোদ আত্মাদ বর্দ্ধনে যত্নপর থাকিতেন । সিপাহিরাও আফিসরদিগকে আশ্রয়-দাতা, প্রতিপালক-কর্তা ও মঙ্গল-বিধাতা বলিয়া মনে করিত, এবং তাঁহাদের আদেশ প্রতিপালনে ও তাঁহাদের মত পরিপোষণে সন্তুষ্ট হইত । তাহারা আফিসরদিগকে আপনাদের শোকের সাস্তনাকর্তা ও অনিষ্টের প্রতিবিধান-কর্তা মনে করিত । ফলত আফিসরেরা দয়া, উদারতা ও সৌজন্যগুণে সর্বতোভাবে সিপাহিদিগের হৃদয় আকর্ষণ করিয়াছিলেন । সিপাহিরা তাঁহাদিগকে পিতৃস্থানীয় ভাবিত, এবং তাঁহাদের “বাবা লোক” অর্থাৎ পুত্রস্থানীয় বলিয়া পরিচিত হইলে স্মৃতি হইত ।

কিন্তু এসময় শীঘ্রই অন্তর্হিত হইল, শীঘ্রই এ সময়ের উদারতা সম-দর্শিতা ও সমবেদনা বিগত কালের শ্রোতে বিলীন হইল । প্রাচ্য ভূখণ্ডে

ব্রিটিশাধিকারের বৃদ্ধির সহিত স্থল-বিশেষে অধিনায়ক-সম্প্রদায়েরও অব্যব-
 হিতা, অসতর্কতা ও অনুদারতা বিকাশ পাইতে লাগিল। আফিসরদিগের
 পূর্ব ক্ষমতা ও পূর্ব প্রভুত্ব অনেকাংশে ন্যূন হইল, তাঁহারা এক্ষণে আড-
 জুটাণ্ট জেনেরলের হস্তের ক্রীড়া-পুত্তল হইয়া পড়িলেন। পূর্বে আফি-
 সরেরা আপনাদের লোকদিগকে দণ্ডিত করিতে পারিতেন, উন্নত করিতে
 পারিতেন, সজ্জিত করিতে পারিতেন, এবং স্মশিক্ত ও স্নব্যবস্থিত করিতে
 পারিতেন। যে আফিসরের সৈন্যদল প্রথমে বিজয়-ক্রীতে গৌরবান্বিত
 হইত, সেই আফিসরের নামানুসারেই সেই সেই সৈন্যদলের নাম হইত।
 ইহাতে সিপাহিরা বিরক্ত বা অসন্তুষ্ট হইত না। তাহারা অধিনায়কের
 নামানুসারে চিহ্নিত ও পরিচিত হইতে দেখিলে আপনাদিগকে গৌরবা-
 ন্বিত জ্ঞান করিত। শেষে ক্রমে ক্রমে রাজ-শক্তি উন্নতির সহিত আফি-
 সরদিগের হস্ত হইতে ক্ষমতা অপহৃত হইতে লাগিল। ক্রমে ক্রমে আফি-
 সরেরা আপনাদের সেনাদলে স্বল্পপরিচিত, স্বল্পমাত্র ও স্বল্প আদরের পাত্র
 হইয়া উঠিলেন, এবং ক্রমে ক্রমে তাঁহারা অস্তিত্ব মাত্রে পর্য্যবসিত হইয়া
 পড়িলেন। ক্ষমতার অভাবে, প্রভুশক্তির অভাবে আর আফিসরের
 আপন আপন দলে কর্তৃত্ব করিতে পারিলেন না। সিপাহিরাও আর
 তাঁহাদিগকে আপনাদের রক্ষাকর্তা প্রতিপালক-কর্তা বা মঙ্গল-বিধাতা
 বলিয়া জ্ঞান করিল না। আড্‌জুটাণ্ট জেনেরলের আফিস হইতে যাহা
 নির্দিষ্ট ও বিধিবদ্ধ হইয়া আসিত, আফিসরেরা তাহাতেই অবনত-মস্তক
 হইতেন, এবং তাহাই আপনার সেনাদলে প্রবর্তিত ও প্রচারিত করি-
 তেন। সিপাহিরা এতকাল আপন আপন আফিসরদিগকে আপনাদের
 সর্বপ্রকার সৌভাগ্যের কেন্দ্র স্বরূপ বলিয়া, যে ধারণা পোষণ করিয়া
 আসিতে ছিল, তাহা নূনতর হইয়া পড়িল। আফিসরেরাও সিপাহিদিগকে
 আপনার লোক বলিয়া বিবেচনা করিতে নিরস্ত হইলেন। স্মৃতরাং
 ঘনিষ্ঠতার পরিবর্তে উভয়ের মধ্যে দূরতা বর্দ্ধিত হইল, এবং সমবেদনা,
 ও সৌহারদের পরিবর্তে ঔদাসীন্য ও অগ্রণয় স্থান পরিগ্রহ করিল।

এই দূরতা, উদাসীনতা ও অসৌহারদের সহিত আফিসরদিগের বিলাস-
 প্রিয়তাও বৃদ্ধি পাইতে লাগিল। দ্রুতগতি-শীল বাষ্পীয় যান ইঞ্জলও ও
 ভারতবর্ষের দূরতা হ্রাস করিয়া দিয়াছিল। ইঞ্জরেজেরা যেমন শাসন-
 কার্যের উন্নতি করিতেছিলেন, তেমন আপনাদিগকেও উন্নত করিতে

বিশ্বৃত হন নাই। ভারতবর্ষ ক্রমে ইঙ্গলণ্ডের ক্রোড়শায়ী হওয়াতে ইঙ্গলণ্ডের বিলাসিতা ও ইঙ্গলণ্ডের সৌখীনতাব তরঙ্গ ভারতের উপকূলেও আঘাত আরম্ভ করিয়াছিল। ইঙ্গরেজী সংবাদ, ইঙ্গরেজী পুস্তক, ইহার উপর ইঙ্গরেজ-ললনারা ক্রতগতিতে ভারতবর্ষে আসিয়া উপস্থিত হইতে লাগিল। ইহাদের সংস্রবে আফিসরেরাও ভারতবর্ষীয় ভাব, ভারতবর্ষীয় আচার ও ভারতবর্ষীয় মনুষ্য হইতে দূরে অপসারিত হইতে লাগিলেন। আর সিপাহিদিগের গল্পশ্রবণে, সিপাহিদিগের শৃঙ্খলা-বিধানে ও সিপাহিদিগের উন্নতিসাধনে তাঁহাদের অনুরাগ বা মনোযোগ রহিল না। স্বদেশীয় পুস্তক তাঁহাদের একাগ্রতা আকর্ষণ করিল, স্বদেশীয় বিলাসিতা তাহাদের শরীরের প্রতি-স্বত্রে প্রসারিত হইল, এবং স্বদেশীয় ললনার সৌন্দর্য্য-গরিমায় তাঁহাদের সৌভাগ্যলক্ষ্মী গৌরবান্বিত হইয়া উঠিল। তাঁহারা এক্ষণে প্রকৃত প্রস্তাবে বৈদেশিক হইয়া উঠিলেন, এবং প্রকৃত প্রস্তাবে ভারতবর্ষীরদিগকে দূর-তর ভাবে দেখিতে লাগিলেন। যেসৌহাদ্দ ও সমবেদনা সিপাহিদিগকে তাঁহাদের সহিত আবদ্ধ করিয়া রাখিয়াছিল, তাহা ক্রমে বিচ্ছিন্ন হইতে লাগিল। কৃষ্ণকায় ও শ্বেতকায়ের পার্থক্য এক্ষণে উজ্জলরূপে সকলের সমক্ষে প্রতিভাসিত হইয়া উঠিল। ঈদৃশী সৌখীনতা ধীরে ধীরে ভারতে উপনীত হইল, অলক্ষ্য ভাবে গতি প্রসারিত করিল, মোহিনী শক্তির প্রভাবে বিজয়-লক্ষ্মী আয়ত্ত করিয়া তুলিল, এবং শেষে আপনার সর্ব্বতো-মুখী প্রভুতা বিস্তার করিয়া মোহের অন্ধকারে সকলকে আচ্ছন্ন করিয়া ফেলিল। পরিবর্তন-শীল সময়ের সহিত আফিসরদিগের পূর্ব ভাব, পূর্ব সজীবতা ও পূর্ব অনুভূতি এতদূর পরিবর্তিত হইয়া উঠিল যে, তাঁহারা আত্ম-বিশ্বৃত হইয়া বিলাসিতার স্রোতে দেহ ভাসাইয়া দিতে সঙ্কুচিত হইলেন না; এই স্রোত নিরুদ্ধ করিতে কোন রূপ চেষ্টা হইল না, কোন রূপ চেষ্টা বর্তমান সময়ে অতীতের ছায়া সমর্পণ করিতে অনুষ্ঠিত হইল না। প্রতীচ্য ভূখণ্ডের স্নন্দরীগণ প্রতীচ্য বিলাস ও প্রতীচ্য ভাবে মনোমোহিনী হইয়া, প্রাচ্য ভূখণ্ডের সৌন্দর্য্য-রাশ্ত্রে আধিপত্য বিস্তার করিতে লাগিলেন, এই সৌন্দর্য্য ও বিলাসের তরঙ্গে আফিসরদিগের হৃদয়ও আন্দোলিত হইয়া উঠিল। তাঁহারা ক্রমে ক্রমে সিপাহিগণের প্রাচ্য ভাব হইতে দূরবর্তী হইয়া পড়িলেন। স্মরণ্য তাঁহাদের সহিত সিপাহিদিগের পূর্বের স্মার ঘনিষ্ঠতা বা সহানুভূতি রহিল না।

আফিসর ও সিপাহিদিগের মধ্যে এইরূপ পার্থক্য জন্মিলেও তাহারা প্রকাশ্য ভাবে কোনরূপ শত্রুতাচরণে প্রবৃত্ত হয় নাই। ১৮২২-১৮৩৫ অব্দ। লর্ড আমহাষ্ট ও লর্ড উইলিয়ম বেণ্টিঙ্কের সময়ে তাহারা শান্তভাবে কর্তব্যপথে অগ্রসর হইতে থাকে। ১৮০৬ অব্দের ভয়ানক বিপ্লবের পর সিপাহিদিগের হৃদয় কোনরূপ অশান্তির উত্তেজনায় বিচলিত হইয়া উঠে নাই। তাহারা বিধস্তভাবে সাহস ও প্রভুভক্তি সহকারে কার্যক্ষেত্রে অবতীর্ণ হয়, এবং সাহস ও প্রভুভক্তি সহকারে যুদ্ধ করিয়া, লর্ড হেষ্টিংসের গবর্নমেন্টকে বিজয়ক্রীতে পরিশোভিত করে। কিন্তু যখন শান্তির রাজ্য পুনঃ প্রতিষ্ঠিত হয়, যখন সিপাহিগণ অবসর পাইয়া অদ্ভুত কিংবদন্তী ও গল্পশ্রবণে মনোনিবেশ করে, তখন তাহাদের হৃদয় পুনর্বার তরঙ্গায়িত হইয়া উঠে। ব্রিটিশ কোম্পানির অব্যবস্থিতার সম্বন্ধে সিপাহিদিগের যে সমস্ত অভিযোগ ছিল, তাহা এই সময়ে প্রবলতর হইয়া উঠে। মাদ্রাজ প্রেসিডেন্সি হইতে এবিষয়ের আর একটি দৃষ্টান্ত সংগৃহীত হইতেছে। ১৮২২ অব্দে বসন্তকালে আর্কটের সৈন্যদলের আবাস-ভূমিতে এক খণ্ড কাগজ প্রাপ্ত হওয়া যায়। এই কাগজে লিখিত ছিল যে, মহম্মদ ধর্মাবলম্বিগণ ইঙ্গরেজদিগের অধীন হইয়া অনেক কষ্ট সহ করিয়াছে। এইরূপ অধীন হওয়াতে তাহাদের প্রার্থনাও সর্বশক্তিমান ঈশ্বরের সমক্ষে অগ্রাহ হইতেছে। এজন্য তাহারা অনেকে বিসৃচিকায় আক্রান্ত হইয়া মৃত্যু-মুখে পতিত হইতেছে। ঈশ্বরের অভিসম্পাত তাহাদের উপর পতিত হইয়াছে। এক্ষণে তাহাদের ধর্মরক্ষার জন্ত সকলেরই প্রগাঢ়রূপে চেষ্টা করা কর্তব্য। আর্কটে ও দিল্লীতে অসংখ্য হিন্দু ও মুসলমান আছে। কিন্তু ইউরোপীয়ের সংখ্যা অতি অল্প মাত্র। ইহাদিগকে এক দিনেই বধ করা সহজ। হিন্দু ও মুসলমানগণ একতা স্বত্রে সম্বন্ধ হউক, নিশ্চয়ই ফল পাওয়া যাইবে। এক্ষণে আর সময় নষ্ট করা কর্তব্য নহে। ইঙ্গরেজেরা এই দেশের লোকদিগের নিকট হইতে সমস্ত জাইগীর ও ইন্ডান ভূমি গ্রহণ করিয়াছে। এক্ষণে ইহারা তাহাদিগকে বৈষয়িক কার্য হইতেও বঞ্চিত করিতে প্রবৃত্ত হইয়াছে। ইউরোপীয় সৈন্যদল এই দেশে আহৃত হইয়াছে, আর ছয় মাসের মধ্যেই ভারতীয় সৈন্যদিগকে নিরস্ত্র করা হইবে। অতএব একরূপ ব্যবস্থা হউক, বাহাতে প্রত্যেক দলের প্রাচীন স্বাধারগণ অশান্ত স্বাধার-

দিগকে পরামর্শ দিয়া সমস্ত ঠিক করিয়া রাখিতে পারে। সুবাদারেরা আবার জমাদারদিগকে পরামর্শ দিবে, এবং এইরূপে সমস্ত সৈন্তদল ক্রমে উপদিষ্ট হইয়া উঠিবে। বেলাড়, চিতোর, মাদ্রাজ এবং অন্যান্য স্থলে এইরূপ নিয়মানুসারে কার্য হইলে সমস্ত সৈন্তদিগকে ইঙ্গিত করা হইবে, যেন তাহারা সকলে এক দিনেই সমুখিত হইতে পারে। ১৭ই মার্চ রবিবার এই সমুখানের দিন ঠিক হইল। এই ১৭ই মার্চ নিশীথকালে এক জন নায়ক ও দশজন সিপাহি এক এক জন ইউরোপীয়ের গৃহে যাইবে, এবং অবলীলায় ও অসঙ্কোচে শয্যাতেই তাহাদিগকে হত্যা করিবে। এই কার্য শেষ হইলে ভারতীয় আফিসরগণ সৈন্তদলের অধিনায়কতা গ্রহণ করিবেন, এবং সুবাদারেরা কর্ণেলের বেতন পাইবেন।

কোন ব্যক্তি হইতে এই অদ্ভুত ও ভয়ঙ্কর লিপির উদ্ভব হইয়াছিল, কোন ব্যক্তি এইরূপে সমুদয় সৈন্তদিগের হৃদয় বিবাক্ত করিতে প্রয়াস পাইয়াছিল, তাহা জানা যায় নাই। এ সম্বন্ধে সমুদয় অনুসন্ধান নিফল হইয়াছে। উহা ছয়গণিত অম্বারোহি-দলের লাইনে কুড়াইয়া পাওয়া গিয়াছিল। উহার অল্পরূপ আর এক খানি লিপিও আট গণিত সেনাদলের লাইনে পাওয়া যায়। প্রাপ্তিমাত্র ঐ উভয় লিপিই সেই টেসনের সৈন্তাধ্যক্ষের নিকট উপস্থাপিত হইল। কর্ণেল ফাউলিস্ এ সম্বন্ধে উৎসাহ, একাগ্রতা ও যত্ন সহকারে কার্য করিতে ক্রটি করিলেন না। তিনি প্রত্যেক রেজিমেন্টের অধিনায়কদিগকে একত্র করিলেন, তাহাদিগকে কাগজের লিখিত বিষয় জানাইলেন, এবং তাঁহারা যে সকল ভারতীয় আফিসরদিগকে অধিক বিশ্বাস করেন, তাঁহাদের সহিতও এ বিষয়ে পরামর্শ করিতে অনু-রোধ করিলেন। এই কার্য শেষ হইলে, কাগজে যে সমস্ত সেনানিবেশের নাম ছিল, তাহার অধ্যক্ষদিগকেও এ বিষয় জানান হইল। কিন্তু তাঁহারা কোন রূপ অসন্তোষের চিহ্ন দেখিতে পাইলেন না। নির্দারিত দিবস নিরু-দ্বেষ্টে অতিবাহিত হইল। কোন রূপ অসন্তোষ বা কোন রূপ বিরাগ সাধা-রণ শাস্তির ব্যাঘাত জন্মাইল না। এই ভয়ঙ্কর যড়যন্ত্র ও এই ভয়ঙ্কর অভ্যুত্থান কেবল লিপি-মাত্রেরই পর্য্যবসিত হইয়া গেল।

কিন্তু অধিক দিন এইরূপ নিরুদ্বেষ্টে অতিবাহিত হইল না, অধিক দিন এইরূপ নিরুদ্বেষ্ট শাসন-সংক্রান্ত কর্তৃপক্ষদিগকে নিঃশঙ্ক ও নিভয় করিয়া রাখিতে পারিল না। উল্লিখিত লিপি প্রাপ্ত হইবার কিছু দিন পরেই ডাকে

আমর এক খানি হিন্দুস্থানী পত্র মাদ্রাজের গবর্ণর ছাৰ্ তমাস্ মনরোর হস্তগত হইল। পত্রের ভাবে এইরূপ বুঝা গিয়াছিল যে, উহা সিপাহি সৈন্তের প্রধান প্রধান অফিসরদিগের নিকট হইতে আসিয়াছিল। উহাতে সাধারণতঃ ভারতীয় সৈন্তদলের আত্ম-বেদনা লিপিবদ্ধ ছিল। এই আত্ম-বেদনা ও এই অভিযোগ গুলি এই ; “সমস্ত অর্থ, সমস্ত সম্মানই খেতকায় সর্দার বিশেষতঃ সিবিলকম্পচারীদিগের হস্তগত হইতেছে, পক্ষান্তরে পরিশ্রম ও কষ্ট বাতীত আর কিছুই ভারতীয় সেনাগণের অদৃষ্টে ঘটনা উঠিতেছে না। যদি তাহারা তরবারির বলে কোন দেশ অধিকার করে, তাহা হইলে ঐ সকল বেস্তাপুত্র কাপুরুষ সিবিল সর্দারেরা সেই দেশে প্রবিষ্ট হয়, সেই দেশ শাসন করে, এবং কিছু কালের মধ্যেই ধনরাশিতে আপনাদের কোষাগার পূর্ণ করিয়া ইউরোপে প্রস্থান-পর হয়। কিন্তু যদি এক জন সিপাহি সমস্ত জীবন পরিশ্রম করে, তাহা হইলেও সে পাঁচ কড়ার বেশি পায় না। মুসলমানদিগের শাসন-সময়ে এবিষয়ে অনেক বিভিন্নতা ছিল। যেহেতু, যখন জয়লাভ হইত, তখন জাইগীর এবং প্রধান প্রধান পদ সৈন্তদিগকে দেওয়া হইত। কিন্তু কোম্পানির শাসন-কালে সকল বিষয়ই কেবল সিবিল কম্পচারীদিগকে দেওয়া হইয়া থাকে। এক জন কলেজের চাপরাশী দেশে যেমন ক্ষমতা ও প্রভুত্ব দেখায়, তাহা বলিবার নহে। কিন্তু এই চাপরাশী কখনও সৈন্তের ন্যায় যুদ্ধ করে না।” এই পত্র এক জনের উদ্ভাবনায় অথবা এক জন কতৃক লিখিত হইতে পারে। এক জনে এইরূপ আপনার হুঃসহ মনো-বেদনা প্রদেশাধিপতির নিকট জানাইতে অগ্রসর হইতে পারে। কিন্তু ঐ হুই খানি পত্রের যেরূপ ভাব, যেরূপ ধারণা ও যেরূপ অভিপ্রায় পরিবর্তিত হইয়াছে, তাহা সকল সময়ে সকল সিপাহিদিগেরই হৃদয় নিহিত কথা। এই অভিযোগ ও এই বিকার চিরকাল তাহাদের অন্তরে জাগরুক ছিল, এবং চিরকাল উহা তাহাদের মধ্যে মধ্যে আঘাত করিতেছিল। পরিশেষে উহা আর স্বল্প-পরিসর হৃদয়ে সঞ্ছ থাকিতে পারিল না, উদ্বেলিত হইয়া বাহিরে প্রকাশিত হইল।

ইহার পর সময়ে সময়ে কয়েকটি নিয়ম প্রণীত ও প্রচারিত হইয়া স্থল-বিশেষে সৈন্ত-সমষ্টির শৃঙ্খলা-বিধানের প্রতিকূলতা সাধন করে। কিন্তু উহাতে সাধারণ শাস্তির কোনও ব্যাঘাত হয় নাই, অথবা কোন বিপ্লব সম্ভব হইয়া কোম্পানির গবর্ণমেন্টকে বিপদাপন্ন করে নাই। এক সময়ে

লর্ড ইউলিয়াম বেণ্টিঙ্কে একটি অসন্তোষকর কার্যে হস্তার্পণ করিতে হয়। ডিরেক্টর সভা, সৈনিক কর্মচারিদিগের বাটা কমাইবার প্রস্তাব করেন। বেণ্টিঙ্ক এই প্রস্তাবানুসারে কার্য করিতে বাধ্য হন। ইহাতে সৈনিকগণ সাতিশয় অসন্তোষ প্রকাশ করে, এবং ঐজন্ম চারি দিকে মহাগোলযোগ বাধিয়া যায়। কিন্তু এই অসন্তোষ ও গোলযোগ দীর্ঘকাল স্থায়ী হয় নাই। এই সময়ে সংবাদপত্র সমূহ স্বাধীনভাবে কার্য করিতেছিল। সংবাদ পত্রের স্বাধীনতার অনেকে স্বাধীন ভাবে আপনাদের মতামত প্রকাশ করিতে উদ্যত হয়। অর্ধ বাটার সঙ্কে সৈনিকদের যে অভিযোগ ছিল, তাহা সংবাদ পত্রের স্তম্ভে ক্রমে প্রকাশ পাইতে থাকে। স্বাধীন সংবাদপত্র অসন্তোষ নিবারণের একটি প্রধান উপায়। হৃদয় যে অসন্তোষে পূর্ণ থাকে, কালীর সহিতই ক্রমে তাহা বাহির হইয়া হৃদয়কে শান্ত ও সন্তুষ্ট করিয়া তুলে। এই অসন্তোষ আর সতেজে প্রকাশ পাইয়া কোন রূপ বিপ্লবের কারণ হয় না। বেণ্টিঙ্কের সময়ে অর্ধ বাটার নিয়ম প্রচলিত হওয়াতে সৈনিক কর্মচারিগণ সংবাদপত্র সমূহেই আপনাদের মর্ষবেদনা জানাইয়া নিরস্ত হন।

এইরূপে সৈনিক কর্মচারিগণের সমস্ত বিরাগ ও অসন্তোষ ক্রমে মন্দীভূত হইয়া আসিল। ক্রমে সিপাহিরা শান্তির রাজ্যে শান্তভাবে আপনাদের কর্তব্য কার্য সম্পাদনে মনোনিবেশ করিল। কিন্তু রাজ্যশাসন-চক্রের পরিবর্তনে সিপাহিদিগের মানসিক শান্তি ও প্রীতি চিরস্থায়ী হইল না। পরিবর্তনশীল রাজনীতির সঙ্গে সঙ্গে তাহাদের সুখ শান্তির আশাও পরিবর্তিত হইতে লাগিল। আফগানিস্তানের যুদ্ধে সিপাহিরা বিশিষ্ট সাহস ও দৃঢ়তাসহকারে ব্রিটিশ গবর্নমেন্টের পক্ষস মর্থন করে। তাহারা সেনাপতি পলকের অধীনে আপনাদের কৃতকার্যতার সবিশেষ পরিচয় দিয়াছিল, এবং নটের অধীনেও আপনাদের বীরত্ব, সাহস ও পরাক্রমের এক শেষ দেখাইয়াছিল। যখন এই সুদৃশ্য, সুসজ্জিত ও পরাক্রান্ত সৈন্যদল আফগানিস্তানের গিরি-গহ্বর হইতে প্রত্যাবৃত্ত হইতেছিল, তখন সিদ্ধুর আর্মীরের সহিত যুদ্ধ বাধিয়া উঠে। সিপাহিরা অকুতোভয়ে, অটলসাহসে ভীষণ-মুক্তি, ভীম-পরাক্রম বেলুচীদিগের সহিত সমরক্ষেত্রে অবতীর্ণ হইয়াছিল, প্রধান সেনাপতি স্কাব্‌চার্লস্‌ মপিয়ায় তাহাদিগের এইরূপ উৎসাহ, বীরত্ব ও বিক্রম দেখিয়া প্রশংসাবাদে তাহাদিগকে শত গুণে মহীয়ান করিয়া তুলিয়াছিলেন।

এক্ষণে সিপাহিদিগকে আবার আর একটি যুদ্ধে প্রবৃত্ত হইতে হইল । কিন্তু ইহাতে তাহাদিগের চিরাভ্যস্ত সহিষ্ণুতা বা চিরাভ্যস্ত পরাক্রম স্থলিত হইল না । তাহারা পূর্বের স্তায় সাহসের সহিত মহারাজপুরের ক্ষেত্রে অবতরণ করিল, এবং পূর্বের স্তায় পরাক্রমের সহিত সুসজ্জিত অরাতিদলের সহিত যুদ্ধে প্রবৃত্ত হইল । অনতিবিলম্বে শান্তির রাজ্য পুনঃ প্রতিষ্ঠিত হইল । চিরপ্রদীপ্ত সমরানল ক্রমে নির্ঝাপিত হইয়া গেল । কিন্তু এই শান্তির সহিতই আবার নূতন বিপদের উদ্ভব হইল । সিন্ধু ব্রিটিশ রাজ্যের একটি অংশ হইয়াছিল, ব্রিটিশ পাতাকা সিন্ধুর সমতল-ক্ষেত্রে শোভা বিকাশ করিয়াছিল । যে সিপাহিরা এই বিজয়-শ্রী ও এই রাজ্য হস্তগত করিতে প্রধান সহায় হইয়া ছিল, তাহারা এই এক্ষণে বিজিত রাজ্যরূপে অসম্মতি প্রকাশ করিল ।

ভারতে ব্রিটিশাধিকার যে সমস্ত রাজ্যে পরিপুষ্ট হইয়াছে, ব্রিটিশ বিজয়-পতাকা যে সমস্ত রাজ্যে একে একে পরিবর্তনশীল কালের অনন্ত মহিনা প্রকাশ করিয়াছে, সেই সমস্ত রাজ্যাধিকারের ফলের সহিত সিপাহি সৈন্ত-দলের অব্যবস্থিততা ও বিশৃঙ্খলার আবির্ভাব অমুখ্যত রহিয়াছে । রাজ্যাধিকারের সঙ্গে সঙ্গে ব্রিটিশ গবর্ণমেণ্টের অরাতির সংখ্যাও ন্যূন হইয়া আইসে ; এই ন্যূনতার সঙ্গে সঙ্গে বহুসংখ্য সৈন্ত রাধিবার প্রয়োজনও অল্পতর হইয়া উঠে । সৈন্তগণের বিশ্বাস ও ভক্তির উপরে সাম্রাজ্যের স্থায়িত্ব সম্পূর্ণরূপে নির্ভর করিতেছে । শত্রুসংখ্যা ন্যূন হইলে এবং রাজ্যাধিকারের আধিক্য সাধন করিলে, সৈন্তগণ যুদ্ধ-ব্যবসায় হইতে একরূপ বিরত হইয়া পড়ে । সুতরাং যে উচ্চ আশায় তাহারা কোম্পানির সৈনিকদলে প্রবেশ করে, যে উচ্চ আশা তাহাদের হৃদয়-নিহিত ভাবনিচয়কে মহীয়ান্ করিয়া তুলে, তাহা ক্রমেই বিলোপ-দশা প্রাপ্ত হইতে থাকে । অধিকন্তু রাজ্যাধিকারের সঙ্গে সঙ্গে সিপাহিদিগের কষ্ট ও অসুবিধা বর্দ্ধিত হয় । তাহারা বহুদূর-দেশে, অজ্ঞাত ও অপরিচিত স্থানে কেবল পুলিশের স্তায় প্রহরিতায় নিযুক্ত থাকে । এই প্রকার কার্য্য পরিশেষে তাগদের অসুখ ও অশান্তির প্রধান কারণ হইয়া উঠে । ইহার পরেখন তাহাদের বাটা কমাইবার প্রস্তাব হয়, তখন তাহারা রাজ্যাধিকারের সাতিশয় বিরোধী হইয়া উঠে । কোম্পানির সিপাহিগণ সীমান্ত-বিভাগে অথবা পররাষ্ট্রে থাকিলে যে অতিরিক্ত বেতন পাইত, কোম্পানির অধিকার প্রসারিত হইলে, সেই বেতন ন্যূনতর হয় । সুতরাং তাহারা যে কার্য্য করিয়া পুরস্কারের প্রত্যাশা করিত, সেই

কার্যের বিনিময়ে তাহারা এক্ষণে আপনাদের বেতনের অংশ হইতে বিচ্যুত হইয়া পড়ে । এই জন্ত সিপাহিরা রাজ্যাধিকারের সাতিশয় বিরোধী, এবং এই জন্ত তাহারা দূরবর্তী নবাধিকৃত রাজ্যে কার্য করিতে সাতিশয় অসম্মত ।

রাজ্যাধিকার ও তন্নিবন্ধন সিপাহিদিগের মনোগত ভাবের সম্বন্ধে যে সকল বিষয় উল্লিখিত হইল, তাহা সিদ্ধ অধিকারের পর পরিস্ফুট হয় । এস্থলে ইহার একটি দৃষ্টান্ত সংগৃহীত হইতেছে । ১৮৪৪ অব্দের ফেব্রুয়ারি মাসে গবর্নরজেনেরল লর্ড এলেনবরা ভারতবর্ষের উত্তরাঞ্চলে অবস্থিতি করিতেছিলেন । এই সময়ে তিনি ৩৪ গণিত সিপাহিদলের অসন্তোষের সংবাদ অবগত হন । এই সৈন্তদল বাঙ্গালা হইতে সিদ্ধিতে কার্য করিতে আদেশ পাইয়াছিল । ইহার পথে যাইতে যাইতে ফিরোজপুরে আপনাদের গতিরোধ করে । উল্লিখিত সৈনিক পুরুষগণ এই বলিয়া, নববিজিত সিদ্ধ রাজ্যে কার্য করিতে অসম্মত হয় যে, তাহারা যুদ্ধের সমর্থ যে অতিরিক্ত বেতন পাইত, তাহা না পাইলে কখনই ঐ স্থানে কার্য করিতে যাইবে না । সিপাহিদিগের এইরূপ অবাধ্যতা ও অনিচ্ছা দেখিয়া লর্ড এলেনবরা ও প্রধান সেনাপতি নেপিয়র বিশিষ্ট যত্ন ও কৌশলসহকারে শৃঙ্খলাস্থাপনে মনোনিবেশ করিলেন । বাঙ্গালার ৭ গণিত অখারোহিদল সীমান্তভাগে যাইবার সময়ে প্রকাশ্যভাবে শূন্যতাচরণে সমুখিত হইয়াছিল । আফসরগণ বহু চেষ্টা করিয়াও তাহাদিগকে সুব্যবস্থিত করিতে পারিলেন না । তাহারা আপনাদের ফণ্ড হইতে অর্থ দিতে চাহিলেন, আপনারা যত্ন করিয়া তাহাদের প্রার্থনা পূরণে প্রতিশ্রুত হইলেন, তথাপি তাহারা ভেরীর নিনাদ শ্রবণে সজ্জিত হইল না, অথবা আফিসরদিগের আদেশে নির্দিষ্ট স্থানে গমনোন্মুখ হইল না । একাগ্রতা ও অটল প্রতিজ্ঞার সহিত ফিরোজপুরের নিকটে বসিয়া রহিল । এই সময়ে আর এক সঙ্কট উপস্থিত হইল । চারিদিকে কিংবদন্তী প্রচারিত হইল যে, ইউরোপীয় সৈন্তগণও এবিষয়ে সিপাহিদিগের সহিত সমবেদনা প্রকাশ করিতেছে । এই কিংবদন্তী শ্রবণে রাজ্য-শাসন-বিভাগের কন্ঠচারিগণ সাতিশয় চিন্তিত ও শঙ্কিত হইয়া উঠিলেন । একদল ইউরোপীয় সৈন্ত স্পষ্টাক্ষরে নির্দেশ করিতে লাগিল যে, সিপাহিরা আপনাদের শ্রায্য বেতন প্রার্থনা করিতেছে মাত্র ; স্ততরাং উহা তাহাদের পক্ষে অশিষ্টতা বা অবিবেচনার কার্য নহে । এই সময়ে শত্ৰুর অপর পার্শ্বে শিখগণ অবস্থিতি করিতেছিল ;

তাহারা সিপাহিদিগের সহিত সমবেদনা প্রকাশ ও সিপাহিদিগের সাহায্য করিতে প্রতিশ্রুত হইয়া তাহাদিগকে উদ্বুদ্ধ করিতে সবিশেষ চেষ্টা পাইয়াছিল। সেই বিভাগের সেনাপতি উল্লেখ করিয়াছিলেন যে, সিপাহিদিগকে নিরস্ত্র করিবার জন্ত প্রত্যাবর্তন করিতে আদেশ করিলে তাহারা কখনই প্রত্যাবর্তিত হইবে না। এ বিষয়ে যদি কিছুমাত্র বল প্রয়োগ করা যায়, অথবা ক্রিয়ৎপরিমাণ কঠোরতা প্রদর্শিত হয়, তাহা হইলে সমস্ত সীমান্তভাগ সমরায়িতে প্রজ্জ্বলিত হইয়া উঠিবে। এজন্য নিরস্ত্রী-করণের সঙ্কল্প পরিত্যক্ত হয়। এইরূপে সৈন্যদল কোন প্রকারে দণ্ডিত না হইয়া যে স্থান হইতে প্রস্থান করিয়াছিল, সেনাপতির নিকট হইতে কোন রূপ আদেশ না আইসা পর্য্যন্ত, সেই স্থানে ফিরিয়া আইসে। ইহার পরিবর্তে অন্য সৈন্যদল সিজুতে কার্য্য করিতে আদিষ্ট হয়। কিন্তু ক্রমে এই অনিষ্ট অনেক সৈনিক দলেই সংক্রান্ত হইয়া উঠে। অনেকেই পূর্ব্বের ন্যায় বিনা বাটায় কার্য্য করিতে অসম্মত হয়। শেষে অনেক যত্নে ও কৌশলে সিপাহিদিগের এই অবাধ্যতা নিবারিত হয়। গবর্ণমেন্ট অনেক স্থলে তাহাদের প্রার্থিত বাটা দিতে প্রতিশ্রুত হন। সিপাহিদিগের এই অসন্তোষ ও বিরাগ কেবল রাজ্যবৃদ্ধির ফল। তাহারা আপনাদিগকে ন্যায্য প্রাপ্য হইতে বঞ্চিত হইতে দেখিয়া, বিরক্ত ও অসন্তুষ্ট হইয়া উঠিয়াছিল। এ বিরাগ ও অসন্তোষ অকারণে জন্মে নাই। তাহারা প্রাণ পর্য্যন্ত পণ করিয়া কোম্পানির জন্য রাজ্য-জয়ে প্রবৃত্ত হইয়াছিল, এক্ষণে সেই রাজ্য জয় হইলে তাহারা আপনাদের নিদ্দিষ্ট বেতন হইতে বঞ্চিত হইয়া পড়ে। ইহাতে যে তাহারা বিরক্ত বা অসন্তুষ্ট হইয়া কার্য্য-হইতে বিরত হইবে, তাহা কিছু বিচিত্র নহে। এ বিষয়ে ইউরোপীয় সৈন্যদিগের প্রভূতক্তিও অটল থাকে না। লর্ড এলেনবরা নির্দেশ করিয়াছিলেন যে, ভারতীয় সৈন্যদলের অসন্তুষ্টিতে অনেক বিপদ সম্ভবে, এই বিপদে ভারত-সাম্রাজ্যও বিপদাপন্ন হইতে পারে। তাঁহার বিশ্বাস যে, সৈন্যদিগের নিরস্ত্র করিবার জিগীষাবৃদ্ধি করাই তাহাদিগকে সর্ব্বতোভাবে বিশ্বস্ত রাখিবার প্রশস্ত উপায়। কিন্তু এই জিগীষা ও সামরিক গৌরব, অস্ত্রায় বা অবিচারে ভারাক্রান্ত করা বিধেয় নহে। ইহাতে রাজ্যাধিকারের লাভ অপেক্ষা রাজ্য-জয়ের অনিষ্ট অধিক হইয়া থাকে। লর্ড এলেনবরার এই উক্তি অযৌক্তিক নহে। রাজ্য-বৃদ্ধির সহিত যে, সিপাহিদিগের বিরাগ

ও অসন্তোষের কারণ অনুসৃত থাকে, তাহা এই সিদ্ধি অধিকারে প্রকাশিত হইয়াছে।

কোম্পানির সিপাহিগণ যেমন সাহসসহকারে ও অকুতোভয়ে সিদ্ধি অধিকার করে, তেমনই পঞ্জাবরাজ্যও প্রভূত পরাক্রমের সহিত করায়ত্ত করিয়া তুলে। পঞ্জাব অধিকার সিপাহিদিগের অপরিসীম গৌরব ও মহত্বের বিষয়। বর্তমান পুস্তকের প্রথম অধ্যায়ে এই রাজ্যাধিকারের বিবরণ বর্ণিত হইয়াছে। সিপাহিগণ সিদ্ধির জায় এই বিজিত রাজ্যেও কার্য্য করিতে আদিষ্ট হয়। এ সময়েও পূর্বের জায় তাহাদের প্রাপ্য বেতন ন্যূনতর হইয়া উঠে। সুতরাং যে বিরাগ সিদ্ধিজয়ের পর পরিষ্কৃত হইয়াছিল, সে বিরাগ পঞ্জাবজয়ের পরেও প্রকাশিত হয়। সিপাহিরা বুঝিতে পারিল না, তাহারা কোন্ নিয়ম, কোন্ যুক্তির বলে ন্যূন বেতনে বিজিত রাজ্যে কার্য্য করিবে? বুঝিতে পারিল না, তাহারা আপনাদের জীবন সঙ্কটাপন্ন করিয়া ব্রিটিশ কোম্পানির জন্ত যে রাজ্য জয় করিয়াছিল, অপরিসীম সাহস ও পরাক্রমের সহিত ব্রিটিশ কোম্পানিকে যে বিজয়-লক্ষ্মীতে পরিশোভিত করিয়াছিল, সেই অধিকার ও সেই বিজয় লক্ষ্মীর বিনিময়ে তাহারা কোন্ যুক্তির বলে প্রাপ্য স্বত্ব হইতে বঞ্চিত হইবে?

সুতরাং সেই সময়ে পঞ্জাবে যে সমস্ত সৈন্য ছিল, এবং যে সমস্ত সৈন্য

কোম্পানির প্রাচীন অধিকার হইতে শতক্র উত্তীর্ণ

১৮৪২-১৮৫০ অব্দ।

হইয়াছিল, তাহারা অল্প বেতন গ্রহণ করিতে

অস্বীকৃত হয়, যে যে সৈনিকদল এই অল্পতর বেতনের অসুবিধা ভোগ করিয়া আসিয়াছিল, অথবা শীঘ্রই ভোগ করিবে বলিয়া মনে করিয়াছিল, তাহারা পরস্পর পরামর্শ করিতে প্রবৃত্ত হয় এবং পরস্পরের সহায়ভূত হইতে হিরপ্রতিজ্ঞ হইতে থাকে। কতিপয় সৈন্যদলের নির্বীচিত প্রতি-নিধিগণ এক টেশন হইতে অল্প টেশনে যাইয়া সমস্ত ঠিক করে। অপেক্ষাকৃত দূরতর স্থানে পত্রাদিও লিখিত হইতে থাকে। রাবলপিণ্ডীতে সৈন্যদিগের এই অসন্তোষ প্রথমে প্রকাশ পায়। একদা জুলাই মাসের প্রাতঃকালে স্তার কোলিন কাষেল সংবাদ পাইলেন যে, ২২ গণিত সৈনিক দল আপন আপন বেতনগ্রহণে অসম্মত হইয়াছে। সিপাহিগণ বাহিরে শান্ত, বিনয়ী ও স্থির ছিল, কিন্তু তাহাদের এই শান্তি, বিনয় ও

দ্বিরত্নর অভ্যন্তরে প্রগাঢ় অসন্তোষ গূঢ়ভাবে রহিয়া ছিল। কাশ্মল ইহা স্পষ্ট বুঝিতে পারিলেন। অন্তান্ত সৈনিক দলও যে, শীত্র তাহাদের দৃষ্টান্তের অহুবর্তী হইবে, ইহাও তাঁহার স্পষ্ট বোধ হইল। এইরূপ একতা, এইরূপ অসন্তোষ ও এইরূপ বিরাগ সকল স্থলে সকল সময়ে বিপদের সূত্রপাত করিয়া থাকে। কিন্তু সাময়িক ঘটনাবিশেষে এই আশঙ্কিত বিপদ অনেকাংশে পরিবর্জিত হইয়া উঠিয়াছিল। সিপাহি সৈন্তের এই অসন্তোষ নববিজিত রাজ্যে পরিস্ফুট হয়, নববিজিত অরাজি-পক্ষের মধ্যে সম্প্রসারিত হইয়া উঠে, প্রতিকূল পক্ষীয়ের সংশ্বেবে প্রবৃদ্ধ হইতে থাকে, এবং অবক্ষমল ও অব্যবস্থিত শাসনের অহুকুলতায় অবাধে ও অবলীলায় আপনার আধিপত্য প্রসারিত করিয়া তুলে। খালসাগণ এই সময়ে যদিও নিরস্ত হইয়াছিল, যদিও পরাজয় স্বীকার করিয়াছিল, তথাপি তাহাদের অন্তর্নিগূঢ় ধূমায়মান বহিঃ নির্কাপিত হয় নাই। যে বিকার ও যে ক্রোধ তাহাদের হৃদয়ে প্রবেশিত হইয়াছিল, তাহা বিগত কালের ক্রোড়শায়ী হয় নাই। পূর্বস্মৃতি তাহাদের হৃদয়ে অনলকণা উৎপাদন করিয়াছিল, এবং বর্তমান অবস্থা তাহাদিগকে কঠোর যাতনার আক্রমণে উন্নতপ্রায় করিয়া তুলিয়াছিল। এইরূপ বিরক্ত, বিদ্বিষ্ট ও অসন্তুষ্ট সম্প্রদায়ের মধ্যে যদি সিপাহিরা প্রকাশ্যভাবে শক্ততাচরণে সমুখিত হয়, তাহা হইলে ঐ খালসা সৈন্তে যে, তাহাদের সংখ্যা বর্দ্ধিত হইবে, তাহা সহজেই বোধগম্য হইতে পারে। খালসাগণ অভ্যুখিত সিপাহিদলে সম্মিলিত হইয়া, অবশুই আপনাদের প্রনষ্ট রাজ্যের উদ্ধারে যত্নপর হইয়া উঠিবে, এবং অবশুই ব্রিটিশ কোম্পানির শাসনকে বিপদাপন্ন করিয়া তুলিবে।

এই আশঙ্কিত বিপদের সময়ে প্রধান সেনাপতি স্যার চার্লস নেপিয়ার কার্যক্ষেত্রে অবতীর্ণ হইলেন। গবর্নরজেনেরল এ সময়ে শীতল পার্কৃত্য সমীরণসেবন করিয়া পুলকিত হইতেছিলেন, প্রধান সেনাপতি বিলম্ব না করিয়া, তাঁহার সহিত সাক্ষাৎ করিলেন। ইহার মধ্যে তাহাদের নিকট সংবাদ আসিল, রাবলপিণ্ডীর কেবল একদল নহে, দুই দল সৈন্ত তাহাদের বেতন গ্রহণে অসম্মতি প্রকাশ করিয়াছে, এবং উজীরাবাদ ও বেহলমের অন্ত কয়েক দলও তাহাদের দৃষ্টান্তাহুবর্তী হইতে আগ্রহান্বিত হইয়াছে। অবিলম্বে গবর্নরজেনেরল ও প্রধান সেনাপতি কতিপয় প্রধান

সৈনিক পুরুষের সহিত মন্ত্রণা করিতে প্রযুক্ত হইলেন। কর্ণেল বেনসন্ নামক এক জন লক্ষপ্রতিষ্ঠ সৈনিক পুরুষ প্রস্তাব করিলেন যে, এ সময়ে সৈন্তদিগকে নিস্তর করা কর্তব্য। কিন্তু নেপিয়র এ প্রস্তাবে সন্মত হইলেন না, তিনি বিলক্ষণ দৃঢ়তার সহিত উহার প্রতিবাদ করিলেন। গবর্নর-জেনেরলও প্রধান সেনাপতির মতে সন্মত হইলেন। সুত্তরাং বাহারা বেতন গ্রহণে অসম্মতি প্রকাশ করিয়াছে, তাহাদিগকে অস্ত্রহীন করা প্রধানতম কর্তৃপক্ষের যুক্তির অমুমোদিত হইল না। এদিকে বেনসন্ গোপনে স্যার কোলিন্ কাঙ্কেলকে লিখিলেন যে, তিনি ও অস্ত্রান্ত সেনাপতিগণ যেন ইউরোপীয় সৈনিকগণ আনিয়া কর্তব্য-পথে অগ্রসর হইতে থাকেন। কিন্তু এই পত্র পছঁছিবার পূর্বেই কাঙ্কেল আশঙ্কিত বিপদের হস্ত হইতে একরূপ পরিভ্রাণ পাইলেন। তিনি ২৬ এ জুলাই প্রধান সেনাপতিকে লিখিলেন, “সিপাহিদিগের প্রতি আপনার উপদেশ সিমলা হইতে প্রেরিত হইবার পূর্বেই সৈন্তগণ শাস্তভাব অবলম্বন পূর্বক পূর্বসঙ্কল্প পরিত্যাগ করিয়াছে”। সিপাহিদিগের এইরূপ শাস্ত হওয়ার প্রধান কারণ নির্দেশ করিতে হইলে ইহাই বলিতে হইবে যে, তাহার শেষ কার্য সম্পাদনার্থ তখনও প্রস্তুত হইতে পারে নাই। কর্তৃপক্ষের বিরুদ্ধাচারী হইতে তাহারা তখনও আশানুরূপ বল অথবা সাহস সংগ্রহ করে নাই। রাবলপিণ্ডীতে একদল ইউরোপীয় সৈন্ত ছিল, নিকটবর্তী অস্ত্রান্ত সেনানিবাসেও ইউরোপীয় সৈনিক দল অবস্থিতি করিতেছিল। ইহাদিগকে এক স্থানে সম্মিলিত করিবার বন্দোবস্ত হইল, এবং ইহাদের সাহায্যে বিপত্তি-পূর্ণ সৈনিক অভ্যুত্থান নিরস্ত করিবার চেষ্টা হইতে লাগিল।

নেপিয়র অক্টোবর মাসে, প্রধান প্রধান সেনানিবেশগুলি পরিদর্শনার্থ উত্তরপশ্চিমাঞ্চলের অনেক স্থান পরিভ্রমণ করেন। দিল্লীতে আসিয়া, তিনি সৈন্তদিগের অসন্তোষ স্পষ্টতঃ দেখিতে পাইলেন। তাহারা স্থির-প্রতিজ্ঞ হইয়াছিল যে, বর্ধিত বেতন না পাইলে কখনই পঞ্জাবে বাইয়া কার্য-ভার গ্রহণ করিবে না। একদল সৈন্ত শতক্রর পারে যাইতে আদিষ্ট হইয়াছিল; কিন্তু তাহারা যথাস্থানে বাইবার নিমিত্ত যাত্রা করিতে সন্মত হইল না। নেপিয়র এইরূপ অবাধ্যতা দেখিয়া স্পষ্ট বুঝিতে পারিলেন যে, সিপাহি-দলে এই বিরাগ ও অসন্তোষ সার্বজনীন হইয়া উঠিয়াছে।

কঠোর উহার কার্য্য পরিষ্কৃত হইয়া ভয়ানক বিপ্লবের উৎপত্তি করিতে পারে । তিনি এ সম্বন্ধে যথোচিত উপায় অবলম্বন করিতে ক্রটি করিলেন না । সিপাহিদিগের মধ্যে শৃঙ্খলা ও শান্তির রাজ্য অব্যাহত রাখিতে যথাসাধ্য চেষ্টা করিতে লাগিলেন ।

উজীরাবাদে সৈনিকদলের বিরাগ দীর্ঘস্থায়ী হইল না । কোম্পানির এক জন উপযুক্ত ও উৎকৃষ্ট কর্মচারী এই স্থানের সৈন্যাধ্যক্ষ ছিলেন । জন হিয়ার্সে জীবনের প্রথমাবস্থায় সীতাবলদির অগ্রতম প্রসিদ্ধ যোদ্ধা বলিয়া প্রসিদ্ধ হইয়াছিলেন । ইহার পর তাঁহার কার্য্য-নৈপুণ্য ও সমর-কুশলতা ক্রমেই প্রকাশিত হইতে থাকে । হিয়ার্সে আপনার সৈনিকদলে বিলক্ষণ মাননীয়, শ্রদ্ধের ও প্রসিদ্ধ ছিলেন । তিনি সিপাহিদিগের হৃদয়-গত ভাব স্পষ্টরূপে বুঝিতেন । বক্তৃতার মোহিনী শক্তির প্রভাবে যে, সিপাহিদিগের হৃদয় আর্দ্র হয়, দৃঢ় প্রতিক্রমা শিথিল হয়, এবং একাগ্রতা অবনত হইয়া পড়ে, ইহা তাঁহার অবিদিত ছিল না । সুতরাং তিনি অবশেষে বক্তৃতা-শক্তির আশ্রয় গ্রহণ করিতেই উদ্যত হইলেন । যখন উজীরাবাদের একদল সৈন্য প্রকাশ্যভাবে বেতন গ্রহণে অসম্মত হইল, তখন হিয়ার্সে সৈন্যদলকে প্যারেড-ভূমিতে আহ্বান করিলেন, এবং তাহাদিগকে সম্বোধন করিয়া জলদ-গম্ভীর স্বরে বক্তৃতা করিতে লাগিলেন । তাঁহার বক্তৃতা এমন উদ্দীপক, এমন হৃদয়গ্রাহী ও এমন যুক্তিপূর্ণ হইয়াছিল যে, সিপাহিরা তাহা শ্রবণ করিয়া, অনেকে অবনতমস্তক হইল, অনেকে বিরাগে, ক্ষোভে ও অনুরোধে আপনাদিগকে দিক্কার দিতে লাগিল, এবং অনেকে পূর্ব অবাধ্যতা স্মরণ করিয়া, হৃৎ-দগ্ধ হৃদয়ে অশ্রু বিসর্জন করিল । পুনরায় তাহাদিগকে বেতন প্রদত্ত হইল । যে চারি ব্যক্তি বেতন গ্রহণে অসম্মত হইয়াছিল, তাহাদিগকে দণ্ডবিধির অধীন করা গেল, এবং বিচারে তাহাদের প্রতি কঠিন গারশ্রমের সহিত কারাবাসের আদেশ হইল । ইহাব পরে সমস্ত সৈন্য দল এই দণ্ডাজ্ঞার কার্য্য দেখিতে সমবেত হইল । উজীরাবাদে চারিদল ভারতীয় ও একদল ইউরোপীয় সৈন্য ছিল, ইহাদের সকলের সমক্ষেই এই দণ্ডদেশ কার্য্য পরিণত হইল । দণ্ডিত সিপাহিগণ সকলের সমক্ষে প্রকাশ্য রাস্তায় প্রকাশ্য-ভাবে কঠোরতর পরিশ্রম করিতে আরম্ভ করিল । সিপাহিরা বিবগ্ন-চিত্তে, কাতরভাবে সতীর্থদিগের এই শোচনীয় দশাবিপর্যায় চাহিয়া

দেখিল। আর তাহারা কোন রূপ অবাধ্যতা বা কোন রূপ অসম্মতি প্রকাশ করিল না। আপনাদের নির্দিষ্ট বেতন গ্রহণ করিল, এবং নির্দিষ্ট নিয়ম অনুসারে কার্য্য করিতে প্রবৃত্ত হইল।

কিন্তু এই স্থলেই দণ্ডবিধির অপ্রতিহত শক্তি অচল বা অকর্ণণ্য হইয়া রহিল না। যে তিন জন প্রধান ষড়যন্ত্রকারী একদল হইতে অল্প দলে বাইয়া সিপাহিদিগকে গবর্ণমেন্টের বিরুদ্ধে উত্তেজিত করিতে চেষ্টা পাইয়াছিল, সামরিক বিচারালয়ে তাহাদের বিচার আরম্ভ হইল। বিচারে তাহারা চৌদ্দ বৎসর কারাগারে আবদ্ধ থাকিতে আদিষ্ট হইল। কিন্তু স্যার চার্লস^{*} নেপিয়ার অপরাধ ও আশঙ্কিত বিপদের গুরুতা দেখিয়া, এই দণ্ডাজ্ঞা পরিবর্তন করিতে আদেশ করিলেন। এজ্ঞা চতুর্দশ বর্ষ কারাবাসের আদেশের পরিবর্তে তাহাদের প্রতি মৃত্যু-দণ্ড ব্যবস্থাপিত হইল। আর দুই জনও এই এক অপরাধে এক বিচারালয়ে অভিযুক্ত হইয়া, একবিধ দণ্ডের অধিকারী হইল *। অপরাধ অনুসারে বিচার করিলে এই দণ্ড কঠোরতর বলিয়া প্রতিপন্ন হইবে। বিপ্লব সজ্জাটিত হইবার পূর্বে প্রাণদণ্ড-বিধান ত্রায়ের অনুমোদনীয় না হইতে পারে। কিন্তু শেষে নেপিয়ার এ দণ্ডও পরিবর্তন করিয়া অপরাধিগণকে যাবজ্জীবন দ্বীপান্তরিত করিতে আদেশ করিলেন। নেপিয়ার এই দণ্ডের সম্বন্ধে লিখিয়াছেন, “এই নির্কাসনে তাহারা আপনাদের অপরাধ হইতে বিমুক্ত হইবে। কারণ, তাহারা স্বদেশ হইতে স্বজাতি হইতে জন্মের মত বিচ্ছিন্ন হইয়া, সমুদ্রপারে অপরিচিত ও অজ্ঞাত স্থানে থাকিয়া, আপনাদের শোচনীয় জীবনে আপনাই পরিতপ্ত হইবে। এইরূপ নির্কাসন কেবল পরিবর্তন মাত্র। ইহা তাহাদের সমুচিত শাস্তি বলিয়া আমি বিবেচনা করি না। তাহারা শোচনীয় দশার জীবিত দৃষ্টান্ত স্বরূপ অবস্থিতি করিবে। সমস্ত বিশ্বাসঘাতক ও সমস্ত ষড়যন্ত্রকারীই ঐদৃশ শোচনীয় অদৃষ্টের অধিকারী হইয়া থাকে †”।

ইহাতেও সার্ক্জনীন বিরাগ অপসারিত হইল না। যদিও সিপাহিগণ স্থানবিশেষে কঠোর দণ্ডবিধিতে অথবা বক্তৃতার তীব্রতায় শাস্ত্যভাব অব-

* স্যার চার্লস নেপিয়ার লিখিয়াছেন, প্রথমে চারি জনের, শেষে এক জনের বিচার হয়।
Sir Charles Napier Indian Mis-government, p. 59.

† Ibid p. 56-60.

লম্বন করিয়াছিল, তথাপি স্থান-বিশেষে অশান্তির ভয়ঙ্করী মূর্তির বিরাম হয় নাই। এরূপ কিংবদন্তী প্রচারিত হইয়াছিল যে, ডাকঘরের পত্রঘাটকগণ অশান্ত পত্রের শ্রায় সিপাহিদিগের ষড়যন্ত্র-পূর্ণ পত্র-রাশিও বহন করিয়া থাকে। ঐ সকল পত্র এক সেনানিবেশ হইতে অল্প সেনানিবেশে যাইয়া ভবিষ্যৎ বিপ্লবের বীজ বপন করে। শেষে ঐ সকল পত্রের অধিকাংশ অধিকৃত ও পরীক্ষিত হইয়াছিল, কিন্তু তাহাতে কোন রূপ ষড়যন্ত্র বা কোন রূপ বিপ্লবের আভাস দৃষ্ট হয় নাই *। যাহা হউক নেপিয়র আশঙ্কিত বিপদের বিষয় স্পষ্টরূপে বুঝিতে পারিয়াছিলেন, এবং উহার প্রতিবিধানার্থ যথাসাধ্য যত্ন করিয়াছিলেন। দেখিতে দেখিতে ভয়ঙ্কর কার্য্য আরম্ভ হইল। নেপিয়রের হৃদয় যে বিপদের আশঙ্কায় অধীর হইয়াছিল, তাহা বর্জিত হইয়া চারি দিকে সংহার-মূর্তির ছায়া বিস্তার করিল। গোবিন্দগড়ের ৬৬ গণিত সৈনিকদল প্রকাশভাবে শত্রুতাচরণে সমুখিত হইল, এবং প্রভূত উৎসাহ ও পরাক্রমের সহিত দুর্গের দ্বার আক্রমণ করিল। এই দ্বার অধিকার করিলে, বাহিরে যে সমস্ত সৈন্য ছিল, তাহারা কখনও দুর্গে প্রবেশ করিতে পারিত না, সুতরাং দুর্গ অনায়াসেই শত্রুপক্ষের অধিকৃত হইত। এই সময়ে গোবিন্দগড়ে একদলও ইউরোপীয় সৈন্য ছিল না। কিন্তু সেনাপতি ব্রাডফোর্ডের অধীনস্থ প্রথম অধরোহিদল বিপক্ষের আক্রমণ নিরস্ত করিতে সজ্জিত হইল। ম্যাকডোনাল্ডের সাহসে ও পরাক্রমে প্রবুদ্ধতেজ হইয়া, ইহারা দুর্গদ্বার হস্তগত করিল †। এইরূপে দুর্গ রক্ষিত হইল, এবং সেই সঙ্গে ইউরোপীয় আফিসরদিগেরও জীবন রক্ষিত হইল। এক্ষণে ৬৬ গণিত সৈন্যদলের নাম সৈনিকের তালিকা হইতে কাটয়া দেওয়া হইল। নেপালস্থ পার্শ্বত্যা প্রদেশের গুরখা সৈন্য তাহাদের পতাকা ও তাহাদের সামরিক ভূষণ অধিকার করিল।

স্যার চার্লস নেপিয়র লিখিয়াছেন যে, যখন ৬৬ গণিত সেনাদল নিরস্ত হইল, যখন তাহাদের পতাকা ও যুদ্ধ-ভূষণ গুরুথাগণ অধিকার করিল, তখন সৈনিকদিগের অসন্তোষ ও শত্রুবভাব আপনা হইতেই তিরোহিত হইয়া গেল। সিপাহিগণ দেখিল, তাহাদের শ্রায় সাহসী, রণকুশল ও পরাক্রম-

* Calcutta Review. Vol. XXII.

† Ibid.

শালী অল্প এক সম্প্রদায় তাহাদের স্থান পরিগ্রহ করিল। স্মতরাং ইহাতে তাহাদের অভীষ্ট সিদ্ধ হইল না, যেহেতু কোম্পানি একের বিনিময়ে অল্প এক সৈনিক দল প্রাপ্ত হইলেন। তাঁহারা ইহাদেরই সাহায্যে আপনাদের ক্ষমতা ও প্রতাপ অপ্রতিহত রাখিতে পারিবে। কিন্তু সিপাহিগণ জাতিনাশ অথবা ধর্মনাশের আশঙ্কায় গবর্ণমেন্টের বিরুদ্ধাচরণে প্রবৃত্ত হয় নাই। তাহারা বর্দ্ধিত বেতনের প্রত্যাশা করিয়াছিল, এবং এই বর্দ্ধিত বেতনের জন্যই আশ্রয়দাতা প্রতিপালক-কর্তা কোম্পানির সমক্ষে অবাধ্যতা প্রকাশ করিতে অগ্রসর হইয়াছিল। নেপিয়র ইহা স্পষ্ট বুঝিতে পারিয়াছিলেন। এবিষয়ের কোন প্রতিবিধান না করিলে যে, সাধারণের বিরাগ ও অসন্তোষ নিরাকৃত হইবে না, ইহাও তাঁহার স্পষ্ট হৃদয়ঙ্গম হইয়াছিল। যে পরিবর্তনে সিপাহিরা বিরক্ত হইয়াছিল, যে পরিবর্তন সিপাহিদিগকে অবাধ্যতা প্রদর্শনে প্রবর্তিত করিয়াছিল, এবং যে পরিবর্তন তাহাদের গভীর মনোবেদনার উদ্দীপক হইয়া উঠিয়াছিল, শার্চাল্‌স নেপিয়র তাহা অন্বেষণ ও অরাজনীতি-সম্মত বলিয়া উল্লেখ করিতে সক্ষম হইলেন না। স্মতরাং এবিষয় যখন ভারতবর্ষীয় গবর্ণমেন্টের বিবেচনাধীনে ছিল, তখন তিনি সিপাহিদিগকে নিয়মানুসারে বেতন দিতে আদেশ প্রচার করিলেন।

যে প্রতিদ্বন্দ্বিতায় স্যার চার্লস নেপিয়র ভারতবর্ষের প্রধান সেনাপতির পদ পরিত্যাগ করিয়াছিলেন, এক্ষণে লর্ড ডালহৌসীর সহিত তাঁহার সেই প্রতিদ্বন্দ্বিতা উপস্থিত হইল। যখন প্রধান সেনাপতি সিপাহিদিগের প্রাপ্য বেতনের সম্বন্ধে বন্দোবস্ত করিতে প্রবৃত্ত হন, তখন গবর্ণরজেনেরল সমুদ্রের শীতল সমীরণ সেবন করিতেছিলেন। তিনি প্রত্যাবৃত্ত হইয়া দেখিলেন প্রধানতম সৈনিক পুরুষ সমুদয় কার্ধ্য শেষ করিয়াছেন। প্রধানতম গবর্ণমেন্টের অজ্ঞাতসারে প্রধান সেনাপতির আদেশ প্রচারিত হওয়াতে ডালহৌসী সাতিশয় বিরাগ প্রদর্শন করিতে লাগিলেন। নেপিয়র এই বলিয়া স্বকৃতকার্যের সমর্থন করিতে লাগিলেন যে, বিপদ সাতিশয় ভয়ঙ্কর হইয়া দাঁড়াইয়াছিল, স্মতরাং এবিষয়ে বিলম্ব করিবার সময় ছিল না। কিন্তু ডালহৌসী নেপিয়রের এ যুক্তি অস্বীকার করিলেন। তিনি দৃঢ়তার সহিত নির্দেশ করিতে লাগিলেন যে, প্রস্তাবিত সময়ে কোন কপ ভয়ঙ্কর বিপদের সম্ভাবনা ছিল না। তিনি নেপিয়রের কার্য্য প্রণালীর সমালো-

চনা করিয়া যে মিনিট প্রচারিত করেন, তাহাতে লিখিত ছিল, “প্রধান সেনাপতি ভারতবর্ষীয় গবর্ণমেন্টের নিকট সংবাদ দেন যে, গত জানুয়ারি মাসে পঞ্জাবের সৈন্তদলে অসন্তোষ লক্ষিত হইয়াছিল, সৈনিকদিগের অবাধ্যতা এতদূর বৃদ্ধি পাইয়াছিল এবং উহা এতদূর সম্প্রসারিত হইয়া উঠিয়াছিল যে, ভারতবর্ষীয় গবর্ণমেন্ট সে সময়ে ভয়ঙ্কর বিপদে পতিত হইয়াছিলেন। প্রধান সেনাপতির প্রেরিত এই সংবাদ আমি ২৬এ মে সাতিশয় বিশ্বাসের সহিত পড়িয়াছি। প্রধান সেনাপতি যে ধারণা পোষণ করিয়া যতদূর অগ্রসর হইয়াছেন, তাহা আমি বিশিষ্ট মনোযোগের সহিত বিচার করিয়া দেখিয়াছি। আমি সেই সময়ের সমস্ত কাগজপত্রও ধীরভাবে পরীক্ষা করিয়াছি, এবং যাহা যাহা সম্ভব হইয়াছে, তাহাও যত্ন পূর্বক অনুধাবন করিয়া দেখিয়াছি। এদিকে প্রধান সেনাপতি যে ধারণা ও বিশ্বাসের অনুবর্তী হইয়া সমস্ত সৈন্তকে বিপ্লবকারী এবং ব্রিটিশ গবর্ণমেন্টকে বিপদাপন্ন বলিয়া নির্দেশ করিয়াছেন, সে ধারণা ও বিশ্বাসের সত্যতা বা সাধুতার সম্বন্ধেও আমি কোনও প্রশ্ন উত্থাপন করিতেছি না। আমি কেবল নিজের মতানুসারে ইহাই বলিতে বাধ্য হইতেছি যে, আমি পূর্বে প্রধান সেনাপতির প্রদত্ত সংবাদ যে ভাবে পড়িয়াছিলাম, এক্ষণে তৎসম্বন্ধে সেই ভাবের কোনও ব্যতায় হয় নাই। ভারতবর্ষ বিপদাপন্ন হইয়াছে বলিয়া চীৎকার করিবার কিছুই সার্থকতা নাই। ভারতবর্ষ বহিঃ-শত্রুর আক্রমণ হইতে বিমুক্ত এবং উহার নূতন প্রজাগণের বশ্চতায় অন্তঃ-শত্রুর আক্রমণে নিরাপদ। এ অবস্থায় সৈনিকদলবিশেষের আংশিক অবাধ্যতায় উহা কখনও বিপদাক্রান্ত হইতে পারে না। * * সৈন্তদল বিদ্রোহাপন্ন এবং সাম্রাজ্য বিপদাক্রান্ত হইয়াছে বলিয়া যে মত প্রচারিত হইয়াছে, আমি তাহা সম্পূর্ণরূপে অস্বীকার করিতেছি”।

স্যার চার্লস নেপিয়ার স্বয়ং উত্তরপশ্চিমাঞ্চলের সৈনিক সম্প্রদায় পর্যবেক্ষণ করিয়া যে বিবরণ লিপিবদ্ধ করিয়াছেন, তাহা দেখিলে লর্ড ডালহৌসীর এই উক্তি তাদৃশ সঙ্গত বোধ হইবে না। নেপিয়ার দিল্লীতে গিয়াছিলেন, আগ্রাতে পদার্পণ করিয়াছিলেন, মীরাটে উপস্থিত হইয়াছিলেন, পরিশেষে হিন্দুদিগের পুণ্যভূমি হরিদ্বারও পরিদর্শন করিয়াছিলেন। কিন্তু সকল স্থানের সকল সম্প্রদায়ের মধ্যেই একই অসন্তোষ, একই বিরোধের ভয়ঙ্করী মুষ্টি দৃষ্ট হইয়াছিল। সত্য বটে, তখন এই অসন্তোষ ও

বিরাগ পরিষ্কৃত হইয়া কোনরূপ বিপ্লবের স্বরূপাত করে নাই, সভ্য বটে, সে সময়ে সিপাহিগণ কম বেতন গ্রহণের প্রস্তাবে উন্মত্ত-প্রায় হইয়া, কোম্পানিরাজকে ভারতীয় ভূখণ্ড হইতে অপসারিত করিতে সমরস্থলে সমবেত হয় নাই। কিন্তু এ প্রস্তাবে তাহারা যে, মর্শে আঘাত পাইয়াছিল, অবাধ্যতার অনমনীয় হইয়াছিল, দৃঢ়প্রতিজ্ঞায় অটল হইয়া উঠিয়াছিল, এবং প্রতিহিংসায় কোম্পানির গবর্ণমেন্টের বিরুদ্ধে সজ্জিত হইবার সুসময় প্রতীক্ষা করিতেছিল, তদ্বিষয়ে কোনও সন্দেহ নাই। নেপিয়র এই অবশ্যস্বাভাবী বিপ্লবের পূর্বাভাস স্পষ্ট বুদ্ধিতে পারিয়াছিলেন; ইহা যে সময়ান্তরে বা ঘটনান্তরে পরিষ্কৃত হইয়া ব্রিটিশ গবর্ণমেন্টকে বিপত্তি-সাগরে নিমজ্জিত করিবে, ইহাও তাঁহার স্পষ্ট হৃদয়ঙ্গম হইয়াছিল। তিনি এই জন্ত সিপাহিগণকে সন্তুষ্ট করিবার প্রয়াস পাইয়াছিলেন; এবং এই জন্ত তাহাদের ইচ্ছানুরূপ বেতন দিয়া প্রভুতর, প্রভুকার্য্য-পরায়ণ ও প্রভুর প্রতি বিশ্বাসী করিতে উদ্যত হইয়াছিলেন।

শেষে এই সাবধানতা, এই কার্য্যকুশলতা ও এই উদারতার সম্মান রক্ষিত হইল না। নেপিয়র বিরাগে ও ক্রোধে মস্তক অবনত করিলেন। শাসন-বিভাগের উচ্চতম পদে অধিরূঢ় হইয়া ডালহৌসী আপনার শাসন-প্রণালী বিপর্য্যস্ত করিলেন না। তিনি স্বীয় রাজশক্তি ও রাজ্য-শাসন প্রণালী অক্ষুণ্ণ রাখিলেন। এদিকে নেপিয়র ডিউক অব ওয়েলিংটনের নিকটে পদত্যাগের অভিপ্রায় জানাইলেন। তাঁহার প্রার্থনা সিদ্ধ হইল। সুতরাং তিনি ভারতবর্ষের প্রধান সেনাপতিত্ব পরিত্যাগ করিয়া স্বদেশে যাত্রা করিলেন। নেপিয়র ২২এ মে অখারোহিদলকে একখানি পত্র লিখিয়া জানাইয়াছিলেন, “এক্ষণে প্রায় সপ্ততি বর্ষে পদার্পণ করাতে এবং গত দশ বৎসর কাল সাতিশয় শারীরিক ও মানসিক ক্লান্তি ভোগ করাতে আমি সুস্থতা লাভের প্রয়াসী হইয়াছি। ভারতবর্ষের জলবায়ুর মধ্যে ভারতবর্ষের রাজকার্য্যে ব্যাপৃত থাকিলে রুখনই এই স্বাস্থ্য লাভ করিতে পারিব না”।

গবর্ণরজেনেরলের সহিত মতবৈষম্য হওয়াতে স্যার চার্লস নেপিয়র ভারতবর্ষ পরিত্যাগ করিয়া শারীরিক ও মানসিক শান্তি-সুখের আশায় স্বদেশে গমন করিলেন। গবর্ণমেন্টের শীর্ষস্থানীয় এই দুই জন

প্রধান ব্যক্তির এই প্রতিদ্বন্দ্বিতা রাজনৈতিক ক্ষেত্রে অনেক বিষয় ফলের
বীজ রোপণ করিয়াছিল। ইহাতে সৈনিক বিভাগে প্রভুত্ব ও সম্মান অনে-
কাংশে কম হইয়া পড়ে। সিপাহিরা এবারেও স্পষ্ট দেখিতে পাইল যে,
তাহাদের প্রধানতম কর্তাও সর্বোংশে ক্ষমতাশালী নহেন। ইঙ্গলও বাহার
হস্তে সমস্ত সৈনিক দলের আধিপত্য সমর্পণ করিয়া নিশ্চিন্ত থাকেন,
এবং যাহাকে গুরুতর কর্তব্যের দায়ী করিয়া, অন্তঃশত্রু ও বহিঃশত্রুর আক্র-
মণ নিবারণার্থ নিয়োজিত করেন; তিনিও একজন সিবিল গবর্ণরের
কর্তৃত্বের সমক্ষে অপদস্থ হন।

এইরূপ প্রতিদ্বন্দ্বিতায় অল্প একটি বিষয় সাধাবণের পরিজ্ঞাত হইয়াছে।
অল্প একটি বিষয় সাধারণে জানিতে পারিয়া ব্রিটিশশাসনের মূল ভিত্তি
শিথিল ও অবদমূল বলিয়া মনে করিয়াছে। চিন্তাশীল ব্যক্তিগণ যখন দৃষ্টি
লেন যে, গবর্ণমেন্টের প্রধানতম কর্তৃপক্ষ পরস্পর বিবাদে প্রবৃত্ত হইয়া
ছেন, তখন তাঁহারা গবর্ণমেন্টের ব্যবস্থিততার সম্বন্ধে সাতিশয় সন্দেহান
হইয়া পড়িলেন। এক জন ভারতবর্ষীয় বিচক্ষণ আফিসর একদা স্যার
জর্জ ক্লার্ককে লিখিয়াছিলেন, “আমার এক্ষণে যাঁটি বৎসর বয়ঃক্রম
হইয়াছে। আমি অভিজ্ঞ লোকদিগের নিকটে তিনটি কথা শুনিতে পাই-
য়াছি। আমার নিজের অভিজ্ঞাতেও বৃদ্ধিতে পারিয়াছি যে, তিনটি
দুর্ঘটনা ব্যতীত ব্রিটিশ গবর্ণমেন্টের স্থায়িত্ব কখনও অপসারিত হইবে
না। এই দুর্ঘটনাদ্বয়ের প্রথমটি এই, উচ্চপদস্থ সাহেবদিগের মধ্যে পরস্পরের
সহিত পরস্পরের প্রতিদ্বন্দ্বিতা। যাহাতে এই শত্রুবতাব না
থাকে, অন্ততঃ যাহাতে ভারতবর্ষীয় লোকে এই ভাবের বিষয় জানিতে না
পারে, তদ্বিবয়ে মনোযোগী হওয়া কর্তব্য। এক্ষণে সাহেবদের মধ্যে
শত্রুতা বর্তমান রহিয়াছে; এবং তাঁহাদের পরস্পরের প্রতি পরস্পরের
মাৎসর্য মধ্যাহ্নকালীন সূর্যের স্তায় সাধারণের দৃষ্টিপথবর্তী হইতেছে।”
লোকে এইরূপ ভাবেই ডালহৌসী ও নেপিয়ারের প্রতিদ্বন্দ্বিতা দেখিয়া
ছিল, এবং এইরূপ ভাবে এই প্রতিদ্বন্দ্বিতা দেখিয়া ব্রিটিশ শাসনের
মূলভিত্তি শিথিল মনে করিয়াছিল। লোকে মনে করিত, ভারতবর্ষে
ইঞ্জরেজদিগের সংখ্যা অল্পমাত্র; কিন্তু একতায় তাহারা বহুসংখ্য হইয়া
থাকে। যদি একতা বিনষ্ট হয়, যদি একতার পরিবর্তে বিদ্বেষ, হিংসা ও
অনৈক্য স্থান পরিগ্রহ করে, তাহা হইলে ইঞ্জরেজেরা ক্রমে ভারতবর্ষে

হীনবল হইয়া পড়ে; তাহাদের শাসন-প্রণালীও ক্রমে হীনশক্তি হইতে থাকে।

লর্ড এলেনবরার শাসন-সময়েও কর্তৃপক্ষের মধ্যে ঠিক এইরূপ কারণে এইরূপ অনৈক্য সজ্জাট হইয়াছিল। যে সমস্ত ভারতবর্ষীয় সৈন্য সিদ্ধিতে যাইতে উদ্যত হইয়াছিল, প্রধান সেনাপতি প্রধানতম গবর্ণমেন্টের সম্মতির অপেক্ষা না করিয়া, তাহাদিগকে অতিরিক্ত অর্থদানে প্রতিশ্রুত হইয়াছিলেন। ইহাতে গবর্ণরজেনেরল সাতিশয় বিরক্ত হইয়া উঠেন। কিন্তু এই বিরাগ সে সময়ে সাধারণে তাদৃশ অভিনিবেশের সহিত দেখে নাই। সে সময়ে সিদ্ধিতে সমরাগ্নি প্রজ্জ্বলিত হইয়াছিল, স্মতরাং সাধারণের মন সেই সময়ের দিকেই প্রধাবিত হইয়াছিল। সে সময়ে এই সামরিক কাহিনী ব্যতীত সাধারণের অবকাশ-কাল অতিবাহনের আর কোন বিষয় ছিল না। কিন্তু ডালহৌসীর সহিত নেপিয়রের প্রতিদ্বন্দ্বিতা সাধারণে ঘোষিত হইয়াছিল, ভারতবর্ষের সকল সেনানিবাসে, সকল বাজারে ও সকল পল্লীগ্রামেই উহা কথোপকথনের প্রধান বিষয় হইয়া উঠিয়াছিল। সকলেই ঐ প্রতিদ্বন্দ্বিতায় কোম্পানিরাজের প্রতি হতশ্রদ্ধ হইয়াছিল, সকলেই ঐ প্রতিদ্বন্দ্বিতায় কোম্পানির গবর্ণমেন্টকে একত্যাশূন্য বলিয়া মনে করিয়াছিল, এবং সকলেই ঐ প্রতিদ্বন্দ্বিতায় রাজনীতির মূলদেশে অনেক আবর্জনা দেখিতে পাইয়াছিল। সাধারণে ভাবিয়াছিল যে, ইন্ডরেজ একখানি তেজস্বী হস্ত ও একটি তেজস্বী মস্তিষ্কের সাহায্যে ভারতবর্ষে একাধিপত্য করিতেছে; সেই ইন্ডরেজই এক্ষণে আপনাদের গৃহবিবাদে ও আপনাদের অনৈক্যে ক্রমে নিস্তেজ, নির্বল ও নিঃসহায় হইয়া পড়িতেছে।

এই রূপে ব্রিটিশ গবর্ণমেন্টের বিশৃঙ্খলা ও অব্যবস্থিততা সাধারণের হৃদয়ে ক্রমে বদ্ধমূল হইয়া উঠিয়াছিল। কিন্তু সিপাহিগণ এতৎপ্রসঙ্গে যে জ্ঞান লাভ করিয়াছিল, তাহা তাহারা কখনও বিস্মৃত হয় নাই। তাহারা বর্দ্ধিত বেতনের জন্য দৃঢ়প্রতিজ্ঞ হইয়াছিল, এবং বর্দ্ধিত বেতন না পাইলে নববিজিত রাজ্যে কার্য্য করিতে অসম্মতি প্রকাশ করিয়াছিল, এক্ষণে বর্দ্ধিত বেতনের সম্বন্ধে কর্তৃপক্ষকে পরস্পর বিবাদ করিতে দেখিয়া, তাহারা ব্রিটিশ গবর্ণমেন্টের প্রতি পূর্ক্যাপেক্ষা আস্থাশূন্য হইয়া পড়িল, এবং পূর্ক্যাপেক্ষা বাধ্যাধিকারের বিরোধী হইয়া উঠিল। তাহারা প্রধান সেনা-

পতিকে বিদায় লইতে দেখিয়া স্থির করিল যে, কোম্পানির অধিকার প্রসারিত হইলে আর তাহাদের কোনও লাভ নাই; সুতরাং কোম্পানির জন্ত নূতন রাজ্য জয় করা, ও নূতন রাজ্যে কোম্পানির পক্ষসমর্থন করা, তাহাদের পক্ষে বৃথা আশ্বাস মাত্র। সিপাহিরা এই জ্ঞান, এই ধারণা কখনও বিশ্বস্তি-সাগরে নিমজ্জিত করে নাই। তাহারা অতীতের চিত্র যত্নপূর্বক স্মৃতি-পটে অঙ্কিত রাখিয়াছিল, এবং বর্তমানের চিত্রের সহিত তাহার তুলনা করিয়া আপনাদের কর্তব্য-পথ নির্দিষ্ট করিয়া লইতেছিল। যদি সিপাহিদিগের হৃদয় ভবিষ্যৎ আশায় একাগ্রতাসম্পন্ন করা হইত, যদি সিপাহিদিগকে আশ্বাস বাক্যে উদ্বোধনী ও উৎসাহী করা যাইত, যদি তাহাদিগকে বলা হইত যে, তাহারা কার্য্যমুরোধে যেরূপ দূর দেশে যায়, অপরিচিত ও অজ্ঞাত স্থানে যেরূপ অসুবিধা ভোগ করে, তৎসমুদয় বিবেচনা করিয়া তাহাদের জন্ত কোনরূপ বিশেষ বন্দোবস্ত করা যাইবে, তাহা হইলে তাহারা আহ্লাদ, কৃতজ্ঞতা ও ভক্তির সহিত সেই আশ্বাস বাক্যে বিশ্বাস স্থাপন করিত, এবং আহ্লাদ, কৃতজ্ঞতা ও ভক্তির সহিত কোম্পানির কার্য্য সাধনে উদ্যত হইত। কিন্তু গবর্নরজেনেরল ও প্রধান সেনাপতির প্রতিদ্বন্দ্বিতায় তাহারা আহ্লাদ, কৃতজ্ঞতা ও ভক্তি প্রকাশের সুবিধা পাইল না। তাহারা আপনাদের প্রভুর নিকটে অনেক প্রত্যাশা করিয়াছিল, শেষে সে প্রত্যাশা ভঙ্গ হইল। তাহারা সুবিচার দেখিতে পাইল না, আপনাদের প্রভুদিগকেও সুব্যবহিত, সুশৃঙ্খল ও স্নিয়মের অনুসারী বলিয়া জ্ঞান করিল না।

ইহার পর আর এক ঘটনায় সিপাহিদিগের অসন্তোষ পরিস্ফুট হইয়া উঠে *। ব্রহ্মদেশে যুদ্ধ সম্বন্ধিত হইয়াছিল। ব্রহ্মদেশবাসিগণ ব্রিটিশ সিংহের বিপক্ষে সমর সজ্জার আয়োজন করিয়াছিল। এই যুদ্ধে সিপাহি-সৈন্য পাঠাইবার প্রয়োজন হইল। সাগরের বারিরাশি অতিক্রম ভিন্ন ব্রহ্ম উপনীত হইবাব সুগম পথ নাই; এজন্য সিপাহিগণ সমুদ্রপথে যাত্রা করিতে আদিষ্ট হইল। ব্রিটিশ গবর্নমেন্ট প্রতিশ্রুত হইয়াছিলেন যে, কখনও সিপাহিদিগকে সমুদ্র যাত্রায় প্রবর্তিত করিবেন না, প্রতিশ্রুত হইয়াছিলেন যে,

* কে সাহেব, লর্ড ডালহৌসীর সহিত স্মার চার্লস নেপিয়ারের বিবাদের অব্যবহিত পরবর্তী সময় প্রগাঢ় শাস্তি-পূর্ব বলিয়াছেন। কিন্তু ঠিক এই সময়ে ৩৮ গণিত সৈন্য-দল ব্রহ্মদেশে যাইতে অসম্মত হয়: Calcutt Review, Vol. VII, : 117

সিপাহিদের ধর্মের বিরুদ্ধে, অমুশাসনের বিরুদ্ধে, চিরাগত ব্যবহার-প্রণালীর বিরুদ্ধে কখনও হস্তোত্তলনে প্রবৃত্ত হইবেন না ; কিন্তু এক্ষণে সমুদ্র-পথে ব্রহ্মদেশে যাইবার আদেশ প্রচারিত হওয়াতে সিপাহিগণ সে প্রতিশ্রুতির সন্ধক্ষে সন্দিহান হইল। ৩৮ গণিত সৈন্যগণ এই প্রতিজ্ঞা করিল যে, তাহারা কখনও সাগরবারি অতিক্রম করিবে না এবং কখনও আপনাদের ধর্ম্মাশু-শাসনের বিরুদ্ধাচারী হইয়া কোম্পানির কার্য্য করিতে অগ্রসর হইবেনা। সৈন্যদলের এই অটল প্রতিজ্ঞা দর্শনে গবর্ণমেন্ট বাঙ নিস্পত্তি করিলেন না ; তাহাদিগকে সর্ব্বপ্রকারে সন্তুষ্ট ও সর্ব্বপ্রকারে তাহাদের অমুশাসনের অমু-গত রাখিবার বন্দোবস্ত করিলেন।

লর্ড ডালহৌসীর ভারতবর্ষ পরিত্যাপের পাঁচ বৎসর পূর্বে কোম্পানির ইউরোপীয় সৈন্যের সংখ্যা কিয়ৎপরিমাণে বর্দ্ধিত হয়। কিন্তু ইঙ্গলণ্ড হইতে ভারতবর্ষের নিমিত্ত যে সমস্ত সৈন্য আইসে তাহার সংখ্যা অনেক পরিমাণে কম হইয়া পড়ে। ১৮৫২ অব্দে ভারতবর্ষের তিন প্রেসিডেন্সিতে ২৯ দল ইউরোপীয় সৈন্য ছিল ; এই উনত্রিশ দলে সর্ব্বসমেত ২৮ হাজার সৈন্য অবস্থিতি করিত। ১৮৫৬ অব্দে উহার স্থানে ২৪ দল হয়। ঐ সমুদয় দলে ২৩ হাজার সৈনিক পুরুষ অবস্থিতি করিতেছিল। এই পাঁচবৎসরে ভারতবর্ষে ব্রিটিশাধিকার অনেক পরিমাণে সম্প্রসারিত হয়। বৎসরের পর বৎসরে, এক দেশের পর অল্প দেশের মানচিত্র লোহিত বর্ণে রঞ্জিত হইতে থাকে। কিন্তু ভারতবর্ষে ব্রিটিশাধিকার বর্দ্ধিত হইলেও ভারতবর্ষে ১৮৫২ অব্দ অপেক্ষা ১৮৫৬ অব্দে তিন হাজার সৈনিক পুরুষ কম হয়। এই দুই অব্দের মধ্যবর্তী সময়ে ইঙ্গলণ্ডকে ইউরোপে একটি মহাসমরে প্রবৃত্ত হইতে হইয়াছিল ; একটি মহাসমর ইঙ্গলণ্ডকে সর্কাংশে আয়ত্ত করিয়া রাখিয়াছিল ; এজন্ত ইঙ্গলণ্ড ভারতীয় সৈন্যের সংখ্যা বর্দ্ধিত করিতে চেষ্টা পান নাই ; ইউরোপীয় সমরের নিমিত্তই অধি-কাংশ সৈন্য নিয়োজিত রাখিয়াছিলেন।

ইউরোপের রাজনৈতিক আন্দোলন বা সামরিক ঘটনা যে, ভারতবর্ষে আন্দোলনের বিষয় হয় না, ইহা মনে করা ভ্রান্তির কর্ম্ম। ইউরোপে কোন গুরুতর ঘটনা সংঘটিত হইলে, ভারতবর্ষেও তাহা আন্দোলিত হইতে থাকে, এবং ভারতবর্ষের লোকের মনেও তাহার সন্ধক্ষে কোন একটি বিশেষ ধারণা বা বিশ্বাস ক্রমে দৃঢ়রূপে অঙ্কিত হইয়া উঠে। ক্রিমিয়া যুদ্ধের সময়ে উহার

যথার্থ পরিস্ফুট হয়। ঐ যুদ্ধের সময়ে ভারতবর্ষের সকল স্থানেই ইঙ্গলণ্ড ও রুশিয়ার মধ্যে আন্দোলন উপস্থিত হয়। প্রতি বাজারে, প্রতি পলীতেই ঐ যুদ্ধের সংবাদ, রুশিয়ার সাহস ও ইঙ্গলণ্ডের পরাক্রম সকলের আলাপের বিষয় হইয়া উঠে। কিন্তু শেষে অনভিজ্ঞতা ও অদূরদর্শিতা এই আন্দোলন ক্রমে ভয়ঙ্কর করিয়া তুলে। ব্রিটিশ রাজের পরাজয়, ব্রিটিশ রাজ্যের অবনতি এই আন্দোলনে সকলের হৃদয়ে বন্ধমূল হইতে থাকে। ক্রমে সাধারণ্যে ঘোষিত হইল যে, রুশিয়া ইঙ্গলণ্ড জয় করিয়া আপনার রাজ্যের অন্তর্ভুক্ত করিয়াছে, এবং মহারানী বিক্টোরিয়া পলায়ন করিয়া, ভারতবর্ষের গবর্নরজেনেরলের নিকট আসিয়া আশ্রয় লইয়াছেন। এইরূপ অনভিজ্ঞতা-মূলক কিংবদন্তীতে সাধারণে ব্রিটিশ শাসনের প্রতি পূর্বাপেক্ষা হতাদর ও হতশ্রদ্ধ হইতে লাগিল এবং ব্রিটিশ রাজকে পূর্বাপেক্ষা হীনবল, অব্যবস্থিত ও অনৈক্যদূষিত বলিয়া মনে করিতে লাগিল। ইহার পর ক্রিমিয়া-যুদ্ধের জন্ম ভারতবর্ষ হইতে সৈন্ত লইয়া যাইবার প্রস্তাব উপস্থিত হওয়াতে সকলেই সাতিশয় শঙ্কিত হইয়া উঠিল, সকলেই আবার জাতিনাশ ও ধর্ম্মনাশের আশঙ্কায় ব্যাকুল হইয়া পড়িল। একজন ভারতবর্ষীয় সম্ভ্রান্ত ব্যক্তি এসম্বন্ধে লিখিয়াছিলেন, “ক্রিমিয়াযুদ্ধের জন্ম সৈন্ত লইয়া যাইবার অভিপ্রায় পার্লামেন্টে পরিব্যক্ত হওয়াতে ভারতবর্ষের অভিজ্ঞ ও দূরদর্শী লোক মাঝেই সাতিশয় বিস্মিত হইয়াছেন।” এই বিস্ময় অকারণে জন্মে নাই; অকারণে এই বিস্ময় ভারতবাসীর মনে স্থান পরিগ্রহ করে নাই। সূক্ষ্মদর্শিগণ ভারতবর্ষীয় সৈন্তের মানসিক ভাব স্পষ্টরূপে বুঝিতে পারিতেন। সৈন্যগণ যে, এ প্রস্তাবে সাতিশয় বিরক্ত হইয়া উঠিবে, ইহাও তাঁহারা হৃদয়ঙ্গম করিয়াছিলেন। স্মরণ্য এই অব্যবস্থিততা ও নির্ভীকতার প্রস্তাব তাঁহারা আদরসহকারে গ্রহণ করেন নাই, অথবা আদরসহকারে উহা গুনিয়া কোনরূপ আত্মলাদ প্রকাশ করেন নাই।

ডালহৌসীর শাসন-সময়ে অত্রাণ্ড অনেক গুলি ঘটনাতেও ভারতবর্ষের অভিজ্ঞ ও দূরদর্শী লোক সাতিশয় বিস্মিত হইয়া উঠেন। ডালহৌসী ১৮৫৬ অব্দের ফেব্রুয়ারি মাসে ভারতবর্ষের শাসন-কর্তৃত্ব অর্পণের হস্তে সমর্পণ করিয়া স্বদেশে যাত্রা করেন। ভারতবর্ষীয় গবর্নরজেনেরলদিগের ন্যে লর্ড ডালহৌসীর তুল্য ক্ষিপ্র-বন্দ্য ও কার্য-কুশল ব্যক্তি অতি

বিবরণ । তিনি এই ক্ষিপ্রকারিতায় ও কার্যকুশলতায় ভারতবর্ষের অভ্যন্তরীণ অবস্থার অনেক পরিবর্তন করিয়াছেন, অনেক পরিবর্তনে ভারতবর্ষকে নূতন উপাদানে এক প্রকার নূতন করিয়া সংগঠিত করিয়া তুলিয়াছেন । তিনি বাহাতে হস্তক্ষেপ করিতেন, তাহাই একাগ্র হৃদয়ে ও সম্পূর্ণ দৃঢ়তার সহিত সম্পন্ন করিয়া তুলিতেন । যে আট বৎসর কাল তাঁহার হস্তে রাজ্য-শাসনের ভার সমর্পিত ছিল, সেই কালে তিনি কখনও স্বীয় কর্তব্য-পথ হইতে রেখামাত্রও বিচলিত হন নাই । এই আট বৎসর কাল তিনি যে রাজনীতির অগ্রসরণে ও যে রাজনীতির প্রভাবে ভারতবর্ষের সমস্ত প্রদেশকে তরঙ্গায়িত করিয়া তুলিয়াছিলেন, সেই রাজনীতি তাঁহার নিজের অভ্যন্ত ও নিজের প্রবর্তিত । সুতরাং সেই রাজনীতিঅনুসারে কার্য করাতে যে ফল লাভ হইয়াছে, তাহা সর্ব্বাংশে তাঁহার নিজের প্রাপ্য । তিনি অনলসভাবে কার্য করিতেন, অকুতোভয়ে কর্তব্যপথে অগ্রসর হইতেন, এবং অবলীলায় ও অসঙ্কোচে আপনার অতীষ্ট সিদ্ধ করিয়া তুলিতেন । অত্র কোন শাসন-কর্ত্তা তাঁহার গ্রায় দৃঢ় প্রতিজ্ঞতা ও তাঁহার গ্রায় অধ্যবসায়ের সহিত কার্য করিতে পারেন নাই । দিমস্থিনিস ও ককেরো অবিসংবাদিতরূপে সর্ব্বশ্রেষ্ঠ বাগ্মী নহেন, সেক্ষপিয়র ও কালিদাস অবিসংবাদিতরূপে সর্ব্বশ্রেষ্ঠ কবি নহেন, প্রতাপসিংহ ও নেপোলিয়ন অবিসংবাদিতরূপে সর্ব্বশ্রেষ্ঠ বীরপুরুষ নহেন, কাবুর ও বিস্-মার্ক অবিসংবাদিতরূপে সর্ব্বশ্রেষ্ঠ রাজনীতিজ্ঞ নহেন ; কিন্তু ডালহৌসী ক্ষিপ্রকারী ও কার্যকুশলদিগের শ্রেষ্ঠ । তাঁহার কোনও প্রতিদ্বন্দ্বী নাই । তিনি তাঁহার সতীর্থদিগকে বহুদূর পশ্চাতে ফেলিয়া আপনার অদ্বিতীয় সাধারণের হৃদয়ে দৃঢ়রূপে অঙ্কিত করিয়া রাখিয়াছেন ।

ডালহৌসীর সময়ে অনেক গুলি অভ্যন্তরীণ উন্নতির সূত্রপাত হয় । তিনি ভারতে রেলওয়ে আরম্ভ করেন, টেলিগ্রাফের তার স্থাপন করেন, বারি দোয়াব ও গঙ্গার খাল খনন করেন, এবং সুদীর্ঘ রাজপথ প্রস্তুত করেন । তাঁহার সময়ে বিদ্যালয়-সমূহে গবর্ণমেন্টের সাহায্যদান-প্রণালী প্রবর্তিত হয় এবং তাঁহার সময়েই সাহায্য-কৃত বিদ্যালয়-সমূহ নগরে নগবে পল্লীতে পল্লীতে প্রতিষ্ঠিত হইয়া সাধারণের অজ্ঞানাঙ্ককার দূর করিতে আরম্ভ করে । ডালহৌসীর অস্থিত এই অভ্যন্তরীণ কার্য-প্রণালীর গুণে বাণিজ্যের বহুল প্রচার হইয়াছে, বিদ্যাশিক্ষার ভিত্তি দৃঢ়তর হইয়াছে, এবং ভারত-

বর্ষের সকলে এক উদ্দেশ্যে এক স্বত্রে সম্মিলিত হইয়া, একপ্রাণ হইতে অভ্যাস করিতেছে।

ডালহৌসী জাতীয় ভাব ও জাতীয় চরিত্রে উন্নত ও অনমনীয় ছিলেন। তিনি সকল বিষয়ই ইঙ্গরেজী ভাবে ইঙ্গরেজী চক্ষে চাহিয়া দেখিতেন, সকল বিষয়েরই ইঙ্গরেজী ভাবে ইঙ্গরেজী চক্ষে বিচার করিতেন। তাঁহার হৃদয় দৃঢ়তর ও সুব্যবস্থিত ছিল, মানসিক ভাব সর্বপ্রকারে অতুলনীয় কার্যকুশলতার অদ্বিতীয় অবলম্ব ছিল। তিনি এই একটি সত্য দৃঢ়রূপে মনোমধ্যে অঙ্কিত করিয়া রাখিয়াছিলেন যে, ইঙ্গরেজী শাসন-প্রণালী, ইঙ্গরেজী আইন, ইঙ্গরেজী শিক্ষা ও ইঙ্গরেজী ব্যবহার-পদ্ধতি, ভারতীয় শাসন-প্রণালী, ভারতীয় আইন, ভারতীয় শিক্ষা ও ভারতীয় ব্যবহার-পদ্ধতি অপেক্ষা সর্বাত্মে শ্রেষ্ঠ। তিনি সর্বাস্তঃকরণে—সর্ব প্রকার দৃঢ়তা, অটলতা ও স্থিরতার সহিত ঐ সত্যটি কার্যে পরিণত করিয়া তুলিতে উদ্যত হইয়াছিলেন। তিনি স্থির করিয়াছিলেন যে, ভারতমানচিত্রের সমস্ত অংশ লোহিতবর্ণে রঞ্জিত হইলে ইঙ্গলণ্ড ও ভারতবর্ষ, উভয়েরই প্রকৃত পক্ষে মঙ্গল হইবে। এই ধারণা ও এই বিশ্বাস তাঁহার হৃদয়ে সম্পাদিত হইয়াছিল, ধীরে ধীরে কার্য-পথ প্রদর্শন করিতেছিল, ভবিষ্য সুখ ও ভবিন্য আশার মনোমোহন দৃশ্য সম্মুখে বিস্তার করিয়াছিল, এবং শেষে অব্যাহত বেগে ও অনমনীয় বিক্রমে আপনার কৃতকার্য্যতার আপনাই গৌরবান্বিত হইয়া উঠিয়াছিল। তিনি এই ধারণায় এতদূর আস্থাবান হইয়াছিলেন, এই ধারণামুসারে কার্য্য করিতে এতদূর আগ্রহান্বিত হইয়া উঠিয়াছিলেন, সংক্ষেপে এই ধারণার অনুসারী কার্য্য করিলে যে, মহৎ ফল লাভ হইবে, তদ্বিষয়ে তাঁহার এতদূর দৃঢ় বিশ্বাস জন্মিয়াছিল যে, তিনি কিছুতেই বিচলিত বা পরাশ্রুত হন নাই। রাজ্যশাসনবিভাগের সমস্ত প্রদান কন্মচারি তাঁহার বিরুদ্ধে দণ্ডয়মান হইলেও তাঁহার ঐ বিশ্বাস অনুমাত্রও বিচলিত হইত না। যে সময়ে কয়েক জন ব্যতীত, আর সকল প্রধান প্রধান রাজ পুরুষ প্রাচীন রাজনৈতিক মত পরিভাগ পূর্বক অভিনব রাজনৈতিক মতে দীক্ষিত হইয়াছিলেন, ভারতীয় রাজ্য-শাসন-ক্ষেত্রে সেই সময়ে তাঁহার আধিপত্য প্রসারিত হয়। মালকম, এলফিন্-ষ্টোন ও মেট্‌কাফ যে রাজনৈতিক মত্রে দীক্ষিত হইয়াছিলেন, যে রাজনৈতিক মত পরিপোষণ করিয়াছিলেন; সে মত্রে ও সে মত্রে তাঁহার শাসন-

সময়ে সূদূরে অপসারিত হইতে থাকে । তিনি যে পথে পদার্পণ করিয়াছিলেন, যে মতের অনুসরণ করিয়াছিলেন ও যে মস্ত্রে দীক্ষিত হইয়াছিলেন, তাঁহার সহযোগিগণের অনেকে সেই পথে পদার্পণ করেন, সেই মতের অনুসরণ করেন ও সেই মস্ত্রে দীক্ষিত হইয়া উঠেন । এই শিষ্যদল লইয়া ডালহৌসী আপনার আশাহুরূপ কার্যসাধনে প্রবৃত্ত হন, এবং এই শিষ্যদলের শিরঃস্থানীয় হইয়া, তিনি ধীরে ধীরে একে একে আপনার অভীষ্ট কার্য সূসম্পন্ন করিয়া তুলেন ।

ডালহৌসী যথেষ্টাচার-প্রকৃতির লোক ছিলেন । অহম্মুখতা, একাগ্রতা ও অনাশ্রবতায় তিনি সর্বদা অনমনীয়, অজ্ঞেয় ও অবিচলিত থাকিতেন । তাঁহার ইচ্ছা, কিছুতেই নিবারিত বা সংযত হইত না । অসাধারণ আত্মগৌরবে উহা সর্বদা উন্নত থাকিত, অটল উৎসাহে উহা কার্য-পথে অগ্রসর হইত, এবং সমুদয় বিঘ্নবিপত্তি অতিক্রম পূর্বক উহা লক্ষ্যস্থলে উপনীত হইয়া আপনার অভীষ্ট ফল লাভ করিত । ডালহৌসীর ক্ষমতা ও ডালহৌসীর যথেষ্টাচার সর্বদা বিমুক্তভাবে বিমুক্ত পথে কার্য করিতে অগ্রসর হইত । ডালহৌসী এই ক্ষমতা ও যথেষ্টাচারের বলে বিপুল উৎসাহের সহিত আপনার সমস্ত কার্য সম্পন্ন করিয়া তুলিতেন । ডালহৌসীর প্রকৃতি-সিদ্ধ একটি মহদোষে তাঁহার রাজনীতি অনেক স্থলে কলঙ্কিত ও দূষিত হইয়াছে, তাঁহার অতাবনীয় কৃতকার্যতাও অনেক স্থলে অমৃতের বিনিময়ে গরলধারা উল্লসিত করিয়াছে । যাহার কল্পনা ও প্রতিভা-শক্তি তেজস্বিনী নহে, তিনি কখনও প্রকৃষ্ট পদ্ধতি-ক্রমে ভারতবর্ষ শাসন করিতে পারেন না । ভারতবর্ষের সম্বন্ধে ডালহৌসীর এই কল্পনা বা প্রতিভা-শক্তি কিছুই ছিল না । যাহার কল্পনার আভাস নাই, প্রতিভা-শক্তির বিকাশ নাই, তিনি বহু বৎসরের অভিজ্ঞতা-বলে সম্প্রদায়বিশেষের জাতীয় চরিত্র বুঝিতে পারেন । কিন্তু কল্পনা ও প্রতিভা-শক্তি যাহাকে পৌরবাধিত করিয়া তুলিয়াছে, তিনি অতি অল্প আয়াসে ও অল্প সময়েই ঐ জাতীয় চরিত্র সুপ্রণালী ক্রমে জানিতে পারেন । ডালহৌসী এই দুইয়ের একটিরও অধিকারী হন নাই, এই দুইয়ের একটিও তাঁহাকে মইয়ান্ বা গৌরবাধিত করিয়া তুলে নাই । সুতরাং তিনি যে রাজ্য-শাসনে ব্যবস্থাপিত হইয়াছিলেন, যে রাজ্যের লোকদিগের মধ্যে তাঁহার ভবিষ্য কীর্তি আবদ্ধ হইয়াছিল, এবং যে রাজ্যের

তিনিই একমাত্র বিধাতা হইয়া উঠিয়াছিলেন, সে রাজ্যের প্রকৃতি ও সে রাজ্যের লোকের হৃদয়গত ভাব তাঁহার কখনও পরিজ্ঞাত হয় নাই। যে ধারণা যথেষ্টাচার দেশে যথেষ্টাচার শাসন প্রণালীর সম্বন্ধে সম্যক্ প্রয়োজিত হয়, তিনি কেবল সেই ধারণার অধিকারী হইয়াছিলেন। ভারতবর্ষীয়গণ তাহাদের প্রাচীন কিংবদন্তীতে কিরূপ বিশ্বাস স্থাপন করে, প্রাচীন অল্পশাসনসমূহকে কিরূপ সম্মান করে, তাহা তিনি জানিতেন না। ভারতবর্ষীয়গণ আপনাদের প্রাচীন বংশের প্রতি যে শ্রদ্ধা ও সম্মান প্রদর্শন করে, সে শ্রদ্ধা ও সম্মানের প্রতি তিনি কখনও আস্থা দেখাইতেন না। ভারতবর্ষীয়গণ তাহাদের চিরমাত্র ব্যবহার-পদ্ধতি ও চিরাগত সংস্কারের প্রতি কিরূপ বিশ্বাসী, তাহা তিনি বুঝিতেন না। আপনাদের প্রাচীন শাসন-প্রণালী অসম্পূর্ণ ও দোষাক্রান্ত হইলেও সাধারণে পরিশুদ্ধ ইঙ্গরেজী পদ্ধতি অপেক্ষাও যে, তাহাতেই অধিকতর অল্পরক্ত থাকে, তাহা বুঝিতে তাঁহার কোন কল্পনা বা প্রতিভা ছিল না। কোন কল্পনা বা প্রতিভা তাঁহাকে এই সমস্ত বৈষয়িক জ্ঞান বা এই সমস্ত বৈষয়িক ব্যাপারের গূঢ়ত্ব নির্ণয়ের অধিকারী করে নাই, কোন কল্পনা বা প্রতিভা তাঁহাকে বহুদর্শী, বহুগুণাবিত ও বহুজ্ঞানী করিয়া তুলে নাই। যে অধিপতি পুরুষ-পরম্পরায় আপনায় রাজ্যে স্বাধীনতা ভোগ করিয়া আসিতেছেন, উচ্চতর গৌরব, মহত্তর সম্মান, উন্নততর আদর ষাঁহাকে পুরুষপরম্পরায় শতগুণে গৌরবান্বিত করিয়া তুলিয়াছে, এক জন বিদেশী ও বিধর্মীর আদেশে সেই রাজ্যাধিপতির রাজ-সম্মান হঠাৎ পয়াদস্ত ও হঠাৎ তাঁহার গৌরব, সম্মান ও আদর বিগত কালের গর্ভশায়ী হইলে সাধারণে যে, তাহাতে বিরাগ প্রদর্শন করিয়া থাকে, তৎসম্বন্ধে তাঁহার কোনও ধারণা ছিল না; কিংবা আপনায় বংশাহুগত স্বাধীনতা বিনষ্ট হইলে এবং আপনি পরধর্মীক্রান্ত পর পুরুষের ইচ্ছায় নিদারুণ দৈশ্রুণ্ড হইলে, সেই রাজ্যাধিপতি কিরূপ মর্ষবেদনায় অধীর হন, কিরূপ বিরাগ, কিরূপ ক্ষোভ তাঁহাকে নিরন্তর দগ্ধ করে, এবং কিরূপ যাতনা তাঁহার চিরসুখ প্রতিহিংসাবৃত্তিকে উদ্দীপ্ত করিয়া তুলে, তাহা তিনি কখনও অনুধাবন করিতেন না। তিনি অপরের চক্ষে দেখিতেন না, অপরের মস্তিষ্কে চিন্তা করিতেন না, এবং অপরের হৃদয়েও অনুভব করিতেন না। তিনি জাতীয় বিশ্বাস ও জাতীয় অনুভূতি পাদদলিত করিয়া, নিজের ধারণা, নিজের বিশ্বাস ও নিজের অতিপ্রায় অনুসারে কার্য করিতে ভাল বাসিতেন।

ডালহৌসী আপনাব এইরূপ অদ্বিতীয় ধারণা ও অদ্বিতীয় বিশ্বাসের বশবর্তী হইয়াই ব্রিটিশ কোম্পানির অধিকার প্রসারিত করিতে উদ্যত হন, এবং এইরূপ ধারণা ও এইরূপ বিশ্বাসবলেই চিরাগত কিংবদন্তী, চিরাগত অনুশাসন ও চিরাগত ব্যবহার পদ্ধতির মূলে কুঠারাঘাত করিয়া অনেক রাজ্যের স্বাধীনতা ও অনেকের রাজ-সম্মান অপহরণ করেন। মহারাজ রণজিৎ সিংহ ভারতবর্ষের মানচিত্র দেখিতে দেখিতে হঠাৎ বলিয়া উঠিয়াছিলেন যে, এই মানচিত্রের সমুদয় স্থলই ক্রমে লোহিতবর্ণ হইয়া যাইবে। এ ভবিষ্যবাণী ডালহৌসীর রাজ্যশাসনে অনেকাংশে ফলবতী হয়। ডালহৌসী বিজয়লক্ষ্মীর প্রসাদ বলিয়া, পঞ্জাবে ব্রিটিশ পতাকা উড্ডীন করেন, প্রকৃত উত্তরাধিকারীর অভাব দেখাইয়া, সেতারা, কাঁসী ও নাগপুর ব্রিটিশ রাজ্যের সহিত সংযোজিত করেন, এবং অভ্যুত্থার ও অবিচারের হেতু প্রদর্শন করিয়া, অযোধ্যায় আপনাদের আধিপত্য প্রসারিত করিয়া তুলেন। ভারতে ব্রিটিশাধিকার এইরূপে কয়েকটি সুবিস্তৃত ও পরাক্রান্ত রাজ্যে পরিপুষ্ট হয়। ইহার পর প্রাপ্য অর্থের বিনিময়ে বেয়ার হস্তগত করিয়া, ডালহৌসী-রাজনৈতিক ক্ষেত্রে আর একটি অকল্পিত-পূর্ব বুদ্ধি বা চাতুরী দেখাইয়া সকলকে চমকিত করেন। ডালহৌসী কেবল এইরূপে রাজ্যগ্রহণ করিয়াই ক্ষান্ত থাকেন নাই, নানা সাহেবের বৃত্তি বন্ধ করিয়াও একটি মহৎ অনিষ্টের সূত্রপাত করেন। এইরূপে সমবেদনার অভাবে, বহুদর্শিতার অভাবে ও প্রজাসাধারণের হৃদয়গত ভাবের পরিজ্ঞানের অভাবে ডালহৌসী হিন্দু, মুসলমান, উভয় সম্প্রদায়কেই ব্রিটিশ গবর্ণমেন্টের বিরোধী করিয়া তুলেন। আপনাব বৃত্তি বন্ধ হওয়াতে নানা সাহেব ব্রিটিশ গবর্ণমেন্টের পরম শত্রু হন, কাঁসী অধিকৃত হওয়াতে লক্ষ্মীবাইর হৃদয়ে নিদারুণ ক্রোধাগ্নির সঞ্চার হয়, এবং অযোধ্যা কোম্পানির মুল্লুক হওয়াতে বাঙ্গালার সিপাহিগণ দারুণ মর্ষপীড়ায় অধীর হইয়া পড়ে। ডালহৌসী এইরূপে ধীরে ধীরে ভারতীয় ক্ষেত্রে ভবিষ্য বিপ্লবের বীজ ^{বপন} পবন করেন, এবং অর্গোরব ও অনুদারতায় ভারত সাম্রাজ্য ক্রমে ভারাক্রান্ত করিয়া তুলেন। পররাজ্যগ্রহণে ও স্বাধীন রাজগণকে সাধারণ লোকের অবস্থায় পাতিত-করণে যে, সাধারণে গবর্ণমেন্টকে অবজ্ঞার চক্ষে দেখিতে থাকে, সেই গবর্ণমেন্টের ক্ষমতা পূর্বদস্ত করিবার সুযোগ অনুসন্ধানে প্রবৃত্ত হয়, তাহা অনেকেরই স্বীকার করিয়া থাকে। পররাজ্যগ্রহণবিষয়িণী নীতির সম্বন্ধে

কাণ্ডেন ক্রস্ একদা রবর্ট সাউদিকে কহিয়াছিলেন, “যদি ভারতবর্ষে আমাদের রাজত্ব বিধ্বস্ত হয়, তাহা হইলে তথায় আমাদের কীন্তুশ্রুত স্বরূপ কেবল কতকগুলি ভগ্ন বোতল ও ছিপি মাত্র থাকিবে। সুমুদ্রতীর-বর্তী সমস্ত বন্দরেই আমাদের গবর্ণমেন্ট সাধারণের শ্রদ্ধাস্পদ হইয়াছেন, যেহেতু সাধারণে উন্নতি-শীল বাণিজ্য হইতে মহৎ উপকার পাইতেছে। কিন্তু রাজ্যের অভ্যন্তরে আমরা অনাদৃত ও অবজ্ঞাত হইতেছি। এখানে দৌরাভ্যাকর পদ্ধতি বিরাজমান রহিয়াছে, আমরা দশ ভাগের নয় ভাগ গ্রহণ করিতেছি, ভারতবর্ষীয়গণ ক্রমেই হ্রস্তসর্বশ্ব হইয়া পড়িতেছে। ইহাদের কেহ কেহ আমাদের শাসন-পদ্ধতিকে হ্রস্ব সত্বে তুলনা করিয়া থাকে। কারণ, উহা ধীরে ধীরে গতি প্রসারিত করে; প্রবল তেজের আঘাতে উহার গতি অল্পভূত হয় না, কিন্তু উহা সর্বদাই তাৎপরিগকে সৃষ্টিকার দিকে অবনত করিতে থাকে *।” আর এক জন হিন্দুদর্শী স্নেহলব্ধ পরব্রাহ্ম-গ্রহণসম্বন্ধে গাধিয়াছিলেন, “কর গ্রহণ হইতে একবারে বিরত হওয়া আমাদের পক্ষে অসম্ভব। কিন্তু আমরা ভারতবর্ষীয়দিগকে উৎপীড়ন না করিয়া কাজ করিতে পারি। যদিও আমরা তাহাদের প্রণয় লাভের অধিকারী না হইতে পারি, তথাপি তাহাদের অবজ্ঞা অব্যাহত রাখিবার কোনও প্রয়োজন নাই। সমুদয়কে এক ভূমিতে এক অবস্থায় পাতিত করা আমাদের উচিত নয়। উহাতে তাহাদের সংস্কার বিচলিত হয়, ভয় পরি-বন্ধিত হয় এবং উপাধি ও সম্পত্তি হরণাশঙ্কা অধিকতর হইয়া উঠে। আমরা এক্ষণে আমাদের ভ্রম ও তাহার শোচনীয় পরিণাম বুঝিতে পারিয়াছি। জীন পল রিচর্ একদা কহিয়াছিলেন, “বহুদর্শিতা একটি উৎকৃষ্ট বিদ্যালয়, কিন্তু ঐ বিদ্যালয়ের বেতন নিতান্ত গুরুতর”। আমরা এমন উপদেশ পাইয়াছি যে, তাহা লাভকর হইবে ও বিস্মৃত হওয়া ভয়ঙ্কর বিপজ্জনক। এই উপদেশ লাভ করিতে আমরাদিগকে অনেক ব্যয়ভার বহন করিতে হইয়াছে; যদি আমরা এই উপদেশে হতাশ হই, তাহা হইলে উহার দশগুণ ব্যয় স্বীকার করিতে হইবে। এই উপদেশ লাভ করিতে আমরা গত কয়েক মাস (সিপাহিবুদ্ধের সময়) অবিশ্রান্ত উৎকর্ষা ও মনঃপীড়ায় অতিবাহিত করিয়াছি। এই কয়েক মাস, পাঠে আমাদের প্রাচ্য শাসনদণ্ড আমরাদিগকে হইতে বিচ্যুত হইয়া পড়ে, এই আশঙ্কায় নিরস্তর

কম্পিত হইয়াছি। আমরা আমাদের বিপক্ষদের আকস্মিক ও ভয়ঙ্কর অন্তঃসঞ্চালনে ভীত হইয়াছি, আমরা আমাদের অগৌরবকর বিজয়-বার্তাও অবনতমস্তকে শ্রবণ করিয়াছি। এই উপদেশের চিত্র সম-সাময়িক ইতিহাসের যৌর অঙ্ককারময় পক্ষে পরিব্যক্ত হইয়াছে। আমাদের বিশ্বাস, উহা কখনও বিস্মৃতি-সাগরে নিমজ্জিত হইবে না; যে পর্যন্ত নিহত বোদ্ধ্বর্ণের নাম তাহাদের দুঃখিনী বিধবা পত্নী ও শোক-সম্পন্ন সন্তানদিগের হৃদয় হইতে অপসারিত না হয়, যে পর্যন্ত এই বিপ্লবের দর্শকগণ—যাঁহারা এই বিপ্লব নিরস্ত করিতে যত্ন করিয়া-ছিলেন, এবং ভয়ঙ্কর শোণিত-শ্রোত দর্শনে রোমাঞ্চিত হইয়াছিলেন,— এই নর্ত্যভূমি হইতে বিচ্ছিন্ন হইয়া, কালের ছুঁবার পরাক্রমে পঞ্চভূতে মিশ্রিত না হন, যে পর্যন্ত আমাদের যথার্থ উপকারী শাসনে আফ্লাদ প্রকাশ করিয়া, ভারতবর্ষীয়গণ আমাদের পূর্বতন অব্যবহিততার সম্বন্ধে আন্দোলন করিতে বিরত না হয়; পক্ষান্তরে যে পর্যন্ত স্বাধীন রাজ্যের অধিবাসিগণ তাহাদের আপন আপন অধিপতিগণের শাসনের স্তায় ইঙ্গরেজেরশাসনেও অমূরক্ত থাকিতে অভিলাষী না হয়, যে পর্যন্ত ভারতবর্ষীয় বিপ্লব অন্তায়রূপে রাজ্যগ্রহণের একমাত্র ফল মনে করিয়া আমরা কর্তব্যপথে অগ্রসর না হই, সে পর্যন্ত কখনও উহা স্মৃতিপট হইতে অপসারিত হইবে না * ”।

কেবল ডালহৌসীর রাজ্যগ্রহণপ্রণালীকে লক্ষ্য করিয়াই চিন্তাশীল ব্যক্তিগণ এইরূপ হৃদয়-ভেদি-বাক্য-পরম্পরা লিপিবদ্ধ করিয়াছিলেন, কেবল ডালহৌসীর রাজ্যগ্রহণ-প্রণালীতেই দূরদর্শী ব্যক্তিগণের হৃদয় এইরূপ স্কন্ধ ও তরঙ্গায়িত হইয়া উঠিয়াছিল। ডালহৌসীর অহস্মুখতা, ডালহৌসীর অনাশ্রবতা, ইহার উপর ডালহৌসীর সমবেদনার অভাবই ভারতীয় ক্ষেত্রে এইরূপ শোচনীয় রাজনীতির কার্য-প্রণালী প্রবর্তিত করে। এক জন স্পষ্টবক্তা ইঙ্গরেজ ডালহৌসীর রাজ্যশাসনের সমালোচনায় লিখিয়াছেন, “তিনি (ডালহৌসী) উৎকৃষ্টতর ও মহত্তর কর্মচারী হইতে পারেন, কিন্তু রাজ্যশাসন-বিষয়ে অতি নিকৃষ্ট ও অপদার্থ ব্যক্তি †”। আমরা

• Westminster Review, New Series. Vol. XXII., p. 156-157: Indian Annexations: British Treatment of Native Princes.

† Evans Bell. Empire in India, p. 26.

এই কঠোর বাক্যের পুনরুক্তি করিয়া ভারতবর্ষের এক জন প্রধান শাসনকর্তাকে কলঙ্কিত করিতে চাহি না। ডালহৌসীর অনেকগুলি গুণ ছিল, কিন্তু রাজ্যাশাসনকার্যের সমুদয় স্থলে ঐ গুণসমষ্টির বিকাশ লক্ষিত হয় নাই। তাঁহার স্বজাতির অনেকে যে ভাবে ভারতবর্ষ শাসন করিতে চাহিতেন, যে কার্য্য করিয়া ভারতবর্ষীয়দিগকে প্রভুতন্ত্র ও সদা সন্তুষ্ট করিতে প্রয়াস পাইতেন, তিনি সেই সকল ভাব ও সেই সকল কার্যের বিরুদ্ধাচরণে ত্রুটি করেন নাই। জন মালকম্ একদা মেজর ষ্টুয়ার্টকে লিখিয়াছিলেন, “সমস্ত ভারতবর্ষকে কতকগুলি জেলাতে বিভক্ত কর, আমি স্পষ্টাক্ষরে নির্দেশ করিতেছি, আমাদের সাম্রাজ্য পঞ্চাশবর্ষ কাল থাকিবে। কিন্তু যদি আমরা ভারতবর্ষীয় স্বাধীন রাজ্যগুলি অব্যাহত রাখি, তাহা হইলে যতকাল ইউরোপে আমাদের নৌযুদ্ধের প্রাধান্য অপ্রতিহত রহিবে, তত কাল আমরা ভারতবর্ষে অবস্থিতি করিতে পারিব, যত দিন আমাদের এই প্রাধান্য থাকিবে, তত দিন কোন ইউরোপীয় শত্রু আমাদের প্রাচ্য সিংহাসন বিচলিত করিতে পারিবে না *”। মেজর ইভান্সবেল এক সময়ে নির্দেশ করিয়াছিলেন “ভারতবর্ষ তরবারির বলে অধিকৃত হইয়াছে, এবং ভবিষ্যতেও উহা তরবারির বলে রক্ষিত হইবে।” এই কথায় যে, আমি কিরূপ বিরক্ত ও হতশ্রদ্ধ হইয়াছি তাহা বলিবার নহে। যদি উহা এই অর্থ প্রকাশ করে যে, ভারতবর্ষে আমাদের সমস্ত ক্ষমতা ও সমস্ত অধিকার কেবল সৈন্য দ্বারা রক্ষিত হইতেছে, তাহা হইলে ঐ কথা আমি অসত্য বলিতেছি। যদি উহা এই অর্থ প্রকাশ করে যে, আমরা কেবল সৈন্য দ্বারাই ভারতবর্ষ শাসন করিতে পারি, প্রজাসাধারণের অধিকার, অহুভূতি ও সামাজিক রীতিতে অনাদর দেখাইয়া কেবল সৈনিক বলের সাহায্যেই আমাদের সাম্রাজ্য ও ক্ষমতা অপ্রতিহত রাখিতে পারি, তাহা হইলেও আমি উহা অসত্য বলিয়া নির্দেশ করিতেছি। ভারতবর্ষ এক মাত্র অসির সাহায্যেই রক্ষিত হইবে, সুতরাং এই অসিতেই আমাদের বিশ্বাস স্থাপন করা উচিত; ব্রিটিশ জাতির করণ্যত অসিতে আমাদের প্রকৃত ক্ষমতা রহিয়াছে, আশ্চর্যের বিষয় এই যে, রাজ্যাধিপতিগণের হৃদয় এইরূপ ধারণা ও এইরূপ মতেই পরিপূর্ণ রহিয়াছে।”

* Kaye, Life and Correspondence of Major-General Sir John Malcolm, Vol. II., p. 372.

“আমাদের সাম্রাজ্যের প্রকৃত ক্ষমতা, আমাদের উদারতা ও আমাদের সুশাসনের উপরেই নির্ভর করিতেছে। অধিবাসীদিগের সাধু মত ও সাধু ইচ্ছার উপর ক্ষমতা প্রকাশ করিলে, ত্রায়ানুগত শাসনপ্রণালীদ্বারা আমাদের প্রাধাত্যের উপর সাধারণের প্রগাঢ় বিশ্বাস ও আস্থা জন্মাইলে আমাদের সাম্রাজ্য অটল থাকিবে।”

“১৮৪৮ অব্দে কলিকাতায় লর্ড ডালহৌসীর ভারতসাম্রাজ্যের শাসনদণ্ড গ্রহণের পর হইতেই সমস্ত ভারতবর্ষে, সমস্ত সম্প্রদায়ের মধ্যে অসন্তোষ ও বিরাগ প্রবলবেগে বৃদ্ধি পাইয়াছিল। যেখানে সাধারণ্যে অসন্তোষ ও অবিশ্বাস বিরাজ করিতেছে, সেখানে বিপ্লবসংঘটন জন্ত কোন একটি সামান্য সূত্রের অভাব উপস্থিত হয় না। সমুদয় বিষয়েই ক্রোধোদ্ভেকের কারণ হইতে পারে, সমুদয় বিষয় লক্ষ্য করিয়াই উন্নত ভাবে চীৎকার করা যাইতে পারে। অধিনেতা ও পরিচালকগণ বিপ্লবের প্রবর্তনার জন্ত সমুদয় বিষয়েই গ্রহণ করিতে পারে, সমুদয় বিষয়েই ক্রোধোদ্ভুক্ত সম্প্রদায়ের মস্তিষ্কে অভাবনীয় জ্ঞান ও ধারণা প্রবেশিত করিতে পারে। যেখানে অসন্তোষ, সন্দেহ ও কৌতূহল একাধিপত্য করিতেছে, সেখানে বসায়ুক্ত টোটাও লোকদিগের উদ্বুদ্ধ করিতে পারে, কঠোরপ্রণালীও উদ্বুদ্ধ করিতে পারে, আধুনিক ভবিষ্যদ্বাণীও উদ্বুদ্ধ করিতে পারে, সংক্ষেপে সমুদয় বিষয়েই উদ্ভেকের উৎপাদক হইতে পারে *”।

লর্ড ডালহৌসীর মস্তিষ্কে কখনও এরূপ জ্ঞান সঞ্চারিত হয় নাই, এরূপ জ্ঞান ও এরূপ কল্পনা কখনও তাঁহাকে সমবেদনা ও বহুদর্শিতা দেখাইতে প্রবর্তিত করে নাই। ডালহৌসী স্বৈরাচারের প্ররোচনায় অযোধ্যা অধিকার করিয়া যে বিপ্লবের বীজ রোপণ করেন, কালক্রমে তাহা হইতে একটি প্রকাণ্ড বৃক্ষ উৎপন্ন হয়। পঞ্জাবজয়ের পর, স্যার হেনরি লরেন্স তাঁহার স্বাভাবিক প্রতিভা-বলে স্পষ্ট দেখিতে পাইলেন যে, এই নববিজিত রাজ্যে ব্রিটিশ গবর্নমেন্ট কখনই সম্মানিত ও সমাদৃত হইবেন না। স্বাধীনতাপ্রিয় শিখগণ হঠাৎ ফিরঙ্গিদের অধীনে ব্যবস্থাপিত হওয়াতে প্রথমে অবশ্যই আপনাদিগকে অপদস্থ ও অপমানিত জ্ঞান করিবে। সুতরাং এই রাজ্যে ইউরোপীয় সৈন্যদ্বারা সুরক্ষিত না হইলে অন্তঃশত্রু ও বহিঃশত্রুর আক্রমণ নিরন্তর করিবার সুবিধা হইবে না। এই বিবেচনায় তিনি বহুসংখ্য

ইউরোপীয় সৈন্য পঞ্জাবে একত্র করেন। অবশিষ্ট কয়েক দল সৈন্য স্থানান্তরে ব্যবস্থাপিত হয়। সূতরাং তাঁহাকে কোম্পানির অধিকৃত অন্যান্য স্থান রক্ষার জন্য বহুসংখ্য ভারতীয় সৈন্তের উপরই নির্ভর করিতে হয়। ইহার পর ইঙ্গলণ্ড ক্রিনিয়া যুদ্ধের জন্য ভারতবর্ষীয় সৈন্য প্রার্থনা করেন। সূতরাং সাধারণে ভাবিতে লাগিল, ইঙ্গলণ্ডের লোক-সংখ্যা ও সৈন্যসংখ্যা অতি অল্প হইয়া পড়িয়াছে, এই জন্য তাঁহারা সকল বিষয়েই ভারতবর্ষীয়দিগের সাহায্য প্রার্থনা করিতেছেন। ভারতবর্ষীয় সৈন্তের সহায়তা ব্যতীত তাঁহাদের কোনও কার্য সাধিত হয় না * ।

ইহার পর যখন অযোধ্যা ব্রিটিশ রাজ্যে সংযোজিত হয়, নবাব ওয়াজিদ আলি যখন ব্রিটিশ কোম্পানির পেম্পন্ গ্রহণ করিয়া অতিশয়নায়েক পৰ্য্যবসিত হন, তখন সাধারণের বিরাগ আরও বাড়িয়া উঠে। পঞ্জাবের শায় অযোধ্যা সীমান্ত রাজ্য নহে, সূতরাং বহিঃশত্রুর আক্রমণ নিবারণ জন্য তথায় বহুসংখ্য সৈন্য রাখিবারও প্রয়োজন দেখায় নাই। ইঙ্গরেজেরা স্বল্পমাত্র সৈন্য আনিয়া অযোধ্যায় ব্রিটিশ পতাকা উড্ডীন করেন, এই স্বল্পমাত্র সৈন্তের উপরেই অধিকৃত রাজ্যের রক্ষার ভার সমর্পণ করিয়া নিশ্চিত হন। এইরূপে অসময়ে অতর্কিতভাবে অযোধ্যায় ব্রিটিশ পতাকা উড্ডীন হওয়াতে সাধারণে সাতিশয় চিন্তাকুল হইল। তাহারা দেখিল, ইঙ্গরেজেরা অবশেষে ভারতবর্ষের একট প্রাধান মুসলমান রাজত্বের ধ্বংস করিলেন, তাহাদের প্রভু-শক্তি ক্রমেই সংহারিণী মূর্তি পরিগ্রহ করিয়া বিকট ভাবে মুখব্যাদান করিতে লাগিল। ক্রমে ক্রমে ভারতবর্ষের সমুদয় রাজাই উহাৰ মুখে পতিত হইবে, ক্রমে ক্রমে ভারত-মানচিত্রের সমুদয় অংশই লোহিত বর্ণে রঞ্জিত হইয়া উঠিবে। সাধারণে ইহাতে সন্তুষ্ট হইল না, আপনাদের দেশীয় রাজগণকে অতল সাগরে নিমজ্জিত হইতে দেখিয়া, আপনাদের সমুদয় বিষয়ই বৈদেশিক শ্বত পুরুষের হস্তগত মনে করিয়া, তাহারা ক্ষোভে, রোষে ও অপমানে সাতিশয় আকুল হইয়া উঠিল।

অযোধ্যা অধিকৃত হওয়াতে সিপাহিরাও অনেক গুলি কারণে অতিশয় বিরক্ত হইয়া উঠিয়াছিল। বাংলার সিপাহিগণের অধিকাংশই অযোধ্যার

* ক্রিনিয়াযুদ্ধের সময় ভারতবর্ষে অর্থ সংগৃহীত হইতে থাকে। ইহাতে লোকে আবার ভাবিতে লাগিল ইঙ্গলণ্ডের কেবল সৈন্যসংখ্যার হ্রাস হয় নাই; অর্থেরও হ্রাস হইয়াছে। Kaye, Sepoy War, p. 345, note,

লোক। অযোধ্যার প্রতি পল্লীতেই ব্রিটিশ কোম্পানির প্রদত্ত পরিচ্ছদ-ধারী ও ব্রিটিশ কোম্পানির কার্য্যান্তরক্ক সিপাহিদিগের আত্মীয়গণ বাস করে। এই সিপাহিগণ সম্ভ্রান্ত হিন্দুবংশীয়, আপনাদের বংশমর্যাদায় আপনারা উন্নত। মুসলমান রাজত্ব বিনষ্ট হওয়ার্তে তাহাদের জাতীয় গৌরবের কোন হানি হয় নাই; ওয়াজিদআলি সিংহাসন-ভ্রষ্ট হওয়ার্তে তাহারা আপনাদিগকে সম্মানভ্রষ্ট মনে করে নাই। কিন্তু অগ্র কারণে তাহাদের হৃদয়ে আঘাত লাগিয়াছিল। অযোধ্যা যত দিন পররাষ্ট্র-শ্রেণীতে নিবেশিত ছিল, তত দিন তাহারা আপনাদের দেশে সাধারণের আদরের পাত্র হইত, এবং সাধারণের নিকটে গৌরবান্বিত থাকিত। কোম্পানির কর্ম গ্রহণ করাতে স্বদেশে অনেক বিষয়েই তাহাদের অনেক স্তুবিধা ছিল। সকলেই তাহাদিগকে সম্মান করিত, সকলেই তাহাদিগকে সাহায্যদানে উন্মুখ হইত, সকলেই তাহাদের মনস্তৃষ্টিসা ব্যগ্র থাকিত। স্বদেশে কোনরূপ অভ্যাচার বা অবিচার হইলেও তাহাদের কোনও অনিষ্ট হইত না। তাহারা ব্রিটিশ রেসিডেন্টের অনুগ্রহে সপরিবারে সুখে কালাতিপাত করিত। স্মৃদ্ধর্শী শ্রী হেনরি লরেন্স একদা লিখিয়াছিলেন, “সিপাহিরা পূর্বে সমাজে যেরূপ গণনীয় ছিল; এক্ষণে সেরূপ নাই। তাহারা পর-রাজ্য-গ্রহণে বিরাগ দেখাইয়া থাকে। যেহেতু, প্রত্যেক রাজ্য ব্রিটিশ সাম্রাজ্যের সহিত সংযোজিত হইলে কার্য্য ক্ষেত্র বিস্তৃত হইয়া পড়ে, সেই সঙ্গে ব্রিটিশ গবর্নমেন্টের শত্রু-সংখ্যা অন্নতর এবং তৎপ্রযুক্ত সিপাহির প্রয়োজনও অন্নতর হয়। * * * পর-রাজ্য গ্রহণ তাহার প্রীতিকর কি না, এই প্রশ্ন একদা বোধাই আশ্বারোহিদলের এক জন অযোধ্যাবাসী সিপাহিকে জিজ্ঞাসা করা হইয়াছিল। সে উত্তর করিয়াছিল, “রাজ্যগ্রহণ আমরা ভাল বাসি না। যখন আমি বাঁটাতে প্রত্যাবৃত্ত হইতাম, তখন বড় লোকের শ্রায় আদর পাইয়াছি। আমার আবাসপল্লীর সম্ভ্রান্ত লোকে আমাকে সম্মুখীন দেখিয়া গাত্ৰোত্থান করিয়াছে। কিন্তু এক্ষণে নিম্ন শ্রেণীর লোকে আমার সম্মুখে ধূমপান করিয়া থাকে*।”

* Sir Henry Lawrence to Lord Canning. Ms. Correspondence. পররাজ্য হরণ করিলে যে, সিপাহিরা সাতিশর বিরক্ত হয়, তাহা সিপাহিদিগের এই কয়েকটি কথায় অধিকতর পরিষ্কট হইবে; শ্রায় পঁচিশ বৎসর হইল, এক জন সিপাহি তাহার আকিসরকে

অযোধ্যা ব্রিটিশরাজ্যের মধ্যে পরিগণিত হওয়াতে তত্ত্ব্য সিপাহি-
গণ এইরূপ বিরক্ত ও অসন্তুষ্ট হইয়াছিল। তাহারা নবাবের শাসন-সময়ে
স্বদেশে আদর ও সম্মানের পাত্র হইয়া কাশবাশন করিত। তাহাদের পরি-
হিত সাময়িক পরিচ্ছদে, তাহাদের ব্যবহৃত সাময়িক অস্ত্রে ব্রিটিশ কোম্পা-
নির দেদীপ্যমান প্রতাপ দেখিয়া, সকলেই তাহাদিগকে শ্রদ্ধা ও ভয় করিত,
সকলেই ব্রিটিশ কোম্পানির লোক বলিয়া, তাহাদিগকে গৌরবান্বিত
জ্ঞান করিত। কেহই তাহাদের বিকদ্ধাচরণ করিত না, অথবা কেহই তাহা
দিগকে অসন্তুষ্ট করিতে সাহসী হইত না। কিন্তু যখন অযোধ্যা ব্রিটিশ
স্বদেশের হস্তগত হইল, যখন অন্তান্ত লোকের ত্রায় সিপাহিগণও ব্রিটিশ
স্বদেশের সাধারণপ্রজা বলিয়া পরিগণিত হইল, তখন তাহাদের আর
সে সম্মান, সে গৌরব বা সে আদর রহিল না। তাহারা স্বদেশীয়দিগের
সহিত একভূমিতে একভাবে দণ্ডায়মান থাকিয়া এক কমিশনরের রক্ষাধীন
হইল। সুতরাং সিপাহিরা অযোধ্যাগ্রহণের ফল স্পষ্টরূপে বুঝিতে পারিল।
স্বজাতিপতির পরিবর্তন হওয়াতে সাধারণে যেরূপ অসন্তোষ প্রকাশ
করিয়াছিল, তাহারাও সেইরূপ অসন্তোষ প্রকাশ করিতে লাগিল;
সকলেই একবিধ ক্ষোভে ও একবিধ বিরাগে পরস্পরের সহিত সমবেদনা-
পর হইয়া উঠিল।

এইরূপে অযোধ্যাগ্রহণের পর সিপাহিরা ব্রিটিশ কোম্পানির উপর
অধিকতর বিরক্ত ও হতশ্রদ্ধ হইয়া উঠে; ক্রমে তাহাদের বিশ্বাস ও
বিশ্বাস্তা অধিকতর দূরে অপসারিত হইয়া পড়ে। সিপাহিরা কেবল সৈনিক
পুরুষ নহে; তাহারা স্বদেশের ও স্বজাতির প্রতিনিধিস্বরূপ হইয়াও কার্য-
ক্ষেত্রে অগ্রসর হইয়া থাকে। স্বজাতির মঙ্গলসাধনে, স্বগোষ্ঠীর উন্নতি-
বিধানে তাহাদের চিন্তা তাহাদের ইচ্ছা ও তাহাদের অভিপ্রায় নিয়ত কার্য-
ভংগপর থাকে। সাধারণ ঘটনা জানিবার তাহাদের অনেক সুবিধা আছে।
তাহারা আপনাদের সৈনিক নিবাসে বিভিন্ন দেশের, বিভিন্ন জাতির
জিজ্ঞাসা করিয়াছিল যে, এক্ষণে তাঁহারা সিপাহিগকে ছাড়িয়া কি করিবেন। আর এক জন
কহিয়াছিল, “এক্ষণে আপনারা পঞ্জাব অধিকার করিয়াছেন; সুতরাং এক্ষণে সৈন্যসংখ্যাও
কম করিবেন।” অপর এক জন সিদ্ধুদেশ বাঙ্গালা প্রেসিডেন্সির সহিত সংযোজিত হওয়ার
সংবাদ শুনিয়া নির্দেশ করিয়াছিল যে, বোধ হয় লণ্ডনকে বাঙ্গালার সহিত সংযোজিত করি-
বার আদেশ প্রচারিত হইবে। *Kaye, Sepoy War, Vol. I. 347, note,*

লোকের সহিত সম্মিলিত হয়, দূরপ্রবাসী বন্ধুদিগের সহিত পত্রাদি দ্বারা আলাপ করে, বাজারের সমস্ত গল্প স্মৃতিপটে অঙ্কিত রাখে, এবং কোঁতূহল-পর হইয়া সকল সময়ে সকল বিষয়েরই আন্দোলনে প্রবৃত্ত হইয়া থাকে । তাহারা গবর্ণমেন্টের উদ্দেশ্য, গবর্ণমেন্টের অভিপ্রায় অনেক সময়ে বুঝিতে পারে ; কিন্তু সদা সন্ধিঞ্চ ও কোঁতূহলপর বলিয়া, তাহারা অনেক সময়ে উহা ভিন্নভাবে বুঝিয়া থাকে । ইঙ্গরেজ গবর্ণমেন্টের কার্য-প্রণালীর গূঢ়তত্ত্ববিনির্গমে তাহার কোনও ক্ষমতা নাই ; ইঙ্গরেজের ছুর্ক্সয়েয় রাজনীতির মস্মাবধারণেও তাহাদের কোনও সামর্থ্য নাই । তাহারা পূর্বের শ্রায় ইঙ্গরেজ আফিসরদিগের সহিত পরামর্শ করিতে পারিত না ; সুতরাং তাহারা অপূর্বকল্পনাবলে নানা প্রকার অনিষ্টকর স্বপ্ন দেখিত এবং আপনাদের কল্পনায় আপনারাই উদ্ভাস্ত হইয়া ছঃসাহসিক কার্যসাধনে অভিনিবিষ্ট হইত ।

তাহাদের এই কল্পনা উদ্দীপ্ত করিতে লোকের অভাব ছিল না । ব্রিটিশ গবর্ণমেন্টের সম্বন্ধে অনেক উপকথা তাহাদের সমক্ষে কীর্ত্বিত হইত, অনেক উপকথা তাহাদিগকে রোমাঞ্চিত করিত, ধমনীমধ্যে শোণিতবেগ দ্বিগুণিত করিয়া দিত । কোম্পানির রাজ্য প্রসারিত হওয়াতে তাহাদের কার্যক্ষেত্র যেমন সঙ্কীর্ণ হইয়াছিল, তেমনই তাহাদের স্বজাতির ধ্বংসনাশের পথ উন্মুক্ত হইয়া উঠিয়াছিল । যে দেশ কোম্পানির রাজ্যের সহিত সংযোজিত হয়, সেই দেশে খ্রীষ্টধর্মের প্রচার ও সেই দেশের অধিবাসীদিগকে খ্রীষ্টধর্মে দীক্ষিত করিবার উপায়ও সহজ হইয়া থাকে । যে সিপাহিগণ নিদারুণ ক্ষুৎপিপাসার্ত হইয়াও অস্তিম সময়ে নিম্ন জাতির আহৃত স্রব্য গ্রহণ করে না *, এক্ষণে তাহারা আপনাদের সম্প্রদায়ের মধ্যে খ্রীষ্টধর্ম প্রচারকদিগকে দেখিতে পাইল । এতদ্ব্যতীত ভারতবর্ষের অনেক দেবত্র ও

* ১৮০০ অব্দের ৩১ এ জানুয়ারি কর্ণেল স্কিনর উনরার রাজার সহিত যুদ্ধে আহত হন । যুদ্ধ শেষ হইলে যুদ্ধক্ষেত্রে কি কি ঘটনা হয়, স্কিনর স্বয়ং দর্শন করিয়া তাহার বিবরণ লিপিবদ্ধ করিয়াছেন । এই বিবরণে সিপাহিদিগের স্বধর্ম্মানুরক্তির দৃষ্টান্ত পাওয়া যাইবে । কর্ণেল স্কিনর লিখিয়াছেন :—“অপরাহ্ন স্কিন যটিকার সময় আমি আহত ও সংজ্ঞাহীন হইয়া ভূপতিত হই । পর দিন প্রাতঃকালে আমার চেতনার সঞ্চার হয় । সচেতন হইয়া দেখিলাম, আমাদের আহত সৈনিকগণ চারি দিকে পড়িয়া রহিয়াছে । আমি সূর্য্যের উত্তাপ হইতে রক্ষা পাইবার জন্ত ধীরে ধীরে হামাগুড়ি দিয়া একটি বনের মধ্যে গিয়া লুকাইলাম । নিকটে আরও দুইজন ভারতবর্ষীয় সৈনিক পুরুষ ছিল, তাহাদের একজন স্থবাপার,

ব্রহ্মত্র ভূমির উচ্ছেদ হওয়াতে লোকে বিরক্ত হইয়া উঠিতেছিল। হিন্দু ও মুসলমান, উভয় সম্প্রদায়ের ধর্ম-সংস্কারের মূলে আঘাত করিবার জন্ত আইন প্রণীত হইয়াছে, সাম্রাজ্য-সম্বন্ধে ধর্ম-সঙ্গত কার্য-প্রণালীর প্রতি হস্তক্ষেপ করিবার জন্ত কারাগৃহে পাচকগণ কার্য করিতেছে, প্রতি সৈনিক নিবাসে, প্রতি সৈনিক দলে, আগস্তক সন্ন্যাসী ও ফকীরগণ এইরূপ কাহিনী বিবৃত করিয়া সিপাহিদিগকে উত্তেজিত করিয়া তুলিতেছিল। ফিরিঙ্গী গবর্ণ-মেণ্টকে পর্ষদিস্ত করিলে যে, তাহাদের অনেক লাভ হইবে, তাহারা সপরি-বাবে মহাস্বখে কালাতিপাত করিতে পারিবে, তাহাও তাহাদের নিকটে প্রস্তাবিত হইতেছিল। এতদ্বাতীত যে সমস্ত প্রাচীন রাজ্য কোম্পানির সাম্রাজ্যের সহিত সংযোজিত হইয়াছিল, সেই রাজ্যের লোকেও সিপাহি-

অন্ত জন জমাদার। একের পাদদেশ জুলির আঘাতে বিচূর্ণ হইয়াছিল, অপরের শরীবে বন্ধনের আঘাত লাগিয়াছিল। নিদারুণ পিপাসায় এক্ষণে আমরা সাতিশয় কাঠর হইয়া পড়িলাম; নিকটে জনপ্রাণী দেখা গেল না। এইরূপ অবস্থায় আমরা সমস্ত দিন মৃত্যুর প্রতীক্ষায় রহিলাম। কিন্তু হায়! বাত্রি উপস্থিত হইল; আমাদেব অদৃষ্টে মৃত্যু কি সাধা কিছুরি খটনা না। পূর্ণ চন্দ্র আকাশে বিমল কর বিকাশ করিতেছিল। নিশীথসময়ে আমরা নিদারুণ শোভা হইয়া পড়িলাম; শীত এমন ভয়ঙ্কর হইয়াছিল যে, আমি প্রতিজ্ঞা করিলাম, যদি জীবিত থাকি, তাহা হইলে আব কখনও সৈনিক কায গ্রহণ করিব না। আমার চারিদিকে বৃষ্টিহতগণ খাতি স্বরে জল প্রার্থনা করিতেছিল। শৃগাল-দল চারিদিকে শব্দেহ বিদীর্ণ করিতেছিল, আমরাও তাহাদের জন্য প্রস্তুত হইতেছি কিনা, দেখিবার জন্য ক্রমেই আমাদের সম্মুখীন হইতেছিল। আমরা শব্দ করিয়া বা প্রস্তর নিক্ষেপ করিয়া তাহাদিগহঁতে আপনাদিগকে রক্ষা করিতেছিলাম। এইরূপে তখনক হৃদয় রাত্রি গতিবাহিত হইল। প্রাতঃকালে দেখিলাম একজন পুরুষ ও একটা বৃদ্ধা স্ত্রী চাঙ্গাবি ও জলপাত্র হস্তে করিয়া আমাদের সম্মুখবর্তী হইয়াছে। বৃদ্ধা নমুদয় আহত ব্যক্তিকেই চাঙ্গারি হইতে এক এক খানি রুটি ও জলপাত্র হইতে জল দিল। আমাকেও সে উহা প্রদান করিল, আমি ঈশ্বরকে ও তাহাকে ধন্যবাদ দিলাম। সুবাদার উচ্চশ্রেণীর রাজপুত এবং এই বৃদ্ধা চামারজাতীয়া ছিল। সুতরাং সুবাদার তাহা প্রদত্ত জল কি রুটি, কিছুর গ্রহণ করিল না। আমি আগ্রহসহকারে তাহাকে উহা গ্রহণ করিতে অনুরোধ করিলাম। সুবাদার অমানবদনে কহিল, “আমাদেব বর্তমান অবস্থায় আমরা ততি অল্পক্ষণ মাত্র জীবিত থাকিব; এই অল্পক্ষণের জন্ত কেন চিরন্তন ধর্মাসু-শাসন পরিত্যাগ করিব? না, আমি কখনও এই জল ও রুটি গ্রহণ করিব না, পরিশুদ্ধ ধর্ম রক্ষা করিয়া একলক্ষিত ভাবে মৃত্যুর ক্রোড়ণায়ী হইব।” Military Memoir of Lieutenant-Colonel James Skinner. Vol. I, p. 178. Comp Duke of Argyll. India under Dalhousie and Canning. p. 75-76.

দিগের হৃদয় কলুষিত করিতে উদ্যত হয় । ইহারা বিবিধবেশে বিবিধ উপায়ে সিপাহিদিগের সহিত সন্মিলিত হইতে থাকে । গভীর সাধনা ইহাদিগকে একাগ্র করিয়াছিল, প্রগাঢ় কার্যাতংপরতা ইহাদিগকে অনলস রাখিয়াছিল এবং অবিচলিত অধ্যবসায় ইহাদিগকে উদ্দেশ্যসাধনে অপরাধু করিয়া তুলিয়াছিল । ইহাদের স্থির প্রতিজ্ঞা ধীরে ধীরে বিকশিত হইতেছিল, অলক্ষ্যভাবে পরাক্রম সংগ্রহ করিতেছিল, অবিচলিতভাবে কার্যক্ষেত্রে অগ্রসর হইতেছিল, শেষে বিপুল উৎসাহে আপনার উদ্দেশ্য সফল করিয়া তুলিতেছিল । যোগরত ব্রহ্মচারীর বেশ, ভ্রমণশীল পথিকের বেশ, ক্রীড়া-কৌতুকপর পুতুলক্রীড়কের বেশ, যে বেশই ইহারা পরিগ্রহ করুক না কেন, যে স্থানেই ইহারা গমন করুক না কেন, যে দৈনিক দলের সহিতই ইহারা সন্মিলিত হউক না কেন, সিপাহিদিগের হৃদয় তরঙ্গায়িত ও সিপাহিদিগকে আকস্মিক বিপ্লবের জন্ত উত্তেজিত করাই ইহাদের একমাত্র উদ্দেশ্য ছিল । এই উদ্দেশ্যসাধনে কোনরূপ অন্তরায় উপস্থিত হইল না । কোনরূপ অন্তরায় ইহাদের প্রতিকূলতা সাধন করিল না । উপযুক্ত সময়ে বীজ নিষ্কণ্ড হইল, উপযুক্ত সময়ে উহা সিপাহিদিগের হৃদয়ক্ষেত্রে স্থান পরিগ্রহ করিল, এবং উপযুক্ত সময়ে উপযুক্ত ঘটনাবিশেষের আবির্ভাবে উহা ফলোন্মুখ হইয়া সমস্ত ভারতবর্ষ অস্থির করিয়া তুলিল ।

ভারতবর্ষের জন্ত নূতন গবর্নরজেনেরলের নিয়োগের সময়ে অনেক আন্দোলন উপস্থিত হইয়া থাকে । লর্ড ডালহৌসীর ছায় এক জন ক্ষিপ্ত-কর্মা ও কার্যকুশল ব্যক্তি যখন ভারতবর্ষের শাসন-দণ্ড পরিত্যাগ করিলেন, তখন তাঁহার উত্তরাধিকারীর স্থিরীকরণসময়ে তুমুল আন্দোলন উপস্থিত হইল । যিনি আটবৎসর কাল কার্য-নৈপুণ্যে ভারতবর্ষের রাজনৈতিক ক্ষেত্রে অনেক অভিনব বিষয়ের সূত্রপাত করিয়াছিলেন, স্থিরতা ও দৃঢ়তার বলে যিনি আপনার প্রবর্তিত নীতি অক্ষুণ্ণ রাখিয়াছিলেন, কে তাঁহার পদ গ্রহণ করিবে, এক্ষণে ইহাই সকলের বিচার্য্য হইয়া উঠিল । ভারত-বর্ষীয়গণ ঔৎসুক্যের সহিত তাহাদের ভাবী শাসনকর্তার আগমনপ্রতীক্ষা করিতে লাগিল । অবশেষে সংবাদ আসিল, লর্ড পাম্‌ষ্টোনের এক জন মন্ত্রশিষ্য মহারাজার পোষ্ট্‌মাস্টরজেনেরল লর্ড ডালহৌসীর পদের জন্ত মনোনীত হইয়াছেন ।

লর্ড কানিং অযোগ্য পাত্র বা অমুদারপ্রকৃতি ছিলেন না। ইটন ও অক্সফোর্ডে শিক্ষালাভ করিয়া, তিনি সাহিত্য ও গণিতে বিশিষ্ট ব্যুৎপত্তি লাভ করিয়াছিলেন। তিনি যে সময়ে অক্সফোর্ডের বিদ্যালয়ে প্রবিষ্ট হন, সেই সময়ে গ্লাড্‌স্টোন, ক্রস, ফিলিমোর তাঁহার সমপাঠী ছিলেন। ইহার সকলেই এক এক সময়ে বৈষয়িক কার্যক্ষেত্রে উচ্চ সম্মান লাভ করিয়াছেন*। কানিং বখন বিশ্ববিদ্যালয় হইতে বহির্গত হন, তখন তিনি এক-বিংশ বর্ষে পদার্পণ করিয়াছিলেন। এই সময়ে পার্লিয়ামেন্টের দ্বার তাঁহার নিকট অব্যাহত ছিল। কিন্তু তিনি তাড়াতাড়ি বৈষয়িক কার্যক্ষেত্রে অবতরণ করিতে অভিলাষী হন নাই। কানিংয়ের বক্তৃতাশক্তি তাদৃশ তেজ-স্বিনী ছিল না। কানিং সাধারণতঃ সাতিশয় লজ্জাশীল ছিলেন। সুতরাং পার্লিয়ামেন্ট মহাসভায় যে, তাঁহার ক্ষমতা অধিকতর বিকশিত হইবে, তাহা তিনি প্রথমে অমুদাবন করেন নাই। যাহা হউক, তিনি সংসারে প্রবেশের পথ নিরুদ্ধ রাখিলেন না। কামিনীর কমণীয় হৃদয় আকর্ষণ করিতে তাঁহার বিশেষ ক্ষমতা ছিল। সরলতা, উদারতা ও নম্রতাতে পবিত্র প্রেমের প্রতিমূর্ত্তি প্রতিফলিত হইয়া তাঁহাকে শতশুণে মহীয়ান ও গৌরবাস্বিত করিয়া তুলিয়াছিল। তিনি এক্ষণে এই পবিত্র প্রেমের পবিত্র সৌন্দর্য্য উপভোগ করিতে প্রবৃত্ত হইলেন। ১৮৩৫ অব্দের ৫ই সেপ্টেম্বর চার্লস জন কানিং সারলোট্‌ ষ্টুয়ার্ট নামে একটি কামিনীর পাণিগ্রহণ করেন। এই কামিনী রূপলাবণ্যবতী এবং বিনয়, নম্রতা প্রভৃতি মানসিক গুণে গরীয়সী ছিলেন। পরিণীত হইবার এক বৎসর পরে কানিং পার্লিয়ামেন্টে প্রবেশ করেন। কমন্স সভায় তাঁহাকে ছয় সপ্তাহের কিছু বেশী দিন থাকিতে হইয়াছিল। কানিং ইহার পর লর্ড সভায় আসন পরিগ্রহ করেন। কানিং প্রায় বিংশতি বৎসর লর্ড সভায় থাকেন। এই ক্ষুদ্রীর্ণ সময়ে তিনি অনেক রাজনৈতিক ব্যাপারে লিপ্ত ছিলেন। কানিং প্রথমে পররাষ্ট্রবিভাগের অণ্ডর সেক্রেটারির পদে নিয়োজিত হন। তিনি কর্তব্যসম্পাদনে সন্তুষ্ট ছিলেন এবং স্বীয় কর্তব্য অতিশয় যোগ্যতার সহিত নির্বাহ করিয়াছিলেন। কানিং ইহার পর ১৮৪৬ অব্দে বনবিভাগের প্রধান কমিশনরের পদ গ্রহণ

* গ্লাড্‌স্টোন ইংলণ্ডের প্রধান মন্ত্রী। ক্রস ভারতবর্ষের অন্যতম গবর্নরজেনেরল লর্ড এলগিন। ফিলিমোর, ইংলণ্ডের একজন প্রধান উকীল।

করেন। ক্রমে তিনি মন্ত্রিসভার সভ্য ও পোর্টমাষ্টারজেনেরলের পদে অধিষ্ঠিত হন।

এইরূপ কার্যাকুশল অভিজ্ঞ রাজনীতিজ্ঞের হস্তে লর্ড ডালহৌসীর পর ভারতবর্ষের শাসন-ভার সমর্পিত হয়। আগষ্ট ১৮৫৫-১৮৫৬ গৃহ অঙ্গ। মাসের প্রথম দিনে ইণ্ডিয়াহাউসে ডিরেক্টরদিগের একটি সভা হয়। কানিংহ্ এই সভায় যথারীতি শপথ করিয়া ভারতবর্ষের শাসনকর্তৃত্ব গ্রহণ করেন। ঐ দিন অপরাহ্নে তাঁহার সম্মানার্থ একটি সমৃদ্ধ ভোজের অনুষ্ঠান হয়। ইংলণ্ডে এইরূপ ভোজ একটি প্রধান স্মরণীয় ঘটনা। এই ঘটনা নীরবে বা বিনা আড়ম্বরে সম্পন্ন হয় নাই। সেই আগষ্ট মাসের প্রথম দিনে সুপ্রশস্ত গৃহে অনেক প্রধান প্রধান ব্যক্তি সমাগত হইয়াছিলেন। ইণ্ডিয়াকোম্পানির সভাপতি ইলিয়ট্ মাক্‌নাটন ঐ ভোজের কর্তৃত্ব গ্রহণ করেন। যাঁহার সম্মানবর্দ্ধন জন্ত ঐ সমৃদ্ধ ভোজের আরো-জন হইয়াছিল, তিনি নীরবে থাকেন নাই। কানিংহ্ ঐ সময়ে বিলক্ষণ গাণ্ডীর্থ্যের সহিত একটি বক্তৃতা করেন। এই বক্তৃতায় তিনি অকপটচিত্তে অনেক কথা কহিয়াছিলেন, আপনার দায়িত্ব, কার্যের গুরুত্ব উল্লেখ করিয়া অকপটচিত্তে স্বাভিপ্রায় প্রকাশ করিয়াছিলেন। তিনি স্পষ্টাক্ষরে নির্দেশ করিয়াছিলেন যে, এক সময়ে এইরূপ গুরুতর ভার গ্রহণ করিতে তিনি যে সঙ্কচিত হইতেন, তাহা স্বীকার করিতে তিনি লজ্জিত নহেন। কিন্তু এক্ষণে কোম্পানির হস্ত হইতে যে ভার গ্রহণ করিয়াছেন, তাহা সম্পন্ন করিতে, তিনি প্রত্যেক বণ্টায় প্রত্যেক মিনিটে নিজের অধাবসায়, চেষ্টা ও মনোযোগ নিয়োগ করিবেন। তিনি ইহার পর সভাপতি মাক্‌নাটনের দিকে ফিরিয়া কহেন, “আপনারা অদ্য ডিরেক্টরসভার সহিত একীভূত হইয়া কার্য করিতে, আমাকে নিরীক্ষসহকারে অনুরোধ করিয়াছেন। আমি এই অনুরোধের জন্ত আপনাদিগকে ধন্যবাদ দিতেছি, এবং উহা কার্যমনো-বাক্যে রক্ষা করিতে প্রতিশ্রুত হইতেছি। আমি জানি, আপনারা যে সকল সম্প্রদায়ের অধিনায়ক, তাঁহারা যেখানেই আপনাদের বিশ্বস্ততা প্রদর্শন করেন, সেখানেই সকলে বিশ্বাসের সহিত তাঁহাদের অধীনে কার্য করিয়া থাকে। বর্তমান গবর্ণমেন্টের প্রধান ব্যক্তি ও আমার সহযোগিগণের সমবেদনার উপরেও আমি নির্ভর করিতেছি। সিবিল ও সৈনিক সম্প্রদায় পরস্পর একীভূত হইয়া কার্য করিলে আমি সাতিশয় আনন্দ অহ-

ভব করি। রাজকীয় কার্যের এই দুটি প্রধান সম্প্রদায় ব্যতীত, আমার দেশীয়গণ গবর্ণমেন্টের অন্ত কোন বিষয় সমধিক গৌরবের সহিত দর্শন করেন কি না, তাহা আমি অবগত নই। এই দুই সম্প্রদায়ের ব্যক্তিগণ ভারতবর্ষের উন্নতির জন্ত অনেক কার্য করিয়াছেন, আপনারা আপনাদের দল হইতে সময় ও শাস্তির সময়ে একরূপ কার্য-কুশল সম্ভ্রান্ত ব্যক্তিদিগকে প্রেরণ করিয়াছেন যে, তাঁহাদিগকে পাইলে ইউরোপের যে কোন রাজ্য আপনাদিগকে গৌরবাধিত জ্ঞান করিতে পারে। মহাশয়, এই সমস্ত লোক থাকাতেই আপনারা পৃথিবীর ইতিহাসে এই একটি অতুলনীয় দৃশ্য প্রদর্শন করিতে সমর্থ হইয়াছেন যে, পঞ্চদশ কোটি লোক একটি সমৃদ্ধিপন্ন দেশে বৈদেশিকের শাসনে, সূখে ও শান্তিতে কালাতিপাত করিতেছে।”

ইহার পর কানিঙ্ক পদের গুরুত্ব ও মহত্বের সম্বন্ধে কয়েকটি কথা কহিয়া এই ভবিষ্য বাণী দ্বারা সকলকে চমকিত করেন :—“আমি জানি না, ভারতবর্ষে কিরূপ ঘটনার আবির্ভাব হইবে; আমি আশা করি, এবং প্রার্থনা করি, আমরা যুদ্ধের শেষ সীমায় উপনীত হইব না। আমি শান্তি-পূর্ণ সময়ে কার্য করিতে ইচ্ছা করি। কিন্তু আমি ইহা কখনই বিশ্বস্ত হইব না যে, পৃথিবীর অন্যান্য অংশ অপেক্ষা আমাদের ভারতসাম্রাজ্যের মঙ্গল অনেকটা অদৃষ্টের উপর নির্ভর করে। ভারতবর্ষের আকাশ এক্ষণে নিম্নল দেখা যাইতেছে, কিন্তু তাহাতে এক হস্তপরিমিত একখণ্ড মেঘের উদয় হইতে পারে। ঐ মেঘ ক্রমে বর্ধিত হইয়া অবশেষে আমাদের সর্বনাশ সাধন করিতে পারে। বাহা একবার সংঘটিত হইয়াছে, তাহা আবারও সংঘটিত হইতে পারে। বিরাগের কারণপরম্পরা ন্যূন হইয়াছে বটে, কিন্তু তাহা অপসারিত হয় নাই। এক্ষণেও অনেক অসন্তুষ্ট ও অবাধ্য ব্যক্তি আমাদের শাসনাধীন আছে। আমাদের এখনও একরূপ প্রতিবাদী রাখিয়াছে যে, তাহাদের প্রতি আমরা সম্পূর্ণরূপে সতর্কভাষ্ম হইয়া থাকিতে পারি না, এবং আমাদের সীমান্তভাগও একরূপ অবস্থায় রহিয়াছে যে, সম্ভবতঃ তাহার কোন অংশে কোন সময়ে বিপ্লবের উৎপত্তি হইতে পারে। এতদ্ব্যতীত কোন-কোন করদ রাজ্যের সহিত আমাদের সম্বন্ধ একরূপ অবস্থায় হইয়া রহিয়াছে যে, ভারতবর্ষের ত্রায় একটি বিস্তৃত সাম্রাজ্যে শান্তিরক্ষা করা সন্দেহের স্থল। আমরা এইরূপ শান্তি রক্ষা

করিতে অসমর্থ হইলেও, আমাদের সম্মান, সাধু বিশ্বাস এবং সংকার্য-বলে অন্ততঃ সেই শাস্তি পাইবার বোগ্য হইতে পারি। যখন এই সমস্তের পরিবর্তে যুদ্ধের প্রয়োজন হয়, তখন যেন বিশিষ্ট ধীরতা ও বিবেচনার সহিত সেই যুদ্ধ করিতে পারি। এইরূপ স্বেবিবেচনা পূর্বক যুদ্ধ করিলে উহা অবশ্যই অল্পকাল-স্থায়ী হইবে, সেই যুদ্ধের ফলও অনিশ্চিত হইবে না। কিন্তু আমি সম্ভ্রামের সহিত এই সকল আশঙ্কা ছাড় হইতে অপসারিত করিতেছি, এবং সম্ভ্রামের সহিত শাস্তির স্বেবিস্তৃত দৃশ্য লক্ষ্য করিতেছি। আমার ভরসা আছে যে, আমি এই শাস্তিময় রাজ্যে থাকিয়া আপনাদের সহায়তা লাভে সমর্থ হইব।”

বাহারা লর্ড কানিংয়ের পার্লামেন্টের বক্তৃতা শুনিয়াছিলেন, তাঁহারা এই বক্তৃতা শুনিয়া সাতিশয় বিশ্বিত হইলেন, এবং মুক্তকণ্ঠে বক্তাকে সাধুবাদ করিতে লাগিলেন। যে বক্তৃতা ১৮৫৫ অব্দের ১লা আগষ্ট তাঁহাদের ক্ষতিপ্রবিত্ত হইয়াছিল, তাহা অনেক পার্লামেন্টের বক্তৃতা অপেক্ষা সর্বাংশে উৎকৃষ্ট। উহা যেমন হৃদয়গ্রাহী হইয়াছিল, তেমনই ধীরভাবে ও গম্ভীর স্বরে উচ্চারিত হইয়াছিল। উহার প্রত্যেক বাক্য ও প্রত্যেক শব্দই শ্রোতৃবর্গের অন্তঃকরণে পূর্ব স্মৃতি সঞ্চারিত করিয়াছিল, এবং তাঁহাদিগকে ক্ষণকালের জন্য আত্মবিস্মৃত করিয়া তুলিয়াছিল। কানিং, আশঙ্কিতহৃদয়ে যে এক হস্তপরিমিত মেঘের বিষয় উল্লেখ করিয়াছিলেন, সে মেঘ সত্য সত্যই ভারতীয় আকাশে উদ্ভিত হইয়াছিল, এবং সত্য সত্যই বর্ধিত হইয়া ব্রিটিশ পর্বতমণ্ডকে সমূহ বিপদাপন্ন করিয়া তুলিয়াছিল। বাহারা কানিংয়ের এই বক্তৃতা শুনিয়াছিলেন, তাঁহারা পরিশেষে এই ভবিষ্যবাণী ফলবন্তী হইতে দেখিয়া সাতিশয় বিশ্বয়ের সহিত কানিংয়ের লোকান্তীত ক্ষমতার নিকটে মস্তক অবনত করিয়াছিলেন।

সেই সমুদয় ভোজের স্মৃতিস্মিত গৃহে, সেই ১লা আগষ্ট আর একজন প্রধান রাজনীতিজ্ঞ ভারতবর্ষের সম্বন্ধে কয়েকটি কথা উল্লেখ করেন। লর্ড পাম্‌স্টোন ভারতবর্ষের পূর্বতন গৌরব, পূর্বতন মহিমা ও পূর্বতন খ্যাতির কাহিনী বিস্তৃত হন নাই, কিংবা ভারতবর্ষকে পূর্বগৌরবে গৌরবাবিষ্ট করিতে কিছুমাত্র লজ্জিত বা সঙ্কুচিত হন নাই। তিনি অগ্নানবধনে কহিয়াছিলেন, “প্রাচীন সভ্যতা প্রথমে ভারতবর্ষ হইতে মিশর দিয়া এই দিকে উপস্থিত হইয়াছে। আমরা সেই সময়ে অসভ্য ছিলাম, কিন্তু এক্ষণে

আমরা সেই অসত্যতার নিকটতম পদ হইতে সভ্যতার উচ্চতম পদে অধিক্রম হইয়া প্রাচীন সভ্যতাজননী ভারতভূমিতে সভ্যতা ও জ্ঞান বিকাশ করিতেছি। বোধ হয়, ভারতবর্ষের অধিবাসীদিগকে উচ্চতর ও পবিত্রতর বিষয় দান করা আসাদের অদৃষ্টে ঘটিতে পারে।” ইহার পর লর্ড পাম্‌স্টোন কানিঙ্কের ভবিষ্যাবাগীর বিষয় উল্লেখ করেন এবং কোন স্থানে ক্রুদ্ধ মেঘখণ্ডের আবির্ভাব হইবে, তাহা নির্দেশ করিয়া দেন।

যদিও লর্ড কানিঙ্ক ইণ্ডিয়া হাউসে যথাবিধি শপথ পূর্বক ভারত-বর্ষের শাসনভার গ্রহণ করেন, যদিও সাধারণে তাঁহাকে ভারত-বর্ষের গবর্নরজেনেরল বলিয়া জ্ঞান করিতে থাকে, তথাপি তিনি পূর্বের স্তায় কিছুকাল মন্ত্রিসভার সভ্য ও পোষ্টমাস্টারজেনেরলের পদে অধিষ্ঠিত থাকেন। পূর্বে স্থির হইয়াছিল যে, লর্ড কানিঙ্ক লর্ড ডালহৌসীর হস্ত হইতে ১৮৫৬ অব্দের ১লা ফেব্রুয়ারি ভারতবর্ষের শাসন-ভার গ্রহণ করিবেন। কিন্তু শেষে ডালহৌসী ১লা মার্চ পদত্যাগের অভিপ্রায় জানাইলেন। সুতরাং কানিঙ্কে আরও কয়েক দিন অপেক্ষা করিতে হইল। অতিনব গবর্নরজেনেরল ভাবিয়া ছিলেন যে, ডালহৌসী অযোধ্যার সম্বন্ধে কোন বিশেষ বন্দোবস্ত ও ভাবী বিপ্লবের আশঙ্কা নিবারণ জন্তই এই বিলম্ব করিতেছেন। ইহাতে তিনি বুঝিলেন যে, এইরূপ বিলম্ব তাঁহার ও ডালহৌসীর বিশেষ সুবিধা হইবে না। সুতরাং এই বিলম্ব প্রথমে তাঁহার অনুমোদনীয় হয় নাই। অপরে ভাবিতে পারে, অযোধ্যা গ্রহণ করাতে বিপদের আশঙ্কায় নূতন গবর্নরজেনেরল এরূপ সঙ্কস্ত হইয়া উঠিয়াছিলেন, কিংবা ঐ কার্য্য তাঁহার নিকট এরূপ অপ্রত্যাশিত ও এরূপ দৌরাঙ্গাজনক বোধ হইয়াছিল যে, তিনি উহার কোন অংশ স্বয়ং সম্পন্ন করিতে চাহেন নাই। এই উভয় ধারণাই ভ্রান্তিমূলক। অযোধ্যা-গ্রহণ প্রস্তাব, মন্ত্রিসভার প্রস্তাব। মন্ত্রিসভার সভ্যপদে অধিষ্ঠিত থাকিতে কানিঙ্ক ঐ প্রস্তাবের অনুমোদন করিয়াছিলেন। সুতরাং অযোধ্যার বন্দোবস্ত করিতে কানিঙ্ক আগ্রহান্বিত ছিলেন। এই জন্ত তিনি ডালহৌসীর কৃত কাল বিলম্বের প্রস্তাবে সন্তুষ্ট হন নাই। কিন্তু যখন ডালহৌসীর শেষ পত্র উপস্থিত হইল, এই শেষ পত্রে কানিঙ্ক যখন অবগত হইলেন, ডালহৌসী বিশেষ ঘটনার সঙ্কট নয়, সাধারণ ঘটনার অন্ত কয়েক সপ্তাহ বিলম্ব করিতেছেন, তখন কানিঙ্ক

কোন কপ আপত্তি করিলেন না ; সম্ভট চিন্তে ডিরেট্টারদিগের সহিত একমত হইলেন * ।

২১এ নবেম্বর কানিঙ্ক সঙ্গীক উইগ্‌সেরে গমন করেন, তথায় মহারাণীর নিকট বিদায় লইয়া ২৩এ লণ্ডনে প্রত্যাযুক্ত হন। এই নবেম্বর মাসেই কানিঙ্ক জন্মভূমি পরিত্যাগ করিয়া জী ও ভ্রাতৃপুত্রের সহিত ভারতবর্ষে যাত্রা করেন। তিনি মিশরের রমণীয় শোভা দেখিয়া জাহুয়ারির মধ্যভাগে সুএজে ফাহাজে আরোহণ করেন, এবং তথা হইতে আদন্‌নগরে উপনীত হন। কানিঙ্ক ১৮৫৬ অব্দের ২৮এ জাহুয়ারি বোম্বাই নগরে উপস্থিত হইয়া ব্রিটিশসিংহের প্রাচ্য সাম্রাজ্যে প্রথম পদার্পণ করেন। গবর্ণর জেনেরলকে যেরূপ সম্মান ও সমাদর প্রদর্শন করিতে হয়, ডালহৌসীর আদেশানুসারে তৎসমুদয় অশুভিত হইয়াছিল। সুতরাং কানিঙ্কের আগমনে বোম্বাই নগরে উৎসব বা আড়ম্বরের কোনও ক্রটি হয় নাই। কানিঙ্ক ২রা ফেব্রুয়ারি মাক্‌নাটনকে লিখিয়াছিলেন, “আমাকে গবর্ণরজেনেরলের ত্রায় সম্মান ও সমাদরের সহিত গ্রহণ করিতে ডালহৌসী আদেশ প্রচার করিয়াছেন ; আমিও এই স্থানে সেইরূপ আদর ও সম্মানের সহিত পরিগৃহীত হইয়াছি। যদিও আমি ইহা পাইতে ইচ্ছা করি না, অথবা পাইবার কোন আশা করি না, তথাপি ঈদৃশ অ. ডম্বর নিবারণ করিতে কোনরূপ চেষ্টা করি নাই।” কানিঙ্ক বোম্বাই হইতে মাদ্রাজে উপস্থিত হন, তাঁহার সহপাঠী বন্ধু লর্ড হারিস্ এই স্থানের শাসনকর্তা ছিলেন। তিনি এই বন্ধুর গৃহে কয়েক দিন আক্লাদে অতিবাহিত করিয়া ফেব্রুয়ারি মাসের শেষ দিন কলিকাতায় পদার্পণ করেন, এবং সেই দিনই গবর্ণর্মেণ্টহাউসে রীতিমত শপথ করিয়া ভারতবর্ষের শাসনভার গ্রহণ করেন।

* লর্ড কানিঙ্ক ডিরেক্টরদিগের সভাপতি মাক্‌নাটনকে এই ভাবে একখানি পত্র লিখেন:—“প্রথমে বোধ হইয়াছিল, লর্ড ডালহৌসী অযোধ্যার বন্দোবস্ত করিতে বিলম্ব করিতেছেন, তাহাতে আমি ভাবিয়াছিলাম, তিনি ষয় এই বন্দোবস্ত করিলে অস্ববিধা হইবে; কিন্তু এক্ষণে জানিলাম, ডালহৌসী সাধারণ কার্যের জন্ত বিলম্ব করিতেছেন সুতরাং আমি ইহাতে আর কোন আপত্তি করিতেছি না। আমি আশা করি, আপনি লর্ড ডালহৌসীর বাসনা পূর্ণ করিবেন এবং ডালহৌসী যে দিন নির্দেশ করেন, সেই দিনে আমাকে ঠাহার পদে নিযুক্ত করিবেন।”—Lord Canning to Mr. Macnaghten, September 26, 1855. Ms. Co rrespondence,

যাঁহারা ভারতবর্ষের গবর্ণরজেনেরলের পদ গ্রহণ করেন, তাঁহারা স্বদেশে যে রূপ অভিমতেরই পরিপোষক হইন না কেন, এবং ভারতবর্ষের কার্যের সম্বন্ধে যে রূপ ধারণারই অল্পবর্ত্তন করুন না কেন, এখানে আসিয়াই কার্যভারে সাতিশর বিস্তৃত হইয়া পড়েন। কার্যের স্রোতঃ একরূপ তীব্রবেগে, একরূপ অনর্গলভাবে প্রবাহিত হয় যে, প্রথমে তাহার গতি মন্দীভূত করা কষ্টসাধ্য হইয়া উঠে। সময় এই কষ্টসাধ্য কার্যসাধনের প্রধান উপদেষ্টা। সময়ের ক্ষমতা বলেই এই কষ্টকর কার্য ক্রমে সহনীয় হইয়া উঠে। গবর্ণরজেনেরলগণ অপরিচিতপূর্ব্ব, অদৃষ্টপূর্ব্ব স্থানে আসিয়াই একবারে তাহার সর্ব্বপ্রধান অধিনায়ক হন, অপরিচিতপূর্ব্ব ও অদৃষ্টপূর্ব্ব বিষয়ের প্রতিকূলে তাঁহাদিগকে অনেকবার সংগ্রামে প্রবৃত্ত হইতে হয়। বাক্সের পর বাক্স, প্রতিদিন তাঁহাদের টেবিলে স্থাপিত হইতে থাকে, প্রতি বাক্সই অপরিচিত ও অজ্ঞাত স্থানের ঘটনাপূর্ণ কাগজ-বাশিতে পরিপূর্ণ থাকে। অভিনব গবর্ণরজেনেরলকে অভিনব স্থানে আসিয়া অস্তিত্ব কাগজাদি পরীক্ষাপূর্ব্বক আদেশ প্রচার করিতে হয়। কিন্তু কানিঙ্গ এইরূপ কার্যভারে প্রসীড়িত হইলেও হতভোদ্য হন নাই; কিংবা সমুদয় বিষয়ের প্রকৃত মর্ম্ম গ্রহণ করিতে কখনও ওঁদাসীন্দ্ৰ অবলম্বন করেন নাই। তিনি দীর্ঘভাবে ও বিবেচনাসহকারে কার্যপথে অগ্রসর হইতে লাগিলেন, দীর্ঘভাবে ও বিবেচনাসহকারে সমুদয় বিষয়ের প্রকৃত তত্ত্ব হৃদয়ঙ্গম করিলেন, যত্নপর হইলেন। ইণ্ডিয়া হাউসের প্রশস্ত গৃহে ১লা আগষ্ট তাঁহার মুখ হইতে যে সমস্ত বাক্য নির্গত হইয়াছিল, তাহা কেবল কথামাত্রেরই পর্য্যবসিত হয় নাই; অথবা অলীক আড়ম্বরের অঙ্গীকৃত্যব সম্পোষণ করে নাই। তিনি অবিচলিতভাবে কার্য করিতে লাগিলেন, দীর্ঘতাসহকারে আপনার কর্তব্যপথ নির্ধারণ করিয়া তুলিলেন, এবং অকুষ্ঠিতচিত্তে সর্ব্বপ্রকার বাধা, সর্ব্বপ্রকার বিপ্লবিত্তির সহিত সংগ্রামে প্রবৃত্ত হইলেন। তিনি না বৃষ্টিয়া হঠাৎ কোন কার্য করিল, আপনার হঠকারিতার পবিচর দিতেন না। তিনি জানিতেন, ভারতবর্ষের সম্বন্ধে তাঁহার অনেক বিষয় অনিবার বাকী রহিয়াছে। ভারতবর্ষের সমুদয় বিষয় প্রকৃষ্টপদ্ধতিক্রমে অবগত না হইলে যথার্থ কল্পবাস্পাদন চক্র হইয়া উঠিবে। সুতরাং কানিঙ্গ, আপনার জ্ঞান প্রশস্ত করিতে চেষ্টা করিতে লাগিলেন। তিনি অভিজ্ঞ বাঙ্গালীদিগকে সাদবে আহ্বান করিলেন, সাদবে তাঁহাদের অভ্যর্থনা করিয়া আপনার

অভীষ্ট বিষয় জানিতে প্রবৃত্ত হইলেন । যে সমস্ত রাজপুরুষ দেশীয় রাজ্য-দিগের বিষয় বিশেষ রূপে অবগত আছেন, এবং যে সমস্ত রাজপুরুষ দীর্ঘ-কাল ভারতবর্ষে থাকিয়া ভারতবর্ষীয়দিগের মনোগত ভাব বিশেষরূপে হৃদয়-ঙ্গম করিয়াছেন, তাঁহারা কানিংহামের বৈষয়িক জ্ঞান সম্প্রসারিত করিতে ক্ষতি করিলেন না । কানিংহাম এইরূপে অভিজ্ঞ রাজপুরুষদিগের সাহায্যে ভারতবর্ষের শাসনদণ্ড পরিচালনা করিতে প্রবৃত্ত হইলেন ।

এতদ্ব্যতীত তাঁহার সতীর্থগণের মধ্যেও অনেকে উপযুক্ত ও সম্প্রদায়-দাতা ছিলেন । ইঁহার দূরদর্শিতাবলে ভারতবর্ষের অবস্থা বিশেষরূপে অব-গত হইয়াছিলেন । এই সময়ে জেনেরল জন লো, ডোরিণ, জন পিটর গ্রাণ্ট ও বার্নেস্ পিকক ভারতবর্ষীয় মন্ত্রিসভার সভ্য ছিলেন । এখানে প্রথম ব্যক্তির সম্বন্ধে অধিক কিছু বলিবার প্রয়োজন নাই । জেনেরল লো কিরূপ রাজনীতিজ্ঞ ও কিরূপ অভিজ্ঞ ছিলেন, এই পুস্তকের স্থান-বিশেষে তাঁহার যে সমস্ত মত পরিগৃহীত হইয়াছে, তৎসমুদয়েই উহা স্পষ্ট হৃদয়ঙ্গম হইবে । লো তিপ্পান বৎসর ভারতবর্ষীয় গবর্ণমেন্টের কার্যে ব্যাপৃত ছিলেন । সে সময়ে গবর্ণমেন্টের বিরুদ্ধপক্ষীয়গণ লোর বিরুদ্ধে কেবল এই একটি অভিযোগ করিতেন যে, তিনি বয়সের আধিক্যে অকর্মণ্য হইয়া পড়িয়াছেন । যদিও লো মেহিদপুরের সংগ্রাম স্থলে মালকমের পার্শ্বে থাকিয়া আপনার সমরনৈপুণ্য দেখাইয়াছিলেন, যদিও যৌবনের অপরিমিত তেজস্বিতা, দৃঢ়তা তাঁহা হইতে অপসারিত হইয়াছিল, যদিও মাধ্যম্নিন সূর্যের প্রথর রশ্মি পরিবর্তনশীল সময়ের আক্রমণে কিয়দংশে হ্রস্বতৈজ হইয়াছিল, তথাপি তাঁহার কার্যকারিতা এক-বারে বিলুপ্ত হয় নাই । লো এক্ষণে তেজস্বী যোদ্ধার শ্রায় কৰ্ম্মকুশল ও দৈহিক বিক্রমশালী ছিলেন না বটে, কিন্তু রাজনৈতিক উপদেশে ও রাজ-নৈতিক আন্দোলনে তিনি কোন অংশেই অযোগ্যপাত্র ছিলেন না । তিনি সন্ধি-বিগ্রহে উদার মজ্ঞাদাতা ছিলেন, সূনিয়মের বাবস্থাপনে হৃদয়ঙ্গম উপ-দেষ্টা ছিলেন, এবং শাসনাধীন রাজ্যের মঙ্গলবিধানে যত্নপর উৎসাহ-দাতা ছিলেন । তাঁহার শ্রায় কোন ব্যক্তি ভারতবর্ষীয় রাজ্যদিগের মানসিক ভাব ও তাঁহাদের রাজ্যের প্রকৃত অবস্থা অবগত ছিলেননা, তাঁহার শ্রায় কোন ব্যক্তি ভারতবর্ষীয়দিগের হৃদয়গত ভাব বুঝিতে পারিতেন না, এবং তাঁহাব শ্রায় কোন ব্যক্তি শ্রায়ের সম্মান রক্ষা করিয়া ধীরতা ও উদারতার সহিত

রাজ্যের সর্বাঙ্গীণ মঙ্গলসাধনে যত্নপর ছিলেন না। তিনি ভারতবর্ষীয়দিগের চক্ষে দেখিতেন, ভারতবর্ষীয়দিগের রসনার কথা কহিতেন, এবং ভারতবর্ষীয়দিগের হৃদয়ে অমুভব করিতেন। লো ডালহৌসীর সংহারিণী কার্য্যপ্রণালী ও অমুদার মত দেখিয়া দুঃখে ও আশঙ্কায় ত্রিয়মাণ হইয়াছিলেন, আপনি যে রাজনৈতিক মস্ত্রে দীক্ষিত হইয়াছেন, যে রাজনৈতিক মতের ক্ষমতা অপ্রতিহত রাখিতে দীর্ঘকাল চেষ্টা পাইয়াছেন যে রাজনৈতিক মত ভারতবর্ষের প্রকৃত মঙ্গলবিধায়ক বলিয়া দীর্ঘকালের দূরদর্শিতায় অবধারণ করিয়াছেন, সেই রাজনৈতিক মতের অবনতি ও সেই রাজনৈতিক মতের বিলোপদশা দেখিয়া তিনি হৃদয়ে যারপরনাই আঘাত পাইয়াছিলেন। লো সমস্ত রাজনৈতিক আন্দোলনেই আপনার উদার মত রক্ষা করিতেন। কিন্তু ডালহৌসী স্বীয় অনাশ্রবতা-দোষে সর্বদাই এই উদার মতে ঔদাসীন্য দেখাইতেন, সর্বদাই এই উদার মত পাদদলিত করিয়া আপনার অভ্যন্ত কার্য্যপ্রণালীর প্রবর্তনায় যত্নশীল হইতেন। ডালহৌসী লোর মতে হতাদর হইলেও লোর প্রতি কখনও অসম্মান প্রদর্শন করেন নাই। তিনি সর্বদা লোর জরাগ্রস্ত সৌম্য মূর্তির যথোচিত সম্মান করিতেন। কিন্তু হঠকারী শাসনকর্তার কার্য্যকাল শেষ হইল। তিনি অবসর লইলেন। লর্ড কানিং আদিয়া লোর সৌম্য মূর্তির যেমন সম্মান করিতে লাগিলেন, তেমনই তাঁহার উদার মতেরও সমাদর করিতে প্রবৃত্ত হইলেন।

যে দুইজন দিবিল কর্মচারী এই সময়ে ভারতবর্ষীয় সভার সভ্য ছিলেন, তাঁহাদের একজন ঘটনাক্রমে এবং অপর জন আপনার বৈষয়িক জ্ঞান ও ক্ষমতা-বলে সেই পদে অধিষ্ঠিত হন। ডোরিং যদিও ভারতবর্ষের রাজনৈতিক ক্ষেত্রে ৩৬ বৎসর অতিবাহিত করিয়াছিলেন, এবং যদিও মন্ত্রিসভার সহকারী সভাপতি ছিলেন, তথাপি ক্ষমতামূল্যে বা বহুদর্শী ছিলেন না। তিনি সে সময়ে কোন প্রধান রাজনৈতিক আন্দোলনে কোন প্রকারে আপনার প্রাধান্য রক্ষা করিতে সমর্থ হন নাই। তিনি গবর্ণমেন্টের রাজস্ব-মন্ত্রী ছিলেন; কিন্তু সে সময়ে রাজস্ব-বিভাগে তাঁহার কোনরূপ অসাধারণ নৈপুণ্য দৃষ্ট হয় নাই। ভারতবর্ষের সম্বন্ধে তাঁহার জ্ঞান সর্বাঙ্গী ছিল, ভারতবর্ষীয়দিগের অবস্থা-সম্বন্ধে তাঁহার অভিজ্ঞতাও অল্পতর ছিল। তাঁহার কোনরূপ একাগ্রতা ছিলনা, কোনরূপ উৎসাহ ছিলনা, বা কোনরূপ পটুতা ছিলনা, তিনি কেবল আপনার অবস্থাতেই সন্তুষ্ট ছিলেন, সন্তুষ্ট

ধাক্কিয়াই আপনার কার্য সম্পন্ন করিতেন। রাজ্যের সর্বাঙ্গীণ মঙ্গল সাধনোদ্দেশে তাঁহার ইচ্ছা প্রবর্তিত হইত না। তিনি ডালহৌসীর প্রতিষ্ঠিত রাজনীতির সমর্থন করিতেন। তাঁহার বহুসংখ্য মিনিট কেবল এইরূপ সমর্থনের অনুচিত যুক্তিতেই পরিপূর্ণ রহিয়াছে। অনুদার রাজনীতির সমর্থন ভিন্ন তাঁহাকর্তৃক রাজ্যের মঙ্গল সাধনোপযোগি কোন কার্য সম্পন্ন হয় নাই। বহুদর্শিতা বা সমবেদনাও তাঁহাকে সুপথ দেখাইবার জন্ত আলোকবর্তীস্বরূপ হয় নাই।

জন পিটার গ্রাণ্টের কার্য-কাল ত্রিশ বৎসর হইয়াছিল; যদিও তিনি তাঁহার সিভিলিয়ান সহযোগী অপেক্ষা বয়ঃকনিষ্ঠ ছিলেন, তথাপি তাঁহা অপেক্ষা অধিক কার্য করিয়াছেন। তাঁহার মানসিক দৃঢ়তা ছিল। তিনি সেই সময়ে কোম্পানির একজন উৎকৃষ্ট কর্মচারী ছিলেন। কোন তরুণবয়স্ক সিভিল কর্মচারী জন গ্রাণ্টের ত্রায় পটুতা ও দক্ষতা সহকারে রাজকার্য্য নিরীহ করিতে সমর্থ হন নাই। জন্ গ্রাণ্ট নিজের ধারণা ও নিজের বিশ্বাস অনুসারে কার্য্য করিতে ভাল বসিতেন; তিনি অনেক সময়ে ডালহৌসীর কার্য্যপ্রণালীর অনুমোদন করিয়াছেন, এবং অনেক সময়ে তাহার বিরুদ্ধেও স্খাভিমত পরিব্যক্ত করিয়াছেন। তাঁহার কার্য্যপ্রণালী সরল ও স্নগম ছিল। তিনি অবলীলায় আপনার কর্তব্যপথ নির্ধারণ করিতেন, অবলীলায় সেই পথ অবলম্বন করিয়া কার্য্যক্ষেত্রে অগ্রসর হইতেন। কিন্তু গ্রাণ্ট স্বাধীনভাবে কোন স্বাধীন মত প্রকাশের অবসর অতি অল্পই পাইয়াছেন। ভারতবর্ষ ও ভারতবর্ষীয় লোকদিগের সম্বন্ধে তাঁহার তাদৃশ অভিজ্ঞতা ছিল না। তাঁহার কার্য্য প্রধানতঃ কাগজপত্র লেখাতেই পর্য্যবাসিত হইত। সর্বদা মিনিট লিখিয়া ও গবর্নমেন্ট সংক্রান্ত কাগজাদির আন্দোলন করিয়া তিনি এমন পরিপক্ক হইয়া ছিলেন যে, যদি কাগজরাশির মধ্যে কোনরূপ ভুল থাকিত ও তৎপ্রযুক্ত যদি গবর্নমেন্ট রাজস্ব-সংক্রান্ত হিসাবপ্রভৃতিতে ব্যতিব্যস্ত হইতেন, তাহা হইলে তিনি সেই কাগজরাশি দেখিয়া তৎক্ষণাৎ সেই ভুল সংশোধন করিয়া দিতেন। গ্রাণ্ট লর্ড ডালহৌসীর শাসন-কালের শেষাংশে মন্ত্রিসভায় সত্যের আসন পরিগ্রহ করেন। তিনি যে সমস্ত মিনিট লিপিবদ্ধ করিয়াছেন, তৎসমুদয় সে সময়ে গবর্নমেন্টসংক্রান্ত প্রথম শ্রেণীর কাগজ বলিয়া পরিগণিত ছিল। তাঁহার মিনিটে যুক্তিপ্রণালী সুব্যবস্থিত থাকিত,

স্বাভিপ্রায় পরিকৃত রূপে অভিযুক্ত হইত, এবং স্থানে স্থানে গভীর রসিকতা ও স্থানে স্থানে গভীর শ্লেষের বিকাশ দেখা যাইত। স্থূলতঃ জন গ্রাণ্ট মনস্বী ও উদার প্রকৃতির লোক ছিলেন। যদিও এই উদারতা রাজনৈতিক চাতুরীতে সময়ে সময়ে সঙ্কুচিত হইত, তথাপি গ্রাণ্টের সাধুতা ও জীবনের পবিত্রতার সঙ্ক্ষে কেহই বাঙ্ নিষ্পত্তি করিত না।

বার্ণেস্ পিকক্ ব্যবস্থাসচিব ছিলেন। আইনপ্রণয়ন ও আইনব্যবস্থাপনেই তাঁহার সমস্ত অবিবাহিত হইত। তিনি হুম্বুদ্ধি ও হুম্বদর্শী ছিলেন। তাঁহার অন্তঃকরণও প্রশস্ত ছিল। বিখ্যাত ওকেনলের বিচার-সময়ে পিককের আইনাভিজ্ঞতা প্রথমে পরিষ্কৃত হয়। তিনি এই অভিজ্ঞতাব বলে ভারতবর্ষে ব্যবস্থাসচিবের আসনে সমাসীন হন। কিন্তু ভারতবর্ষীয়দিগের আচার ও ব্যবহার পদ্ধতি তাঁহার অল্প পরিজ্ঞাত থাকাতে তিনি সকল বিষয় ইঙ্গরেজী প্রণালী অনুসারেই সম্পন্ন করিতে উদাত হইতেন। ইঙ্গলণ্ডীয় পদ্ধতি ও ইঙ্গলণ্ডীয় রীতি যে ভারতবর্ষে সম্যক্ প্রয়োজিত হয় না, ইহা তাঁহার জ্ঞান ছিল না। ভারতবর্ষের অধিবাসিগণ বিভিন্ন সম্প্রদায়ে বিভক্ত। ইহাদের অনুশাসন, ইহাদের ব্যবহার-প্রণালী এবং ইহাদের শৌকিক-ক্রিয়া পরস্পর ভিন্ন লক্ষণাক্রান্ত। সুতরাং ইঙ্গরেজী সংস্কারের অনুবর্তী হইয়া কোনরূপ ব্যবস্থা প্রচলিত করিলে উহা সকল সময়ে এই সকল বিভিন্ন সম্প্রদায়ের উপযোগী হইতে পারে না। পিকক স্থলবিশেষে ভারতবর্ষীয়দিগকে এইরূপ অনুপযুক্তরূপে সংস্কৃত করিতে ইচ্ছা করিতেন। কিন্তু পিককের উৎসাহ ও কার্যক্ষমতা প্রবল ছিল। তিনি উৎসাহসহকারে কার্যক্ষেত্রে প্রবেশ করিতেন, এবং স্বীয় কমতাগুণে স্বকর্তব্য সম্পন্ন করিয়া তুলিতেন।

এইরূপ সহযোগিদিগের সহিত মিলিত হইয়া কানিংগ্ ভারতবর্ষ-শাসনে প্রবৃত্ত হন। মোটামুটি বলিতে গেলে, সে সময়ে মন্ত্রি-সভা নিরবচ্ছিন্ন অপ-সার্থ বা অকর্ম্মণ্য লোকে সংপৃষ্ঠিত হয় নাই। জেনেরল লোর শ্রায় ব্যক্তি মন্ত্রি-সভায় অধিষ্ঠিত থাকাতে সভা অনেক পরিমাণে গৌরবান্বিত হইয়াছিল। যদিও লো মাদ্রাজের সৈনিক দলের একজন প্রাচীন সৈনিক পুরুষ ছিলেন, তথাপি তাঁহার রাজনীতিজ্ঞতা ও ভারতবর্ষের সঙ্ক্ষে অভিজ্ঞতা অতুলনীয় ছিল। এই বহুগুণান্বিত সহযোগী কানিংগ্‌র অহুচিতমন্ত্রণাদাতা ছিলেন না*।

কানিংগ্ বধন ভারতবর্ষে উপস্থিত হন, তখন জর্জ্ আনসন ভারত

* লর্ড কানিংগ্‌র পৃহবিহার কিয়ৎকাল পরেই জেনেরল লো ইঙ্গলণ্ডে যাত্রা করেন। পরবর্তী পীতকালে (১৮৫৬-৫৭) তিনি এই দেশে প্রত্যাবৃত্ত হন।

বর্ষের প্রধান সেনাপতি ছিলেন। জর্জ আনসন্ ভারতবর্ষের প্রধান সেনাপতি হওয়াতে ভারতবর্ষীয় ইঙ্গরেজ-সম্প্রদায়ের সকলেই সাতিশয় বিশ্বয় প্রকাশ করিয়া ছিলেন; যেহেতু, তাঁহার সেনাপতি আনসনে কোন অসাধারণ সৈনিক গুণ দেখিতে পান নাই। আনসনের দেহলক্ষী ক্ষীণ ও কিয়ৎপরিমাণে নিশ্চত ছিল। আনসন্ শালগ্রাংশু মহাভূজ ছিলেন না। বিরাট মূর্তির অল্পরূপ কোন সৌন্দর্য্য তাঁহার দেহে লক্ষিত হইত না। তিনি রুশ ছিলেন। এদিকে ভারতবর্ষের জলবায়ু অনেক সময়ে বিদেশীর শরীরে সহ হয় না; ঋতুপরিবর্তনে অনেক সময়ে তাঁহাদের দৈহিক সুস্থতারও পরিবর্ত হইয়া থাকে। ১৮৫৬ অব্দের গ্রীষ্ম ও বর্ষাকালের জলবায়ু আনসনের দেহে এরূপ বিক্রম প্রকাশ করিতে লাগিল যে, লর্ড কানিংজ অনেক বার বিলাতে লিখিয়া পাঠাইলেন, তাঁহার সৈনিক সহযোগী ক্রমেই কঙ্কালমাত্রে পর্য্যবসিত হইতেছেন, ক্রমেই দৈহিক বীৰ্য্য ও তেজস্বিতা তাঁহা হইতে অন্তর্দান করিতেছে।

এই সময়ে দেওয়ানী ও সৈনিক বিভাগের ক্ষমতা পরস্পর সীমাবদ্ধ বা সুব্যবস্থিত ছিল না। স্মতরাং যখন উভয় বিভাগের প্রধানতম কর্তৃপক্ষ বিভিন্ন মত অবলম্বন করিতেন, তখন উভয়ের প্রতিদ্বন্দ্বিতা অপরিহার্য্য হইয়া উঠিত। ঘটনাক্রমে এই সময়ে গবর্নরজেনেরল ও প্রধান সেনাপতির মধ্যে বৈষয়িক কার্য্য-সম্বন্ধে প্রতিদ্বন্দ্বিতা উপস্থিত হয়। কিন্তু ইহাতে ব্যক্তিগত বিবাদে সূত্রপাত হয় নাই। লর্ড কানিংজ ও সেনাপতি আনসন্, উভয়েই পরস্পরের প্রতি সম্মান প্রদর্শন করিতেন। ক্রমে এ বিষয় সংবাদপত্রে অতিরঞ্জিত হইয়া তীব্রভাবে আন্দোলিত হইতে লাগিল; এই আন্দোলন কেবল ভারতবর্ষেই সীমাবদ্ধ রহিল না, ইঙ্গলণ্ডেও উপস্থিত হইয়া তত্রত্য ব্যক্তিদিগকে চমকিত করিয়া তুলিল। ইঙ্গরেজগণ ভাবিলেন, ভারতবর্ষের গবর্নরজেনেরল ও প্রধান সেনাপতির মধ্যে অবশ্যই বিবাদের সূত্রপাত হইয়াছে। কিন্তু ভারতবর্ষের প্রধানতম দেওয়ানী কন্সচারী লিখিলেন, যদিও কেবল একটি বিশেষ বিষয়ে তাঁহাদের মধ্যে অনৈক্য হইয়াছে, তথাপি সৈনিক-প্রধানের সৌম্য প্রকৃতি এরূপ মনোহারিণী ও তিনি এরূপ পবিত্র স্বভাবের সম্ভ্রান্ত ব্যক্তি যে, তাঁহার সহিত কখনও বিবাদ হওয়া সম্ভাবিত নহে *। বাহা হউক, এই অনৈক্যে পর-

* লর্ড কানিংজ ভূন মাসে আনসনের সম্বন্ধে লিখিয়াছিলেন; "তাঁহার প্রকৃতি মনোহর।

স্পরের প্রতি পরস্পরের শ্রদ্ধা বা সম্মান কম হয় নাই) যখন আনসন্ সেপ্টেম্বর মাসে কলিকাতা পরিত্যাগ করিয়া সৈন্তপরিদর্শন-স্থানসে-উত্তরপশ্চিমাঞ্চলে যাত্রা করেন, তখন তিনি গবর্নরজেনেরলের সহায়তায় মোহিত হইয়াছিলেন। আনসন্ গবর্নরজেনেরলের সৌহার্দ ও সৌজন্যে সন্তুষ্ট হইয়া কলিকাতা পরিত্যাগ করেন। এই সৌহার্দ ও এই সৌজন্যের বিষয় কখনও তাঁহার স্মৃতিপথ হইতে অপসারিত হয় নাই।

গবর্নরজেনেরলের তিন জন সেক্রেটারির মধ্যে সিসিল বীডন হোম ডিপার্টমেন্টে, এডমোনস্টোন পররাষ্ট্রবিভাগে ও কর্ণেল বাচ্চ সৈনিক বিভাগে নিয়োজিত ছিলেন। প্রথম দুইজন যুদ্ধদর্শী ও কার্যকুশল ছিলেন। তাঁহারা যে যে বিভাগের কার্যে ব্রতী ছিলেন, সে সে বিভাগের সমুদয় বিষয় তাঁহাদের অভ্যস্ত ছিল। কানিংহাম এই সকল কর্মচারীর অধিনায়ক হইয়া কার্যক্ষেত্রে অবতীর্ণ হন, এবং এই সকল কর্মচারীর সাহায্যে সুবিস্তৃত ভারত সাম্রাজ্যের পরিচালনে মনোনিবেশ করেন।

ব্যবস্থাপকসভা এই সময়ে সাত জন সভ্যে সংগঠিত হইয়াছিল। ডোরিং উহার সহকারী সভাপতি ছিলেন; ইলিয়াট সাম্রাজ্যের, লি গেইট-বোথাইর, কারি বাঙ্গালার এবং হারিঙ্গটন উত্তরপশ্চিমাঞ্চলের প্রতিনিধিত্ব গ্রহণ করিয়াছিলেন। প্রধান বিচারপতি ও স্থার আর্থর বুলারও উহার

তাঁহার সুযোগ্য উত্তরাধিকারী আর্কে আছে, তাহা আমি অবগত নহি।" ইহার পর অক্টোবর মাসে তাঁহার লেখনী হইতে এই বাক্য নির্গত হয় :—“আপনি আনসন্ ও আমার সম্বন্ধে যে প্রতিশব্দভার উল্লেখ করিয়াছেন, তাহাতে আমি বিস্মিত হইতেছি না। যেহেতু, দুই তিন মাস হইল, এ বিষয় কলিকাতায় আলোচিত হইয়াছে। সংবাদপত্রেও উহা হান পরিগ্রহ করিয়াছে। আমার বোধ হয়, দুইটি বিষয়ে আমাদের মধ্যে অমৈত্র্য হওয়াতে এই আলোচনের সূত্রপাত হইয়াছে। সেই বিষয় দুটির একটি এই, যে সকল কর্মচারী বিদায় গ্রহণ করিয়া স্বদেশে যাইতে ইচ্ছুক হন, প্রধান সেনাপতি তাঁহাদের সেই বিদায়-প্রার্থনাপত্র স্বয়ং গ্রহণ করিয়া গবর্নরজেনেরলের মন্ত্রিসভায় পাঠাইবার ক্ষমতা চাহিয়াছিলেন। দ্বিতীয়টি এই, গবর্নরজেনেরল দেওয়ানী ও রাজনৈতিক বিভাগে যে সমস্ত কর্মচারী নিয়োগ করেন, তাহাতেও প্রধান সেনাপতি ক্ষমতা পরিচালন করিতে চাহিয়াছিলেন। কিন্তু আমি এই দুই বিষয়েই তাঁহার মতের অগ্রমোদন করি নাই। কিন্তু এইরূপ অমৈত্র্য বা এতদ্ভেদক আলোচনে আমাদের মধ্যে কোনরূপ বনাস্তর হয় নাই। সেনাপতি এরূপ সাধুপ্রকৃতির নোক ও এরূপ মহাশয় ব্যক্তি যে, তাঁহার সহিত বিবাদ হওয়া অসম্ভব।” Ms. Correspondence. Com. p. Kaye, History of the Sepoy War, Vol. I., p 394, note.

অস্ত্রনিবিষ্ট ছিলেন । এই সকল সভ্যদিগের কেহ উদার মত কেহ বা ডালহৌসীর অবলম্বিত সঙ্গীর্ণ মতের অনুবর্তন করিতেন । *

হালিডে বঙ্গদেশের লেফটেনেন্ট গবর্নরের পদে অধিষ্ঠিত ছিলেন । কর্তব্য-প্রিয়তা ও শ্রমশীলতার সহিত অনুদারতা ও অব্যবস্থিততা হালিডের হৃদয় অধিকার করিয়াছিল । হালিডে ত্রায়-বুদ্ধির বশবর্তী হইয়াও অত্যায়ে কঠোর দণ্ড পরিচালনে কাতর হইতেন না, এবং শুল্ক ও স্ফর্মাজিত রুচির অধিকারী হইয়াও লোক-বিরাগ সংগ্রহে অপরাধু ছিলেন না । তিনি মুখে অমৃতরস বর্ষণ করিয়া সাধারণকে সন্তুষ্ট করিতেন, বাক্যে গরল-ধারা প্রবাহিত করিয়া লোকের হৃদয় কলুষিত করিয়া তুলিতেন । তাঁহার অভিপ্রায় স্বাধীনতার পরিপোষক হইত, তাঁহার নীতি দৌরাশ্ব্যের পরাক্রম অক্ষুণ্ণ রাখিতে সচেষ্ট থাকিত । ভারতবর্ষীয় সংস্কারকগণ আপনাদের সংস্করণ-কার্যের স্থলে হালিডের দৃষ্টান্ত সংগ্রহ করিতেন ভারতবর্ষীয় প্রাচীন সিবিলকর্মচারিগণ আপনাদের কার্যপদ্ধতির স্থলে হালিডের অবলম্বিত নীতির উল্লেখ যত্নশীল হইতেন । হালিডে মুদ্রণ-স্বাধীনতার সাতিশয় বিরোধী ছিলেন । সংবাদ পত্রের উপর তাঁহার এই বিরক্তির কোন যুক্তিসঙ্গত কারণ ছিল না । তিনি সংবাদ পত্রের তেজস্বিনী বহুশিখায় হস্ত প্রসারণ করিয়াছিলেন, হস্ত দণ্ড হইয়াছিল বলিয়াই বালকের ত্রায় উহার উপর জাতক্রোধ হইয়াছিল । এক সময়ে তিনি নিতান্ত নির্কোণ্ডের ত্রায় লর্ড ডালহৌসীর প্রাইভেট সেক্রেটারির সহিত প্রকাশ্য বাগযুদ্ধে প্রবৃত্ত হন । যে কোন কারণেই হউক, লর্ড ডালহৌসী স্বীয় প্রাইভেট সেক্রেটারিকে লেফটেনেন্ট গবর্নরের সত্যবাদিতার উপর দোষারোপ করিতে অনুমতি দিয়াছিলেন । ১৮৫৭ অব্দে যে আইন বিধিবদ্ধ হইয়া কিছুকাল মুদ্রণ-স্বাধীনতার অন্তরায় হইয়াছিল, হালিডে তাহার একজন প্রধান পরিপোষক ছিলেন । আইন তাঁহার হস্তে যে ক্ষমতা সমর্পণ করিয়াছিল, সে ক্ষমতা প্রয়োগ করিতে তিনি যথাশক্তি চেষ্টা করিতেন । সিপাহি-যুদ্ধের সময়ে তিনি ভারতবর্ষীয় ইঙ্গরেজ-সম্প্রদায়ের অপ্রিয় হইয়া উঠিয়াছিলেন, তাঁহার নিজের কর্মচারিগণও এবিষয়ে তাঁহার পরিপূরক হইতে কাতর হন নাই ।

যিনি অসামান্য বিক্রম প্রকাশ করিয়া শ্রীরঙ্গপতনে ব্রিটিশ পতাকা উড্ডীন করেন, তাঁহার পুত্রের হস্তে মাদ্রাজের শাসনভার ছিল । লর্ড হারিস্ এক জন সামাজিক, দয়ালু এবং গম্ভীরস্বভাবের লোক ছিলেন । প্রকৃতি

তঁাহার স্বভাব উদার করিয়াছিল, পবিত্র খ্রীষ্ট ধর্ম-তত্ত্ব তঁাহাকে মুহূর্ত্তর সামাজিক করিয়া তুলিয়াছিল, এবং ঘটনাবলি তঁাহাকে বিভিন্ন বিভাগ দ্বা বা বিভিন্ন বিষয় শাসন করিবার শ্রবল সমর্থনকারী করিয়াছিল। তিনি সাধুতাকে হৃদয়ের সহিত ভাল বাসিতেন, সত্যনিষ্ঠাকে সর্বাঙ্গতঃ করণে আদর করিতেন, সুবিবেচনা ও সুপরামর্শে সাতিশয় প্রকুল হইতেন। উৎপীড়িত প্রজাগণের দুঃখ নিবারণ জন্ত তিনি কোন কষ্টকে কষ্ট বলিয়া বিবেচনা করিতেন না, স্বকর্তব্য সম্পাদন কালে তিনি কোন প্রকার লোক-নিন্দাকে নিন্দা বলিয়া গ্রাহ্য করিতেন না। তিনি একদিকে সাধারণের কষ্ট নিবারণ জন্ত বিখ্যাত সমাজ প্রতিষ্ঠিত করেন, অপর দিকে লোকনিন্দায় উপেক্ষা প্রদর্শন পূর্বক মুদ্রণ-স্বাধীনতার বিরুদ্ধে একটি মিনিট লিপিবদ্ধ করিয়া আপনার অভি-প্রায়ানুসারি কার্যসম্পাদনে একাগ্রতার পরিচয় দেন। দীর্ঘসূত্রতা লর্ড হারিসের শাসনকার্যের একটি গুরুতর দোষ ছিল। তিনি মাদ্রাজে ভূমির বন্দোবস্ত-কার্যের অনুষ্ঠান করেন, বোধ ৩৬ বৎসর ইহার কার্য চলিবে বলিয়া মনে করা হইয়াছিল। প্রথমে তঁাহার শাসন-নীতি মুসলমান ধর্ম-বলম্বিগণের বিরুদ্ধবাদিনী ছিল, কিন্তু শেষে এই বিরুদ্ধ ভাব অপেক্ষাকৃত অল্প হইয়া আইসে।

লর্ড এলফিন্‌ষ্টোন বোম্বাইর শাসন-দণ্ড গ্রহণ করিয়া ছিলেন। বিংশতি বৎসর পূর্বে এলফিন্‌ষ্টোন মাদ্রাজের শাসন-কার্যে ব্যাপ্ত থাকেন। এই সময়ে আতিথেরতা ও আনন্দপ্রিয়তায় তিনি লোক-প্রসিদ্ধ ছিলেন। কিন্তু বোম্বাই আসিয়া তিনি শাসন-বিভাগে আপনাকে সবিশেষ প্রসিদ্ধ করিয়া তুলেন।

উত্তরপশ্চিমপ্রদেশ এই সময়ে লেক্টেনেন্ট্ গবর্নর কলবিন সাহেবের শাসনাধীন ছিল। কলবিন প্রথমে লর্ড অকলাণ্ডের প্রাইভেট্ সেক্রেটারি ছিলেন। ইহার পর তিনি তেনাসরিম প্রদেশের কমিশনর ও সদর জজের পদে অধিরোহণ করেন। শেষে উত্তরপশ্চিমাঞ্চলের শাসনদণ্ড তঁাহার হস্তে সমর্পিত হয়।

ভালই হউক, আর মন্দই হউক, এই সকল লোকের হস্তে ১৮৫৭ অব্দের প্রথম ভাগে গবর্নমেন্টের শাসন-ভার ব্রহ্ম ছিল। লোমহর্ষণ বিপ্লব সংঘটনের পূর্বে ইঙ্গলও এই সকল রাজপুরুষের হস্তে আপনার প্রাচ্য সাম্রাজ্যের সুব্যবস্থা ও সুশৃঙ্খলার ভার সমর্পণ করিয়াছিলেন।

প্রথম ভাগ সমাপ্ত।

চতুর্থ অধ্যায় ।

লর্ড ডালহৌসীর রাজ্য-শাসনের অনুষ্ঠিত—ভূস্বামীদিগের অধঃপতন—রাজস্বযুক্তি
অবস্থা—উত্তর পশ্চিমাক্ষের ভূমির খলোবস্ত—তালুকদারী স্বত্ব—ভূমিক্রোক—বোম্বাইর
ইনাম কমিশন—দেওয়ানী আদালতের বিচারকার্য—জ্যোতিঃপ্রসাদের বিচার—সমাজের
অভ্যন্তরীণ অবস্থা ।

যখন প্রাচীন রাজ্যসমূহ ব্রিটিশ কোম্পানির অধিকারভুক্ত হইতে
ছিল, যখন প্রাচীন রাজবংশীয়গণ ব্রিটিশ
১৮-৬-১৮৫৬ খ্রীঃ অব্দ ।

কোম্পানির পেন্সন গ্রহণ করিতে ছিলেন,
তখন আমাদের সম্রাজ্য ভূস্বামীদলের বিরুদ্ধে আর একটি মহাসংগ্রাম উপ-
স্থিত হয় । রাজ্য-গ্রহণের স্তায় ঐ সংগ্রামও মারাত্মক ফল প্রসব করিয়া
সকলকে ব্যস্তব্যস্ত করিয়া তুলে । ডালহৌসী ঐ সংগ্রাম প্রথমে ঘোষণা
করেন নাই, উহা অনেক রাজনীতিক্তি ব্রিটিশ কর্মচারীর মস্ত-বলে অনুষ্ঠিত

প্রগাঢ় ছিল, তথাপি তাঁহারা নিয়ন্ত্রণের উপকারের জন্ত উচ্চতর সম্প্রদায়ের উন্নয়নকেই যোগ্যতর কার্য মনে করিয়াছিলেন।

দুই উপারে এই মাঝামাঝি কার্য সম্পন্ন হয়; এক, ভূমির বন্দোবস্ত, অপর ভূমির ক্রোক। অযোধ্যার নবাব হইতে যে সমস্ত প্রদেশ লাভ হয়, এবং মহারাষ্ট্র-যুদ্ধে জয়ী হওয়াতে গঙ্গা ও যমুনার মধ্যবর্তী যে যে রাজ্য অধিকৃত হয়, তৎসমুদয়ে কোন রূপ চিরস্থায়ী বন্দোবস্ত করিবার প্রস্তাব হইতে থাকে। লর্ড উইলিয়ম বেণ্টিঙ্কের শাসনসময়ে উত্তরপশ্চিম প্রদেশে ঐ বন্দোবস্ত-কার্য যথাবিধি অকল্পিত হয়। গবর্ণমেন্ট এই প্রস্তাব যে সহুদেয় লক্ষ্য করিয়া, ও বিজ্ঞতার বশবর্তী হইয়া, স্থির করিয়াছিলেন, সে বিষয়ে কাহারও সংশয় নাই। ঘটনার মূল সূত্র প্রগাঢ় মহত্ব ও গভীর উদারতার পরিচায়ক। গবর্ণমেন্ট ঘোষণা করিয়াছিলেন, “দরিদ্র ও নিঃসহায় দুঃখদিগের এবং ধনী ও সহায়-সম্পন্ন তালুকদারগণের বর্তমান স্বত্বের নিরক্ষরণ ও সেই স্বত্বের রক্ষণ, গবর্ণমেন্টের কর্তব্য *”। এই কর্তব্য অপেক্ষা উদার রাজনীতি সম্বন্ধে আর কোন রাজকীয় কর্তব্য সম্ভবে না। কিন্তু বন্দোবস্ত-সংক্রান্ত কর্মচারিগণ এই উদার কর্তব্যের সম্পাদন-ভার গ্রহণ করিয়া অনেক অনিষ্টের সূত্রপাত করেন। তাঁহারা ছায়ে অল্পসরণ করিতে বাইয়া, অজ্ঞানে পতিত হন, এবং সুবিচার করিতে বাইয়া, অবিচারের পরিচয় দেন। তাঁহাদের পরিদর্শন-পুস্তকের প্রতি পত্র দুই স্তম্ভে বিভক্ত থাকিত। এক স্তম্ভের শীর্ষ-দেশে “মুস্তাজীর” (কৃষক) ও অপর স্তম্ভের শীর্ষদেশে “মালিক” (অধিকারী) লিখিত হইত। মালিকের স্তম্ভে প্রায়ই শূন্য থাকিত। কর্মচারিগণ স্বল্প অল্প-সন্ধান না করিয়া, এক জনকে তাহার চিরন্তন সম্পত্তি হইতে বিচ্যুত করিতেন, এবং ইচ্ছানুসারে তাহাকে কৃষকের স্তম্ভে নিবেশিত করিতেন। ইহা মহত্তর সাম্যপ্রণালী; বন্দোবস্ত-সংক্রান্ত কর্মচারিগণ অসঙ্কুচিতচিত্তে সকলকেই এই প্রণালীর অধীনে আনয়ন করিতে উদ্যত হইয়াছিলেন। যখন আদি পুরুষ আদম স্বহস্তে মৃত্তিকা খনন করিতেন, তখন ধনী লোক কে ছিল? আর যখন চিরমাত্র পল্লী-সমাজ প্রথমে প্রতিষ্ঠিত হয়, তখনই বা কে ধনবান্ ছিল? স্মরণ্য সমাজে তালুকদারের অস্তিত্ব বিলুপ্ত হওয়াই

* Letter of Mr. John Thornton, Secretary to Government, N. W. Provinces to Mr. H. M. Elliot, Secretary to Board of Revenue, April 30, 1845.

উচিত। কর্মচারিগণ এইরূপ উদারতা, এইরূপ বিবেক-বুদ্ধি ও এইরূপ সুনীতির বশবর্তী হইয়া, ভূস্বামি-সম্প্রদায়ের উচ্ছেদ সাধন করেন।

উত্তরপশ্চিম প্রদেশে এইরূপে ভূমির বন্দোবস্ত-কার্য আরম্ভ হয়। অনেক তালুকদার পৈতৃক সম্পত্তি হইতে বিচ্যুত হইয়া, সাধারণ লোকের অবস্থায় পতিত হন, অনেকের সম্পত্তি আইনের বলে (Sale Law) প্রকাশ্য নিলামে বিক্রীত হইয়া যায়। বন্দোবস্তসংক্রান্ত কর্মচারিগণের উত্তোলিত দণ্ড, ধনী ও নিধন, সকলকেই এক ভূমিতে আনয়ন করে। রাজনীতির অক্ষুণ্ণ শক্তি অহুদার ভাবে বিকাশিত হয়, সংহার-মুক্তির আয় ছাইয়া পড়ে, প্রতি-কূলতায় পরিপুষ্ট হয়, শেষে বদ্ধিতধিক্রমে সঙ্গদয় বিনষ্ট করিয়া ফেলে। যদি অল্পকূল ঘটনাবশতঃ কেহ এই সংহারিণী রাজ-শক্তির হস্ত হইতে রক্ষা পাইতেন, তাহা হইলে তখন তাহা ইচ্ছাজাল বলিয়া যোধ হইত। তালুক-দাবগণ প্রায়ই নিরোধ, অক্ষম, ছুরাচার, অথবা এই বিশেষণত্রয়ের সমষ্টী-ভূত এক অপূর্ব জীব বলিয়া উল্লিখিত হইতেন। এই নির্কুদ্ভিতা অক্ষমতা ও ছুরাচারিতাই তাঁহাদের সম্পত্তি-চ্যুতির কারণ বলিয়া নির্দিষ্ট হইত। এ বিষয়ের একটি দৃষ্টান্ত দেওয়া যাইতেছে। মৈনপুরীর রাজা উত্তর পশ্চি-মাঞ্চলে সম্রাস্ত তালুকদার বলিয়া, প্রসিদ্ধ ছিলেন। তাঁহার বংশ যেমন প্রাচীন, তেমনই সম্মানিত ছিল। রাজভক্তি ও সংকার্যের নিমিত্ত, ব্রিটিশ গবর্ণমেন্টের নিকটেও তিনি বিশিষ্ট গণনীয় ছিলেন। তাঁহার বিস্তৃত তালুক প্রায় দুই শত পল্লী গ্রাম লইয়া ছিল। ঐ স্থানের বন্দোবস্ত-কর্মচারী ও কার্যনিপুণ ও ক্ষমতাপন্ন ছিলেন। কাব্য-নিপুণতা ও ক্ষমতা বলে তিনি শেষে সেই প্রদেশে উচ্চতম পদে অধিষ্ঠিত হন। কিন্তু সাম্য-প্রণালী তাঁহার চিরাত্যস্ত ছিল। তিনি ঐ প্রণালীর পরিপোষকগণের শ্রেণীতে বসিয়াই রাজনৈতিক মন্ত্র শিক্ষা করিয়াছিলেন। সুত্তরাং বন্দোবস্তসংক্রান্ত অপর কর্মচারিগণ তালুকদারদিগকে যে ভাবে দেখিতেন, তিনিও মৈনপুরী-রাজকে সেই ভাবে দেখিলেন। এডমন্টোন মৈনপুরীর অধিপতিকে অক্ষম বলিয়া নির্দেশ করিতে কুষ্ঠিত হইলেন না, তাঁহার মতে, রাজা সর্বদা দৃষ্ট-বুদ্ধি কর্ম-চারিগণে বেষ্টিত থাকেন, সম্পত্তির তত্ত্ববধানে অমনোযোগী হন, সর্ব প্রকার পাপকার্যের অমুষ্ঠান করেন। সমস্ত ভূসম্পত্তির এক চতুর্থাংশ রাজাকে দিয়া অপরাংশ গ্রহণই ঐ অপরাধের উচিত শাস্তি বলিয়া বিবেচিত হইল। মৈনপুরী-রাজ ১৪৯ গ্রামের অধিস্বামী ছিলেন, বন্দোবস্ত-কর্মচারী উহার

মধ্যে তাঁহাকে কেবল ৫১ খানি গ্রাম দিয়া, গ্রামের লোকদিগের সহিত অপ-
রাপর গ্রামগুলির বন্দোবস্ত করিবার প্রস্তাব করিলেন। এই সঙ্গে মৈনপুরী
রাজকে বিচ্যুত গ্রামগুলির জন্ত কিছু অর্থ দিবারও কথা থাকিল।

রাজ্য-শাসন-বিভাগের শ্রেণী-অনুসারে বন্দোবস্ত-কর্মচারীর উপর কমি-
শনর, কমিশনরের উপর রেবিনিউ বোর্ড, এবং রেবিনিউ বোর্ডের উপর
লেফ্টেনেন্ট গবর্নর অবস্থিত করিতেন। ইহাদের কেহ শ্রাটীন, কেহবা
আধুনিক মন্ত্রে দীক্ষিত ছিলেন। সতরঞ্চের বিভিন্ন বর্ণের গুটিকার গ্রাম
ইহারা এক ক্ষেত্রেই বিভিন্ন ভাবে থাকিতেন। জর্জ এডমনস্টোনের
প্রস্তাব কমিশনরের নিকট উপস্থিত হইলে, তিনি তীব্র ভাবে উহার প্রতি-
বাদ করেন। তীক্ষ্ণবুদ্ধি রবট ক্যানিংটনের অকাট্য যুক্তির বলে বন্দো-
বস্ত-কর্মচারীর সমস্ত অনার হেতুবাদ খণ্ডিত হইয়া যায়। হামিণ্টনের
মতানুসারে ভূসম্পত্তি, অর্থের বিনিময়ে কখনও স্বত্বাধিকারীর হস্তচ্যুত করা
নাইতে পারে না; রাজা সম্পত্তিরক্ষণে অসমর্থ হইলে, অবসর গ্রহণ করিতে
পারেন, তাঁহার অসামর্থ্য হেতু তদীয় বংশধরদিগকে সম্পত্তি হইতে বঞ্চিত করা
উচিত নহে। কোন ভারতীয় রাজ্যাধিপতি ভূসম্পত্তি বিক্রয় অথবা কাহাকে
সম্পত্তি হইতে বিচ্যুত করিলে, যে গবর্নমেন্ট তাহা দোয়ায়্যাকর বলিয়া
যোষণা করেন, সেই গবর্নমেন্টের পক্ষে তদনুরূপ কার্য-প্রণালী অবলম্বন
করা শোভা পায় না*। কিন্তু রবট বার্ড এই সময়ে রেবিনিউ বোর্ডের
পরিচালক ছিলেন। অভিনব রাজনৈতিক মত তাঁহার নিকট সাতিশয়
আদরণীয় ছিল, তিনি কমিশনরের মতের অনুমোদন করিলেন না। অভি-
নব সম্প্রদায়ের পরিপোষক অভিনব সাম্প্রদায়িক মতেরই সমর্থন করিলেন।
সতরঞ্চ গুটিকায় এক শ্রেণী অবনতি স্বীকার করিল, উহার প্রতিদ্বন্দ্বী অপর
শ্রেণী বঙ্কিতবিক্রমে পুনর্বার উন্নত হইয়া উঠিল।

কিন্তু এই স্থলেই ঐ রাজনৈতিক অভিনয়ের শেষ হইল না। রেবি-
নিউ বোর্ডের উপর লেফ্টেনেন্ট গবর্নর কর্তৃত্ব করিতেন, তাঁহার নিকট প্রস্তা-
বিত বিষয় উপস্থিত হইল। রবটসন্ ভারতবর্ষীয়দিগের বখার্ব বন্ধ ছিলেন।
তাঁহার হিতৈষিতা দেশের উন্নতিসাধনে তৎপর থাকিত, তাঁহার বিবেক-
বুদ্ধি দূষিত রাজনীতির উন্মুলনে নিয়োজিত হইত, এবং তাঁহার কর্তব্য-জ্ঞান
উদারতা ও অপক্ষপাতের সম্মান রক্ষা করিত। তিনি ঐ অভিনব দূষিত

* Despatch of Court of Directors, August 13, 1851.

রাজনীতির সমর্থন না করিয়া উদার ও অপক্ষপাত নীতির সমর্থন করিলেন। কমিশনের রবর্ট হামিল্টনের যুক্তি-পূর্ণ মতই তাঁহার অনুমোদনীয় হইল। কিন্তু বোর্ডের প্রতিকূলতায় এ সম্বন্ধে গবর্ণমেন্টের আদেশ-লিপি প্রচারিত হইতে বিলম্ব হইল। মৈনপুরীরাজের সহিত বন্দোবস্ত হইবার পূর্বেই রবর্টসন্ কক্ষ পরিত্যাগ করিলেন, এবং তাঁহার আসনে জর্জ ক্লার্ক উপবিষ্ট হইলেন। ক্লার্কও তাঁহার পূর্ববর্তী শাসনকর্তার স্থায় উদারস্বভাব ও উদারনীতির পরিপোষক ছিলেন। কিন্তু দীর্ঘকাল তিনি ঐ উদারতার পরিচয় দিতে পারিলেন না। অসুস্থতাহেতু তাঁহার কার্য-কাল সংক্ষিপ্ত হইয়া আসিল; ক্লার্ক অবসর লইলেন। তাঁহার স্থলে অগ্রমতাবলম্বী অগ্র এক ব্যক্তি উত্তর পশ্চিমাঞ্চলের শাসনদপ্ত গ্রহণ করিলেন।

তমাসন কার্যনিপুণ ও সরলহৃদয় কর্মচারী ছিলেন। কিন্তু অহস্তু-খতা তাঁহার একটি গুণতর দোষ ছিল। তিনি নিজের মত সর্ব্বাংশে রক্ষা করিয়া, কার্য্য করিতে ভালবাসিতেন। তাঁহার শিক্ষা, অভিনব রাজ-নৈতিক তত্ত্বের পরিপোষণ কবিত, প্রাচীন-তত্ত্বের প্রতিকূলতায় মার্জিত হইত, একাগ্রতার উন্নত থাকিত এবং উদ্দেশ্যসাপনে অপরাধু হইয়া উঠিত। আপনার মতের প্রতিবাদ কখনও তমাসনের গ্রাহ হইত না। তিনি অভিনব সম্প্রদায়ের প্রধান শিক্ষাদাতা ও অধিনেতা ছিলেন, স্তরতঃ আপুণিক দলের অনুমোদিত সমদর্শি শাসন-নীতি তাঁহারও অনুমোদনীয় ছিল। তিনি ঐ প্রণালীর বশবর্তী হইয়া, সকলকেই অসঙ্কচিত্তহৃদয়ে এক ভূমিতে আনয়ন করিতেন। তাঁহার উদারতা এইরূপ একীকরণের মহিমা ঘোষণা করিত, কর্তব্য-বুদ্ধি, পবস্বগ্রহণে নিয়োজিত থাকিত, এবং স্থায়-পরতা চিবন্তন স্বপ্নের উচ্চৈর্দে পরিষ্কৃত হইত। উত্তরপশ্চিমাঞ্চলের উচ্চতম গণ্ডে অধিকৃত হইয়া তমাসন দেখিলেন, মৈনপুরীর রাজার বিষয় গবর্ণমেন্টের বিবেচনারীন আছে, এপয্যন্ত কোন চূড়ান্ত আদেশ প্রচারিত হয় নাই, স্তরতঃ তিনি উহা প্রচার করিলেন, বন্দোবস্ত-কর্মচারীর উত্তোলিত দণ্ডই অক্ষয় রহিল। মৈনপুরী-রাজ স্বীয় বিষয়ের তিন চতুর্থাংশ হইতে বঞ্চিত হইলেন। উদার সাম্যপ্রণালী অবাধে অসঙ্কোচে এক জন সমৃদ্ধ তালুকদারকে সাধারণ লোকের অবস্থায় পাতিত করিল *।

* Ludlow, Thoughts on the policy of the Crown towards India, p. 227-228 Comp. Kaye, Sepoy War, Vol. I, p. 161-162.

বঙ্গদেশের এক জন রাজপুরুষ বোলডর্সন ১৮৪৪ অব্দে যখন আগ্রার রেভিনিউ বোর্ডের মেম্বর ছিলেন, তখন তালুকদারী বন্দোবস্ত-সম্বন্ধে এক খানি ক্ষুদ্র পুস্তক লিপিবদ্ধ করেন। নিম্নিষ্ট ব্যক্তিগণের মধ্যে বিতরণার্থ ঐ পুস্তক মুদ্রিত হয়। বোলডর্সনের পুস্তকে মৈনপুরী-রাজের বিষয় ব্যতীত অন্ত একটী ভূসম্পত্তি-ঘটিত বিবরণ আছে। ভূস্বামিনী পোয়ে-নীর রাণী। ইঙ্গরেজগণ যখন উক্ত প্রদেশ অধিকার করেন, এবং যখন পর্যায়ক্রমে ভূমির বন্দোবস্ত হয়, তখন তাঁহার জমীদারী স্বত্ব অবিসংবাদিত রূপে স্থিরীকৃত হইয়াছিল। কিন্তু রাণীর বিরুদ্ধে কোনও অভিযোগ বর্তমান না থাকিলেও তাঁহার সম্পত্তির সম্বন্ধে অনুসন্ধান আরম্ভ হয়। অনুসন্ধানে রাণী আপনার অধিকৃত সমস্ত বিষয়েরই প্রকৃত স্বত্বাধিকারিণী বলিয়া বিবেচিত হন। উহার ছয় বৎসর পরে রাণী যখন পূর্ণ যুগলী ও সম্পত্তির তত্ত্বাবধারণে সক্ষম ছিলেন, তখন গ্রামের প্রধানদিগের সহিত তাঁহার সম্পত্তির বন্দোবস্ত করিবার নিমিত্ত কোর্ট অব ওয়ার্ড তাঁহাকে অকস্মাৎ আপনাদের অধীনে আনয়ন করেন *।

বন্দোবস্ত-প্রণালীর গ্রায় ভূসম্পত্তির বিক্রয়রীতিও অনেক অনিষ্টের সূত্রপাত করে। কোন বৎসর হুর্ভিক্ষ উপস্থিত হইলে যেমন এক দিকে খাদ্যের অভাবে লোকের ছরবহার এক শেষ হইত, তেমনই অপর দিকে বিক্রয়-আইনের (Sale Law) বলে ভূস্বামীদিগের সর্বনাশ হইয়া যাইত। তালুকদারগণ ঐ ছঃসময়ে খাজনা দাখিল করিতে পারিতেন না, সুতরাং তাঁহাদের সমস্ত বিষয় অবিলম্বে প্রকাশ্য নিলামে বিক্রীত হইয়া যাইত। এইরূপ সম্পত্তি-বিক্রয়ে অনেক ভূস্বামী সর্বস্বান্ত হইয়া পড়েন। স্বল্প বৃদ্ধি রবটসন ১৮৪২ অব্দের ১৫ই এপ্রেল লিখিয়াছিলেন, “আমার আশঙ্কা হইতেছে, তালুকদারী বন্দোবস্ত, ভূমিক্রোক ও ভূমিবিক্রয়-সংক্রান্ত আইনে বর্তমান উচ্চশ্রেণীর সমস্ত চিহ্ন বিলুপ্ত হইয়া যাইবে। এই সকল আইন প্রচার করিয়া গবর্ণমেন্ট দয়াপ্রদর্শনের পথ বন্টন করিয়া তুলিয়াছেন †”। কেবল রবটসনই গবর্ণমেন্টের কাণ্ড প্রণালীর এইরূপ নিন্দা করেন নাই; বাঁহার উদার রাজনীতির পরিপোষক,

* Ludlow, Thoughts on the policy &c., p. 230-231.

† Return on the Revenue Survey, India, 1853, p. 125. Vide Ludlow, Thoughts on the Policy of Crown towards India, p. 236.

তাহারা সকলেই উহার প্রতিবাদ করিয়াছেন। মার্টিন গবিন্স্ ভূমি-বিক্রয় সংক্রান্ত আইনের সম্বন্ধে লিখিয়াছেন, “ভারতবর্ষীয়দিগের সম্বন্ধে আমরা রাজস্ব ঘটতি যে প্রণালী অবলম্বন করিয়াছি, তাহাতে অনেক দোষ বর্তমান রহিয়াছে। রাজস্ব-দানে অক্ষম লোকদিগের প্রতি আমরা যে কঠোরতা দেখাই, তাহা রাজস্ব-প্রণালীর একটি প্রধান দোষ। এই নিয়মানুসারে অক্ষম লোকের ভূসম্পত্তি প্রকৃষ্ট নিলামে বিক্রীত হয়, এবং সে পুরুষানুক্রমে যাহা ভোগ করিয়া আসিয়াছে, তাহা হইতে একবারে বিচ্যুত হইয়া পড়ে*। উত্তর ভারতের ভূস্বামিগণ এই প্রণালীর প্রতি নিরতিশয় ঘণা ও বিরাগ প্রদর্শন করিয়া থাকেন***। আমি যখন রাজস্ববিভাগের কক্ষ-চারী ছিলাম, তখন কখনও ঐ নিয়ম প্রবর্তিত করি নাই। ভারতীয় ভূমি-ধিকারিগণের হান্ন আমিও উহাতে অবজ্ঞা দেখাটয়া থাকি*। প্রশস্তমনা রাজপুরুষগণ এই কঠোর প্রণালীতে এইরূপ কঠোর ভাবে আক্রমণ করিয়াছিলেন। গবর্ণমেন্ট এক সময়ে এইরূপ গুরুতর দণ্ড বিধান করিয়া ভারত বর্ষকে বিষয় ভয় ও আতঙ্কে আচ্ছন্ন করিয়া ভুলিয়াছিলেন। দণ্ডের কঠোরতায় উত্তরপশ্চিমাঞ্চলে তালুকদারগণ হতসর্কস্ব ও হতমান হন, প্রাচীন প্রধানগণ সম্পত্তিচ্যুত ও প্রনষ্ট-সর্কস্ব হইয়া পড়েন, এবং মহাজনগণ দাস্তাকারীদিগের নিকট মস্তক অবনত করেন †।

দূরদর্শী ব্যক্তিগণ সকলেই একবাক্যে স্বীকার করিবেন যে, উত্তর ভারতের এইরূপ বন্দোবস্ত-কাণ্ডে রাজনৈতিক বিষয়ে একটি বড় অনিষ্ট ঘটিয়াছিল। উদার ও সমীচীন নীতি বাহাদিগকে ব্রিটিশ রাজত্বের পক্ষপাতী ও হিতৈষী বন্ধু কহিতে পারিত, ঐ সঙ্কচিত ও অযোগ্য প্রণালী তাহাদিগকে পরনশক্র করিয়া তুলে। প্রাচীন উদার রাজ-নৈতিক মতের পরিপোষকগণ ঐ অনুদার প্রণালীর বিষময় ফল স্পষ্ট দেখিতে পাঠিয়াছিলেন। তাহারা বুঝিয়াছিলেন যে, ঐ সংহারিণী রীতি ভারতে ভবিষ্যৎ বিপ্লবের বীজ রোপণ করিতেছে। অবিলম্বে ঐ বীজ হইতে প্রকাণ্ড বৃক্ষ উৎপন্ন হইয়া সমস্ত ভারতবর্ষ ছাইয়া ফেলিবে। এই সুন্দরদর্শী রাজনীতিজ্ঞগণের মধ্যে ডিরেক্টর সভাব মনস্বী টুকের প্রথমে উল্লিখিত রীতির অনিষ্টকারিতা হৃদয়ঙ্গম করেন। তিনি ভূমির বন্দো-

* Gubbins, The Mutinies in Oude, p. 439.

† Ludlow, Thoughts on the Policy &c., p. 247.

বস্তু-প্রণালীর সম্বন্ধে লিখিয়াছিলেন, “কৃষকদিগের সহিত উচ্চশ্রেণীর তা লুকদরগণের সম্বন্ধ রহিত করা, আমার বিবেচনায়, সেই কৃষকদিগকে আঙ্কানুভূর্তী অথবা তাহাদের অবস্থা উন্নত করিবার প্রশস্ত উপায় নয়। আমরা একশ্রেণীকে পূর্বতন অবস্থা হইতে সম্পূর্ণরূপে বিচ্যুত করিয়াছি। ধটে, কিন্তু তাহাদের পূর্বস্থিতি অথবা বর্তমান অনুভূতি নষ্ট করিতে পারি নাই। তাহারা এবং তাহাদের সম্ভানগণ অবশ্যই বৃষ্টিতে পারিবে যে, তাহাদের সে সৌভাগ্য অস্তিত্ব হইয়াছে। তাহারা এক্ষণে নীরবে আছে, যেহেতু রাজ্যাধিপতিগণের ইচ্ছাব বশীভূত হওয়া ভারতবর্ষীয়দিগের স্বাভাবিক ধর্ম। কিন্তু যদি পশ্চিম সীমান্তে আমাদের কোন শত্রু উপস্থিত হয়, অথবা দুর্ভাগ্যক্রমে কোনরূপ বিপ্লব ঘটে, তাহা হইলে আমরা দেখিব যে, ঐ তালুকদারগণ বিপক্ষদলে প্রবেশ করিয়াছে, এবং তাহাদের অনুভূর্তী প্রজাসমূহ সেই দলের পতাকার অধীনে সজ্জিত হইয়াছে *।” ইহার পচিশ বৎসর পরে এক জন রাজপুরুষ দূরদর্শী রবর্টসনের পাদতলে বসিয়া রাজনীতি শিক্ষা পূর্বক অসঙ্কুচিতভাবে লিখিয়াছিলেন, “(১৮৫৭ অশ্বের) বিপ্লব ঘটিবার এক বৎসরেরও অধিক কাল পূর্বে আমি প্রকাশ্যরূপে দেওয়ানী আদালতের ক্ষমতাব অপব্যবহার, সম্পত্তি-বিক্রয়-সম্বন্ধীয় কঠোর বীতি এবং তৎপ্রযুক্ত সমাজের পরিবর্তন, কর্তৃপক্ষের গোচর করিয়াছি। আমি ইহার পর দেখাইয়াছি যে, যদিও আমরা প্রাচীন সম্প্রদায়কে স্থান-ভ্রষ্ট করিয়াছি, তথাপি তাহাদের পূর্বস্থিতি কিংবা প্রজাদের সহিত তাহাদের সম্বন্ধ নষ্ট করিতে পারি নাই। আমি স্পষ্টাকরে নির্দেশ করিতেছি যে, বিপ্লবের সময়ে এই সমৃদ্ধ ও সহায়-সম্পন্ন সম্প্রদায় ও তাহাদের অনুচরগণ আমাদের শত্রুর দল পরিপুষ্ট করিয়াছিল। আমার এই সাবধা-বতা অবলম্বনের পরামর্শে মনোযোগ দেওয়া হয় নাই; আমাকে আশঙ্কা-কারী বলিয়াই মনে করা হইত, যেহেতু কেবল রাজনৈতিক বিভাগে কার্য করাতে, রাজপুরুষগণ আমাকে রাজস্বঘটিত বিষয়ে সম্পূর্ণ অনভিজ্ঞ, ও উক্ত বিষয়ে কোনরূপ যুক্তিসিদ্ধান্তের মত প্রকাশ করিতে সম্পূর্ণ অসমর্থ, ভাবিতেন”।

“বদাউনে সমস্ত নিম্ন শ্রেণীর অধিবাসিগণই দলবদ্ধ হইয়াছিল, এবং সমস্ত বিভাগেই অরাজকতা ও বিপ্লব বিসাজ করিয়াছিল। প্রাচীন ভূস্বাগি-

* Kaye, Sepoy War, Vol. I, p. 165.

গণ এই অবসরে নিসামক্রেতাদিগকে নিহত বা দুরীভূত করিয়া আপনাদের পৈতৃক সম্পত্তি অধিকার করিয়াছিলেন। যে গবর্ণমেন্ট এক সময়ে কঠোরতা দেখাইয়াছেন, যে গবর্ণমেন্টের কার্য-প্রণালী এক সময়ে সকলকে সম্পত্তিচ্যুত ও শ্রেণীচ্যুত করিয়াছে, সেই গবর্ণমেন্টের ক্ষমতা পুনঃ প্রতিষ্ঠিত করিতে দেশের অস্থিমজ্জাস্বরূপ এই সকল লোক কখনই সম্মত হইবে না। আমার দৃঢ় বিশ্বাস, যদি বিগত অনিষ্টের প্রতিবিধানার্থ কোন উপায় অবলম্বিত না হয়, এবং যদি প্রাচীন বংশাবলিকে স্বপদে পুনঃ প্রতিষ্ঠিত না করা যায়, তাহা হইলে অপরিসীম সৈন্য ও আমাদের প্রভুশক্তি অক্ষুণ্ণ রাখিতে সমর্থ হইবে না। আমি বিলক্ষণ বুঝিতে পারিয়াছি যে, যদি অসন্তোষের এই কারণ বর্তমান না থাকিত, তাহা হইলে যে পল্লীবাসিগণ সিপাহিদিগকে ঘৃণা করে, সেই পল্লীবাসিগণই সিপাহিদিগের সহিত ব্রিটিশ গবর্ণমেন্টের বিরুদ্ধে সমুথিত হইত না। টোটার সহিত ইহাদের কোনরূপ সম্বন্ধ নাই; ময়দার সহিত মনুষ্যের অস্থিচূর্ণ আছে কি না, ইহার। সে বিষয়েরও কোন সংশ্বে থাকে না; আপনাদের ধম্মরক্ষা করা হুকুম হইয়াছে বলিয়াও, ইহার। ব্যাকুলভাবে চীৎকার করে না। যে ভূসম্পত্তি তাহাদের “জানসে আজিজ”—প্রাণ অপেক্ষাও প্রিয়, সেই ভূসম্পত্তির অধিকারচ্যুতি ও পুরুষানুক্রমিক স্বত্ববলোপই তাহাদিগকে এইরূপ উদ্ভিক্ত করিয়া তুলিয়াছে *।”

কর্ণেল স্টিমান জন কলবিনকে এক সময়ে লিখিয়াছিলেন :—“ভারতবর্ষীয় ভূস্বামিদিগের প্রতি সৌজন্য প্রদর্শন করিতে যাইয়া, রবর্ট মার্টিন্ বাৰ্ড যখন স্নযোগ পাইয়াছেন, তখনই তাঁহাদের সম্মান নষ্ট করিয়াছেন, এই সকল ও অন্যান্য বিষয়ে তমাসনও (উত্তরপশ্চিমাঞ্চলের পূর্বতন লেফ্‌টেনেন্টগবর্নর) তাঁহার অনুকরণ করিতে সঙ্কুচিত হন নাই। তাঁহাদের ছন্দানুবর্তী ও প্রশংসাকারিগণের অনেকেই ঐ দৃষ্টান্তের অনুবর্তন করিয়াছেন। * * ভারতবর্ষীয় সমাজের বর্তমান অবস্থায় এক মাত্র ভূমির উপরই উচ্চতর মধ্যবিত্ত সম্প্রদায় সংগঠিত হইতে পারে, তমাসন আপনার প্রণালী প্রবর্তিত করিতে যাইয়া, ভূমির উপর উচ্চতর ও মধ্যবিত্ত সম্প্রদায়ের পরিপুষ্টি সাধনের ব্যাঘাত জন্মাইয়াছেন। তিনি ভারতবর্ষের সমস্ত

* William Edwards, Personal Adventures during the Indian Rebellion, pp. 12, 17.

ভূস্বামীদিগকে অপরিমিতাচারী ও বিঘ্নকারী সম্প্রদায় ভাবিয়া, . সর্বদাই অবজ্ঞার চক্ষে চাহিয়া দেখিতেন * ।”

ভারতবর্ষীয় ভূস্বামিগণ এইরূপ অপরিমিতাচারী ও বিঘ্নকারী সম্প্রদায় বলিয়া উপেক্ষিত ও অনাদৃত হইয়াছিলেন । স্বল্পদর্শী রাজনীতিজগণের এইরূপ কঠোর সমালোচনাও অকার্যকর ও অসার বলিয়া উপেক্ষিত ও অনাদৃত হইয়াছিল । যখন এইরূপ সাম্যশ্রমালীর কার্য ভারতবর্ষে অনুষ্ঠিত হইতেছিল, তখন অত্র এক সম্প্রদায়ের অধিকার বিনষ্ট হইবার স্বত্রপাত হয় । রাজ্য-গ্রহণ ঘটনার অত্র রাজ্যাধিপতিগণের এ কার্যও সম্প্রদায়বিশেষের ছদ্মবেশে গভীর মালিন্যের উৎপত্তি করে । যাহারা সংকার্যের বলে রাজ্যের উন্নতি সাধন করিয়াছিলেন, অথবা কোন উপায়ে অধিপতিগণের অনুগ্রহের অধিকারী হইয়াছিলেন, তাঁহাদিগকে পুরস্কারস্বরূপ বা সম্মতি ও অনুগ্রহের চিহ্নস্বরূপ নিষ্কর ভূমি দেওয়া হইত । এই প্রথা ভারতে ব্রিটিশ গবর্ণমেন্টের প্রথমাধিপত্য কালে ও তাহার পূর্বতন সময় হইতেই চলিয়া আসিতেছিল । লাখেরাজদারগণ পুরুষানুক্রমে আপনাদের এই স্বত্ব ভোগ করিয়া আসিতেছিলেন । লাখেরাজ ভূমির ইতিহাস অনেক ঘটনাবৈচিত্রে পরিপূর্ণ । উহা প্রকৃষ্ট পদ্ধতিক্রমে বর্ণনা করিতে গেলে এক খানি বড় গ্রন্থ হইয়া উঠে । ঐ সকল ভূসম্পত্তির কোন কোনটি নিয়মাবলি হইতে বিমুক্ত ছিল, কোন কোনটি অধিকারীর জীবিত কাল পর্যন্ত স্বত্বাঙ্গীভূত ছিল, কোন কোনটি পুরুষানুক্রমিক ও চিরস্থায়ী অধিকার বলিয়া পরিগণিত ছিল, কোন কোনটির উৎপত্তির সময় প্রাচীন, কোন কোনটির আধুনিক, কোন কোনটি আয়তনসারে ও বিধিপূর্বক অধিকৃত হইয়াছিল, কোন কোনটি বা প্রবঞ্চনা ও চাতুরীর বলে হস্তগত হইয়াছিল । ঐ সমস্ত ভূসম্পত্তির প্রকৃত স্বত্বের নির্ধারণ ও যথানিয়মে তৎসমূহের শ্রেণী-বিভাজন অবশ্যই সন্নীতি ও সহৃদয়তার অনুমোদিত । ইঙ্গরেজেরা যখন বাঙ্গালা, বিহার ও উড়িষ্যার দেওয়ানি গ্রহণ করেন, তাহার অব্যবহিত পূর্বে বঙ্গদেশে ঐরূপ বহুসংখ্যক নিষ্কর ভূমি লোকের অধিকারে থাকে । উত্তরপশ্চিমাঞ্চলেও ঐরূপ অনেক লাখেরাজ ভূমি ছিল । লাখেরাজদারগণ পুরুষানুক্রমে উহা ভোগ করিয়া আসিতেছিলেন । কালক্রমে কার্যদক্ষ, লিপি-পটু কর্মচারিগণের হস্তে ঐ সমস্ত লাখেরাজ ভূমির বন্দোবস্তের ভার

সমর্পিত হইল । এই কৰ্মচারিগণ লাখেরাজদারদিগকে আপনাদের স্বত্ব-প্রতিপাদনার্থ দলিলাদি উপস্থাপিত করিতে আদেশ করিলেন । কিন্তু লাখেরাজদারগণ বহুকাল ব্যাপিয়া পুরুষানুক্রমে ভূমি ভোগ করিয়া আসিতেছিলেন, উহার স্থায়িত্ব সম্বন্ধে তাঁহাদের অটল বিশ্বাস ছিল । এই পুরুষানুক্রমিক ভূমির সম্বন্ধে যে সমস্ত দলিলাদি ছিল, তৎসমুদয় বর্ষা অথবা কীট প্রভৃতির উপদ্রবে বিনষ্ট হইয়া গিয়াছিল । যে সম্পত্তি তাঁহারা কহুকাল অবিসংবাদিত রূপে ভোগ করিতেছিলেন, এক্ষণে সেই সম্পত্তির স্বত্বনির্ধারণ জন্ত আদেশ প্রচারিত হওয়াতে, সকলেই সাতিশয় শঙ্কিত হইয়া উঠিলেন । প্রয়োজনীয় দলিলাদি বিনষ্ট হইয়াছিল, প্রকৃত স্বত্বাধিকারিগণ এজন্ত অধিকতর শঙ্কাকুল ও কর্তব্য-বিমূঢ় হইলেন, ভয় ও আশঙ্কার রাজ্য সর্বত্র সমভাবে বিরাজ করিতে লাগিল । কৰ্মচারিগণ কার্য-নৈপুণ্য-গুণে প্রতি দিন শত শত বিষয়ের মীমাংসা করিতে লাগিলেন । কেহই বাঙ-নিষ্পত্তি করিবার সময় পাইল না, কেহই দয়া বা সৌজন্মের অধিকারী হইল না । সংহারকবিধি সকলকেই স্বীয় সংহার-মূর্তির কুক্ষিগত করিল । যাহারা প্রবঞ্চনা-বলে নিজের ভূমি অধিকার করিয়াছিল, তাহারা যেমন আয়ের দণ্ড ভোগকরিল, যাহারা পুরুষানুক্রমে বিধি-সম্মত নিজের ভূমির অধিকারী হইয়াছিল, তাহারাও তেমনই অন্তায়ের ফলভোগী হইল ।

কার্য-কুশল কৰ্মচারিগণের উত্তোলিত দণ্ড এইরূপে বঙ্গদেশের নিরীহ অধিবাসীদের হৃদয়ে আঘাত করিল । বাঙ্গালী চিরকাল রাজতন্ত্র, বাঙ্গালী চিরকাল বেদনা বোধ-হীন, এবং বাঙ্গালী চিরকাল আপনাতে আপনি লুক্কায়িত । তাহারা নীরবে এই দণ্ড গ্রহণ করিল, নীরবে সংহারক বিধির নিকটে অবনত-মস্তক হইল এবং নীরবে দীর্ঘ নিশ্বাস ত্যাগ করিয়া, পূর্ব-স্বত্বের সমুদয় চিরু দিলুপ্ত করিয়া ফেলিল । কিন্তু আর এক সম্প্রদায় বাঙ্গালী অপেক্ষা সাহসী ছিল । ইহার বেদনা-বোধ ছিল, একপ্রাণতা ছিল, এবং অনমনীয় তেজস্বিতা ছিল । অধিকন্তু এই সম্প্রদায়ই প্রধানতঃ ভারত-সাম্রাজ্যের রক্ষণে নিয়োজিত ছিল; উত্তরপশ্চিমাঞ্চলের এই যুদ্ধ-নিপুণ জাতির উপর প্রস্তাবিত সংহারিণী পদ্ধতি আপনার ক্ষমতা বিস্তার করিবে কি না, ইহাই এক্ষণে সকলের বিচার্য্য হইল । সংবাদ পত্রে এ বিষয়ে তুমুল আন্দোলন হইতে লাগিল । অনেকেই মনে করিলেন, নিজের ভূমির সম্বন্ধে ঐ কঠোর প্রণালী উত্তরপশ্চিমাঞ্চলে প্রবর্তিত হইলে, নিশ্চয়ই

কেবল ব্রিটিশ সেনা দ্বারা ভারত-সাম্রাজ্য রক্ষা করিতে হইবে। ঐ প্রণালীর এক জন অমুমোদনকারী বিপ্লবের আশঙ্কায় স্পষ্টাক্ষরে নির্দেশ করিলেন যে, উহার কার্য কখনও উত্তরপশ্চিমাঞ্চলে প্রসারিত হইবে না। কিন্তু এ বাক্য নিষ্ফল হইল। সংহারিণী নীতি কোথাও প্রতিহত হইল না। অভিনব রাজনৈতিক মন্ত্র-শক্তিতে উহা প্রবর্তিত-তেজ হইল, তৃষানলের শ্রায় ধীরে ধীরে আপনার গতি বিস্তার করিতে লাগিল, প্রতিকূলতায় অনমনীয় হইয়া উঠিল, শেষে প্রবল বেগে সমুদয় স্থানে ব্যাপিয়া পড়িল। কেহই উহার হস্ত হইতে পরিত্রাণ পাইল না, কেহই উহার অদমনীয় বেগ নিরুদ্ধ করিতে সমর্থ হইল না। লোকে মোগলশাসনে যাহা ভোগ করিয়া আসিয়াছিল, মরহাট্টার অভ্যুদয়ে যাহা স্বাধিকারে রাখিয়াছিল, এবং ব্রিটিশ কোম্পানির রাজ্যে যাহা অবিসংবাদিত রূপে অধিকার করিবে বলিয়া, মনে করিয়াছিল, ঐ কঠোর প্রণালী অবলীলায় তাহা নষ্ট করিয়া ফেলিল।

উত্তরপশ্চিম প্রদেশের নিষ্কর ভূমির শৃঙ্খলা করিবার ভার বন্দোবস্তসংক্রান্ত কর্মচারিদিগের উপর সমর্পিত হয়। ইহার অমুমোদন করিয়া নিষ্কর ভূমি সকল পূর্বের শ্রায় প্রকৃত স্বত্বাধিকারিদিগের ভোগদখলে রাখিতে পারিতেন, অথবা যাহারা অশ্রায়পূর্বক নিষ্কর ভূমির অধিকারী হইয়াছে, তাহাদের সেই ভূমির উপর যথোপযুক্ত কর স্থাপন করিতে পারিতেন। কিন্তু নিষ্কর ভূমি সকল প্রকৃত স্বত্বাধিকারিগণের অধীনে রাখা ঐ কর্মচারিগণের মধ্যে অতি অল্প লোকেরই ইচ্ছা ছিল। বোর্ড এবং তমাসনের শিষ্যদলের অধিকাংশই বন্দোবস্ত-কার্যে নিযুক্ত ছিলেন। মহত্তর সাম্য-প্রণালী প্রতিষ্ঠাপনই ইহাদের রাজনীতির এক মাত্র উদ্দেশ্য ছিল। ইহার নিষ্কর ভূমি সকল অপকারের উদ্দীপক বলিয়া মনে করিতে লাগিলেন, রেবিনিউ বোর্ড মহত্তর সাম্যপ্রণালীর কার্যে আহ্লাদ প্রকাশ করিয়া, এই কর্মচারি-দলের পরিশোধক হইতে সঙ্কুচিত হইলেন না। কিন্তু উদায়চেতা বরটসন অটল সাহস ও দৃঢ়তর অধ্যবসায়ের সহিত ঐ সংহারিণী নীতির বিরুদ্ধে দণ্ডায়মান হইলেন। তাঁহার চেষ্টায় পরিশেষে কর্মচারিগণের অবলম্বিত নীতি কোন কোন স্থানে প্রতিহত হইল বটে, কিন্তু অধিকাংশ স্থলেই নিষ্কর ভূমির অধিস্বামিগণ আপনাদের চিরগুণ স্বত্ব হইতে বিচ্যুত হইয়া পড়িলেন। বরটসন এই বন্দোবস্ত সংক্রান্ত

কর্মচারিগণের সম্বন্ধে লিখিয়াছেন, “যে সকল নিষ্কর ভূমি রেজেষ্টরি করা হয় নাই, বন্দোবস্ত-বিভাগের কর্মচারিগণ অনুসন্ধান ব্যতিরেকে তৎসমুদয়ই অধিকারিগণের স্বস্থচ্যুত করিয়াছেন। * * * একটি জেলায় অর্থাৎ ফর-কাবাদে সন্ধি-পত্রের নিয়ম ও সাক্ষাৎ সম্বন্ধে গবর্ণমেন্টের আদেশ, ফলোপ-ধায়ক হয় নাই। ওয়ারেন হেস্টিংস ও লর্ড লেকের শ্রায় ব্যক্তিগণ এ সম্বন্ধে যে রীতি প্রবর্তিত করিয়া গিয়াছিলেন, তাহার প্রতিও সম্পূর্ণরূপে অনাদর প্রদর্শন করা হয় *।” ঐ যথেষ্টাচার প্রণালী যে, রাজনৈতিক ক্ষেত্রে বিষময় ফল উৎপাদন করিয়াছিল, তাহা দূরদর্শী ব্যক্তিগণের সকলেই এক বাক্যে স্বীকার করিয়াছেন। উহার প্রবর্তনায় বঙ্গদেশের সাধারণ অবস্থা-পন্ন লোকেও আপনাদের জীবনোপায়ের সম্বল হইতে বঞ্চিত হইয়া পড়ে। জে পি ওয়াইজ নামক এক জন সম্ভ্রান্ত ইঙ্গরেজ স্পষ্টাক্ষরে নির্দেশ করিয়া-ছেন, “চট্টগ্রাম জেলায় সমস্ত অধিবাসীই উহাতে আপনাদের চিরন্তন অধি-কার হইতে বঞ্চিত হয়, এবং উহাতে এক রূপ অভ্যস্তরীণ বিপ্লব সজ্জা হইয়া উঠে +।” কর্মচারিগণ অবশ্য শ্রায়বুদ্ধির বশবর্তী হইয়া, এবং রাজ্যের ভবিষ্য মঙ্গলের আশায়, কার্যে প্রবৃত্ত হইয়াছিলেন, কিন্তু ঐ শ্রায়-বুদ্ধির ও রাজ্যের মঙ্গলাশা ভ্রয়োদর্শন অথবা অভিজ্ঞতার সহিত সম্মিলিত হয় নাই। অল্প জ্ঞানের বিপত্তি-পূর্ণ তরঙ্গাবেগে উহা অস্থির ও পরিশেষে নিম-জ্জিত হইয়াছিল।

কিন্তু বন্দোবস্ত বিভাগের কার্যকারকগণের সকলেই ঐ রূপ অনভিজ্ঞ বা অদূরদর্শী ছিলেন না, দুর্দমনীয় ভূমিকামুকতা সকলকেই ঐরূপ অভ্যস্ত-রীণ বিপ্লব উপস্থিত করিতে প্রবর্তিত করে নাই। ইহাদের মধ্যে কেহ কেহ দূরদর্শী ও উদার-চেতা ছিলেন, বিবেক-বুদ্ধি ও কর্তব্য-নিষ্ঠা ইহাদিগকে রাজ্যের ও প্রজা-সাধারণের মঙ্গলসাধনে নিয়োজিত রাখিত। আগ্রার বন্দোবস্ত-কর্মচারী মাসেল সাহেব এই শ্রেণীক দলের অন্ততম প্রধান ব্যক্তি ছিলেন। তিনি এক সময়ে আগ্রার বন্দোবস্ত-সংক্রান্ত বিজ্ঞাপনীতে লিখিয়াছিলেন, “যদি প্রজাসাধারণের সন্তুষ্টিগম্পাদন, এবং দণ্ডবিধি দ্বারা

* Minute of Mr. Robertson, Lieutenant-Governor of the North West Provinces, quoted in Despatch of the Court of Directors, August 13, 1851. Comp. Kaye, Sepoy War. Vol. I., p.173, and Ludlow, Thoughts &c., 250-251.

+ Second Report on Colonization and Settlement (India) 1858, pp. 44, 60.

প্রকৃষ্ট পদ্ধতি ক্রমে রাজ্যশাসন, আবশ্যক হয়, যদি গবর্ণমেন্টের কার্য-প্রণালী দ্বারা এই প্রদেশের দারিদ্র্য ও অজ্ঞানের দুর্দশাপন্ন ভূমিতে পতনোন্মুখ সমাজকে যথাসাধ্য রক্ষাকরা আবশ্যক হয়, যদি পূর্বপুরুষাগত ও আভিজাতিক গোঁরব, বিগত সময়ের সাহস, স্বদেশের জাতীয় চরিত্র, মানব মনের উচ্চতর ও মহান্ ভাবনিচয়স্বরূপ পূর্বস্বতির মনোহর দর্পণে প্রতিফলিত করা আবশ্যক হয়, তাহা হইলে, আগ্রার লেক্টেনেন্ট গবর্ণর বুধোয়ার রাজ-পরিবারকে স্বপদে প্রতিষ্ঠিত করিয়া যে উদারতা ও মহত্ব দেখাইয়াছেন, তাহা অপেক্ষা আর কোনও সংকার্যের অনুষ্ঠান, কর্তব্য বলিয়া, আমি অধিকতর আফ্লাদের সহিত, নির্দেশ করিতে পারি না, এবং যে উচ্চতর অনুভূতি আগ্রা-বিভাগের উন্নতি ও সৌভাগ্যের সহিত গ্রথিত আছে, ভারতবর্ষের এই বিভাগের অধিবাসীদিগের প্রতিনিধি হইয়া, আমি বিজ্ঞাপনীতে সেই অনুভূতি প্রকাশ না করিয়া, ক্ষান্ত থাকিতে পারিতেছি না।” দূরদর্শী রবটসন বুধোয়ারের মৃত রাজার দত্তক পুত্রকে পৈতৃক জাইগীর সমর্পণ করাতে, সমবেদনা-পর বন্দোবস্তকর্মচারী এইরূপ আফ্লাদ প্রকাশ করিয়াছিলেন, এবং সরল ও প্রীতিপ্রকুল হৃদয়ে এইরূপ সরল ও উদার বাক্য লিপিবদ্ধ করিয়া, অনুপম হিতৈষিতা ও দূরদর্শিতার পরিচয় দিয়াছিলেন।

বাস্তালা ও উত্তরপশ্চিমাঞ্চলে এইরূপ বিপ্লব উপস্থিত হয়, বাস্তালা ও উত্তরপশ্চিমাঞ্চলের রাজস্ব-ব্যবস্থা এইরূপ বিশৃঙ্খল হইয়া উঠে। এদিকে বোম্বাইয়ের ইমান কমিশন আর একটি বিপ্লবের সূত্রপাত করেন। ১৮১৭ খ্রী অব্দের সংগ্রামে পেশবা বাজীরাওর অধঃপতন হইলে, ব্রিটিশ গবর্ণমেন্ট অনেক ভূসম্পত্তির অধিকারী হন। এই বিজিত রাজ্যে অনেক নিষ্কর ভূমি “ইনাম” নামে প্রসিদ্ধ ছিল। লোকে ঐ সমস্ত ভূমি বিভিন্ন সময়ে বিবিধ উপায়ে অধিকার করিয়াছিল। ব্রিটিশ গবর্ণমেন্ট পেশবার রাজ্যে বিজয়-পতাকা উড্ডীন করিয়া, ঐ সমস্ত নিষ্কর ভূমির বন্দোবস্ত করিবার সঙ্কল্প করেন। ১৮১৯ অব্দে এলফিন্-ষ্টোন ঐ বিজিত রাজ্যের কমিশনর ছিলেন, তিনি সর্বপ্রথমে বন্দোবস্তের আবশ্যকতা প্রতিপাদন করেন। যদি গবর্ণমেন্ট সহসা অনুসন্ধান আরম্ভ করিতেন, সহসা প্রত্যেক সম্ভ্রম্যুক্ত নিষ্কর ভূমির বিলোপ সাধন করিতেন, সহসা পূর্বতন গবর্ণমেন্টের প্রদত্ত অধিকার উৎসন্ন করিতেন,

এবং সহসা পুরুষানুগত সমস্ত অধিকারের উচ্ছেদ করিতেন, তাহাহইলে লোকে অবশুই ভয়-বিহ্বল-চিত্তে গবর্ণমেন্টের দিকে চাহিয়া থাকিত, এবং অবশুই এই সমস্ত কার্যকে অত্যাচারের পরাকাষ্ঠা মনে করিত। কিন্তু গবর্ণমেন্ট এইরূপ হঠকারিতা দেখাইয়া, সকলকে আতঙ্কে বিহ্বল করিতে উৎসুক ছিলেন না। যাহাতে শ্রায়ের প্রতাপ অক্ষুণ্ণ থাকে, যাহাতে সমস্ত বিষয়ের সমান ভাবে সুবিচার হয়, ইহাই তাঁহাদের ইচ্ছা ছিল। কিন্তু এই ইচ্ছা পূর্ণ করিতে যাইয়া, গবর্ণমেন্টের কর্মচারিগণ বোম্বাই প্রেসিডেন্সিতে যেরূপ কঠোর প্রণালী অবলম্বন করেন, তাহাতে সাধারণের বিরাগ ও অসন্তোষ ক্রমে বদ্ধমূল হইয়া উঠে।

বৎসরের পর বৎসর অতিবাহিত হইতে লাগিল, আইনের পর আইন প্রণীত, প্রচারিত ও কার্যে পরিণত হইতে লাগিল, তথাপি বোম্বাই প্রেসিডেন্সির রাজস্ব-প্রণালী সংশোধিত ও সুব্যবস্থিত হইল না। ইহার পর ১৮৫২ অব্দে অল্প একটি আইন বিধিবদ্ধ হইল; এই আইন অনুসারে প্রধানতঃ যুদ্ধব্যবসায়ী কতিপয় ইঙ্গরেজ কর্মচারী শত সহস্র ভূমির বন্দোবস্ত করিবার ক্ষমতা পাইলেন। ইহার আইনের তত্ত্ব ছিলেন না, এবং দেওয়ানী কার্যেও পারদর্শী ছিলেন না। যে সকল ভূমির শুল্ক-বিধান জল্প এই আইন সংগঠিত হইল, তাহার অধিকাংশই সম্ভ্রান্ত বংশীয়দিগের অধিকৃত ছিল; ইহার কুলমর্থ্যদায় উন্নত থাকিতেন এবং পুরুষানুক্রমিক প্রাধিক্তে গৌরবান্বিত হইতেন। ইহাদের পূর্ব পুরুষগণ আপনাদের তরবারির উপর বিশ্বাস স্থাপন করিয়াছিলেন, এবং ঐ তরবারির বলেই আপনাদের অধিকার অক্ষুণ্ণ রাখিয়াছিলেন। দক্ষিণ মহারাষ্ট্র-প্রদেশে এইরূপ বহুসংখ্য জাইগীরদার ছিলেন। ইহার অধিকৃত ভূসম্পত্তির দলীলাদি যত্র পূর্বক রক্ষা করেন নাই। ইহার পুরুষানুক্রমে ঐ সমস্ত সম্পত্তি ভোগ করিয়া আসিতেছিলেন, ইহাদের ধারণায় ঐ চিরন্তন অধিকারই, দলীল অপেক্ষা, স্বত্ব-স্থাপনের প্রবলতর সমর্থক ছিল। শৌভাগ্য-ক্রমে কেহ সম্পত্তির বিধি-সিদ্ধতার সমর্থনোপযোগী কোন লিখিত দলীল পাইলেও সযত্নে তাহা রক্ষা করেন নাই। যে মহাসংগ্রামে পেশবার অধঃপতন হয়, যে সংগ্রামে শ্বেত পুরুষ মহারাষ্ট্রের সিংহাসনে অধিষ্ঠিত হয়, সেই সংগ্রামের কাহিনী ব্যতীত তাঁহাদের পূর্বস্বতিতে আর কিছুই প্রতিভাসিত হইত না। এইরূপে এক বৎসরের পর অল্প বৎসর আসিতে

লাগিল, এইরূপে বংশানুক্রমে এক ব্যক্তির পর আর এক ব্যক্তি অবাধে আপনার সম্পত্তি ভোগ করিতে লাগিলেন, সময়ের মহত্তর বিধি ইহাদের বিরুদ্ধে দণ্ডায়মান হইল না। কিন্তু শেষে ইনাম-কমিশন প্রতিষ্ঠিত হইল। ইহার কীর্তি, ইহার প্রভাপ, ইহার কার্য ক্ষমতা সমস্ত দক্ষিণ মহারাষ্ট্রে ব্যাপ্ত হইল। সময়ের মহত্তর বিধি ইহার প্রতিরোধে সমর্থ হইল না। অব্যবহিত বেগে ইহার কার্য আরম্ভ হইল, অপ্রতিহত তেজে ইহার প্রভাপ ছাইয়া পড়িল, এবং অনমনীয় বিক্রমে ইহার বিধময় ফল সকলকে চমকিত করিয়া তুলিল। কমিশনরগণের উপস্থিতি-সংবাদ এক পল্লী হইতে অল্প পল্লীতে প্রচারিত লইতে লাগিল, এক পল্লী হইতে অল্প পল্লীতে যাইয়া, কমিশনরগণ দলীলাদি চাহিতে লাগিলেন। অসময়ে, অতর্কিত ভাবে কমিশনরগণের আদেশ প্রচারিত হওয়াতে সকলেই স্তম্ভিত হইয়া রহিল। যাহাদের দলীল ছিল না, তাহাদের কেহই এই ভীষণ আক্রমণ হইতে পরিত্রাণ পাইল না, এবং কেহই আপনাদের পুরুষানুগত সম্পত্তি রক্ষা করিতে সমর্থ হইল না। প্রতি দিনই ভূসম্পত্তি বধ্য ভূমিতে নীত হইতে লাগিল, প্রতি দিনই উহা কমিশনরদিগের উস্তোলিত দণ্ডের প্রভাবে পূর্বাধিকারিগণের হস্ত হইতে বিচ্যুত হইতে লাগিল। “যাহারা অল্পকূল অদৃষ্ট-ক্রমে এই মারাত্মক বিপ্লব হইতে রক্ষা পাইল, তাহারাও কমিশনরদিগের মর্মান্বিত বিচারালয় হইতে সমাগত, অত্যাচারে বিনীর্ণদেহ, কার্য-সম্পাদনে অসমর্থ, ভিক্ষা-করণে লজ্জিত, এবং দারিদ্র্যে মর্মান্বিত সম্প্রদায়ের মধ্যে আসিয়া, তাহাদের অসহনীয় মনোবেদনা ও অদমনীয় মনঃকোভ দ্বিগুণ করিয়া তুলিল *।” এই কমিশনের কর্মচারিগণ লোকের গৃহে অনধিকার প্রবেশে সঙ্কচিত হইলেন না, এবং বলপূর্বক দলীলাদির অন্বেষণ করিতেও কুণ্ঠিত হইলেন না। অবাধে, অগ্নানভাবে ইহারা সাধারণের অন্তর্মহলে প্রবেশ করিয়া, অবিচারের পরাকাষ্ঠা দেখাইতে লাগিলেন †। কমিশনরগণ ক্ষুদ্র

* Memorial of G. B. Seton-Karr. Comp. Kaye, Sepoy War, Vol. I., p. 177.

† নিম্নে একপানি আবেদন-পত্রে যে অংশের অমুবাদ প্রদত্ত হইল; তাহাতে এই বিষয় পরিষ্কৃত হইবে। এই আবেদন-পত্র পূনা ও অপরাপর নগরের ইনামদার এবং অন্যান্য অধিবাসিগণ বোম্বাইর একটি সভায় সমর্পণ করে :—

“আমাদের বিশ্বাস, ইনাম কমিশনরগণের লোকেরা যে, তাহাদের কর্তৃপক্ষের প্রদত্ত ক্ষমতা অনুসারে অপরের বাসিতে বলপূর্বক অনধিকার-প্রবেশ করিয়া গৃহের তালা ভঙ্গ.

ও বৃহৎ পর্যট্রিশ হাজার ভূমির দলীল উপস্থিত করিতে আদেশ প্রচার করেন। ইহাদের কার্যকালের প্রথম পাঁচ বৎসরের মধ্যে তৎসমুদয়ের তিন পঞ্চমাংশ বাজেয়াপ্ত হইয়া যায় *।

১৮৫৮ অক্টবর ১লা সেপ্টেম্বর মাদ্রাজ প্রেসিডেন্সিতেও ইনাম কমিশনের কার্য আরম্ভ হয়। এদিকে এই কমিশনের কার্য-প্রণালীর দোষে বোম্বাই প্রেসিডেন্সির সকলেই মর্মান্বিত হইয়া পড়ে। এক জন সম্ভ্রান্ত ইন্ডিয়ান এ সম্বন্ধে লিখিয়াছেন, “দক্ষিণ মহারাষ্ট্র-প্রদেশে ইনাম কমিশন দ্বারা লোকে সাতিশয় বিরক্ত ও অসন্তুষ্ট হইয়া উঠিয়াছে। লোকের মন এজন্ত একরূপ উদ্ভিক্ত হইয়াছে যে, গবর্ণমেন্টের বিরুদ্ধে যখন যাহার অনুষ্ঠান আরম্ভ হয়, ইহার তাহারই অনুমোদন করিয়া থাকে †”। দক্ষিণপথের এক জন ভ্রমণকারী লাডুলো নামক ইন্ডিয়ানের এক জন সুবিজ্ঞ ব্যবহারাজীবকেও এই অসন্তোষের বিষয় জানাইয়াছেন ‡। বোম্বাইর ত্রায় মাদ্রাজ প্রেসিডেন্সিতেও এই কমিশনের বিষয় ফল লক্ষিত হইয়াছে। নর্টন সাহেব এ সম্বন্ধে কয়েকটি উদাহরণ প্রদর্শন করিয়াছেন; তন্মধ্যে দুইটিমাত্র এ স্থলে সংগৃহীত হইল; এতদেশীয় সৈন্ত-দলের দুই জন সুবাদার বিলোড়ের সিপাহিদিগের বিরক্তিকর ভাব দর্শনে সৈন্তাধ্যক্ষদিগকে সংবাদ দেয়, এজন্ত তাহারা পুরস্কার স্বরূপ ত্রিচিনপল্লী ও মাদুরা বিভাগে নিকর ভূমি প্রাপ্ত হয়। এক্ষণে ইনাম কমিশনদিগের সুবিচার-নৈপুণ্যে ইহাদের এক জনের সন্তানবর্গ এই ভূমি যথানিয়মে ভোগ করিবার ক্ষমতা পাইল, এবং অপরের বিধবা পত্নী যাবৎজীবন তাহার স্বামীর অধিকৃত ভূসম্পত্তির অধিকারিণী হইল। এই বিধবার মৃত্যুর পর গবর্ণমেন্ট উক্ত ভূমি পুনরধিকার করিলেন। বিশ্বস্ত সুবাদারের পুত্র পিতার পুরস্কার-লব্ধ

করে, সমস্ত দ্রব্য ধ্বংস করে এবং প্রয়োজনীয় দলীলাদি গ্রহণ করে, ইহা কখনই গবর্ণমেন্টের অভিপ্রেত নয়। * ইনাম কমিশনের লোকেরা বেকরপ অভ্যচার, অবিচার, ও দৌরাভ্য করিয়াছে, তাহা আমরা উল্লেখ করিতে লজ্জিত হইতেছি। তাহারা গৃহস্থানীর অনুপস্থিতে অবাধে বাটীতে প্রবিষ্ট হইয়াছে, সমুদয় তালা ভাঙ্গিয়াছে, এবং সমস্ত দলীল লইয়া গ্রহান করিয়াছে।” Ludlow, Thoughts on the Policy &c., p. 260, note.

* Kaye, Sepoy War, Vol. I., p. 177.

† Third Report on Colonization and settlement (India), p. 93. Comp. Ludlow, Thoughts on the Policy &c., p. 273.

‡ Thoughts on the Policy, &c., p. 273.

সম্পত্তি হইতে বিচ্যুত হইল; তাহার পিতার প্রত্নপরায়ণতা ও বিশ্বাস এক্ষণে সে মহাপাপ স্বরূপ বলিয়া গণনা করিতে লাগিল *।

রাজস্ববিভাগ যখন ভারতবর্ষের সমুদয় স্থলে সমুদয় ভূস্বামি-সম্প্রদায়ের হৃদয়ে এইরূপ গভীর মালিঞ্জের উৎপাদন করিতেছিল, তখন দেওয়ানী বিভাগও ঐ সৰ্ব্ব-সংহারক মহাসংগ্রামের প্রধান সহায় হইয়া কার্য-ক্ষেত্রে অগ্রসর হইতে থাকে। দেওয়ানী বিচারালয়ের কার্য নৈপুণ্যে প্রাচীন ভূম্যধিকারিগণের অনেকেই পুরুষানুগত ভূমির স্বত্ব হইতে বিচ্যুত হন। বন্দোবস্ত-সংক্রান্ত কৰ্মচারিগণের প্রবর্তিত সংহারিণী নীতি দেওয়ানী বিচার-পতিদিগের বিচারে অটল, অনমনীয় ও অজ্ঞেয় হইয়া উঠে। প্রতি বৎসর ভূসম্পত্তি-সমূহ দেওয়ানী বিচারালয়ের ডিক্রী অনুসারে বিক্রীত হইতে থাকে, প্রতি বৎসর ভূস্বামিগণ চিরন্তন স্বত্ব হইতে পরিলুপ্ত হইয়া, নিৰ্ব্বিদ, নিঃস-হায় ও নিঃসম্বল হইতে থাকেন। এইরূপে বিচারালয়ের বিচার-প্রণালী রাজস্ব-কার্যপদ্ধতির অনুমোদন করে, ভূমি সখকীয় বিপ্লবের অধিনায়ক হয়, ভারতের ভূম্যধিকারিগণের হৃদয়ে নিদারুণ তুর্নানল সঞ্চার করে, এবং ব্রিটিশাধিকারী ও ব্রিটিশ শাসনকে তীব্র হলাহলে কালীময় করিয়া তুলে। কৰ্মচারিগণের কার্য-প্রণালীর দোষে গবর্ণমেণ্টের প্রতি অসন্তোষ ও বিরাগ ক্রমেই সাধারণের হৃদয়ে বদ্ধমূল হইতে থাকে। সকলেই ব্রিটিশ নীতিকৈ অবজ্ঞার চক্ষে দেখিতে থাকে, সকলেই ব্রিটিশ শাসনে আপনাদিগকে অধঃ-পাতিত ও প্রনষ্ট-সৰ্ব্বস্ব মনে করিতে থাকে, এবং সকলেই কোন ভবিষ্য বিপ্লবের সময় আপনাদের বিনষ্ট ও বিচ্যুত স্বত্বের পুনরুদ্ধারে কৃতসঙ্কল্প হইয়া উঠে।

লর্ড ডালহৌসীর মস্তিষ্ক হইতে ঐ সংহারিণী প্রণালী প্রসৃত হয় নাই, ডালহৌসীর উদ্ভাবনী শক্তি-প্রভাবে ঐ অসাধারণ বিপ্লব সম্বটিত হইয়া, সাধারণের পূর্বস্বত্তি কলুষিত করে নাই। ডালহৌসী কেবল ঐ প্রণালীর অনুমোদন ও সম্প্রসারণ করিয়াছিলেন মাত্র। পূর্বাধিকৃত প্রদেশ-সমূহে ঐ প্রণালীর কার্য অনুমোদিত হইয়াছিল, এবং ডালহৌসী স্বয়ং যে সমস্ত প্রদেশ অধিকার করিয়াছিলেন, তৎসমুদয়ে উহা সম্প্রসারিত হইয়াছিল। পঞ্জাবে যে সমস্ত রাজনীতিজ্ঞের হস্তে রাজ্যশাসনের ভার সমর্পিত ছিল, তাঁহারা ঐ প্রণালীর কার্যে সাতিশয় বিরক্ত হইয়া উঠেন।

* Norton, Topics for Indian Statesmen, p. 169.

শ্যার হরবর্ট এডওয়ার্ডিস্‌ ঐ ভয়ঙ্কর রণস্থলে ভয়ঙ্করী নীতির আক্রমণে প্রাচীন সর্দার ও ভূস্বামীদিগকে পতিত হইতে দেখিয়া, বিরাগে ও ক্ষোভে পঞ্জাব পরিভাগ করেন । প্রশস্তমনা শ্যার-হেনরি লরেন্সও প্রতি সংগ্রামে নিরাশ্রয় ও নিঃসহায় ভূম্যধিকারিগণের পক্ষ সমর্থন করিতে যাইয়া, পরাজয়ে অবনত-মস্তক হন, এবং পরিশেষে সমস্ত পঞ্জাবে ঐ সাম্য প্রণালীর বিজয়-পতাকা উড্ডীন এবং সমস্ত সর্দারকে হতমান, হতসর্কস্ব ও হতাশ দেখিয়া, সে স্থল হইতে বিদায় গ্রহণ করেন * । অযোধ্যাতেও ঐ প্রণালী নিদাকরণ অভ্যন্তরীণ বিপ্লবের উৎপত্তি করে । এতদ্বারা এক দিকে অধিকারিগণ যেমন স্বত্ব-ভ্রষ্ট হইতে থাকেন, অপর দিকে স্তম্ভনই প্রদেয় লোকে কার্য-ক্ষেত্র হইতে সূদূরে অপসারিত হইয়া পড়েন । ইহাতে ব্রিটিশ গবর্ণমেন্ট ও ভারতবর্ষীয় রাজগণ-কর্তৃক নিষ্কর ভূমির বাজেয়াপ্তকরণের ফলের বিভিন্নতা স্পষ্ট বুঝা যাইবে । আমাদের রাজগণ কোন নিষ্কর ভূমি গ্রহণ করিলে ভূস্বামী তাদৃশ ছুরবস্থায় পতিত হন না । সমস্ত সম্রাস্ত পদ তাঁহার সম্মুখে অব্যাহত থাকে, ভারতবর্ষের গবর্ণমেন্টের শাসনাধীনে ভারতবর্ষের সমস্তানগণই রাজস্ব ও সেনা-সংক্রান্ত সমস্ত প্রধান প্রধান পদ প্রাপ্ত হইতে পারেন । কিন্তু ব্রিটিশ গবর্ণমেন্টের শাসনে উহার ব্যভিচার দৃষ্ট হয় । ব্রিটিশ গবর্ণমেন্টের অধীনে সমস্ত সম্রাস্ত পদ ব্রিটিশ জাতির নিমিত্তই উন্মুক্ত থাকে । বাহাদুর ভূসম্পত্তি ব্রিটিশ রাজের অধিকার-ভুক্ত হয়, তাঁহার অনেক সময়ে বৈষয়িক মধুচক্র হইতে মধুসংগ্রহে প্রতিবিদ্ধ হন । সুতরাং নিদাকরণ দৈগ্ধ আসিয়া তাঁহাদের মর্মে মর্মে তীব্র তুবানল সঞ্চারিত করে । তাঁহার ব্রিটিশ গবর্ণমেন্টের অধীনেও কোন কার্য লাভ করিতে পারেন না, এবং ব্রিটিশ গবর্ণমেন্ট হইতেও বিচ্ছিন্ন থাকিতে পারেন না । ইহাতে পূর্ক স্মৃতি তাঁহাদের শিরায় উগ্রতর বিষ প্রবাহিত করে, এবং বর্তমান অবস্থা শরীরের প্রতিকুলে তুষ্ণাগ্নির উৎপত্তি করিয়া তাঁহাদিগকে উন্মত্ত করিয়া তুলে । কঠোর রাজস্ব-প্রণালী এইরূপে বচসংখ্য সম্রাস্ত ব্যক্তিকে ব্রিটিশ গবর্ণমেন্টের প্রতি হতশ্রদ্ধ করে । ইহাদের মধ্যে কেবল রাজবংশীয়গণ অন্তর্নিবিষ্ট ছিলেন না, হিন্দুধর্মাবলম্বী অনেক পুরোহিত ও যুদ্ধ-ব্যবসায়ী অনেক সৈনিক প্রধানগণেও ইহাদের সংখ্যা পরিপূর্ণ হইয়াছিল । গবর্ণমেন্ট

* Raikes, Notes of the Revolt of the North-West Provinces of India. Comp. Kaye, Sepoy War, I., p. 179 note.

যে সমস্ত ব্রাহ্মণের অধিকৃত নিষ্কর ভূমি গ্রহণ করিয়াছিলেন, তাঁহারা সনাতন ধর্ম-লোপের ভয় দেখাইয়া, সাধারণের বিরাগ পরিবর্তিত ও সাধারণকে গবর্ণমেন্টের বিরুদ্ধে সমুত্তেজিত করিতে ক্রটি করেন নাই। এইরূপে অভিজ্ঞাত ও সাধারণ সম্প্রদায় ক্রমে ক্রমে ব্রিটিশ গবর্ণমেন্টের প্রতি বিরক্ত ও সমবেদনাশূন্য হইয়া উঠে, এবং এইরূপে তাহাদের অন্তনিগূঢ় ধ্বনয়মান বহ্নি ক্রমে ক্রমে প্রজ্জ্বলিত হইবার সূত্রপাত হইতে থাকে।

ইনাম-কমিশনের পর বিচার-কার্যের ছই এক স্থলেও গবর্ণমেন্টের সাতিশয় অব্যবস্থিততা প্রকাশ পায়। এস্থলে উহার একটি ১৮৫১ অঙ্গ। দৃষ্টান্ত প্রদর্শিত হইতেছে। জ্যোতিঃপ্রসাদ নামক এক জন ধনী ও বিচক্ষণ কণ্ট্রাক্টর আক্‌গানিস্তান ও গোবালিয়রের যুদ্ধের সময় সৈন্যদিগের আহারীয় দ্রব্যাদির সংগ্রহের ভার গ্রহণ করেন। যুদ্ধ শেষ হইলে গবর্ণমেন্টের নিকট জ্যোতিঃপ্রসাদের এক লক্ষ টাকা প্রাপ্য হয়। গবর্ণমেন্ট ঐ টাকা পরিশোধ করেন না। পঞ্জাবে যুদ্ধ উপস্থিত হইলে জ্যোতিঃপ্রসাদ আবার সৈন্যদিগের ব্যবহায্য দ্রব্যাদির সংগ্রহের ভার গ্রহণ করিবার জন্ত আহৃত হন। জ্যোতিঃপ্রসাদ প্রথমে এ বিষয়ে অসম্মতি প্রকাশ করেন, কিন্তু গবর্ণমেন্ট তাঁহাকে পূর্ন প্রাপ্য সমস্ত টাকা ও একটি “উপাধি” দিতে প্রতিশ্রুত হওয়াতে, তিনি পরিশেষে কমিশরিয়টের ভার গ্রহণ করেন। পঞ্জাবের যুদ্ধ শেষ হইয়া গেলে জ্যোতিঃপ্রসাদ টাকা কি উপাধি, কিছুই প্রাপ্ত হন না। এদিকে তাঁহার হিসাব বিশেষ কঠোরভাবে পরীক্ষা করিতে আরম্ভ করা হয়, এবং ঘটনাবিশেষে ভয় প্রদর্শিত হইতে থাকে। ইহার মধ্যে কমিশরিয়টের এক জন কন্সটারী জ্যোতিঃপ্রসাদের বিরুদ্ধে তর্কবল তর্করূপ, প্রবঞ্চনা প্রভৃতি কয়েকটি গুরুতর বিষয়ে অভিযোগ উপস্থিত করেন। গবর্ণমেন্ট এই অভিযোগ শুনিয়া জ্যোতিঃপ্রসাদের বিপক্ষ হন, তাঁহার সপ্ননাশাধনের সঙ্কল্প করেন, এবং মেজর রামসে নামক এক জন সৈনিক পুরুষকে উহার অহুসন্ধান করিতে আদেশ দেন। রামসে বিশিষ্ট মনোযোগ ও ধীরতার সহিত জ্যোতিঃপ্রসাদের হিসাব দেখিয়া সৈনিক-সমিতিতে জ্যোতিঃপ্রসাদকে নির্দোষ বলিয়া রিপোর্ট করেন। এই সমিতিতে তিন জন মেম্বর ছিলেন, ইহাদের ছই জন রামসের রিপোর্টে সন্তুষ্ট হন, কিন্তু তৃতীয় ব্যক্তি এবিষয় গবর্ণর-জেনেরলের সভায় পাঠাইবার প্রস্তাব করেন। প্রায় শত বৎসর পূর্বে নন্দুয়ারকে

লইয়া যে কাণ্ড উপস্থিত হইয়াছিল, এক্ষণে তাহার পুনরভিনয় আরম্ভ হইল। যিনি অসময়ে গবর্ণমেন্টকে সাহায্য করিয়াছিলেন, অকাতরে অর্থ ব্যয় করিয়া, গবর্ণমেন্টের সৈন্তগণের প্রয়োজনীয় দ্রব্যাদির সংস্থান করিয়াছিলেন, তিনিই এক্ষণে অপরাধী বলিয়া পরিগণিত হইলেন; দুঃসময়ে উপকার করা এক্ষণে মহাপাপ স্বরূপ স্থির হইল। এই পাপের প্রায়শ্চিত্ত বিধানার্থ অধমণ উত্তমর্ণকে প্রকাশ্য বিচারালয়ে দণ্ডায়মান করিতে স্থির-প্রতিজ্ঞ হইলেন। অবিলম্বে আগ্রাতে জ্যোতিঃপ্রসাদের বিরুদ্ধে অভিযোগ উপস্থিত হইল। লালু নামে এক জন ইঙ্গরেজ বারিষ্টার জ্যোতিঃপ্রসাদের পক্ষসমর্থনে নিয়োজিত হইলেন। এ দিকে জ্যোতিঃপ্রসাদ শঙ্কিত হইয়া, কলিকাতায় পলায়ন করিলেন, কিন্তু কলিকাতাতেও তাঁহার বিরুদ্ধে গ্যারেন্ট জারী হইল। জ্যোতিঃপ্রসাদ কলিকাতা হইতে আগ্রায় আনীত হইলেন। বার দিন বিচার কার্য চলিল, বার দিন, অধমণ গবর্ণমেন্টের নিয়োজিত জুরী ও বিচারপতির সমক্ষে, উত্তমর্ণ জ্যোতিঃপ্রসাদ বারিষ্টার লাঙ্গের সাহায্যে আপনার পক্ষ সমর্থন করিতে লাগিলেন। শেষে ধর্ম্মাধিকরণে ধর্ম্মের সম্মান রক্ষিত হইল, ব্রিটিশ নীতি ও ব্রিটিশ শাসনের নিকট ভারতের ব্রিটিশ গবর্ণমেন্ট মস্তক অবনত করিলেন। জ্যোতিঃপ্রসাদ প্রকাশ্য বিচারালয়ে নির্দোষ বলিয়া সপ্রমাণ হইলেন, এবং স্বদেশীয়গণের উৎসাহ-পূর্ণ আনন্দধ্বনির মধ্যে বিজয়-শ্রীতে শোভিত হইয়া, বিচার-গৃহ পরিত্যাগ করিলেন। কিঞ্চিদূর এক শতাব্দীতে ভারতের রাজনৈতিক অবস্থা অনেকাংশে পরিবর্তিত হয়। নন্দকুমার এক সময়ে গবর্ণরজেনেরলের বিরুদ্ধে অভিযোগ উপস্থিত করিতে ফাঁসী-কাষ্ঠে আশ্রয় বিসর্জন করেন, জ্যোতিঃপ্রসাদ অল্প সময়ে গবর্ণমেন্টের নিকট আপনার শ্রায়াহুগত প্রাপ্য বিষয় প্রার্থনা করিতে নির্দোষ বলিয়া বিমুক্ত হন। কিন্তু ভারতবর্ষীয় গবর্ণমেন্টের সম্বন্ধে এই দুই বিষয়ই সমান লজ্জাকর ও সমান অপবাদ-জনক *।

রাজস্ব-সংক্রান্ত বিপ্লবের সঙ্গে সঙ্গে সমাজের অভ্যন্তরীণ অবস্থাও অনেকাংশে পরিবর্তিত হইতে আরম্ভ হয়। ব্রাহ্মণ্যধর্ম্মের প্রাচুর্য্যব সময়ে হিন্দুগণ যেমন সংযত-চিত্ত যোগীর শ্রায় স্বপদ্ধতির অনুমোদিত ক্রিয়া-কলাপ ও স্বপদ্ধতির অনুমোদিত বিদ্যাশিক্ষায় নিরত ছিলেন, ঊনবিংশ শতাব্দীতে,

* British India its Races and its History, Vol. II., p. 182-183.

ব্রিটিশ গবর্ণমেন্টের শাসনাধীনে তাহার রূপান্তর হইতে থাকে । যে সংস্কার হিন্দুদিগের অস্থিতে অস্থিতে, শিরায় শিরায় প্রবেশিত হইয়াছিল, সে সংস্কার কোম্পানির মুন্সুকে দুরীভূত হইবার স্বত্রপাত হয় । ইঙ্গরেজী শিক্ষা, ইঙ্গরেজী অভ্যাস ও ইঙ্গরেজী রীতিতে সংস্কৃত হইয়া, এক অভিনব সম্প্রদায় পূর্ব-সংস্কৃত সমাজকে চমকিত করিয়া তুলেন । যে হিন্দু মহিলাগণ শীত-সঙ্কুচিত বৃদ্ধার শ্রায় আপনাতে আপনি লুক্কায়িত থাকিতেন, যাহারা গৃহ-প্রকোষ্ঠকেই পরিদৃশ্যমান জগতের শেষ সীমা জানিয়া, অসুখ্যাম্পঞ্জরূপ পবিত্র সংজ্ঞায় ভূষিত হইতেন, তাঁহাদের কঠাগণ এক্ষণে ইঙ্গরেজের স্থাপিত বিদ্যালয়ে ইঙ্গরেজী রীতিতে বিদ্যাশিক্ষায় প্রবৃত্ত হয়, যে হিন্দুগণ এক সময়ে তালপত্রে লিখিত পুস্তক পাঠ করিয়া, বিদ্যাভ্যাস করিতেন, তাঁহাদের সম্ভানগণ এক্ষণে সুদৃশ্য ইঙ্গরেজী পুস্তক হস্তে লইয়া, ইঙ্গরেজী ভাষায় জলদ-গম্ভীর স্বরে বক্তৃতা করিতে আরম্ভ করেন । এইরূপে সমাজের ঐক-স্তরের উপর অন্তস্তর সংগঠিত হইতে আরম্ভ হয়, এইরূপে উনবিংশ শতাব্দীর ব্রিটিশ রাজের প্রসাদে সমাজ ক্রমেই উন্নতির দিকে অগ্রসর হইতে থাকে । সুশিক্ষিত সম্প্রদায় এই উন্নতির স্রোত নিরুদ্ধ করিতে চেষ্টা না করিয়া, খাশাখাশা তাহা সম্প্রসারিত করিতে চেষ্টা করিতে থাকেন ।

কিন্তু এই পরিবর্তনে সাধারণের হৃদয় ব্রিটিশ গবর্ণমেন্টের বিরুদ্ধে উত্তে-জিত হয় নাই, সাধারণে এই পরিবর্তনে কোন অবশ্যাস্তাবী বিপ্লবের আশঙ্কা করে নাই । পূর্বতন হিন্দু অবহেলিত ও পূর্বতন হিন্দুরীতি পাদদলিত হইলেও, গৌড়া হিন্দুগণ প্রশস্ত চিত্তে গম্ভীরভাবে আপনাদের ধর্ম-সম্বন্ধ নিত্য কর্ণের অনুষ্ঠানে ক্রটি করেন নাই । সামাজিক রীতির পরিবর্তন ব্যতীত অল্প একটি বিষয়ের পরিবর্তনে সাধারণের হৃদয় সহজেই সংকুচিত হইতে পারে । জাতি বিচার-প্রণালী সমুদয় স্থলে সমুদয় হিন্দুগণের মধ্যেই সমাদৃত হইয়া থাকে । সকলেই এই জাতি-বিচারের প্রতি তীক্ষ্ণ দৃষ্টি রাখে, সকলেই আপনাদের জাতি রক্ষা করিতে দৃঢ়-প্রতিজ্ঞ হইয়া থাকে । কেহই এই সনাতন রীতি হইতে বিচ্যুত হয় না, এবং কেহই প্রাণ থাকিতে এই সনাতন ধর্মে জলাঞ্জলি দিতে সম্মত হয় না । জাতি গেলে কিরূপ ছরব-স্থায় পড়িতে হয়, কিরূপ সামাজিক সংস্রবশূন্য হইয়া থাকিতে হয়, কিরূপ ঈশ্বরপরিত্যক্ত, ধর্ম-ভ্রষ্ট, পিতা মাতা ও আত্মীয় স্বজন-বিচ্যুত হইয়া, অন্তিমে অনন্ত পদপ্রাপ্তির আশা পরিত্যাগ পূর্বক, ভীষণ অন্ধকারময়

নরকে ডুরিতে হয়, তাহা বালক, বৃদ্ধ, বনিতা সকলের হৃদয়েই গাঢ়রূপে অঙ্কিত থাকে। এই জাতি-বিচারের প্রতি ইঙ্গরেজদিগের বিশেষ দৃষ্টি ছিল, তাহারা প্রজাদের জাতিরক্ষা করিতে কাতর হইতেন না, এবং প্রজাদিগকেও তাহাদের আপন আপন জাতির অনুমোদিত কার্য্যামুষ্ঠানে প্রতিবেধ করিতেন না। কিন্তু এইরূপ তীক্ষ্ণ দৃষ্টি ও এইরূপ প্রগাঢ় যত্ন থাকিলেও, সময় বিশেষে এক একটি কার্য্য-প্রণালী প্রবর্তিত হইয়া, সাধারণকে চমকিত ও সাধারণের হৃদয় আন্দোলিত করিয়া তুলে।

কারারুদ্ধ ব্যক্তিগণ সাক্ষাৎ-সম্বন্ধে গবর্ণমেন্টের অধীনেই প্রতিপালিত ও সংরক্ষিত হইয়া থাকে। ইহাদের ভরণপোষণ প্রভৃতি সমুদয় কার্য্যই গবর্ণমেন্ট নিৰ্ব্বাহ করিয়া থাকেন। পূৰ্ব্বতন নিয়মামুসারে কয়েদিগণ খাদ্য দ্রব্যের জন্ত গবর্ণমেন্ট হইতে নির্দিষ্ট হারে টাকা পাইত। তাহারা ঐ টাকায় আপনাদের ইচ্ছামত খাদ্য সামগ্রী সংগ্রহ ও আপনাদের রীতি-অনুসারে রন্ধন করিয়া ভোজন করিত। কিন্তু ঐ নিয়ম শেষে কারাশৃঙ্খলার সাতিশয় প্রতিরোধক হইয়া উঠিল। কয়েদিগণ খাদ্য-সামগ্রী সংগ্রহ বা রন্ধনজন্ত অনেক বিলম্ব করিয়া, নির্দিষ্ট কার্য্য হইতে বিরত থাকিত। এজন্য তাহারা আহারের জন্ত ভিন্ন ভিন্ন দলে বিভক্ত হইল। নির্দিষ্ট সময়ে এই বিভিন্ন দলের আহার সামগ্রী প্রস্তুত করিবার জন্ত নির্দিষ্ট পাচক-গণ নিযুক্ত হইল। তাহাদের জন্ত খাদ্য সামগ্রী রন্ধন করা হয়, পাচকগণ তাহাদের অপেক্ষা নিম্ন জাতির হইলে তাহাদের যে জাতি নষ্ট হয়, তাহা সকলেই বৃদ্ধিতে প্লারেন। কারণে পাচকগণ নিযুক্ত হওয়ার উচ্চ জাতির কয়েদিগণ সাতিশয় বিরক্ত হইল, সকলেই ব্রিটিশ কোম্পানির উদারতা ও ব্যবস্থিতারসম্বন্ধে ভ্রান্ত হইয়া উঠিল, সকলেই মনে করিতে লাগিল, গবর্ণমেন্ট এবার জাতি নষ্ট করিয়া, সাধারণকে খ্রীষ্টীয় ধর্মে দীক্ষিত করিবার সঙ্কল্প করিয়াছেন। এই সংস্কার কারাগৃহ ব্যতীত সমস্ত নগরে সংক্রান্ত হইল। নগর-বাসিগণ ঐ আকস্মিক পরিবর্তন দেখিয়া, বিস্ময়ে ও বিরাগে হত-বুদ্ধি হইতে লাগিল। ব্রাহ্মণ পাচকগণ কারাগৃহে রন্ধনকার্য্যে নিযুক্ত ছিল কি না, এস্থলে তদ্বিষয়ের উল্লেখের কোনও আবশ্যিকতা নাই, অদ্য ব্রাহ্মণ পাচকগণ কারাগৃহের জাতিভেদ প্রণালীর সামঞ্জস্য রক্ষা করিতে পারে, কল্যা হরত নিম্ন শ্রেণীর লোকে তাহাদের স্থান পরিগ্রহ করিয়া, উচ্চ শ্রেণীর কয়েদাদিগকে অনশনে রাখিতে পারে। সাধারণে এইরূপ আশঙ্ক

করিয়াই, স্ত্রিয়মান হইল, এবং ফিরিঙ্গী গবর্ণমেন্টের অধীনে জাতি নষ্ট হইবে ভাবিয়া, কর্তব্য-বিমূঢ় হইয়া পড়িল ।

এই বিরাগ ও আশঙ্কা কেবল হিন্দু ধর্ম-মূলক, এবং এইরূপ সন্ত্রাসও কেবল হিন্দুজাতি হইতে উদ্ভূত । হিন্দু ব্যতিরিক্ত অত্র কোন জাতির সহিত কারাগৃহস্থিত পাচকালয়ের তাদৃশ সংস্রব ছিল না । মুসলমানগণ এবিষয়ে সমবেদনা দেখায় নাই । কিন্তু বিষয়াস্তরের পরিবর্তনে তাহাদিগের মর্মে আঘাত লাগিয়াছিল । তাহারা দেখিল, তাহাদের চিরমাত্র পারশ্র ভাষা ধর্মাধিকরণ হইতে অপসারিত হইল, তাহারা দেখিল, তাহাদের চিরমাত্র মৌলবীগণ ইঙ্গরেজ বিচারপতি ও ইঙ্গরেজ অধ্যাপকের সমক্ষে অধঃকৃত হইয়া উঠিল, ইহার পর তাহারা দেখিল, তাহাদের কলিকাতাস্থিত মাদ্রাসার সমুদয় ধর্ম-সম্বন্ধীয় দান রহিত হইয়া গেল । যে আচার, যে রীতি, যে ভাষা, এক শতাব্দীর অধিক কাল অক্ষুণ্ণ প্রতাপের সহিত ভারতবর্ষের সর্বত্র আধিপত্য প্রসারিত করিয়াছিল, তাহা এক্ষণে প্রতিকূল তেজের প্রভাবে সঙ্কুচিত হইয়া, পরিবর্তনশীল সময়ের আক্রমণে বিধ্বস্তপ্রায় হইতে লাগিল, এবং কোন অভাবনীয় দৈব শক্তির বলে সর্বসংহারক বালের কুক্ষিশায়ী হইবার উপক্রম হইল । ইঙ্গরেজী ভাষা, ইঙ্গরেজী শিক্ষা, ও ইঙ্গরেজী ব্যবহার-পদ্ধতি মহান্দীয় অধ্যাপকদিগকে শঙ্কিত করিয়া তুলিল । অপর দিকে নিষ্কর ভূমি বাজেয়াপ্ত হওয়াতে তাহাদের বিরাগ শতগুণে বর্দ্ধিত হইল । ইহার পর কারাগৃহে পাচক নিয়োজন দেখিয়া, তাহাদের হৃদয় ক্রমেই আশঙ্কার তবঙ্গে আন্দোলিত হইতে লাগিল । এইরূপে মুসলমানগণও ক্ষোভে রোষে বিবাগে ব্রিটিশ গবর্ণমেন্টের বিরুদ্ধে উত্তেজিত হইয়া উঠিল * ।

লর্ড ডালহৌসীর কার্য-ক্ষেত্রে উপস্থিত হইবার কতিপয় বৎসব পূর্বে কারালয়সমূহে পূর্বোক্ত প্রণালী প্রবর্তিত হয় । হঠাৎ উহার প্রবর্তনায়

* বিখ্যাত প্রমাণ অনুসারে জানিতে পারা যায় যে, হিন্দুদের অগ্রে মুসলমানগণই গবর্ণমেন্টের বিরুদ্ধে সাতিশয় বিরক্ত হইয়া উঠে । বাদ্রালার পুলিশ স্পারিটেণ্ডেন্ট ডাম্পিয়ান সাহেব একদা লিখিয়াছিলেন, “আমি অনুসন্ধান করিয়া বুঝিতে পারিয়াছি, মুসলমানগণ ভূমি বাজেয়াপ্ত-করণ, নূতন শিক্ষাপ্রণালীস্থাপন ও ইঙ্গরেজী শিক্ষার উৎসাহদানে বিশেষ অসন্তুষ্ট হইয়াছে । ইহার পর কারাগৃহে পাচকনিয়োজন-প্রণালী প্রবর্তিত হওয়াতে গবর্ণমেন্টের প্রতি তাহাদের বিরাগ অধিকতর বর্দ্ধিত হইয়া উঠিয়াছে ।” Kaye's Sepoy War, Vol. I, p. 197, note.

যে, বিপ্লব ঘটবার সম্ভাবনা আছে, তাহা কর্তৃপক্ষ স্পষ্ট বুদ্ধিতে পারিষ্কার-
 ছিলেন, সুতরাং তাহারা তখন বিশিষ্ট ধীরভাবে ও সমীচীনতাসহকারে
 উহা কার্যে পরিণত করিতে চেষ্টা পাইয়াছিলেন * । কিন্তু বৎসরের
 পর বৎসর অতীত হইতে লাগিল ; প্রতি বৎসর, এক প্রণালীর পর অল্প
 প্রণালী স্থান পরিগ্রহ করিতে লাগিল, এই পরিবর্তনে পূর্ব আশঙ্কা দূরে
 অপসারিত হইল, এবং পূর্ব-সাবধানতা শিথিল হইয়া পড়িল । সুতরাং
 অনেক স্থানের কারারুদ্ধ ব্যক্তিগণ এই প্রণালীর বিরুদ্ধে সমুখিত হইতে
 কুন্তিত হইল না, তাহারা অপরিমিত সাহস ও অবিচলিত দৃঢ় প্রতিজ্ঞার
 সহিত ঐ অভিনব প্রণালী প্রতিরোধ করিতে দণ্ডায়মান হইল । শাহা-
 বাদ, সারণ, বিহার ও পাটনা লোমহর্ষণ নিদারুণ কাণ্ডের রঙ্গভূমি হইল,
 শেষে দূরদর্শিতা-বলে হিন্দুত্বের নিদর্শন-ক্ষেত্র, হিন্দু অধ্যাপকদিগের পূজনীয়
 স্থান, পুণ্যভূমি বাবাণসী ঐ ভীষণ কাণ্ড হইতে রক্ষা পাইল ।

পাচকনিয়োজনে, কারাগৃহের কয়েদী ও পার্শ্ববর্তী অধিবাসীদের মধ্যে
 যেমন অসন্তোষ ও বিরাগের উৎপত্তি হয়, কয়েদীদের লোটা পরিবর্তনেও
 তেমনি অসন্তোষ ও বিরাগ চারি দিকে সম্প্রসারিত হইয়া উঠে । লোটা
 হিন্দু ও মুসলমানদিগের প্রয়োজনীয় কার্য সম্পাদনের একটি প্রধান উপ-
 করণ । কিন্তু স্থলবিশেষে এই লোটা উগ্রপ্রকৃতি ব্যক্তির হস্তে অস্ত্রের
 কার্যও করিয়া থাকে † । এজন্য কোন কোন স্থানে কয়েদীদিগকে
 লোটোর পরিবর্তে মুগ্ধ পাত্র দেওয়া হয় । খাদ্য সামগ্রী প্রস্তুত করিবার
 জন্য পাচক নিযুক্ত হওয়াতে, যে কাণ্ড সম্বন্ধিত হইয়াছিল, লোটোর পরি-
 বর্তে মুগ্ধ পাত্র প্রদত্ত হওয়াতে তাহারই পুনরভিনয় আরম্ভ হইল । মুগ্ধ
 পাত্র প্রদান ও তাহার ব্যবহারাদেশ, কয়েদীদের মস্তিষ্কে অন্তরূপ জ্ঞান ও

* উত্তর পশ্চিমাঞ্চলের লেফটেনেন্ট গবর্নর ১৮৪১ অব্দের জুলাই মাসে প্রস্তাবিত বিষয়ে
 এই বিজ্ঞাপনী প্রচার করেন, “যদি এই প্রণালী প্রকৃতপ্রভাবে সাধারণের ধর্ম সঞ্চায়
 মতের হানিকর হয়, এবং কিয়দিনের জন্যও কারারুদ্ধ ব্যক্তিগণের ভবিষ্যৎ আশার মূলো-
 ছেদ করে, তাহা হইলে গবর্নমেন্ট ইহা প্রবর্তিত করিবেন না ” । Kaye, Sepoy War
 Vol. I., p. 198, note.

† কে সাহেব এ বিষয়ের একটি দৃষ্টান্ত দিয়াছেন । তিনি কহেন, ১৮৩৪ অব্দের এপ্রেল
 মাসে আলিপুর জেলের এক জন কয়েদী, তথাকার মাজিষ্ট্রেট রিচার্ডসন সাহেবকে পিতলের
 লোটোর আঘাতে হত্যা করিয়াছিল । Kaye, Sepoy War, Vol. I., p. 198-199, note.

অশ্রু রূপ ধারণার সঞ্চার করিল। তাহারা ভাবিল, গবর্ণমেন্ট সকলের হস্তে মৃদভাণ্ড দিয়া, সকলের জাতি নষ্ট করিবার ইচ্ছা করিয়াছেন; ধর্ম সংহারের অপরবিধ চেষ্টা অল্পুষ্টিত হইতেছে, অপরবিধ চেষ্টা জাতিগত, অল্পুশাসন-গত ও সম্প্রদায়গত পার্থক্য দূর করিতে অগ্রসর হইতেছে। স্ত্রুতরাং কয়েদিগণ স্থির থাকিতে পারিল না, সাধারণেও ঐ আকস্মিক পরিবর্তনে সন্তুষ্ট হইল না। আরাতে কারারুদ্ধগণ এরূপ উদ্ভিক্ত হইয়া উঠিল যে, কারারুদ্ধগণ কর্তৃপক্ষের আদেশে তাহাদের প্রতি গুলি করিতে কাতর হইল না। মজঃফরপুরেও সাধারণের বিরাগ এইরূপ বর্দ্ধিত হয়। তত্রত্য মাজিষ্ট্রেট এই বিপ্লবকে, কয়েদীদের সাহায্যকারী ও কয়েদীদের প্রতি সমবেদনা-বিশিষ্ট অধিবাসীদের একটি ভয়ঙ্কর ও আকস্মিক অভ্যুত্থান বলিয়া, নির্দেশ করিতে সঙ্কুচিত হন নাই। নগরের প্রায় সমস্ত অধিবাসী ও বহুসংখ্য কৃষিজীবীতে এই সমুখিত দল পরিপুষ্ট হইয়াছিল। ইহারা স্পষ্টাক্ষরে নির্দেশ করিয়াছিল যে, লোটা প্রত্যর্পিত না হইলে তাহারা কখনই শাস্তভাবে স্ব স্ব গৃহে প্রতিগমন করিবে না। পাছে শাস্তি-রক্ষক সৈন্যগণের আসিবার পূর্বে কয়েদিগণ পলায়ন পূর্বক ধনাগার লুণ্ঠন ও নগরে উপদ্রব আরম্ভ করে, এই আশঙ্কায় কর্তৃপক্ষ এরূপ সন্ত্রস্ত হইয়াছিলেন যে, তাহারা কয়েদীদিগকে লোটা প্রত্যর্পণ করিয়া, সাধারণকে শান্ত ও স্থির করাই যুক্তিসিদ্ধ বোধ করিয়াছিলেন।

কোনরূপ আকস্মিক পরিবর্তনে লোকের মন যে, বিরক্ত ও নানা প্রকার আশঙ্কার তরঙ্গ-আন্দোলিত হইয়া উঠে, তাহা এই কারাগৃহের বিপ্লবে স্পষ্ট প্রতীত হইবে। ভারতবর্ষীয়গণ নিত্যসন্তুষ্ট হইলেও ধর্মনাশ ও জাতি-নাশের আশঙ্কা তাহাদিগকে উন্নত করিয়া তুলে, এবং গভীর আতঙ্ক তীব্র তুষানলের ছায় অলক্ষ্য ভাবে গতি প্রসারিত করিয়া, তাহাদিগকে নিরস্তর দগ্ধ করিতে থাকে। কিন্তু কয়েদিগণ ব্রিটিশ রাজকে অতুল সাগরে তুর্ভাইতে সমর্থ নহে; ভারতের মানচিত্র হইতে লোহিত রেখা অপসারিত করিতে, শূঙ্খলাবদ্ধ ব্যক্তিগণের কোনও ক্ষমতা নাই। তাহারা কেবল ক্ষণস্থায়ী আতঙ্কে উদ্ভিক্ত হইয়া, ক্ষণস্থায়ী বিকার প্রদর্শন করে মাত্র। কারাগৃহের প্রণালী-পরিবর্তন কেবল পরীক্ষা-স্থল। গবর্ণ-মেন্ট এই পরীক্ষা-স্থলে পরিশেষে অকৃতকার্য হন নাই। কয়েদিগণ অপেক্ষা আর এক রণকুশল সম্প্রদায় আছে। তাহারা শৌর্য্যে বীরেন্দ্র-সমাজের

বরদীয়া, এবং সাহসে ও তেজস্বিতায় ভারতে অতুলনীয় । এই সাহসী ও তেজস্বী সশ্রদ্ধায় ব্রিটিশ গবর্ণমেন্টের অব্যবস্থিততা বা বিদ্যাভিম্বানী মৌলবী ও পণ্ডিতদিগের প্ররোচনায় উত্তেজিত হইয়া, ভীষণ-অনল-ক্রীড়া প্রদর্শনে অসমর্থ নহে ।



তৃতীয় অধ্যায় ।

ডালহৌসীর রাজ্য-শাসনের অল্পবৃদ্ধি—অযোধ্যা—উহার পূর্বতন সৌভাগ্য—মুসলমান-দিগের আধিপত্য—নবাবের সহিত ব্রিটিশ গবর্নমেন্টের সন্ধি—নবাব মুজাউদৌলা—আসফ-উদৌলা—মির্জা আলি—সামত আলি—গাজিউদ্দীন হায়দর—নসিরুদ্দীন হায়দর—মহম্মদ আলি শাহ—১৮৩৭ অব্দের সন্ধি—আমজুদ আলি শাহ—ওয়াজিদ আলি শাহ—অযোধ্যার শাসনসংক্রান্ত অব্যবহৃততার অপবাদ—কর্ণেল স্টিমানের রিপোর্ট—আউট্রাম—অযোধ্যা অধিকার ।

পঞ্জাব, নাগপুর ঝাঁসী প্রভৃতি অধিকার করিয়াও লর্ড ডালহৌসীর হুন্সিবার লোভ পরিতৃপ্ত হইল না। অচিরাত্ আর একটি ১৮৫৬ খ্রিঃ অব্দ। সমৃদ্ধ রাজ্যের প্রতি তাঁহার দৃষ্টি নিপতিত হইল। পঞ্জাবের শ্রায় রাজবিদ্রোহিতার কারণ দেখাইয়া ডালহৌসী ঐ রাজ্য ব্রিটিশ কোম্পানির অধীন করিলেন না। যেহেতু, উহার অধিপতি চিরকাল ব্রিটিশ গবর্নমেন্টের বন্ধু ছিলেন, চিরকাল আপনায় ধন, জন, সমস্তই ব্রিটিশ গবর্নমেন্টের উপকারার্থ উৎসর্গ করিয়া আসিয়াছিলেন। নাগপুর, ঝাঁসীর শ্রায় উত্তরাধিকারীর অভাব দেখাইয়াও উহা গ্রহণ করা হইল না। যেহেতু উহার অধিপতির দায়াদগণ বর্তমান ছিলেন। এস্থলে কেবল ইচ্ছা হইয়াছিল বলিয়াই ডালহৌসী ঐ রাজ্যে ব্রিটিশপতাকা উড্ডীন করেন। কবিগুরু বাঙ্গীকির মধুর গীতিতে যাহা গ্রথিত রহিয়াছে, রঘুকুল-তিলক রামের বিলাসভূসি বলিয়া অদ্যাপি যাহা লোকের রসনার রসনার নৃত্য করিয়া বেড়াইতেছে, মেকলের লেখনী বিস্তৃতি ও সমৃদ্ধিতে যাহাকে ইউরোপপ্রসিদ্ধ ফরাসী ও জর্মান সাম্রাজ্যের সহিত এক শ্রেণীতে নিবেশিত করিয়াছে, একমাত্র ডালহৌসীর ইচ্ছাবলে সেই অতিবিস্তৃত অতিসমৃদ্ধ রাজ্য ব্রিটিশ কোম্পানির হস্তগত হয়।

এই সমৃদ্ধ রাজ্যের নাম অযোধ্যা। ইহার উত্তর এবং উত্তরপূর্ব সীমা নেপাল, পূর্ব সীমা ব্রিটিশাধিকৃত গোরক্ষপুর, দক্ষিণপূর্ব সীমা এলাহাবাদ, দক্ষিণ পশ্চিম সীমা দোয়াব, ব্রিটিশাধিকৃত ফতেহপুর, কাণপুর ও ফরুকাবাদ, এবং উত্তর পশ্চিম সীমা শাহজহাঁপুর। ইহার পরিমাণ ২৩,৯২৩ বর্গমাইল ;

অধিবাসীর সংখ্যা ৫০,০০,০০০ * । অতি প্রাচীন কাল হইতে অযোধ্যা সুখসমৃদ্ধিতে পরিপূর্ণ, অতি প্রাচীন কাল হইতে অযোধ্যার বৈভবরাশি ইতিহাসে পরিকীর্ণিত । সহস্রের পর সহস্র বৎসর অতীত হইয়াছে, অযোধ্যার ঐ প্রাকৃতিক সৌন্দর্য্য ও সমৃদ্ধিমাধুর্য্যের কিছুমাত্র ব্যত্যয় হয় নাই । কালে অযোধ্যা ভারতবর্ষের সর্বপ্রকার স্বাভাবিক দৃশ্যের বিকাশভূমি, এবং সর্বপ্রকার সমৃদ্ধির বিলাসক্ষেত্র । অনেকেই সন্দেহ করিবেন, অযোধ্যার এইরূপ সম্পত্তি-বাহুলাই উহার সর্বনাশের প্রধান কারণ । দরায়ুস-ছহিতা যদি সুন্দরী না হইত, তাহা হইলে সেকন্দর শাহের ধর্ম্ম ইতিহাসের যোগ্য হইত না ; অযোধ্যা যদি সুসমৃদ্ধ, সুব্যবস্থিত ও সর্বাংশে সৌভাগ্য-লক্ষ্মীর প্রিয় নিকেতন না হইত, তাহা হইলে লর্ড ডালহৌসী তৎপ্রতি আকৃষ্ট হইতেন না ।

তিরোরীক্ষেত্রে পৃথীরাজের পতন হইলে মহম্মদ গোরীর অহুগত দাস কোতবউদ্দীন ইবক্ দিল্লীর সিংহাসনে আরোহিত ১৭৬৪-১৮৫৬ খ্রীঃ অব্দ । হন । কোতবউদ্দীন অযোধ্যা জয় করিয়া উহা স্বীয় রাজ্যের সহিত সংযোজিত করেন । তদবধি অযোধ্যা দিল্লীর রাজ্যের অন্তর্ভুক্ত হয় । আকবরের সমকালে ইহা পঞ্চদশ সুবার অন্ততম সুবার মনো পরিগণিত ছিল । এইরূপে অযোধ্যা বহুকাল দিল্লীর অর্দ্ধচন্দ্রশোভিত পতাকার আশ্রয়ে থাকিয়া পরে অতর্কিত কারণে নবাগত ব্রিটিশ কোম্পানির সহিত রাজনৈতিক সূত্রে সম্বন্ধ হইয়া উঠে । যখন মীরকাসিম ইঙ্গরেজদিগের সহিত যুদ্ধে পরাজিত হইয়া অযোধ্যার নবাব সুলতানউদ্দৌলার আশ্রয় গ্রহণ করেন, তখন হইতেই ব্রিটিশ কোম্পানির সহিত অযোধ্যার সম্বন্ধের সূত্রপাত হয় । সুলতানউদ্দৌলা মীরকাসিমকে আশ্রয় দিয়া ইঙ্গরেজদিগের বিরুদ্ধে সৈন্য সংগ্রহ করেন । ১৭৬৪ অব্দের ২৩এ অক্টোবর বক্সারের যুদ্ধ হয় । যুদ্ধে পরাজিত হইয়া সুলতানউদ্দৌলা ইঙ্গরেজদিগের সহিত সন্ধি স্থাপন করেন । ১৭৬৫ অব্দের ১৬ই আগষ্ট ঐ সন্ধি হয় । সন্ধির নিয়মানুসারে শত্রুর আক্রমণ হইতে মিত্ররাজ্য রক্ষা করিতে ব্রিটিশ কোম্পানির যে সমস্ত সৈন্য অযোধ্যায় থাকিকে, নবাব সেই সমস্ত সৈন্যের ব্যয় আপনার ধনাগার হইতে দিতে প্রতিশ্রুত হন । এতদ্ব্যতীত যুদ্ধের ব্যয় স্বরূপ তিনি কোম্পানিকে ৫০ লক্ষ টাকা দিতে

স্বীকার করেন *। এই অবধি স্ফুজাউদৌলা ইঙ্গরেজদিগের প্রতি বিলক্ষণ সম্ভাব দেখাইয়া আসিতেছিলেন, কখনও তিনি তাঁহাদে বিরুদ্ধে ষড়যন্ত্র করিয়া পবিত্র মিত্রতা কলঙ্কিত করেন নাই †। কিন্তু সন্দেহ ব্রিটিশ শাসনের প্রধান মন্ত্রী, সন্দেহ ব্রিটিশ ইণ্ডিয়ানব্রিটিশজাতির স্বার্থসিদ্ধির অদ্বিতীয় সাধন। সন্ধির তিন বৎসর পরে জনরব হইল, স্ফুজাউদৌলা কোম্পানির বিরুদ্ধে ষড়যন্ত্র ও সৈন্ত সংগ্রহ করিতেছেন। এই জনরব গবর্ণমেন্টের মনে গভীর সন্দেহ উৎপাদন করিল, সন্দেহের অনুরোধে ব্রিটিশ গবর্ণমেন্ট নবাবের নিকট কৈফিয়ৎ তলব করিলেন, নবাব উপযুক্ত কারণ দেখাইয়া কৈফিয়ৎ দিলেন, এদিকে ভারতবর্ষীয় মন্ত্রিসভার সদস্তগণও অনুসন্ধান করিয়া জনরবের অমূলকত্ব প্রতিপন্ন করিলেন। তথাপি ব্রিটিশ কোম্পানি প্রসন্ন হইলেন না। সন্দেহের মন্ত্রণায় নবাবের সহিত আবার নিয়ম হইল। এই নিয়মানুসারে নবাব

* Aitchison, Treaties. Vol. II., p. 76-79.

† অযোধ্যার নবাব ব্রিটিশ গবর্ণমেন্টের বিরুদ্ধে স্ফুজাউদৌলা হইলেন, তবিশ্ব প্রদর্শনার্থ একটি ঘটনার উল্লেখ করা যাইতেছে। ঘটনাটি এই:—১৭৭২ অব্দে প্রসিদ্ধ হায়দরআলী অযোধ্যার নবাব স্ফুজাউদৌলার নিকট এক খানি পত্র প্রেরণ করেন। পত্রে লিখিত ছিল:—“আপনি এত সৈন্ত ও এত অধিক যুদ্ধোপকরণের অধিস্বামী হইয়াও যে খ্রীষ্টীয় ধর্মাবলম্বী অধীনতা স্বীকার করিতেছেন, তাহাতে আমি নিতান্ত বিস্মিত হইয়াছি। আমার দিকে আমি যেমন তাহাদিগকে পর্য্যদন্ত করিতেছি, আপনি ও সেই রূপ আপনার দিকে তাহাদিগকে আক্রমণ করেন, ইহাই আমার মতে উচিত। এইরূপ সমবেতচেষ্টায় তাহাদের বিনাশসাধনই কর্তব্য।” এই পত্রের উত্তরে নবাব লিখেন:—“যাহারা সাংসারিক কার্যে সর্বপ্রকার স্বার্থ পরিত্যাগ করিয়াছে, ধর্ম্মাঙ্কতা কেবল তাহাদের জন্ম, কিন্তু আমার স্থায় যাহাদের উপর বহুসংখ্য বিভিন্ন ধর্ম্মাবলম্বীর সম্বন্ধে কর্তব্যভার নিহিত আছে, তাহাদের পক্ষে উহা ইহা নিতান্ত দোষাবহ। যে সমস্ত সৈন্য ও যুদ্ধোপকরণ আমার অধিকারে আছে বলিয়া আপনি জানিয়াছেন, তাহা কেবল ইষ্টইণ্ডিয়া কোম্পানির শত্রুর বিরুদ্ধে কার্য্য করিবার জন্যই রক্ষিয়াছে। অন্য প্রকারে আমি উহার ব্যবহার করিব, আপনি এক্রম মনে ভাবিবেন না।” ঘটনাক্রমে এই উভয় পত্রই লক্ষ্যে ব্রিটিশ রেসিডেন্টের হস্তগত হয়। রেসিডেন্ট পত্রের মর্ম্ম অবগত হইয়া উহা গবর্ণরজেনেরলের নিকটে পাঠাইতে নবাবের নিকটে অনুমতি গ্রহণ করেন। গবর্ণরজেনেরলও পত্রের মর্ম্ম অবগত হইয়া নবাবের সৌহার্দজনিত সরলতা ও বিশ্বস্ততা জানিতে পারিবেন, এই জন্যই রেসিডেন্ট এইরূপ অনুমতি গ্রহণ করিয়াছিলেন। M. M. Musseehooddeen. Comp. Dacottee in Excelsis, p. 12-13, note.

৩৫ সহস্রের অধিক সৈন্ত রাখিতে পারিবেন না বলিয়া প্রতিশ্রুত হইলেন* । এই ক্রপে-ব্রিটিশ সিংহের সহিত মৈত্রীবন্ধন করিয়া নবাবের অদৃষ্ট-চক্র পরি-বর্তিত হইতে আরম্ভ হইল । কোম্পানি দেখিলেন, অযোধ্যা একটি সুসমৃদ্ধ ও বহুজনাকীর্ণ প্রদেশ, নবাবও সর্ব্বাংশে সৌভাগ্য-লক্ষ্মীর বরপুত্র । ইহাঁর বহুসংখ্য প্রজা আছে, সমৃদ্ধ নগর আছে, অভেদ্য দুর্গ আছে, উহার উপরেও অপরিমিত অর্থ আছে । ঈদৃশ সৌভাগ্য-সম্পদ তাঁহাদের সহনীয় হইল না । কোম্পানির প্রধান কর্মচারী রাজনীতির অপূর্ব্ব কৌশলে, বন্ধু-বন্ধনের অমোঘ সাধন সন্ধির ব্যপদেশে ঐ সকল গ্রহণ করিতে প্রবৃত্ত হইলেন ।

বিলাতের ডিরেক্টরগণ চুণার দুর্গ আপনাদের অধিকারে আনিতে ভারতবর্ষীয় গবর্ণমেন্টকে পত্র লিখেন এবং ভবিষ্যতে এবিষয়ে যে কোন সুবিধা উপস্থিত হয়, তাহা পরিত্যাগ করিতে নিষেধ করেন † । ১৭৬৫ অব্দের সন্ধির ষষ্ঠ ধারা অনুসারে নবাবের নিকটে ব্রিটিশ কোম্পানির যে ৫০ লক্ষ টাকা প্রাপ্য হয়, তাহার প্রতিভূস্বরূপ এই দুর্গ কোম্পানির হস্তে থাকে ; কিন্তু ঐ টাকা পরিশোধ হইলে, উক্ত দুর্গ কোম্পানির হস্তচ্যুত হইয়া পুনর্বার নবাবের অধিকারে যায় । এক্ষণে কোম্পানি পুনর্বার ঐ দুর্গ আপনাদের হস্তে আনিতে কৃত-সঙ্কল্প হইলেন । সঙ্কল্পসিদ্ধির উপায় নির্দেশ করিতে অধিক বিলম্ব হইল না । এই সময়ে বর্গীয় হান্সামার সমগ্র ভারত-বর্ষ ব্যতিব্যস্ত হইয়া উঠিয়াছিল । মহারাষ্ট্রীয় সৈন্ত রোহিলখণ্ড হইতে অযোধ্যায় উৎপাত আরম্ভ করে । অযোধ্যা রোহিলখণ্ডের উত্তরপশ্চিমে

* এই ৩৫ হাজার সৈন্য নিম্নলিখিত শ্রেণীতে বিভক্ত হয় :—

অশারোহী	১০,০০০
পদাতিক	১০,০০০
নজিব	৫,০০০
কামান-রক্ষক	৫০০
অনিয়মিত সৈন্ত	২,৫০০

এই ৩৫ হাজার সৈন্তের মধ্যে কেহই ইউরোপীয় সৈন্যের ন্যায় হস্তশিক্ষিত ও হস্তশিক্ষিত হইতে পারিবে না । Aitchison's, Treaties. Vol. II., p. 64.

† Return to House of Lords of Treaties and Engagements between East India Company and Native Powers in Asia &c., p. 55, Comp. Dacoitee in Excelsis, p. 14.

অবস্থিত । উহার ঠিক বিপরীত দিকে অর্থাৎ অযোধ্যার দক্ষিণপূর্বে নবাবের অধিকৃত এলাহাবাদ ও চূণার দুর্গ আছে । কোম্পানি এই সুযোগে আপনাদের সঙ্কল্পসিদ্ধির অভিপ্রায়ে কুটরাজনীতির কৌশল-জাল বিস্তার করিলেন । ১৭৬৫ অব্দের সন্ধি অনুসারে নবাবের অধিকৃত কোরা ও এলাহাবাদ দিল্লীর সম্রাট শাহ আলমকে প্রদত্ত হয় । সম্রাট ১৭৭১ অব্দে উহা আবার নবাবের হস্তে সমর্পণ করেন । এক্ষণে বর্গীর হাঙ্গামা হইতে পরম মিত্র নবাবের রাজ্য নিরাপদ করিবার জন্ত ১৭৭২ অব্দের ২০ এ মার্চ আবার দুইটি সন্ধি হইল । ঐ সন্ধিষয়ের নিয়মানুসারে কোম্পানি চূণার দুর্গ গ্রহণ করিলেন এবং এলাহাবাদ আপাততঃ আপনাদের হাতে রাখিলেন * । সুতরাং কোম্পানির সহিত বন্ধুতা রক্ষা করিতে গিয়া সুলজা-উর্দৌলা দুইবার আপনার সম্পত্তি হারাইলেন ; প্রথম বার তাঁহার সৈন্যসংখ্যা ন্যূন হইয়া ৩৫ হাজার হইল, দ্বিতীয় বার তাঁহার এলাহাবাদ ও চূণার দুর্গ দুইটি অধিকারচ্যুত হইল † ।

এই সময়ে ব্রিটিশ কোম্পানির রাজস্বের অবস্থা নিতান্ত মন্দ ছিল, টাকার অভাবে হেষ্টিংসের গবর্নমেন্ট যে রূপ বিব্রত হইয়া পড়িয়াছিলেন, লর্ড মেকলেরলেখনী হইতে তাহার একটি সুন্দর চিত্র প্রতিফলিত হইয়াছে । এইস্থলে উহার আভাস প্রদর্শিত হইলঃ—“শান্তভাবে রাজ্য শাসন কর, আর অধিক অর্থ প্রেরণ কর, পার্শ্ববর্তী রাজাদিগের প্রতি সুলক্ষণে শান্তি বিতরণ কর, শান্ত ব্যবহার প্রদর্শন কর, আর অধিক অর্থ প্রেরণ কর । হেষ্টিংস বিলাতের কর্তৃপক্ষ হইতে যে সমস্ত উপদেশ প্রাপ্ত হইতেন, যথার্থতঃ বলিতে গেলে ইহাই তাহার সংক্ষিপ্ত সারাংশ । যদি এই উপদেশ সরল ভাবে অভিব্যক্ত হয়, তাহা হইলে ইহাই বলিতে হইবে, “প্রজাদের পিতৃস্থানীয় ও দৌরাত্ম্যকারী হও, শ্রায়ের মর্ধ্যাদা-রক্ষক ও অশ্রায়ের পরিপোষক হও এবং শাস্তস্বভাব ও হিংসাপরায়ণ হও । প্রাচীন সময়ের খ্রীষ্ট-ধর্ম্মাবলম্বিগণ যে ভাবে বিধর্ম্মদিগের সহিত ব্যবহার করিতেন, বিলাতের ডিরেক্টরগণ ও ভারতবর্ষের প্রতি ঠিক সেই ভাব প্রদর্শন করিতেছিলেন । উক্ত ধর্ম্ম সম্প্রদায় বধ্য জীবকে হত্যাকারীর হস্তে সমর্পণ করিয়া এই অল্পরোধ করিতেন যে, তাহার প্রতি

* Dacoitee in Excolsis, p. 16. Comp. A collection of Treaties. Vol. II., pp. 65, 82-84.

† Ibid, p. 15.

যেন বিশিষ্ট দয়া ও সৌজন্য প্রদর্শিত হয়। যে স্থলে ডিরেক্টরদিগের আদেশ কার্যে পরিণত হইবে, তাহার পনরহাজার মাইল অন্তরে থাকিয়া যে, তাঁহারা আপনাদের আদেশের বিষয় অসঙ্গতি বৃদ্ধিতে পারিতেন না, ইহা সম্ভব হইতে পারে। কিন্তু তাঁহাদের কলিকাতায় প্রতিনিধি এই অসঙ্গতি বিলক্ষণ বৃদ্ধিতে পারিয়াছিলেন। যখন রাজকোষ শূন্য, সৈন্তগণ অপ্রাপ্তভূতি, আপনাদের বেতন বাকী, সৈন্তসংখ্যা স্বল্প, রাজকীয় প্রজাগণ প্রতিদিন পলায়িত, তখনও তাঁহাকে আর দশ লক্ষ টাকা ইঙ্গলণ্ডে পাঠাইতে বলা হয়। হেষ্টিংস দেখিলেন যে, তাঁহাদের নিমিত্ত অর্থসংগ্রহের অগ্রতর উপায় অগ্রাহ্য করা তাঁহাব নিতান্ত আবশ্যক হইয়া উঠিয়াছে। এজন্য তিনি তাঁহাদের কোন না কোন কথা অগ্রাহ্য করিতে বাধ্য হইয়া ভাবিলেন যে, তাঁহাদের নীতিবাক্য উপেক্ষা ও তাঁহাদিগের নিমিত্ত অর্থ আয়োজন করাই শ্রেয়স্কর হইতেছে *।

নবাব সূজাউদ্দৌলার অপরিসীম অর্থ ছিল, স্মরণ্য হেষ্টিংস তাহার দিকে হস্ত প্রসারণ করিতে সম্মুচিত হইলেন না। ১৭৭২ অব্দে ২০এ মার্চ ব্রিটিশ কোম্পানি যে কোরা ও এলাহাবাদ গ্রহণ করেন, ১৭৭৩ অব্দের ৭ই সেপ্টেম্বরের সন্ধি অনুসারে ৫০ লক্ষ টাকা লইয়া সেই কোরা ও এলাহাবাদই নবাব সূজাউদ্দৌলার নিকট বিক্রয় করা হইল; অধিকন্তু ষে সমস্ত ব্রিটিশ সৈন্ত নবাবের সাহায্যার্থে যাইবে, তাহার প্রত্যেক দলের নিমিত্ত নবাব প্রতিমাসে ২,১০,০০০ সিকা টাকা দিতে প্রতিশ্রুত হইলেন †। এই রূপে গবর্নমেন্টের মিত্রতার প্রসাদে সূজাউদ্দৌলা ও তাঁহার উত্তরাধিকারী-বর্গের সম্পত্তি নষ্ট হইতে লাগিল। একদিকে তাঁহাদের অর্থ কোম্পানির ধনাগার পূর্ণ করিতে আরম্ভ করিল; অপরদিকে তাঁহাদের অধিকৃত স্থান ব্রিটিশ পতাকায় শোভিত ও ব্রিটিশ অধিকারস্থচক লোহিত বর্ণে রঞ্জিত হইয়া ভারত-মানচিত্রে স্থান পরিগ্রহ করিতে লাগিল।

১৭৭৫ অব্দে নবাব সূজাউদ্দৌলার মৃত্যু হয়। তৎপুত্র আসফউদ্দৌলা অযোধ্যার সিংহাসনে আরোহণ করেন। ব্রিটিশ গবর্নমেন্টের সহিত সন্ধি-স্বত্রে আবদ্ধ হইয়া নবাব সূজাউদ্দৌলা ব্রিটিশ সৈন্তের ব্যয়পোষণার্থে যে অর্থ দিতে প্রতিশ্রুত হইয়াছিলেন, আসফউদ্দৌলার সহিত সন্ধিতে তাহার

* Macaulay, Essay on Warren Hastings.

† Aitchison, Treaties. Vol. II., pp. 65, 85-86.

অফ্ফের সহিত আরও পঞ্চাশ হাজার সংযোজিত হয়। এতদ্ব্যতীত খুবর্ণমেন্ট সন্ধির নিয়মানুসারে বারাণসী, জৌনপুর ও গাজীপুর গ্রহণ করেন *।

১৭৯৭ খ্রীঅঙ্কে নবাব আসফউদ্দৌলা লোকাণ্ডুরিত হইলে তাঁহার পুত্র মির্জা আলি † উজীরের পদগ্রহণ করেন। কিন্তু ব্রিটিশ কোম্পানি দেখিলেন, মির্জা আলি অপেক্ষা আসফউদ্দৌলার ভ্রাতা সাদত আলির সহিত অর্থ-গ্রহণ-সম্বন্ধ অপেক্ষাকৃত ঘনিষ্ঠ হইতে পারে, সুতরাং মির্জা আলির পরিবর্তে সাদত আলিকেই সিংহাসনে আরোহিত করিবার সঙ্কল্প হইল। স্যার জন শোর এই সঙ্কল্পসিদ্ধির মানসে বারাণসীতে গমন করিলেন, এবং আসফউদ্দৌলার সহিত মির্জা আলির পুত্রস্ব-সম্বন্ধ নন্দেহ-জনক বলিয়া মির্জা আলিকে পদচ্যুত ও সাদত আলিকে তৎপদে আরোহিত করিবার প্রস্তাব করিলেন। সুতরাং সাদত আলি ব্রিটিশ কোম্পানির অনুগ্রহে ১৭৯৮ অঙ্কের ২১এ জানুয়ারি লক্ষ্যের সিংহাসনে অধিরূঢ় হইলেন ‡। সিংহাসনে অধিরোহণের এক মাস পরে (২১এ ফেব্রুয়ারি) স্যার জন শোর তাঁহার সহিত যে সন্ধি করেন, তাহাতে নবাব কোম্পানিকে ব্রিটিশ সৈন্তের ব্যয়পোষণার্থ বার্ষিক ৭৬ লক্ষ টাকা দিতে প্রতিশ্রুত হন। ঐ সৈন্তের সংখ্যা ন্যূনকল্পে ১০ হাজার করা হয় §।

এই রূপ সন্ধির পর সন্ধিতে অবোধ্যার এক একটি অঙ্গ স্থলিত হইয়া ব্রিটিশ রাজ্যে সংযোজিত হইতে লাগিল। পূর্বে উক্ত হইয়াছে, কোম্পানি বাহাদুর ১৭৭২ অঙ্কের ২০এ মার্চের সন্ধি অনুসারে চুণার ছুগ গ্রহণ করেন। ইহার পর ১৭৭৫ অঙ্কের ২১ এ মে বারাণসী, গাজীপুর, কাণপুর বিভাগ, ১৭৮৭ অর্থে কতেগড়ের ছুগ, ১৭৯৮ অঙ্কে এলাহাবাদ তাহাদের অধিকারে আইসে; অবোধ্যায় কোম্পানির যে সৈন্ত রক্ষিত হয়, তাহার ব্যয়পোষণার্থ ৫৫ লক্ষ টাকা দিবার নিয়ম ছিল, স্যার জন শোরের সমকালে উহা আবার বন্ধিত হইয়া ৭৬ লক্ষে পরিণত হয় ¶। এত করিয়াও ব্রিটিশ কোম্পানির আশানুরূপ মিত্রতা দৃঢ়তর হইল না। নবাবকে অধিকতর বন্ধুত্বপাশে আবদ্ধ করিবার জন্য রঙ্গ-ক্ষেত্রে আর এক জন মহাপুরুষের আবির্ভাব হইল।

* Archeson, Treaties, p. 65. comp. Dacoitee in Excelsis, p. 21.

† হানি উজীর আলি নামেও প্রসিদ্ধ। Dacoitee in Excelsis, p. 35.

‡ Ibid, p. 35.

§ A Collection of Treaties. Vol. II., pp. 66, 115, 116.

¶ Dacoitee in Excelsis, pp. 39, 37.

লর্ড মর্নিংটন (মার্কুইস অব ওয়েলেস্লি) ১৭৯৮ অব্দের মে মাসে কলিকাতার পদার্পণ করেন। অক্টোবর মাসে অযোধ্যার প্রতি তাঁহার দৃষ্টি পতিত হয়। অযোধ্যায় ইহার পূর্বে যে সৈন্ত ছিল, তাহাব্যতীত আরও দুই দল সৈন্ত রাখিবার প্রস্তাব করিয়া ওয়েলেস্লি এই লিখিয়া পাঠান যে, হয় নবাব সাদত আলি বার্ষিক বৃত্তি গ্রহণ করিয়া রাজত্ব পরিত্যাগ করুন, নচেৎ রাজ্যের অর্দ্ধাংশ এই সৈন্তদিগের ব্যয় নির্বাহার্থে ছাড়িয়া দিন। ওয়েলেস্লি কেবল মুখসর্বস্ব ছিলেন না। তিনি নিজেই কথা সর্বাংশে রক্ষা করিয়া চলিতেন। স্মরণ্যে তাঁহার কথা অবিলম্বে সফল হইয়া উঠিল। ১৮০১ অব্দের ১৪ই নবেম্বর আর একটি সন্ধি হইল। সন্ধির নিয়ম অনুসারে, নবাব সাদত আলি অতিরিক্ত সৈন্তদলের ব্যয়নির্বাহার্থে ১,৩৫,২৬,৪৭৪, টাকা আয়ের ভূসম্পত্তি অর্থাৎ সমগ্র রাজ্যের অর্দ্ধাংশেরও অধিক মিজবর কোম্পানির হস্তে সমর্পণ করিলেন *।

ব্রিটিশ কোম্পানির দুর্নিবার লোভ প্রযুক্ত এইরূপে নবাব সাদত আলির সম্পত্তি ন্যূন ও ক্ষমতা সঙ্কুচিত হইল। সৌভাগ্যের বিষয় এই যে, তাঁহাকে আর দীর্ঘকাল মনঃক্লম্ব হইয়া থাকিতে হয় নাই। মৃত্যু ১৮১৪ অব্দের ১১ই জুলাই তাঁহাকে ইহলোক হইতে অপসারিত করিয়া বন্ধুশ্রেষ্ঠ কোম্পানির হস্ত হইতে রক্ষা করে। সাদত আলির পর তাঁহার সর্বজ্যেষ্ঠ পুত্র গাজীউদ্দীন হায়দর অযোধ্যার শাসন-দণ্ড গ্রহণ করেন। ব্রিটিশ কোম্পানির অর্থলোভ সাদত আলির সহিত তিরোহিত হইল না। গাজীউদ্দীন হায়দরও সময়ে সময়ে অর্থ-সাহায্য করিয়া মিজতার গৌরব রক্ষা করিতে লাগিলেন। ১৮১৪ অব্দে যখন নেপালে যুদ্ধ উপস্থিত হয়, তখন নবাব কাণপুরে লর্ড মন্টগোমেরি সহিত সাক্ষাৎ করিয়া এক কোটি টাকা দেন। কিন্তু গবর্নরজেনরল ঐ টাকা একবারে গ্রহণ না করিয়া নবাবের নিকট হইতে বার্ষিক ৬ টাকা হার ১০৮,৫০,০০০ টাকা ঋণ গ্রহণ করেন †। পরে নেপালের যুদ্ধের ব্যয় অধিক হইয়া পড়াতে আবার নবাবের নিকট হইতে আর এক কোটি টাকা গ্রহণ করা হয় ‡। ১৮১৯ অব্দে ব্রিটিশ গবর্নরমেন্ট গাজীউদ্দীনকে পুরুষানুক্রমে “রাজা” (king) উপাধি দান করেন।

* Collection of Treaties, Vol. II. p. 67. Comp. Calcutta Review, No VI. Vol., III. p. 379. Dacoitee in Excelsis, p. 48.

† A Collection of Treaties. Vol. II., p. 69.

‡ Ibid. p. 69.

গাজিউদ্দীনের পর নসিরুদ্দীন হায়দর অবোধ্যার শাসনদণ্ড গ্রহণ করেন । ১৮৩৭ অঙ্গে তাঁহার মৃত্যু হইলে তদীয় পিতৃত্ব্য মহম্মদ আলি শাহ নবাব হন । লর্ড অকলাণ্ড ইহার সহিত ১৮৩৭ অঙ্গের ১৮ই সেপ্টেম্বর সন্ধি করেন । ঐ সন্ধির ৭ম ও ৮ম ধারায় নিরূপিত হয় যে, নবাবের রাজ্যে অত্যাচার ও বিশৃঙ্খলা হইলে ব্রিটিশ গবর্ণমেন্ট উপযুক্ত কর্মচারী দ্বারা অবোধ্যা স্বেব্যবস্থিত ও সুশৃঙ্খল করিয়া, পরে উহা নবাবের হস্তে সমর্পণ করিবেন * ।

লর্ড ডালহৌসী পঞ্জাব প্রভৃতি ব্রিটিশ কোম্পানির অধীন করিয়া যখন অবোধ্যার দিকে দৃষ্টিপাত করেন, তখন ঐ সন্ধির প্রতি তাঁহার নিতান্ত অনাস্থা দৃষ্ট হয় । তিনি স্পষ্ট বলিতে লাগিলেন, ১৮৩৭ অঙ্গের সন্ধি বিলাতের ডিরেক্টর সভা কর্তৃক অনুমোদিত হয় নাই ; সুতরাং উহা অনুমোদিত ও বিধিনির্দিষ্ট সন্ধির অন্তর্গত নহে † । যঁাহারা ছলগ্রাহী হইয়া পরস্পর-গ্রহণে উদ্যত হইয়া থাকেন, তাঁহাদের ছিদ্রাঘেষণের অসুবিধা হয় না । লর্ড ডালহৌসী অবোধ্যা ব্রিটিশ-রাজ্যভুক্ত করিতেই কৃতসঙ্কল্প হইয়াছিলেন, সুতরাং ১৮৩৭ অঙ্গের সন্ধি অননুমোদিত বলিয়া উক্ত রাজ্য কিছু কালের জন্য গ্রহণের দায় হইতে নিষ্কৃতি পাইতে চেষ্টা করেন । কিন্তু জায়ের সন্ধিপাত-বর্জিত বিচারের নিকট তাঁহার এই চেষ্টা ফলবতী হয় নাই । তিনি যে সন্ধি অননুমোদিত বলিয়া কৌশল-জাল বিস্তার করিয়া ছিলেন, সেই সন্ধি ১৮ই সেপ্টেম্বর যথানিয়মে অনুমোদিত হইয়া অস্ত্রান্ত্র বিধিনির্দিষ্ট সন্ধির সহিত এক শ্রেণীতে নিবেশিত হইয়াছিল ‡ । ব্যবহার শাস্ত্রবিশারদ টেবরাস্ টুইসও বিশেষ বিবেচনা করিয়া ঐ সন্ধিকে অনুমোদিত ও অবশ্যপ্রতিপাল্য সন্ধি বলিয়া উল্লেখ করিয়াছেন । তিনি স্পষ্টাক্ষরে লিখিয়াছেন, “আমি বিশেষ বিবেচনা করিয়া এই সিদ্ধান্তে উপনীত হইতেছি যে, ভারতবর্ষীয় গবর্ণমেন্ট আইন অনুসারে কখনই ১৮৩৭ অঙ্গের সন্ধি অকার্য্যকর বলিয়া ফেলিয়া রাখিতে পারেন না” § । লর্ড হার্ভিঞ্জ ১৮৪৭ অঙ্গে অবোধ্যার নবাবকে যে পত্র লিখেন, তাহাতেও ১৮৩৭ অঙ্গের সন্ধি বিধিনির্দিষ্ট বলিয়া উল্লিখিত হইয়াছিল ¶ । কর্ণেল

* Collection of Treaties. Vol. II. p. 176-177.

† Retrospects and Prospects &c., p. 54.

‡ Collection of Treaties, Vol. II., p. 173-177.

§ Dacoitee in Excelsis, p. 192.

¶ Oude Papers, 1856, pp. 31, 32 Comp. Ibid. 1858. p. 62.

সিমান ৩.১৮৫১ অর্কে লিখিয়াছেন; —“১৮৩৭ অর্কের সন্ধি আমাদিগকে আপনাদের কর্মচারী দ্বারা রাজ্য-শাসন করিবার যে ক্ষমতা অর্পণ করিয়াছে, আনার বোধ হয়, আমাদের গবর্ণমেন্ট সেই ক্ষমতার প্রয়োগ না করিয়া থাকিতে পারিবেন না” * । স্যার হেন্‌রি লরেন্স লিখিয়াছেন, “নূতন সন্ধি (১৮৩৭ অর্কের সন্ধি) অনুসারে যে, আমরা অযোধ্যার শাসনভার স্বহস্তে গ্রহণ করিতে পারি, ইহা কেহই অস্বীকার করিবেন না” † । ১৮৩৭ অর্কের সন্ধি যখন বিধিবদ্ধ হয়, তখন লর্ড ব্রৌটন বোর্ড অব-কন্ট্রোলার সভাপতি ছিলেন, তিনিও স্পষ্টাক্ষরে উল্লেখ করিয়াছেন, “১৮৩৭ অর্কের সন্ধি যে, গবর্ণমেন্ট বিধিবদ্ধ করিয়াছেন, তাহাতে আমার দৃঢ় বিশ্বাস আছে । এই সন্ধির একাংশমাত্র অগ্রাহ্য হইয়াছিল, সমুদয় অংশ অগ্রাহ্য হয় নাই” ‡ । এইরূপ প্রধান প্রধান ব্যক্তি মাত্রেই ১৮৩৭ অর্কের সন্ধি বিধি-নির্দিষ্ট ও অবশ্য-প্রতিপাল্য সন্ধির মধ্যে নিবেশিত করিয়াছেন । বস্তুতঃ যে সন্ধি যথানিয়মে বিধিবদ্ধ হইল; একটি কি দুইটি ব্যতীত যাহার সমুদয় ধারা ডিরেক্টরগণকর্তৃক অনুমোদিত হইল, আট বৎসর পরে যাহা ভারতবর্ষীয় গবর্ণমেন্ট কর্তৃক যথানিয়মে প্রচারিত হইল, প্রচারের এগার বৎসর পরে তাহাই আবার একবারে অগ্রাহ্য হইল § । সমুদয়গণ কখনও ইহাতে বিশ্বাস স্থাপন করিবেন না ।

আশ্চর্য্যের বিষয় এই, কেহ কেহ এবিষয়েও ডালহৌসীর মতের অনুমোদন করিতে ক্রটি করেন নাই । স্যার চার্লস জাক্সনের মতে ডিরেক্টরগণ ১৮৩৭ অর্কের সন্ধি বিধিবদ্ধ করিতে অস্বীকৃত হইয়াছিলেন না । ডিউক অব আর্গাইল লিখিয়াছেন, “১৮৩৭ অর্কের সন্ধি বিধিবদ্ধ না হওয়াতে যে, আমাদের সমূহ লাভ হইয়াছে, উহা যথার্থ নয় । প্রত্যুত উহা প্রবল থাকিলে লর্ড ডালহৌসী অবশ্যই সন্তুষ্ট থাকিতেন । ঐ সন্ধি তাঁহাকে সমস্ত অধিকারই

* Oude Blue-book, p. 166. Comp. J. Malcolm Ludlow, War in Oude, p. 29, note.

† Sir Henry Lawrence's Essays, p. 131. Comp. Calcutta Review, No. VI. Vol. III. p. 424.

‡ Beveridge, History of India. Vol. III. p. 548.

§ War in Oude, p. 29-30.

¶ A Vindication, p. 121.

সমর্পণ করিয়াছিল, প্রয়োজন উপস্থিত হইলে তিনি অযোধ্যার শাসনভারও গ্রহণ করিতে পারিতেন” * । ডিউক অব আর্গাইলের এই কথা কতদূর সঙ্গত, বলা যায় না। ১৮৩৭ অব্দের সন্ধি ডালহৌসীকে সমস্ত ক্ষমতা অর্পণ করে নাই। তিনি ইচ্ছা করিলে ঐ সন্ধি অনুসারে রাজ্যের উদ্বৃত্ত টাকা ব্যয় করিতে পারিতেন না, তিনি ইচ্ছা করিলে ঐ সন্ধি অনুসারে অযোধ্যার রাজস্ব গ্রহণ করিতে পারিতেন না। এই সন্ধি তাঁহাকে শাসনভার গ্রহণের ক্ষমতা অর্পণ করিয়াছিল বটে, কিন্তু তাহা চির দিনের জন্ত নয়। তিনি কিয়ৎকালের জন্ত অযোধ্যা জাতীয় আচার, জাতীয় রীতি ও জাতীয় বিধি অনুসারে শাসন করিয়া পরে উহা নবাবের হস্তে সমর্পণ করিতে বাধ্য হইতেন † । জায়ন্ প্রভৃতির উক্ত রূপ লিখন-ভঙ্গীতে পবিত্র ইতিহাসের মহিমা বিনষ্ট হইয়াছে। বাহারা লর্ড ডালহৌসীর সহিত একমতে দীক্ষিত, তাঁহাদের নিকটে এবিষয়ে প্রকৃত সহায়তার আশা করা যায় না।

১৮৪২ অব্দের মে মাসে মহম্মদ আলি শাহের মৃত্যু হয়। তৎপুত্র আমজুদ আলি শাহ নবাব হন। আমজুদ আলির পর ওয়াজিদ আলি শাহ ১৮৪৭ অব্দের ১৩ই ফেব্রুয়ারি অযোধ্যার শাসন-দণ্ড গ্রহণ করেন। এত দিন অযোধ্যার প্রতি ব্রিটিশ কোম্পানির যে দুর্নিবার ভোগলালসা ছিল, ওয়াজিদ আলির সমকালে তাহা চরিতার্থ হইয়া উঠিল। কোম্পানি অযোধ্যার শাসনসম্বন্ধে যে অত্যাচার ও অবিচারের অপবাদ আরোপ করিয়াছিলেন, তাহাই এক্ষণে ঐ লালসাতৃপ্তির পথ পরিস্কৃত করিল। এক নবাবের পর অল্প নবাব অযোধ্যার সিংহাসনে অধিরূঢ় হইতে লাগিলেন, এক গবর্ণরজেনেরলের পর অল্প গবর্ণরজেনেরল ভারতবর্ষের শাসন-দণ্ড গ্রহণ করিতে লাগিলেন, তথাপি এই অপবাদ তিরোহিত হইল না। বেটিংক এই অপবাদে অন্ধ হইয়া নবাবকে উপদেশ দিলেন, অকলাণ্ড এই অপবাদে অন্ধ হইয়া ১৮৩৭ অব্দে সন্ধি বন্ধন করিলেন, হার্ডিঞ্জ এই অপবাদে অন্ধ হইয়া নবাবকে তাড়না করিলেন; এত করিয়াও গবর্ণমেন্ট পরিতুষ্ট হইলেন না। পরিশেষে এক জন সর্বভুক্ আসিয়া সমুদয় অপবাদের সহিত অযোধ্যায় নবাবের রাজত্বের শেষ চিহ্ন বিলুপ্ত করিয়া ফেলিলেন।

* India under Dalhousie and Canning, p. 110, note.

† Retrospects and Prospects &c., p. 54.

লর্ড ডালহৌসী স্থায়ের মন্তুকে পদাঘাত পূর্বক সন্ধি ভঙ্গ করিয়া অযোধ্যা ব্রিটিশ রাজ্যভুক্ত করিতে কৃত-সঙ্কল্প হইলেন। কর্ণেল স্টিমান নবাবের দরবারে রেসিডেন্ট ছিলেন। তিনি যদিও শাসনের অব্যবস্থা সম্বন্ধে অভিযোগ করিতে লাগিলেন, তথাপি যাহাতে নবাবের সিংহাসন রক্ষা পায় এবং তদীয় রাজ্য সুব্যবস্থিত হয়, তদ্বিষয়ে চেষ্টা করিতে ক্রটি করিলেন না। স্টিমান ১৮৫২ অব্দের সেপ্টেম্বর মাসে ডালহৌসীকে স্পষ্টাক্ষরে লিখিলেন “যদি আমরা অযোধ্যা অথবা উহার কোন অংশ আত্মসাৎ করি, তাহা হইলে ভারতবর্ষে আমাদের স্মৃতি নষ্ট হইবে। এই স্মৃতি এক ডজন অযোধ্যা অপেক্ষা আমাদের পক্ষে অধিকতর মূল্যবান”*। কিন্তু লর্ড ডালহৌসী একথা কণপাত করিলেন না, স্টিমানের প্রস্তাব অনুসারেও অযোধ্যা সুব্যবস্থিত করিতে মনোযোগী হইলেন না। ব্রিটিশ ইণ্ডিয়ার সর্বপ্রধান অধিনায়কের এই রূপ উদাসীনতা দর্শনে কর্ণেল স্টিমান পরিশেষে দুঃখসহকারে তাঁহার এক জন বন্ধুকে লিখিয়াছিলেনঃ—“আমার আশঙ্কা হইতেছে, লর্ড ডালহৌসী বোধ হয়, আমার সহিত একমত নহেন। আমি যাহা স্থায়সম্পত্ত ও সম্মানার্থ বিবেচনা না করি, একরূপ বিষয় যদি তিনি করিতে চাহেন, তাহা হইলে আমি উহার সম্পাদনের ভার অপরের জন্ত রাখিয়া পদ ত্যাগ করিব। রাজ্য আত্মসাৎ করিতে আমাদের কোন অধিকার নাই। ১৮৩৭ অব্দের সন্ধি অনুসারে আমরা উহার কার্যভার গ্রহণ করিতে পারি, কিন্তু উহার রাজস্ব আপনাদের জন্ত রাখিতে পারি না। আমরা কেবল আমাদের গবর্নমেন্টের সম্মানরক্ষার্থ ও প্রজাদের উপকারের জন্ত ঐরূপ করিতে পারি। বাজেয়াপ্ত করা নিতান্ত অসাধু ও অসম্মানার্থ কার্য”†। এই পত্র ১৮৫৪ অব্দের ১১ই সেপ্টেম্বর লিখিত হয়। এতদ্বারা স্পষ্ট প্রতিপন্ন হইতেছে যে, ৬ বৎসরকাল রেসিডেন্টের কার্য করিয়াও কর্ণেল স্টিমান লর্ড ডালহৌসীর মনোগত অভিপ্রায় বুঝিতে সমর্থ হন নাই‡। কেবল কর্ণেল স্টিমানই যে, অযোধ্যাগ্রহণের বিরোধী ছিলেন, একরূপ নহে। স্টিমানের স্থায় স্যার হেনরি লরেন্সও এবিষয়ে সম্পূর্ণ অমত প্রকাশ করিয়াছিলেন। হেনরি লরেন্স “কলিকাতারিবিউ” নামক সাময়িক পত্রে

* Sleeman's Oude, Vol. II., pp. 378, 379.

† Ibid. Vol. I., pp. XXI, XXII.

‡ Retrospects and Prospects &c., p. 68.

‘অযোধ্যারাজ্য’ শীর্ষক একটি প্রবন্ধে স্পষ্টাক্ষরে উল্লেখ করিয়াছেন, “অযোধ্যা যথাসম্ভব নবাবের শাসনাধীন রাখাই বিধেয়, উহার একটি টাকাও কোম্পানির ধনাগারে আসিতে দেওয়া উচিত নহে” * । হেনরি লরেন্সের এই মত চিরকাল অটল ভাবে ছিল । পঞ্জাব অধিকারের ৫ বৎসর পরে ১৮৪৪ অক্টোবর জুন মাসে প্রসিদ্ধ ইতিহাসলেখক কে সাহেবকে তিনি যে একখানি পত্র লিখেন, তাহাতেও উল্লেখ ছিল, “এক ব্যক্তি তাহার অর্থ অযথাব্যয় কিংবা প্রজাদিগের প্রতি দুর্ব্যবহার করিতেছে বলিয়াই, আমরা তাঁহার রাজ্য গ্রহণ করিতে পারি না । আমরা তাঁহার রাজস্ব আপনাদের ধনাগারে না আনিয়া প্রজাদিগকে রক্ষা করিতে পারি” † । কর্ণেল স্টিমান ও স্যার হেনরি লরেন্সের লেখনী হইতে এই রূপ পবামর্শবাক্য নির্গত হইয়াছিল, তাঁহারা এইরূপ নিঃস্বার্থভাবে ডালহৌসীকে মন্ত্রণা দিয়াছিলেন, কিন্তু ইহাতে ডালহৌসী কর্ণপাত করিলেন না, প্রত্যুত অবিলম্বে অত্যাচার, অবিচারও দৌরাত্ম্যের ছল করিয়া অযোধ্যা গ্রহণ করিতে হস্ত প্রসারণ করিলেন ।

১৮৫৪ অক্টোবর ২৪এ নবেম্বর জেনারেল আউট্রাম কর্ণেল স্টিমানের পরিবর্তে অযোধ্যার রেসিডেন্ট হইলেন । স্মতরাং সর্বশেষ শোচনীয় কার্যসম্পাদনের ভার তাঁহার উপরেই সমর্পিত হইল । ১৮৫৫ অক্টোবর লর্ড ডালহৌসী নীলগিরির স্মৃৎস্পর্শ সমীরণ সেবন করিতে করিতে অযোধ্যাঘটিত সমুদয় বিবরণের সমালোচনা করিয়া একটি বৃহৎ মিনিট লিখিলেন । ১৮ই জুন উহা তাঁহার হস্তাক্ষরিত নামে শোভিত হইল ‡ । পর বৎসরের জানুয়ারি মাসের মধ্যেই সমুদয় বন্দোবস্ত ঠিক হইল । কোর্ট অব ডিরেক্টর অযোধ্যাগ্রহণে সন্মতি দিয়াছিলেন, বোর্ড অব কন্ট্রোল অযোধ্যাগ্রহণে সন্মতি দিয়াছিলেন, এবং ইঞ্জলণ্ডের মন্ত্রিসভাও অযোধ্যাগ্রহণে সন্মতি দিয়াছিলেন, স্মতরাং ডালহৌসী আর নিশ্চেষ্ট থাকিলেন না । তিনি ৩রা জানুয়ারি প্রাতঃকালে একটি সভা আহ্বান করিলেন ; প্রয়োজনীয় কার্যের অধিকাংশই অগ্রে সম্পন্ন হইয়াছিল । ব্রিটিশ গবর্নমেন্টের ঘোষণা-পত্র, অযোধ্যার নূতন শাসনপদ্ধতির বিবরণ প্রভৃতি প্রায় সমস্তই

* Sir Henry Lawrence's Essays, p. 132. Comp. Calcutta 'Review, No. VI., Vol. III., p. 424.

† Kaye's Lives of Indian Officers, Vol. II., p. 310.

‡ Kaye's Seyoy War, Vol. I., p. 143.

লিখিত হইয়া পররাষ্ট্রবিভাগীয় সেক্রেটারির দপ্তরে সংরক্ষিত ছিল, এক্ষণে সভা কেবল তদনুসারে কার্য্য করিতে আদেশ করিলেন। সুতরাং কাল বিলম্ব না করিয়া রেসিডেন্টের নিকটে সংবাদ দেওয়া গেল। আউট্রাম জাহুয়ারি মাসের শেষে এই সংবাদ পাইলেন। মাসের শেষ দিবসে তিনি নবাব-দরবারের মন্ত্রীকে ব্রিটিশ গবর্নমেন্টের চূড়ান্ত নিষ্পত্তি জানাইলেন। মন্ত্রী দোষক্ষালনের জন্য সময় চাহিলেন, নবাব-মাতা প্রাণাধিক পুত্রের পুনর্বিচার জন্ত গবর্নমেন্টকে আবদ্ধ করিতে অনুরোধ করিলেন, এইরূপ সকল বিষয়ই তাঁহার আশা করিয়াছিলেন, এইরূপ সকল বিষয়ের জন্তই প্রস্তাব হইয়াছিল। কিন্তু আউট্রাম এক বই ছই উত্তর দিলেন না। বিচারের সময় অতিবাহিত হইয়াছে, সহিষ্ণুতার সময় অতিক্রান্ত হইয়াছে, এক্ষণে কেবল নবাবকে ব্রিটিশ গবর্নমেন্টের আদেশ জ্ঞাপন করাই বাকী। রেসিডেন্টের মুখ হইতে কেবল এই উত্তর বহির্গত হইল। মন্ত্রী অদৃষ্টচক্রের আবর্তন অবশুস্তাবী জানিয়া মস্তক অবনত করিলেন, নবাবমাতা প্রাণপ্রিয় ওয়াজিদ আলির পতন অবশুস্তাবী জানিয়া নীরবে রোদন করিলেন।

৪ঠা ফ্রেব্রুয়ারি ব্রিটিশ রেসিডেন্ট নবাব ওয়াজিদ আলির সহিত সাক্ষাৎ করিতে গমন করিলেন। নবাবের প্রাসাদ-দ্বার কামান-শুল্ল ও রক্ষকদিগকে নিরস্ত করা হইল। যাহারা পূর্বে শস্ত্রদ্বারা রেসিডেন্টকে অভিবাদন করিত, তাহারা এক্ষণে কেবল হস্তদ্বারা অভিবাদন করিল। নবাব স্বীয় ভ্রাতা ও কতিপয় বিশ্বস্ত অমাত্যের সহিত রেসিডেন্টকে দরবারে গ্রহণ করিলেন। সাংঘাতিক ব্যাপারের অভিনয় আরম্ভ হইল। রেসিডেন্ট গবর্নরজেনেরলের পত্র ও গুরুতর দণ্ড-বিধায়ক সন্ধির এক খানি পাণ্ডুলিপি নবাবের হস্তে দিয়া কহিলেন, যে দণ্ড বিহিত হইয়াছে, তাহা যেন তিনি অবনতমস্তকে গ্রহণ করেন। নবাব গভীর শোকসহকারে সন্ধিপত্র গ্রহণ করিলেন, গভীর শোকসহকারে স্বীয় উক্ষীণ রেসিডেন্টের হস্তে দিয়া কহিলেন, সন্ধি কেবল তুল্য ব্যক্তিদিগের মধ্যই স্থাপিত হইয়া থাকে, কিন্তু ব্রিটিশ গবর্নমেন্ট তাঁহার সন্ত্রম নষ্ট করিলেন, রাজ্য গ্রহণ করিলেন, একরূপ ব্যক্তির সহিত সন্ধিবন্ধন বিড়ম্বনা মাত্র। তাঁহার এইরূপ কাতর উক্তি ক্রমে ফল দর্শিল না। তিনি বাহাদিগকে বন্ধ বলিয়া আলিঙ্গন কবিয়াছিলেন, বন্ধুভাবে বাহাদিগের নিকট বিনতি দেখাইয়াছিলেন, তাঁহারাই এক্ষণে বন্ধুতার বিনিময়ে শত্রুতা সাধিলেন।

ক্ষোভে ও রোবে নবাব ওয়াজিদ আলি নীরব হইলেন। শোচনীয় অভিনয়ের যবনিকা নিপত্তিত হইল। অচিরাৎ ব্রিটিশ রেসিডেন্ট ব্রিটিশ গবর্ণমেন্টের ঘোষণা-পত্র প্রচার করিলেন। পঞ্চাশ লক্ষ অধিবাসীর সহিত উত্তরে নেপাল, পূর্বে গোরক্ষপুর, দক্ষিণে এলাহাবাদ ও পশ্চিমে আজিমগড়, জৌনপুর, ফরকাবাদ এবং শাহজহাঁপুর সীমার মধ্যবর্তী প্রায় ২৪ সহস্র বর্গ মাইলপরিমিত বিস্তৃত রাজ্য ব্রিটিশ ইণ্ডিয়ার অন্তর্ভুক্ত হইল। আর এই বিস্তৃত রাজ্যের অধিতীয় শাস্তা ও পাতা নির্দিষ্ট বৃত্তিভোগী হইয়া অস্তিমাত্রে পর্য্যবসিত হইলেন।

এইরূপে প্রধান প্রধান রাজ্যগুলি হস্তগত করিয়া লর্ড ডালহৌসী লর্ড কানিংয়ের হস্তে ভারত-সাম্রাজ্যের শাসনভার সমর্পণ করেন। অযোধ্যা অধিকার ভারত-ক্ষেত্রে লর্ড ডালহৌসীর শেষ ও সর্ব প্রধান কীর্তি। জটনক ইতিহাস-লেখক ডালহৌসীর এই কার্য রাজ্যাধিকারের ওয়াটলু বুলিয়া উল্লেখ করিয়াছেন। * যদি আমাদের মত জিজ্ঞাসা করা হয়, তাহা হইলে আমরা অগ্নান বদনে উহা মহাপাতকের চরমসীমা স্মিতকীল্ডের অগ্নিকাণ্ড বলিয়া নির্দেশ করিব। মোহাক্ক মেরী নির্দোষ প্রোটেষ্ট্যান্ট-দিগকে জলস্ত আঙুণে নিক্ষেপ করিয়া ধর্ম্মের বিনিময়ে পাপরাশি উপার্জন করিয়াছিলেন, লর্ড ডালহৌসী নিরীহ ওয়াজিদ আলির স্বদয়ে তুবানল উৎপাদন করিয়া সুনামের বিনিময়ে অপকীর্তি সঞ্চয় করিলেন। ডালহৌসীর অধিষ্ঠিত গবর্ণমেন্ট কেবল নবাবের রাজ্য গ্রহণ করিয়াই নিরস্ত হইলেন না, অন্য কার্যেও তাঁহাদিগের অত্যাচারের পরাকাষ্ঠা লক্ষিত হইল। নবাব পার্লামেন্টে অভিযোগ উত্থাপন করিবার জন্য বিলাতগমনের অনুমতি চাহিলেন, রেসিডেন্ট কলেক্টরশলে তাঁহাকে সে উদ্যম হইতে নিরস্ত করিতে প্রয়াস পাইতে লাগিলেন, কেবল ইহাই নয়, যাহার উপর তাঁহার রাজ্য-পুনঃপ্রাপ্তির আশা নির্ভর করিতেছে, একরূপ দলীলাদিও রেসিডেন্ট ও তাঁহার সতীর্থগণ বলপূর্ব্বক অধিকার করিলেন। নবাবের ধনসম্পত্তি, গৃহ-সজ্জা, বস্ত্র, শকট, পুস্তকালয়স্থ জুই লক্ষ পরিমিত বহুমূল্য ও হস্তলিখিত পুস্তক, হস্তী, অশ্ব প্রভৃতি সমুদয় প্রকাশ্য নিলামে বিক্রীত হইল, এবং তদুৎপন্ন অর্থ মাননীয় কোম্পানির ধনাগার পরিপূর্ণ করিল। † এত করিয়াও

* Sir John Kaye, History of the Sepoy War, Vol. I., p. 143.

† Dacoitee in Excelsis, p. 145.

ডালহৌসীর বাসনা সিদ্ধ হইল না । লিখিতে অপরিমিত লজ্জা ও ক্ষোভ হয়, কর্তৃচারিগণ অন্তর্মহলে প্রবেশ করিয়া বলপূর্বক নবাবের বেগমদিগকে বাহিরে আনিল, বলপূর্বক তাঁহাদের দ্রব্যাদি প্রকাশ্য রাস্তায় নিক্ষেপ করিল, এবং তাঁহাদের ব্যয়ের জন্য যে অর্থ রক্ষিত হইয়াছিল, তাহা আটক করিয়া রাখিল * । জনৈক অপক্ষপাতী ব্রিটিশ লেখক এ বিষয়ে লিখিয়াছেন, “ইঙ্গরেজেরা অযোধ্যারাজ্যের যে সমুদয় সম্পত্তি বিলুপ্তন করিয়াছেন, ইহাই তাহার শেষ, এবং নবাবের পরিবারগণ—যাঁহারা এক শত বৎসরের অধিককাল ইঙ্গরেজদিগের শরণাপন্ন ছিলেন, ইঙ্গলণ্ডীয় ব্যক্তিবর্গের নিকট সুবিচার-প্রার্থী হইয়াছিলেন—এই রূপ অবস্থায় পাতিত হইলেন । অযোধ্যার নবাবেরা পুরুষ-পরম্পরায় ইঙ্গরেজদিগের সহিত যে বন্ধু স্থাপন করিতে বাধ্য হইয়াছিলেন, ইহাই সেই বন্ধুত্বের ফল । এই-রূপেই তাঁহাদিগের সর্বস্বহরণ সম্পূর্ণ হইল † ।”

কি অপরাধে অযোধ্যার এইরূপ শোচনীয় দশা উপস্থিত হইল ? কি অপরাধে নবাব ও তৎপরিবার সম্মান-চ্যুত ও সম্পত্তি-চ্যুত হইয়া ভিখারীর অবস্থায় পাতিত হইলেন ? একবার তাহার বিচার করা কর্তব্য । সকলেই ইতিহাসের দোহাই দিয়া যুক্তকণ্ঠে বলিয়া থাকেন যে, নবাব ওয়াজিদ আলি সিংহাসনে অধিষ্ঠিত থাকাতেও অযোধ্যা নিতান্ত অরাজক হইয়া উঠিয়াছিল, সর্বদাই চুরি, ডাকাইতী প্রভৃতির নিমিত্ত লোকে সশঙ্ক থাকিত ; ইঙ্গরেজ গবর্ণমেন্ট অযোধ্যা অধিকার করিয়া লোকের ঐ আশঙ্কা দূর করিয়াছেন, ইঙ্গরেজ অযোধ্যার শাসনভার গ্রহণ না করিলে উহা কখনও এরূপ সুব্যবস্থিত ও এরূপ উন্নত হইত না । বিদ্যালয়ের বালক হইতে অশীতিপর বৃদ্ধ পর্য্যন্ত, সকলের মুখেই এই কথা শুনিতে পাওয়া যায় । লর্ড ডালহৌসীর পরিপোষকগণও সর্বত্র এই বাক্য প্রতিক্ষণিত করিয়াছেন । তাঁহাদের লেখনীমুখ হইতে অবলীলাক্রমে অযোধ্যার এইরূপ বর্ণনা বহির্গত হইয়াছে :—“অযোধ্যা বৃক্ষরাজি-পরিপূর্ণ এবং বংশ ও কণ্টক-সমাকীর্ণ জঙ্গলে আচ্ছন্ন ছিল । পূর্বে যেখানে জঙ্গল ছিল না, তালুকদারগণ শস্য-সম্পত্তি বিনষ্ট করণতে তাহা আপনা হইতেই জঙ্গলে পরিণত হইয়া উঠিয়াছিল । * * অযোধ্যার অধিকাংশ স্থানেরই এইরূপ অবস্থা ছিল । কোনও স্থানে শান্তি

* Dacoitee in Excelsis, p. 145-146.

† Ibid, p. 146.

ছিল না। উর্দুর প্রদেশের সমস্ত স্থানই জঙ্গলে পরিণত হইয়াছিল। * * * জীবন ও সম্পত্তি সর্বদা বিয়স্কুল থাকিতে বাণিজ্য তিরোহিত হইয়াছিল, ক্ষুদ্র নগরসমূহ পল্লীগ্রামে পরিণত হইয়াছিল। অধিবাসিগণ বিদ্রোহী ও দস্যুগণের হস্তেও সময়ে সময়ে অব্যাহতি পাইত, কিন্তু নবাবের সৈন্যগণের হস্তে কাহারও নিস্তার ছিল না * ।” কিন্তু আমরা এই কথায় সন্দেহ দিয়া পবিত্র ইতিহাসের সম্মান বিলুপ্ত করিতে ইচ্ছা করি না। অবশ্য অন্যান্য দেশের ন্যায় অযোধ্যায় কখন কখন অত্যাচার হইত। কিন্তু যে অত্যাচারে রাজ্য অরাজক বলিয়া প্রতিপন্ন হয়, যে অত্যাচারে সর্বসাধারণের ধনপ্রাণ নষ্ট হইয়া যায়, সংক্ষেপে যে অত্যাচারে ব্যথিত হইয়া ব্রিটিশ গবর্নমেন্ট নবাবকে রাজ্য-চ্যুত করেন, অযোধ্যায় এরূপ অত্যাচার হয় নাই। আমরা ইঙ্গরেজ-শাসিত দেশের সহিত তুলনা করিয়া সপ্রমাণ করিব, অযোধ্যায় এরূপ অত্যাচার হয় নাই, যাহার নিমিত্ত ব্রিটিশ গবর্নমেন্ট নবাবের সিংহাসন গ্রহণ করিতে পারেন, সপ্রমাণ করিব, এরূপ কোনও অরাজকতা ঘটে নাই, যাহার নিমিত্ত অযোধ্যা ইতিহাস কলঙ্কিত করিতে পারে।

প্রথমে চুরি, ডাকাইতী প্রভৃতি উপদ্রবের বিষয় ধরা যাউক। কাশ্মের বান্‌বারি প্রভৃতি কর্মচারিগণ স্পষ্টাক্ষরে বলিয়াছেন যে, অযোধ্যায় চুরি, ডাকাইতীর সংখ্যা পূর্বাপেক্ষা অনেক ন্যূন হইয়া উঠিয়াছিল। অযোধ্যায় ১৮৪৮ হইতে ১৮৫৪ অব্দ পর্য্যন্ত ৬ বৎসরে ৫০ লক্ষ অধিবাসীর মধ্যে লঘু অপরাধের সংখ্যা কিঞ্চিৎ ১,৬০০ ও গুরু অপরাধের সংখ্যা কিঞ্চিৎ ২০০ হইয়াছিল। পক্ষান্তরে অত্রান্ত প্রদেশের সহিত উহার তুলনা কর, বিস্তর প্রভেদ লক্ষিত হইবে। ব্রিটিশ গবর্নমেন্টের শাসিত এলাহাবাদ অযোধ্যার এক পঞ্চমাংশ, এবং বারাণসী এক ষষ্ঠাংশ। কিন্তু এক ১৮৫৫ অব্দেই এলাহাবাদে অপরাধের সংখ্যা ১,৪৫২ ও বারাণসীতে ৮,০০৪ দাঁড়ায়। বারাণসী অযোধ্যার এক ষষ্ঠাংশ পরিমিত হইয়াও অপরাধাংশে অযোধ্যা অপেক্ষা চারি গুণ উর্দ্ধে স্থান পরিগ্রহ করে। ভারতবর্ষের মধ্যে বাঙ্গালা ব্রিটিশ

* Life of Sir Henry Lawrence. Vol. II., p. 287. মার্শমান সাহেবও স্বপ্রণীত ইতিহাসে (History of India. Vol. III, p. 421.) অযোধ্যার সম্বন্ধে এইরূপ অভিপ্রায় প্রকাশ করিয়াছেন। অধিক কি হেনরি লরেন্সও অযোধ্যাকে এইরূপ অরাজক বলিয়া বর্ণনা করিতে ক্রটি করেন নাই। Calcutta Review. No. VI. Vol. III., 1845, p.

কোম্পানির একটা প্রাচীন স্মৃশাসিত প্রদেশ । উহাতেও ১৮৫০ অব্দে ৯৬, ৩৫২ জন ধৃত হইয়া বিচারার্থ আনীত হয় । ইহাদের মধ্যে ৫৫,২৫১ জন দোষী বলিয়া প্রমাণিত ও যথাবিধি দণ্ডিত হয় । এতদ্ব্যতীত ১৮৫১ অব্দে অপরাধীর সংখ্যা ৯৪,৯৫৩ ; ১৮৫২ অব্দে ৯২,১১৫ ও ১৮৫৩ অব্দে ৯২,৬২৯ দাঁড়ায় । বাঙ্গালার জনসংখ্যা অযোধ্যার জনসংখ্যার ৮ গুণ, অপরাধীর সংখ্যা অযোধ্যার অপরাধীর সংখ্যার ৩৭ গুণ * ।

ব্রিটিশ অধিকারের সীমায় দুশ্চরিত্র লোকে সময়ে সময়ে চুরি, ডাকা-

* *Dacoitee in Excelsis*, p. 182-183.

এই স্থলে অন্য প্রকারে অযোধ্যার সহিত বাঙ্গালার তুলনা করা যাইতেছে । ডালহৌসী যে ১৮৫৬ অব্দের ফেব্রুয়ারি মাসে ঘোষণা-পত্র দ্বারা অযোধ্যায় স্মৃশাসনের অভাব প্রচার করেন ; সেই ১৮৫৬ অব্দের ডিসেম্বর মাসে বাঙ্গালার অবস্থা সম্বন্ধে মিসনরিগণের একখানি আবেদন পত্র সমর্পিত হয় । তুলনার জন্য এক পাৰ্শ্বে ডালহৌসীর ঘোষণাপত্রোক্ত অযোধ্যার অবস্থা, অন্য পাৰ্শ্বে মিসনরিগণের আবেদন পত্রোক্ত বাঙ্গালার অবস্থা উদ্ধৃত হইল :—

ডালহৌসীর লিখিত অযোধ্যার অবস্থা ।	মিসনরিগণের লিখিত বাঙ্গালার অবস্থা ।
“ডাকাইতের দল বিভাগনমূহের শাস্তি নষ্ট করিতেছে ।”	“ডাকাইতদলের গতি প্রতিরোধ করিতে পুলিশের কোনও ক্ষমতা নাই ।”
‘আইন ও শ্রায় অপরিচিত রহিয়াছে’	‘এ প্রদেশের সর্বত্রই নিঃশ্ব দুর্বল লোকের উপর অত্যাচার হইয়া থাকে । ধন সংগ্রহের উপায়ভূত ক্ষমতাই ক্ষমতার মধ্যে পরি- গণিত । (লেঃ গবর্নর হালিডের রিপোর্ট ।)
“অস্ত্রাঘাত ও রক্তপাত প্রাত্যহিক ঘট- নার মধ্যে পরিগণিত ।”	“ভয়ঙ্কর ও লোমহর্ষণ ডাকাইতী প্রতি বৎ- সরই সংঘটিত হইয়া থাকে । * * এস্থানে সীমাঘটিত বিবাদে সর্বদাই মানামারি হইয়া থাকে ।”
“কোনও স্থানে এক ঘটাকালও জীবন সম্পত্তি নিরাপদ নহে ।”	“বাঙ্গালার অধিকাংশ বিভাগেই জীবন ও সম্পত্তি নিরাপদ নহে ।”
এই তুলনায় স্পষ্টই প্রতীত হইবে যে, ১৮৫৬ অব্দে অযোধ্যার অবস্থা বাঙ্গালার অবস্থা অপেক্ষা কোনও অংশে নিকৃষ্ট ছিল না । স্মরণ্য যে অপরাধে ডালহৌসী অযোধ্যায় নবাবের রাজত্ব লোপ করিলেন, সেই অপরাধ বাঙ্গালাতেও প্রয়োজিত হইতে পারে । <i>War in Oude</i> , p. 24-25, note.	

ইতী প্রভৃতি উপদ্রব করিত বলিয়াই যে, অযোধ্যা শাসন-বর্জিত ছিল, তাহাও যথার্থ নয়। জেনেরল আউট্রাম সীমাস্থিত ব্রিটিশ মাজিষ্ট্রেটদিগকে এ সম্বন্ধে এই কয়েকটি বিষয় জানাইতে অনুরোধ করেনঃ—“গত কয়েক বৎসরের (ছয়, সাত) মধ্যে ব্রিটিশ সীমায় হত্যা ও ডাকাইতী প্রভৃতির সংখ্যা কমিয়াছে কি না ? সংখ্যা ন্যূন হইলে ঐ ন্যূনতা অযোধ্যার সীমাস্থিত শাস্তিরক্ষকদিগের শাসনে হইয়াছে, না জীবন ও সম্পত্তি বিষয়সকল বলিয়া লোক-সংখ্যা কম হওয়াতে, হইয়াছে *” ? মাজিষ্ট্রেটগণ এই প্রশ্নের যে সকল উত্তর দেন সেগুলি পরস্পর একরূপ বিষদৃশ যে, তৎসমুদয় অবলম্বন করিয়া কখনই একটি চরম সিদ্ধান্তে উপনীত হইয়া যায় না। ফতেহপুরের মাজিষ্ট্রেট এ বিষয়ে লিখেন, “অযোধ্যারাজ্যের সংক্রমে এই বিভাগে অপরাধের সংখ্যা বাড়িয়াছে কি কমিয়াছে, তাহা নির্ধারণ করা সহজ ব্যাপার নয়। তবে যে কয়েকটি ডাকাইতী হইয়াছে, তাহার একটি ব্যতীত সমস্তই অযোধ্যার লোকে করিয়াছে”। জৌনপুরের মাজিষ্ট্রেট উত্তর দেন, “গত কয়েক বৎসরে ডাকাইতী ও হত্যার সংখ্যা কমিয়াছে। নবাবের সুলতানপুরস্থ নাজিম এবিষয়ে বিশেষ সাহায্য করিতেছেন। অপরাধ ঢাকিতে অথবা অপরাধকারীদিগকে উৎসাহ দিতে কখনও তাহার প্রবৃত্তি হয় নাই।” গোরাকপুরের মাজিষ্ট্রেটও সীমান্ত প্রদেশে অপরাধের সংখ্যা কমিয়াছে বলিয়া রিপোর্ট করেন। অবিবাসীর সংখ্যা কমিয়াছে কি না, তদ্বিষয়ে তিনি কোন উত্তর দিতে পারেন নাই। ফরক্কাবাদের মাজিষ্ট্রেটের উত্তর কিছু কৌতুকাবহ। তিনি বলেন, “এ বিভাগে যে সকল ব্যক্তি চুরি, ডাকাইতী প্রভৃতি পাপ-কার্য্য করে, অযোধ্যায় তাহাদের পলায়ন ও অপহৃত জব্বাদির সংগোপনের যে, বিশেষ সুবিধা হয়, তদ্বিষয়ে কোন সন্দেহ নাই। কিন্তু অযোধ্যার পুলিশের কাপ্তেন হিয়ার্সে অপরাধীদিগকে ধৃত করিতে বিশিষ্ট যত্ন প্রদর্শন করিয়া থাকেন।” কাপপুরের মাজিষ্ট্রেট অপেক্ষাকৃত বিস্তারিতরূপে জেনেরল আউট্রামের প্রশ্নের উত্তর দেন। তিনি কয়েকটি অপরাধের বিষয় উল্লেখ করিয়া বলেন, “এই সকল অপরাধকারীর অধিকাংশই অযোধ্যায় ধৃত হইয়াছে। অপরাধের সংখ্যা বর্জিত কি ন্যূন হয় নাই। উহা সমভাবেই রহিয়াছে। ১৮৫৪ অব্দে যে সমস্ত ডাকাইতী হয়, তাহার অধি-

নায়কগণ অযোগ্য লোক নয় । ইহারা গোবালিয়র ও দক্ষিণপশ্চিম দিক হইতে আসিয়াছিল *।”

এক্ষণে এই মাজিষ্ট্রেটগণের সকলেই যদি একবাক্যে স্বীকার করিতেন যে, কেবল অযোধ্যার লোকেই ব্রিটিশ সীমায় চুরি, ডাকাইতী প্রভৃতি পাপকার্যের অনুষ্ঠান করিয়া থাকে, তাহাই হইলেও কেহই বিস্মিত হইতেন না । যে বিভাগদ্বয় পরস্পর নিকটবর্তী, তাহার দুষ্চরিত্র লোকে এক বিভাগ হইতে অল্প বিভাগে যাইয়া প্রায়ই উপদ্রব করিয়া থাকে । পৃথিবীর পরস্পর সমীপবর্তী দেশসমূহেও এরূপ ঘটনা বিরল নহে । ব্রিটিশ গবর্নমেন্ট আপনাদের যে রাজ্য সুশাসিত বলিয়া অভিমান করেন, সেই রাজ্যের লোকও অযোধ্যার সীমায় যাইয়া দৌরাণ্ডা করিত । সুলতান-পুরস্থ নাজিম জৌনপুরের মাজিষ্ট্রেটের নিকটে এ বিষয়ে অনেক অভিযোগ করিয়াছিলেন । অযোধ্যার জনৈক সেনাপতি কাশেন বান্‌বারি ব্রিটিশাধিকৃত আশ্মিগড়ের কৰ্মচারিগণের বিরুদ্ধেও এইরূপ অভিযোগ করিতে ক্রটি করেন নাই † । বিশেষ যে পাঁচ জন মাজিষ্ট্রেট জেনেরল আউট্রামের নিকটে রিপোর্ট করেন, তাঁহাদের দুইজন, অযোধ্যার সীমায় পাপকার্য করিয়া আসিতেছে, বলিয়া স্বীকার করিয়াছেন । দুইজন অযোধ্যার পুলিশের কর্তব্যপরায়ণতার সমূহ প্রশংসা করিয়াছেন । এক জন প্রকৃতপ্রস্তাবে কিছুই বলিতে পারেন নাই । সুতরাং এই রিপোর্ট অবলম্বন করিয়া অযোধ্যাকে অরাজক বলা সর্বথা অসঙ্গত । অযোধ্যা যে অত্যাচার-পীড়িত ও সুশাসন-বর্জিত ছিল, এই রিপোর্ট দ্বারা তাহার কোনও সমর্থন হইতেছে না ।

অযোধ্যার রাজকৰ্মচারিগণ যে অকৰ্মণ্য ছিলেন না, তদ্বিষয়ে আরও অনেক প্রমাণ দেওয়া যাইতে পারে । জেনেরল আউট্রাম অনুসন্ধান করিয়া স্বীকার করিয়াছেন, “অযোধ্যার নিকটবর্তী ব্রিটিশ সীমান্ত-ভাগ যে, অযোধ্যার সীমান্তস্থ পুলিশ হইতে সমূহ উপকার পাইয়াছে, তদ্বিষয়ে সন্দেহ নাই ।” লর্ক্লেইস্ট পূর্বতন রেসিডেন্ট সেনাপতি লো ১৮৫৫ অব্দের ১৫ই আগষ্টের মিনিটে লিখিয়াছেন, “আমাদের অধিকার হইতে যে সমস্ত অপরাধী অযোধ্যার পলায়ন করে, তাহাদের অনুসন্धानে যখন

* War in Oude, p. 15-16.

† War in Oude, p. 18. Comp. Oude Blue-book, pp. 47-57, 59.

আমাদের সৈন্তগণ অযোধ্যা দিয়া গমন করে, তখন তাহাদের আহাৰ-সামগ্ৰী প্রভৃতির আয়োজন এবং আমাদের ডাক-রক্ষণপ্রভৃতি কার্যে অযোধ্যার গবৰ্ণমেণ্ট এ পর্য্যন্ত বিশিষ্ট মনোযোগ ও দক্ষতা দেখাইয়া আসিতেছেন। অযোধ্যার নবাবগণের সকলেই ঠগী ও ডাকাইতি নিবারণ বিষয়ে আমাদের সহিত বিশিষ্ট মনোযোগসহকারে কার্য্য করিতেছেন। *** আমি যখন লক্ষ্মীতে রেসিডেন্টের কার্য্যে নিয়োজিত ছিলাম, তখন (এবং আমার মতে বৰ্ত্তমান সময়েও) অযোধ্যার দরবার সম্বোধ পূৰ্বেক আমাদের ইচ্ছানুযায়ি কার্য্য করিয়াছেন। ভারতবর্ষের কোনও অংশে কোনও রাজ্যে এরূপ ছন্দানুবর্ত্তিত্ব এ পর্য্যন্ত আমার নয়নগোচর হয় নাই *।”

লো প্রভৃতি কৰ্ম্মচারিগণের শেখনী হইতে অযোধ্যার এইরূপ প্রশংসা বাক্য বহির্গত হইয়াছে, এইরূপ ত্রায়-সঙ্গত বিচারে তাঁহারা বিনশ্বর জগতে অবিনশ্বর সত্যের মহিমা রক্ষা করিয়াছেন। বিস্ময়ের বিষয় এই, ডালহৌসীর গবৰ্ণমেণ্ট এইরূপ দূরদর্শিগণের বাক্যে উপেক্ষা করিয়া এই অযোধ্যাকেই অত্যাচার ও অবিচারের আকর বলিয়া, উহা হস্তগত করিতে সঙ্কচিত হন নাই।

দূষিত চরিত্রের উপদ্রব ছাড়িয়া রাজোপদ্রবের বিষয় বিচার করিলেও কোনও দোষ দেখা যাইবে না। নবাবের আধিপত্য-সময়ে অযোধ্যায় সকলেই প্রফুল্লচিত্তে কালাতিপাত করিত, সমুদয় ক্ষেত্রই শ্রামল শস্ত-সম্পত্তিতে পরিশোভিত থাকিত। সুবিখ্যাত ডাক্তর হিবর্ অযোধ্যা ভ্রমণ করিয়া লিখিয়াছেন, “আমি অযোধ্যার বিষয় যেরূপ শুনিয়াছিলাম, এখানে আসিয়া তাহার কিছুই দেখিলাম না, প্রত্যুত দেশের সমুদয় ক্ষেত্রই সম্পূর্ণ রূপে কষিত দেখিলাম, ইহাতে আমার যেমন সুখের উদয় হইয়াছে, তেমনই বিস্ময়েরও সঞ্চার হইয়াছে। কারণ, অযোধ্যা ঘোর অত্যাচারে পীড়িত হইলে আমি কখনই এত অধিক জনসংখ্যা ও এত অধিক ব্যবসায়-ক্ষেত্র দেখিতে পাইতাম না +।” অযোধ্যার সুখ-শান্তির ইহা অপেক্ষা বলবৎ প্রমাণ আর কি হইতে পারে? হিবর্ সাহেব যখন স্বয়ং দেখিয়া অযোধ্যার এইরূপ সমৃদ্ধির উল্লেখ করিয়াছেন, তখন অযোধ্যাকে অত্যাচার-পীড়িত বলিয়া নির্দেশ করা উচিত

* Oude Blue-book, p. 226. Comp. War in Oude, p. 19.

+ Heber's Journal, Vol. II., p. 49.

নহে। অত্যাচার-পীড়িত দেশ কখনও সৌভাগ্যলক্ষ্মীর বিকাশক্ষেত্র হয় না।

অযোধ্যা মুশাসন-বর্জিত অথবা অত্যাচার-পীড়িত হইলে অধিবাসিগণ অবশ্যই উক্ত স্থান পরিত্যাগ করিয়া স্থানান্তরে উপনিবিষ্ট হইত। কিন্তু এরূপ ঘটনা অযোধ্যায় কখনও হয় নাই। অধিবাসীদিগের বাস-স্থানপরিত্যাগসম্বন্ধে যে সমস্ত বিবরণ পাওয়া গিয়াছে, তৎসমুদয়দ্বারা অযোধ্যায় গবর্ণমেন্টের অত্যাচার-বাহুল্য সপ্রমাণ হয় না। জেনেরল আউট্রাম প্রস্তাবিত বিষয়ে লিখিয়াছেন, “অযোধ্যাবাসিগণ যদি রাজ্যোপদ্রবে নিপীড়িত হইয়া উঠিত, তাহা হইলে তাহারা যে, নিকটবর্তী ব্রিটিশ রাজ্যে উপনিবেশ স্থাপন করিত, তাহা সহজেই বোধগম্য হইতে পারে। আমি মাজিষ্ট্রেটগণের নিকট হইতে এ সম্বন্ধে যাহা জানিতে পারিয়াছি, তাহাতে এ বিষয়ের কিছুই প্রমাণ পাওয়া যায় না। ফতেহপুরের মাজিষ্ট্রেট এ বিষয়ে কিছুই বলিতে পারেন নাই। পক্ষান্তরে আজিমগড় শাহজাহাঁপুর ও এলাহাবাদের মাজিষ্ট্রেটের নিকট হইতে কোনও উত্তর পাওয়া যায় নাই। অযোধ্যায় অধিবাসীদের সংখ্যা কম, অথবা তাহারা অধিক পরিমাণে ব্রিটিশাধিকারে উপনিবিষ্ট হইয়াছে কি না, জৌনপুরের মাজিষ্ট্রেট তদ্বিবয় অবগত নহেন। অযোধ্যাবাসিগণ উপনিবেশ স্থাপন করিয়াছে কি না, গোরক্ষপুরের মাজিষ্ট্রেটও সে বিষয়ে কিছুই বলেন নাই। ফরক্কাবাদের মাজিষ্ট্রেট উত্তর করিয়াছেন, চর্ঘটনার সময়ে বহুসংখ্য লোক অযোধ্যা হইতে এই বিভাগে আসিয়া কয়েককাল বাস করে বটে, কিন্তু প্রকৃত প্রস্তাবে উপনিবিষ্ট লোকের সংখ্যা অতি অল্প। অযোধ্যা হইতে যে সমস্ত লোক ব্রিটিশ অধিকারে উপনিবেশ স্থাপন করিয়াছে, কাণপুরের মাজিষ্ট্রেট তাহার একটি তালিকা প্রস্তুত করিয়াছেন। ঐ তালিকায় প্রতিপন্ন হয় যে, গত ছয় সাত বৎসরের মধ্যে উপনিবিষ্ট লোকের সংখ্যা ২,৩৩৩ হইয়াছে। ইহাদের মধ্যে ১,৩৫৪ জন কৃষক, অবশিষ্ট অকৃষিজীবী। এই সকল লোক পরিবারবর্গ সমভিব্যাহারে আসিয়া, স্থায়িক্রমে উপনিবিষ্ট হইয়াছে। যদিও অকৃষিজীবীগণ স্বভাবতঃ পক্ষীর শ্রায় নিরস্তর এদিকে ওদিকে ঘুরিয়া বেড়ায়, তথাপি তাহারা অযোধ্যায় ফিরিয়া যাইতে ইচ্ছুক নহে *।”

এক্ষণে বিবেচনা করা উচিত যে, কোন প্রদেশের অধিবাসিগণ প্রদেশান্তরে উপনিবেষ্ট হইলেই যে, সেই প্রদেশ অত্যাচারে নিপীড়িত, তাহা সপ্রমাণ হয় না। লোকসংখ্যার আত্যন্তিক বৃদ্ধি, জল বায়ুর দোষ, দেশ-ব্যাপী মহামারী ধা দুর্ভিক্ষ প্রভৃতি অনেক কারণে লোকে অধ্যুষিত স্থান পরিত্যাগ করিয়া উপনিবেশ স্থাপন করিয়া থাকে। কিন্তু রাজা দুর্কিনীত ও অত্যাচারী অথবা রাজা বিঘ্ন-সঙ্কুল হইলে লোকে সহসা গৃহাদি পরিত্যাগ করিয়া দলে দলে কোন নিরাপদ স্থানে যাইয়া বাস করে। ইহার উদাহরণরূপে আরাকানবাসীদের কথা উল্লেখ করা যাইতে পারে। গত শতাব্দীতে ব্রহ্মদেশীর গবর্নমেন্টের অত্যাচারে উৎপীড়িত হইয়া আবাঝানবাসিগণ গৃহাদিসম্পত্তি পরিত্যাগ পূর্বক ব্রিটিশ রাজ্যে প্রবেশ করিতে সঙ্কুচিত হয় নাই। অযোধ্যাবাসিগণ আরাকানবাসীদের হ্রাস প্রদেশান্তরে গিয়া বাস করিয়াছে কি না, এক্ষণে তাহারই বিচার করা কঠব্য। আউট্রাম মাজিষ্ট্রেটদিগের নিকট হইতে যে সমস্ত বিবরণ সংগ্রহ করিয়াছেন, তৎসমুদয় এই শেষোক্ত প্রকারের উপনিবেশ স্থাপনের পোষকতা করিতেছে না। চয় কিংবা সাত বৎসরে ৫০ লক্ষ অধিবাসীর মধ্যে ২,৩৩৩ জনের উপনিবেশস্থাপন গণনার উপযুক্ত নহে। বিশেষতঃ ইহারা যে অত্যাচার-পীড়িত হইয়া অযোধ্যা পরিত্যাগ করিয়াছে, তাহারও কোন প্রমাণ নাই। পক্ষান্তরে অন্যান্য বিভাগের মাজিষ্ট্রেটগণ একবাক্যে স্বীকার করিয়াছেন যে, অযোধ্যা হইতে আসিয়া, কেহ সেই সেই বিভাগে উপনিবেশ স্থাপন করে নাই। ইহাতে স্পষ্ট প্রতিপন্ন হইতেছে, অযোধ্যায় কোনও অত্যাচার সজ্বাতিত হইয়া অধিবাসিদিগকে উপনিবেশস্থাপনে প্রবর্তিত করে নাই। যদি কোন স্থানের কতিপয় অধিবাসী প্রদেশান্তরে বাস করিলে সেই স্থান সুশাসন-বর্জিত ও অত্যাচার-পূর্ণ হয়, তাহা হইলে বোলনে কিয়ৎ-সংখ্যক ইন্সপেক্টকে উপনিবেষ্ট দেখিয়া লুই নেপোলিয়ন অনায়াসে ইঙ্গলণ্ডকে সুশাসনবর্জিত বলিয়া নির্দেশ করিতে পারেন, এবং ভারতবর্ষের কুলিগণ প্রদেশান্তরে উপনিবেশ স্থাপন করিতে ভারতবর্ষও দৌরাভ্যপূর্ণ বলিয়া কথিত হইতে পারে *।

বস্তুতঃ অযোধ্যায় এমন কোন অত্যাচার হয় নাই, যাহাতে স্থানীয়

লোকে উৎপীড়িত হইয়া দলে দলে অধুষিত স্থান পরিত্যাগ করিতে পারে, এবং অযোধ্যায় এমন কোনও অবিচার হয় নাই, যাহাতে সেই রাজ্য অক্লষ্ট ও শস্যসম্পত্তিশূন্য হইতে পারে। ইষ্টইণ্ডিয়া কোম্পানির ভারত-রাজ্যশাসনের বর্ণনা-প্রসঙ্গে স্মার্ক জন্ কে উল্লেখ করিয়াছেন যে, ভারত-বর্ষীয়গণ নিত্যসঙ্কষ্ট ও সমবেদনাহীন ; এজন্য সহসা আপনাদের বাসস্থান পরিত্যাগ করিয়া স্থানান্তরে যাইতে ইচ্ছা করেন না * । কে সাহেবের এই যুক্তি অংশতঃ সমীচীন হইলেও ঘোরতর অত্যাচার বা আকস্মিক বিপ্লবের সময়ে উহার কার্যকারিতা দৃষ্ট হয় না। যেহেতু আকস্মিক বিপ্লবের সময় ভারতবর্ষীয়গণ প্রায়ই দলে দলে গৃহ পরিত্যাগ করিয়া থাকে। নিজামের রাজ্যের অধিবাসিগণ এক সময়ে এইরূপে দলবদ্ধ হইয়া ব্রিটিশ রাজ্যে প্রবেশ করিতে সক্ষম হইয়াছেন † । সুতরাং নিত্যসঙ্কষ্ট বা সমবেদনার অভাব আকস্মিক উপদ্রবের সময়ে ভারতবর্ষীয়দিগকে একস্থানে নিবদ্ধ করিয়া রাখিতে পারে না।

অযোধ্যাপ্রব্ধের বিংশতি বৎসর পূর্বে ফরক্কাবাদের জজ ফ্রেডরিক শোর লিখিয়াছিলেন, “আমি অযোধ্যায় কোন কোন স্থানে পরিভ্রমণ করিয়াছি ; আমার মতে উহা অধিবাসীস্ব সংখ্যালুসারে সম্পূর্ণরূপে কৃষিকার্য্যসম্পন্ন। * * * যে সকল কস্মচারী সীতাপুরে থাকিতেন, এবং মৃগয়াপ্রভৃতি আমোদে নিকটবর্তী জনপদে বাতায়ত করিতেন, তাঁহারা সকলেই এক-বাক্যে সমস্ত জনপদকে উদ্যানভূমি বলিয়া বর্ণনা করিয়াছেন। অধিবাসীদের গবাদি পশু, অশ্ব, অধিকৃত দ্রব্যাদি, এবং আবাসগৃহ ও পরিচ্ছদের দৃশ্যে বোধ হয় যে, তাহারা কোন অংশেই হর্দশাপন্ন নহে, বরং আমাদের প্রজাগণ অপেক্ষা অনেকাংশে সৌভাগ্যশাগী। লক্ষ্ণৌয়ের সম্পত্তি—যাহা কেবল রাজার অধিকারভুক্ত নয়, কিন্তু মহাজন ও বিপণি-স্বানীদিগের অধিকৃত--ব্রিটিশাধিকৃত রাজ্যের অনেক নগরের (বোম্ব হয়, কলিকাতা উহার অন্তর্ভুক্ত নহে) সম্বন্ধে অতিক্রম করিয়া থাকে, যদি গবর্ণমেন্ট অবিচার ও অত্যাচারে প্রসিদ্ধ হয়, তাহা হইলে প্রদেশের সাধারণ অবস্থা কি প্রকারে এমন সমৃদ্ধিপর হইতে পারে ? প্রকৃত কথা এই, লক্ষ্ণৌ গবর্ণমেন্ট আমাদেব নিজের গবর্ণমেন্ট অপেক্ষা অনেক পরিমাণে ক্ষমা প্রদর্শন করিয়া

* Kaye Administration of East India Company, p. 54-55.

† Leloy, British India, its Races and its History. Vol. I, p. 217.

থাকেন । বংশানুগত ভূমির ক্রয় ও বাজেয়াপ্ত এখানে সচরাচর সংঘটিত হয় না * ” ।

হারমান্ মারিবেল হেন্‌রি লরেন্সের জীবনবৃত্তে অযোধ্যার সম্বন্ধে লিখিয়াছেন, “১৮৫৩ অব্দের পূর্বে পররাজ্যাধিকারের পক্ষপাতী কোন ব্যক্তি অযোধ্যা-রাজ্য কণ্টক ও বংশবৃক্ষে পরিপূর্ণ বলিয়া বর্ণনা করিয়া গিয়াছেন । এক্ষণে রাজকর্মচারিগণ অযোধ্যারাজ্যের বিরূপ বিবরণ লিখিয়াছেন, তাহাই দেখা যাউক । অযোধ্যারাজ্যের বিস্তার প্রায় ২৫,০০০ ইঙ্গরেজী বর্গ মাইল । স্যার হেন্‌রি লরেন্স ঐ রাজ্যের অধিবাসীর সংখ্যা ৩,০০,০০০ বলিয়াছেন ; কিন্তু তাহা ভ্রম-পূর্ণ বোধ হয় । তিন চারি বৎসর গত হইল, অযোধ্যার জনসংখ্যা ৮,০০,০০০ নিরূপিত হইয়াছে । ১৮৬৯-৭০ অব্দে প্রকাশিত ভারতবর্ষের বার্ষিক বিজ্ঞাপনীতে অধিবাসীর সংখ্যা ১,১০,০০,০০০ দৃষ্ট হয় । অযোধ্যাধ্বংসের যে সমুদয় কারণ পূর্বে প্রদর্শিত হইয়াছে, তৎসমুদয়ের মধ্যেও সিপাহি-বিদ্রোহও একটি নিরূপিত হইয়াছিল । ইঙ্গরেজাধিকারকে আমরা যতই বাহুবিদ্যাপাবদর্শী বলি না কেন, অযোধ্যা গ্রহণের পর এত অল্প সময়ে এতদূর উন্নতি কখন সম্ভবে না ।

“স্বায়ত্তঃ বলিতে হইলে, আমাদিগকে ইহাই স্বীকার করিতে হইবে যে, আমরা যখন অযোধ্যা অধিকার করি, তখন উহা অধিবাসি-পূর্ণ ও সাতিশয় সমৃদ্ধিশালী ছিল, এবং এ বিষয়ে ইঙ্গরেজাধিকৃত অশ্রান্ত স্থানের সহিত উহার উপমা দিতে পারা বাইত । সত্য, অযোধ্যা রাজ্য উত্তমরূপে শাসন করা হয় নাই ; কিন্তু উহাতে কখন এতদূর অত্যাচার হয় নাই, যাহাতে অধিবাসীর সংখ্যা কনিয়া বাইতে পারে, এবং বাণিজ্য ও কৃষিকার্য বন্ধ হইতে পারে † ।”

অযোধ্যা ঘেরতর দৌরাশ্বা-পূর্ণ ছিল না । নবাব বিদ্বান, বুদ্ধিমান্ ও সর্কাংশে ব্রিটিশ গবর্ণমেন্টের পরামশগ্রাহী ছিলেন । মসৌউদ্দীন নামক ইতিহাসবেত্তা লিখিয়াছেন, “নবাব ওয়াজিদ আলি শাহ প্রাচ্য ভাষায় উচ্চতর শিক্ষা লাভ করিয়াছেন । প্রাচীন ও আধুনিক ইতিহাস ও সাহিত্যশাস্ত্রে তাহার বিলক্ষণ অধিকার আছে । তিনি পারস্ত ও উর্দু ভাষায় কয়েকখানি উৎকৃষ্ট কাব্য ও অশ্রান্ত গ্রন্থ রচনা করেন ।

* Notes on Indian Affairs. Vol. I., p. 152-153.

† Merivale's Life of Sir Henry Lawrence, Vol. II, p. 248.

এগুলি ইউরোপের সাধারণ পুস্তকালয়সমূহে বিশিষ্ট আদর সহকারে রক্ষিত হইয়া থাকে । মসুর পার্সিন দি ভাসীনামক ফরাসী বিদ্বৎ সমাজের জনৈক সভ্য ও হিন্দুস্থানী ভাষার অধ্যাপক স্বীয় বক্তৃতার প্রারম্ভে নবাবের লিখিত পুস্তকসমূহের বিলক্ষণ স্মৃতি করেন * ।”

জেনেরল লো লিখিয়াছেন, “অযোধ্যার পূর্বতন পাঁচ জন নবাবের সকলেই ব্রিটিশ গবর্ণমেন্টের পরম মিত্র ছিলেন, সকলেই ব্রিটিশ কাম্‌চারিগণের পরামর্শ লইয়া কার্য্য করিতেন । ইহাদের কার্য্য-পদ্ধতি সাতিশয় প্রশংসনীয় ছিল । অযোধ্যার বর্তমান নবাব ও তাঁহার কাম্‌চারিগণের নিকট হইতে আমরা সাক্ষাৎসম্বন্ধে অনেক উপকার পাইয়াছি ।

“এই নবাবগণ কেবল আমাদের সহিত মিত্রতা-স্বত্রে আবদ্ধ ছিলেন না, ইহারা অত্রান্ত মিত্ররাজ্যের নিকট যে সমস্ত পত্র লিখিতেন, তাহাও আমাদের রেসিডেন্ট দ্বারা পাঠাইয়া দিতেন । কাহারও সহিত কোন যুদ্ধ উপস্থিত হইলে, ইহারা আমাদের সহিত যথার্থ বন্ধুর গ্রাম ব্যবহার করিতেন । নেপাল ও ব্রহ্মদেশের যুদ্ধের সময়ে অর্থের বড় প্রয়োজন হইয়াছিল ; অযোধ্যার নবাব সে সময়ে আমাদের তিন কোটি টাকা ঋণ দেন । ১৮৪২ অব্দে লর্ড এলেনবরার গবর্ণমেন্ট যখন আফগানিস্তানের দুর্ঘটনার ব্যতিব্যস্ত ছিলেন, তখন বর্তমান নবাবের পিতামহ ১৪ লক্ষ ও পিতা ৩২ লক্ষ টাকা দিয়া সাহায্য করেন । নেপালের যুদ্ধের সময়েও নবাব আমাদের ৩০০ হস্তী দিয়াছিলেন । পার্শ্বত্যাগ প্রদেশে কামান ও তাম্বু প্রভৃতি লইয়া বাইবার সময়ে এগুলি হইতে আমরা বিশেষ সাহায্য পাইয়াছিলাম । এই হস্তীব সহায়তা ব্যতীত আমরা কখনই যুদ্ধের ভ্রাব্যাদি যোগ্যতলে আনিতে পারিতাম না ।”

এত দূরে লড ডালহৌসীর পর রাজ্য গ্রহণ ব্যাপারের পরিসমাপ্তি হইল । ডালহৌসীর প্রসাদে পঞ্জাব, নাগপুর, কাঁসি প্রভৃতি ব্যতীত আরও কতকগুলি রাজ্যে ব্রিটিশ পতাকা উদ্ভীন হয় । গ্রন্থপ্রতিপাদ্য ঘটনার সহিত তৎসমুদয়ের কোনও সংস্রব নাই, এজন্য এ স্থলে উহার বিবরণ লিখিত হইল না । যে সমস্ত রাজ্যের সহিত সাক্ষাৎ ও পরস্পর-সম্বন্ধে সিপাহি যুদ্ধের কারণ অনুস্থাত রহিয়াছে, বর্তমান গ্রন্থে যথাসম্ভব সংক্ষিপ্ত

* Deccotee in Exceclsis, p. 156.

+ Oude Blue-book, p. 225. Comp. Deccotee in Exceclsis, p. 151.

ভাবে তাহারই বিবরণ লিপিবদ্ধ হইল। এইরূপে ষাটবৎসর কাল ভারত-সাম্রাজ্যের শীর্ষস্থানে অধিষ্ঠিত থাকিয়া ধীরে ধীরে একে একে প্রধান প্রধান রাজ্যগুলি ব্রিটিশ কোম্পানির অধীনে আনিয়া লর্ড ডালহৌসী ১৮৫৬ অব্দের ফেব্রুয়ারি মাসে বিদায়-সূচক মিনিট লিপিবদ্ধ করেন। এই মিনিটে তিনি অনেক কথা লিখিয়াছিলেন, রাজ্যবুদ্ধি ও ধনবুদ্ধির কারণ দেখাইয়া অনেক গর্ব করিয়াছিলেন, কিন্তু তাঁহার বাগাড়ম্বর ও গর্ব সুলক্ষণশীদিগের নিকটে প্রীতিকর হয় নাই। তিনি যে রাজ্য-গ্রহণ-নীতির কুহকে মুগ্ধ হইয়াছিলেন, অবিলম্বে সেই সর্বসংহারিণী নীতি অমৃতের বিনিময়ে গরল উদ্গীরণ করিল। ডালহৌসী শাস্ত্রভাবে এই নীতিকে শাস্ত্রময়ী বলিয়া প্রতিপন্ন করিতে প্রয়াস পাইয়াছিলেন, কিন্তু তাঁহার প্রয়াস সফল হয় নাই। তিনি কেবল কতকগুলি স্মিথ ও শীতল বাক্য স্তূপাকার করিয়া স্বীয় “মিনিট” বাড়াইয়াছিলেন। এই স্মিথতা, এই শীতলতার ভারতের গাধাশালা নিবাসিত হয় নাই। বরফ-খণ্ড একত্র পুঞ্জীকৃত হইয়াছিল, দারুণ উত্তাপে উহা দ্রবীভূত হইয়া, সনত্র ভারত বিপ্লাবিত করিয়া, মহা প্রলয়-কাণ্ড উপস্থিত করিল।

দ্বিতীয় অধ্যায় ।

লর্ড ডালহৌসীর রাজ্য-শাসনের অস্থিতি—ব্রহ্মযুদ্ধ—পেশুঅধিকার—উত্তরাধিকারি-
শুল্ক আশ্রিত রাজ্যের অধিকার-বিষয়ক বিধি—সেতারা—বাঁসী নাগপুর—কেরৌলী—
হাইদরাবাদের নিজাম—কর্ণাটের নবাব—তাঞ্জোর—সম্বলপুর—পেশবা—ধনুপুত্র নানা
সাহেব ।

লর্ড ডালহৌসী ভারতে পদার্পণ পূর্বক বিজয়-লক্ষ বলিয়া দুইটি প্রধান
রাজ্য ব্রিটেনিয়ার করায়ত্ত করেন । প্রথমটি উত্তর ভারতের সিঙ্কু—বারি-
পরিষ্কালিত পঞ্জাব, দ্বিতীয়টি পূর্ব উপদ্বীপের ইরাবতীবিন্দিত পেশু ।
প্রথমটির বিষয় যথাস্থানে যথাযথ বিবৃত হইয়াছে, দ্বিতীয়টির সহিত বর্তমান
ইতিহাসের তাদৃশ সংস্রব নাই, সুতরাং উহার বিষয়সবিস্তার বলিবার কোনও
প্রয়োজন নাই । এক জন জাহাজী কাণ্ডে নবীয় মাঝির উপর অত্যাচার
করতে রেজুন গবর্ণমেণ্ট কাণ্ডেনের ১১৭ টাকা * অর্থ দণ্ড করেন । এই
বিষয় ভারতবর্ষীয় গবর্ণমেণ্টের কর্ণগোচর হইলে কয়েক খানি রণতরী
ক্রতগতি আসিয়া ইরাবতীর হৃদয়ে অধিষ্ঠিত হয়, অনিবার্য রণ-কণ্ডয়ন
বশতঃ অচিরে উভয় পক্ষে সমরান্নি প্রজ্জলিত হইয়া উঠে । ব্রহ্মদেশীয়সিংগের
শোণিত স্রোতে ঐ সমরানল নির্ক্ষিপিত ও পেশু প্রদেশ ব্রিটিশ রাজ্যের
অন্তর্ভুক্ত হয় । লর্ড ডালহৌসী ১৮৫২ অব্দের ২০ এ ডিসেম্বর ঘোষণাপত্র
প্রচার করিয়া ব্রহ্মদেশকে এইরূপ বিকলাঙ্গ করেন † । পঞ্জাব ও পেশু,
উভয়ই গবর্ণর জেনেরলের হুকুমার রণ-মাদকতার ফল, উভয়ই অন্তায় সমরের
অন্তায় প্রসাদ । ডালহৌসী যেমন এক দিকে বলপূর্বক অপরের রাজ্য
কোম্পানির অধিকারভুক্ত করেন, অপর দিকে সেইরূপ কুটিল রাজনীতি
বিস্তার করিয়া বিনা যুদ্ধে মিত্ররাজ্যসমূহও ব্রিটিশ পতাকায় পরি-
শোভিত করিতে যত্নপর হন । আশ্চর্য্য ও ক্ষোভের বিষয় এই, বিচারকের

* টরেন্স এ ছলে ১০০০ টাকা (১০০ পৌণ্ড) লিখিয়াছেন (Torrens, Empire in Asia,
p. 353.) কিন্তু এডুইন আর্নোল্ডের মতে কাণ্ডেনের ১১৭ টাকা দণ্ড হইয়াছিল । Vide
Edwin Arnold's Dalhousie's Administration of British India Vol. II.,
p. 34.

† Empire in Asia, p. 357.

পবিত্র শ্বেথনী হইতে ঈদৃশ কার্যেরও প্রশংসাবাদ বহির্গত হইয়াছে, ঈদৃশ কার্যও অপাপ-বিদ্ধ বিজয়-লক্ষ্মী ও অপাপ-বিদ্ধ রাজনীতির অর্জিত বলিয়া বর্ণিত হইয়া ইতিহাসের সম্মান বিনষ্ট করিয়াছে • ।

এক্ষণে রণস্থল-বর্ত্তিনী বিকট সংহার মূর্ত্তির দৃশ্য পরিত্যাগ করিয়া লর্ড ডালহৌসীর শেষোক্ত রাজ্য-নাশিনী নীতির বর্ণনায় প্রবৃত্ত হইতেছি । ডালহৌসী এই নীতির অনুসরণ পূর্ব্বক উত্তরাধিকারিণের অভাব দেখাইয়া কয়েকটি রাজ্য ব্রিটিশ ইণ্ডিয়ান সংযোজিত করেন ।

পুত্র হিন্দুদিগের অন্তিমে অনন্ত প্রীতি প্রাপ্তির একটি প্রধান উপায় । পুত্র বেমন ইহলোকে জনক-জননীর সৌভাগ্যের অবলম্বন হইয়া সংসার-সাগরে তাহাদের অধিতীয় সহায় হয়, সেইরূপ পরলোকেও তাহাদিগকে পুন্নাম নরকের হৃদয়-বিদারক যন্ত্রণা হইতে পরিত্রাণ করিয়া শ্রাদ্ধ-তর্পণাদি দ্বারা সম্প্রীত করে । হিন্দুগণ এজন্ত ঔরস পুত্রের অভাব হইলে যথা-বিধানে দত্তক পুত্র গ্রহণ করিয়া আপনাদিগের বংশরক্ষা ও শেষের নরক-যাতনা হইতে পরিত্রাণ পাইবার উপায় বিধান করেন । এই গৃহীত পুত্র ঔরস পুত্রের আয় শাস্ত্রানুসারে পিতার সমস্ত স্থাবর ও অস্থাবর সম্পত্তির অধিকারী হইতে পারে । কিন্তু ব্রিটিশ গবর্ণমেন্টের প্রসাদে এ সম্বন্ধে একটি অপূর্ণ বিধি প্রচারিত হইয়া সকলকে ব্যতিব্যস্ত করিয়া তুলে । যে সমস্ত রাজ্য সর্বোপরিতন প্রভু-শক্তির আশ্রিত, সেই সমস্ত রাজ্যের অধিপতিগণ ঔরস পুত্রের অভাবে যে সমস্ত দত্তক পুত্র গ্রহণ করিবেন, তৎসমুদয় প্রভু-শক্তির অনুমোদিত না হইলে তাহাদের রাজ্যসম্পত্তি উক্ত প্রভুশক্তির রাজ্যে উপগত হইবে । কিন্তু ব্যক্তিগত বিষয়াদি এই বিধির অধীন নহে, উচ্চতম প্রভুশক্তি সম্মত হউন, বা না হউন, উহা কখনও দত্তকের হস্তচ্যুত হইবে না । ভারতের এই উচ্চতম প্রভুশক্তি, ঊনবিংশ শতাব্দীর অদম্য ব্রিটিশ গবর্ণমেন্ট ; আশ্রিত রাজ্য, সেতারা ঝাঁসী প্রভৃতি । এই

* ডিউক অব্ আর্গাইল ও সার্ চার্লস জাক্সন প্রভৃতি ডালহৌসীর এই নীতি দোষ-সম্পর্ক-শূন্য বলিয়াছেন ।—The Duke of Argyll, India under Dalhousie, and Canning. Sir Charles Jackson, A Vindication of the Marquis of Dalhousie's Indian Administration.

+ A Vindication of the Marquis of Dalhousie's Indian Administration p. 5-6. Comp. Kaye's Sepoy War, Vol. I., p. 70-71.

আশ্রিত রাজ্য-সমূহের অধিপতিগণ যে সমস্ত দস্তকপত্র গ্রহণ করেন, তাহা ব্রিটিশ গবর্ণমেন্টের অমুমোদিত না হওয়াতে তাঁহাদের রাজ্য কোম্পানির রাজ্য হইয়া যায়। এই উপগমন-বিধি ভারতীয় মিত্ররাজ্যের ধুমকেতু স্বরূপ। সকলেই ইহার জ্ঞাত, সকলেই ইহার জ্ঞাত পুরুষ-পরম্পরাগত ধর্ম্মানুশাসনের বিনাশ-শঙ্কায় ব্যাকুল-চিত্ত। এই ভীতি, এই ব্যাকুলতা কেবল এক সর্বসংহারক বিধি হইতে প্রসূত হইয়া এক সময়ে সকলের হৃদয় আলোড়িত করিয়া তুলিয়াছিল। বাঙ্গালা ও বোম্বাই প্রদেশের কতিপয় সিবিল কর্মচারীর হস্ত বিচারে ঐ ভরস্কর বিধির সৃষ্টি হয়, এবং উহা প্রথমে সেতারা রাজ্যে প্রয়োজিত হইয়া সকলকে যুগপৎ বিশ্বয়, আতঙ্ক ও ভয়ে চমকিত করিয়া তুলে * ।

সেতারা অনতি উচ্চ মহাবলেস্বর পর্বতের শীতল ছায়ায় আবস্থিত। প্রসন্ন-সলিলা কৃষ্ণার পবিত্র জল-প্রপাত উহার পাদদেশে ১৮৪৮ খ্রীঃ অব্দে। বিধৌত করিতেছে। অদূরে স্নিগ্ধ-হৃদয়া ভীমা ও নীরৱর বিকশিত কুসুম-শোভিত অমুচ্চ শ্রামল তটদেশে উহার আলেখ্যবৎ রমণীয়তা পরিবর্দ্ধিত করিয়া দিতেছে। সেতারা যেরূপ প্রাকৃতিক সৌন্দর্য্যের বিলাস-ক্ষেত্র সেইরূপ ইতিহাসেরও প্রিয় নিকেতন। যে অদীন-পরাক্রম মহাপুরুষ যবনপীড়িত মাতৃভূমির উদ্ধারার্থ বিশ্বত্রাস যুদ্ধরবে সকলকে কম্পিত করিয়াছিলেন, যাহার অতুল তেজ, অতুল সাহস ও অতুল বীরত্বে ইন্দ্রকোপ নোগল সেনা বিধ্বস্ত হইয়াছিল, এবং যাহার প্রচণ্ড প্রতাপ হিমালয় হইতে সুদূর কুমারিকা পর্য্যন্ত ব্যাপিয়া পড়িয়াছিল, সেতারা সেই হিন্দুকুল-গৌরব মহাপরাক্রান্ত শিবজীর প্রিয়তম স্থান। যে সময়ে আর্য্যাস্তান-গণ যবনের পাদ-দলিত হইতেছিল, যে সময়ে চন্দ্র-সূর্য্যাবংশে কতিপয় নিশ্বেজ নক্ষত্র স্তিমিত ভাবে জলিতেছিল, এবং যে সময়ে ভারতবর্ষ পূর্ব্বতন গৌরবভঙ্গ হইয়া ধীরে ধীরে ঘোর তিমিরাবৃত কলঙ্ক-সাগরে ডুবিতেছিল, সে সময়েও শিবজীর বিজয় ভেরীর গভীর নিনাদ জলদ-গন্তীর ভাবে সেতারা হইতে উথিত হইয়াছিল এবং মহাসাগরের মহা তরঙ্গের শ্রায় আদিয়া ভারতের বিংশতি কোটি জীবের হৃদয়ে প্রতিঘাত করিয়াছিল। ব্রিটিশ গবর্ণমেন্টের সমকালে সেতারার গদিতে প্রতাপ সিংহ অধিষ্ঠিত ছিলেন। প্রতাপ সিংহ মহারাষ্ট্ররাজ্যের স্থাপয়িতা মহাপরাক্রম শিবজীব

বংশধর, স্মৃতরাং মহারাষ্ট্র-সমিতিতে তাঁহার বিশিষ্ট সম্মান ও প্রতিপত্তি ছিল। গবর্ণমেন্ট ১৮১৯ অব্দে সেতারাপতির সহিত সন্ধি স্থাপন করেন *। সেতারাপতি সন্ধিবদ্ধ হইয়া ব্রিটিশ গবর্ণমেন্টের প্রতি বিলক্ষণ সৌহার্দ দেখাইয়া আসিতেছিলেন। কিন্তু সন্ধির ২০ বৎসর পরে, (১৮৩৯ অব্দে) গোয়ার পর্তুগীজ গবর্ণমেন্টের সহিত সম্মিলিত হইয়া ব্রিটিশ গবর্ণমেন্টের বিপক্ষে ষড়যন্ত্র করিয়াছেন, সেতারারাজ প্রতাপ সিংহের বিরুদ্ধে এই অভিযোগ উপস্থিত হয়। প্রতাপ সিংহ আরোপিত দোষ-কালনার্থ যথাসাধ্য চেষ্টা পাইলেন, কিন্তু গবর্ণমেন্ট তাঁহার প্রার্থনার কর্ণপাত করিলেন না। তাঁহার অপরাধের বিচারও হইল না। বিনা আইনে, বিনা বিচারে, রাত্রিকালে প্রতাপ সিংহকে নগর হইতে কয়েক মাইল দূরবর্তী একখানি সামান্য পত্তরাধিবার কুটারে আবদ্ধ করিয়া পরে বারানসীতে নির্বাসিত এবং তাঁহার ধন-সম্পত্তি অধিকার করা হইল †। প্রতাপ সিংহের ভ্রাতা আপা সাহেব, পেশবা বাজীরগোর হস্তে বন্দীস্বরূপ ছিলেন, ব্রিটিশ গবর্ণমেন্ট তাঁহাকে বন্দি হইতে মুক্ত করিয়া সেতারার গদিতে আরোহিত করেন। ১৮৪৮ অব্দের ৫ই এপ্রেল অপুত্রকাবস্থায় তাঁহার পরলোক প্রাপ্তি হয়। মৃত্যুর পূর্বে তিনি শাস্ত্রানুসারে দত্তক পুত্র গ্রহণ করেন ‡। এ দিকে রাজ্যচ্যুত প্রতাপ সিংহও বধাবিধানে অত্র একটি দত্তকের পিতৃস্থানীয় হন §। কিন্তু লর্ড ডালহৌসী এই উভয় দত্তকই অসিদ্ধ বলিয়া উল্লেখ করেন। তাঁহার মতানুসারে সেতারারাজ যে দত্তক পুত্র গ্রহণ করেন, তাহা ব্রিটিশ গবর্ণমেন্টের অমুমোদিত হয় নাই, স্মৃতরাং নিয়ম অনুসারে ঐ দত্তক সেতারার গদির অধিকারী হইতে পারে না। সর্বোপরি তনু প্রভুশক্তির অমুমোদন ব্যতিরেকে কাহারও কোন দত্তক গ্রহণ সিদ্ধ হয় না। লর্ড ডালহৌসী এই যুক্তি দেখাইয়া ১৮৪৯ অব্দের মস্তব্যালিপিতে উল্লেখ করিয়াছেন, “সেতারারাজ কোন উত্তরাধিকারী না রাখিয়া পরলোক গমন করাতে উক্ত প্রদেশ ব্রিটিশ সাম্রাজ্যের অন্তর্ভুক্ত করা হইয়াছে ॥”

* Arnold's Dalhousie's Administration, Vol. II., p. 111.

† Dalhousie's Administration. Vol. II, p. 111-112.

‡ Empire in India. p. 162.

§ Arnold's Dalhousie's Administration, Vol. II, p. 113.

¶ Kaye's Sepoy War, Vol. I, p. 71.

বিলাতের কোর্ট অব্ ডিরেক্টর সভা ১৮৭৯ অব্দের ১লা জানুয়ারি ডালহৌসীর পক্ষ সমর্থন করিলেন। তাঁহাদের মতামত ১৮৭৯ খ্রীঃ অব্দ। সারেও ডালহৌসীর প্রদর্শিত হেতুবাদ সঙ্গত বোধ হইল। সুতরাং ডালহৌসীর লিখিত সেতারার ললাট-লিপি কোর্ট অব্ ডিরেক্টরের লেখনীর আঘাতে বিপর্যাস্ত না হইয়া আরও অটল হইয়া গেল * ।

এইরূপে ভীমা ও নীরার স্বভাব সুন্দর তট-ভূমি, নেত্র-তৃপ্তিকর মহাবলেশ্বর ভূবর-আলার নেত্র-তৃপ্তিকর প্রদেশ ব্রিটিশ ইণ্ডিয়ান অন্তর্ভুক্ত হইল। যে সেতারার পূর্বতকন্দর এক দিন আর্ধ্যকুলরবি শিবজীর তৈরব রবে প্রতিধ্বনিত হইয়াছিল, যে সেতারার প্রচণ্ড প্রতাপ এক সময়ে হিমালয় হইতে কুমারিকা পর্যাস্ত প্রসারিত হইয়া সকলের ভীতি উৎপাদন করিয়াছিল, সেই সেতারা পূর্বতন অধিকারীর হস্ত হইতে স্থলিত হইয়া ব্রিটেনিয়ার করায়ত্ত হইল। সে তেজ, সে সাহস এক্ষণে অনন্ত সময়ের নহিত বিলীন হইয়া বৈদেশিকের ভোগসুখের পথ উন্মুক্ত করিয়া দিল।

এ ডালহৌসী যে ভাবে উত্তরাধিকারীর অভাব দেখাইয়া সেতারারাজ্য কোম্পানির অধিকারভুক্ত করিয়াছেন, তাহা সন্নীতির অনুমোদিত হইয়াছে। ১৮১৯ অব্দে যে সন্ধি হয়, তাহাতে ব্রিটিশ গবর্নমেন্ট সেতারারাজ্য চিরকাল প্রতাপ সিংহের বংশধরদিগের অধীনে রাখিতে প্রতিশ্রুত হইয়াছিলেন † । কিন্তু ডালহৌসী এই সন্ধি ভঙ্গ করিয়া সেতারায় ব্রিটিশ পতাকা উড্ডীন করেন। সত্য বটে, প্রতাপ সিংহ রাজ্য-ভ্রষ্ট হইয়া দত্তক পুত্র গ্রহণ করিয়াছিলেন, সত্য বটে, রাজ্যভ্রষ্টের গৃহীত বলিয়া ব্রিটিশ গবর্নমেন্ট ঐ দত্তকের প্রতি অনাস্থা দেখাইয়াছিলেন, কিন্তু আপা সাহেবের সম্বন্ধে এরূপ কোন বিধিবিপর্যায় ঘটে নাই। আপা সাহেব সেতারার গদীর অধিকারী থাকিতেই যথানিয়মে দত্তক পুত্র গ্রহণ করিয়াছিলেন, তথাপি কোন্ বিধানে তাঁহার ঐ দত্তক অসিদ্ধ বলিয়া প্রতিপন্ন হইল? কোন্ বিধানে তাঁহার রাজ্যে অকস্মাৎ ব্রিটিশ বৈজয়ন্তী উড্ডীন হইল? ফলে, লর্ড ডালহৌসী ভারতে ব্রিটিশাধিকার প্রসারিত করিবার উদ্দেশ্যেই সেতারা

* Arnold, Dalhousie's Administration, Vol. II, p. 121. Comp. Kaye, Sepoy War, Vol. I, p. 75.

† Empire in India, p. 171. Kaye's Sepoy War, Vol. I, p. 72.

রাজ্য গ্রহণ করিয়াছিলেন, উত্তরাধিকারীর অভাব দেখান, একটি ছল ভিন্ন আর কিছুই নহে।

লর্ড ডালহৌসীর মতের পরিপোষকগণ অনেক স্থলেই অগ্রায় যুক্তি অবলম্বন করিয়া সেতারা গ্রহণের সমর্থন করিয়াছেন। ডিউক অব্ আর্গাই-ইলের মতে কোর্ট অব্ ডিরেক্টরের প্রায় সমুদয় সভাই ডালহৌসীর প্রস্তাবের পোষকতা করিয়াছিলেন *। কিন্তু স্বক্ষদর্শী মেজর ইবান্সবেল্ স্পষ্ট দেখাইয়াছেন যে, ডিরেক্টরের অনেকে ঐ মতের বিরোধী ছিলেন। টুকর সেফার্ড, মেলবিল্, অলিফার্ট, কলফিল্ড, ইহার। সকলেই ঐ প্রস্তাবের বিরুদ্ধ পক্ষ অবলম্বন করেন †। আর্গাইল, অগ্র স্থলে লিখিয়াছেন, উত্তরাধিকারীর অভাব হইলে কেবল লর্ড ডালহৌসীই যে, এই সমস্ত রাজ্য ব্রিটিশ ইণ্ডিয়ায় সংযোজিত করিতেন, এরূপ নহে, ইহার পূর্বেও অধিকার-শূন্য সমস্ত ক্ষুদ্র রাজ্যের সম্বন্ধে ঐ ব্যবস্থা বিহিত হইত ‡। ডালহৌসীর অন্ততম বন্ধু শার্ চার্লস্ জাক্সনও ঐ মতের এক জন প্রধান প্রতিপোষক। তিনি স্পষ্টাক্ষরে নির্দেশ করিয়াছেন যে, ভারতবর্ষের প্রাদেশীয় রাজাদিগের উত্তরাধিকারীর অভাব হইলে তাহাদের রাজ্য-গ্রহণ-বিষয়ক বিধি লর্ড ডালহৌসীর সৃষ্ট নহে। উহা পূর্বাধিকারী চলিয়া আসিতেছে, ডালহৌসী কেবল ঐ চির প্রচলিত আইনের অনুসারী হইয়া কার্য্য করিয়াছিলেন মাত্র §। কিন্তু তবাহুসন্ধারী ইবান্সবেলের স্বল্প অনু-সন্ধানে উহারও অসত্যতা প্রতিপন্ন হইয়াছে। বেল্ স্পষ্টাক্ষরে নির্দেশ করিয়াছেন, ১৮৪৮ অব্দে সেতারা গ্রহণের সময়েই এই আইন অনুসারে কার্য্য হইয়াছিল ¶। তিনি দৃষ্টান্তস্থলে উল্লেখ করিয়াছেন, মহারাজ সিন্ধিয়া এবং কাশ্মীর ও রীবার অধিপতি যে দত্তক গ্রহণ করেন, লর্ড কানিং তাহার অনুমোদন করিয়াছিলেন। বিখ্যাত টাইমস্ পত্রও বিশেষ

* Duke of Argyll, India under Dalhousie and Canning, p. 27.

† Empire in India, p. 163. Comp. Rebellian in India, p. 69.

‡ India under Dalhousie and Canning, p. ৩৪.

§ A Vindication of the Marquis of Dalhousie's Indian Administration, pp. 9, 16.

¶ Retrospects and Prospects &c., p. 9. Comp. Empire in India, p. 165-172.

লর্ড কানিংগের এই কার্যের সমর্থন করেন *। লর্ড কানিং ১৮৬০
অক্টোবর ২৬এ এপ্রেল ও ১০ই মে যে শাসন-সংক্রান্ত বিজ্ঞাপনী প্রেরণ
করেন, এবং শ্রী চার্লস্ উড্ (লর্ড হালিফাক্স) ২৬এ জুলাই তারিখে
যে উত্তর দেন, তাহাতে স্পষ্ট নির্দেশ আছে, “উচ্চতম প্রভু-শক্তি জাইগীর-
দার অপেক্ষা উচ্চ শ্রেণীর প্রত্যেক রাজ্যাধিকারীর রাজ্যই স্থায়ী দেখিতে
ইচ্ছা করেন। যদি ইহাদের মধ্যে কাহারও গুণস পুত্রের অভাব হয়,
তাহা হইলে হিন্দু আইন (যদি তিনি হিন্দু হন) ও জাতীয় রীতি অনুসারে
অত্র উত্তরাধিকারি-গ্রহণ বিধিসিদ্ধ বলিয়া অনুমোদিত হইবে †।

কেবল মেজর ইবান্স্বেলই যে, এইরূপ রাজ্য-কামুকতার নিন্দা
করিয়াছেন, এরূপ নহে। বেলের শ্রীম নর্টন, লাড্‌লো প্রভৃতি মনস্বী
লেখকগণ স্বীকার করিয়াছেন, যে বিধি অবলম্বন করিয়া সেতারা
গ্রহণ করা হইয়াছে, পূর্বে তাদৃশ কোন বিধি ভারতবর্ষে প্রচলিত
ছিল না। লর্ড ডালহৌসীর প্রসাদে ১৮৪৮ অব্দে সেতারা গ্রহণের
সময়েই ব্রিটিশ ইণ্ডিয়ায় ঐ অসঙ্গত ব্রিটিশ নীতির কার্য দৃষ্ট হয় ‡।
অধিক কি বোম্বাই প্রেসিডেন্সির তদানীন্তন গবর্নর শ্রী জর্জ্ ক্লার্কের
শ্রীম রাজপুরুষণ ঐ যথেষ্টাচারিতার বিরুদ্ধে দণ্ডায়মান হইতে কিছু-
মাত্র সঙ্কুচিত হন নাই। শ্রী জর্জ্ স্পষ্ট উল্লেখ করিয়াছেন, “কোন-
ব্যক্তি এবং তাঁহার দায়াদ ও উত্তরাধিকারীর সহিত সন্ধিসম্মত চিহ্নস্বর্ন
বন্ধুত্বের বিষয় বিবেচনা করিলে ইহাই প্রতীত হইবে যে, যাহাদের
সহিত সন্ধি হইয়াছে, তাঁহাদের রীতি অনুসারে যে পর্য্যন্ত উত্তরাধিকারীর
অভাব দৃষ্ট না হয়, সে পর্য্যন্ত তাঁহাদের রাজ্য অধিকার করা শ্রীমসঙ্গত
নহে। সেতারারাজ এক্ষণে যে বালককে দত্তক পুত্র স্বরূপ গ্রহণ করিয়া-
ছেন, নিয়ম অনুসারে সেই বালকই তদীয় রাজ্যের এই প্রকার উত্তরাধি-
কারী §।” এডুইন আর্নোল্ড লর্ড ডালহৌসীর ব্রিটিশ ইণ্ডিয়া-শাসনের সমা-
লোচন করিতে যাইয়া সেতারা গ্রহণের সম্বন্ধে লিখিয়াছেন, “নীরা এবং
ভীমা নদীর রমণীয় তট এবং ফল-সম্পত্তি-শোভী মহাবলেশ্বর পর্ব্বতের সহিত

* Empire in India, p. 133.

† Ibid. p. 131.

‡ J. B. Norton, Rebellion in India: How to prevent another, pp. 66,67,
72. Comp Ludlow, British India its Races and its History vol. II. p. 258-259

§ Annexation of Sattara, 1849, p. 62. Vide Empire in India, p. 164.

বহুলা কিস্তি বিধি-বহির্ভূত পুরস্কারস্বরূপ সেতারা রাজ্য ব্রিটিশ ইণ্ডিয়া-ভুক্ত হইল। প্রতাপ সিংহ স্বীয় অসহ্যবহার বশতঃ গদিচ্যুত হইয়াছিলেন বটে, কিন্তু আপা সাহেব আমাদের বিশ্বাসী বন্ধু ছিলেন। এতদ্ব্যতীত তিনি প্রশংসার্হ শাসনকর্ত্তা বলিয়াও সর্বত্র পরিচিত। সাধারণ হিতকর কার্যে তাঁহার বিশেষ আস্থা ছিল। কিন্তু ব্যক্তিগত বিষয় দূরে থাকুক, এস্থলে কেবল আইনের অধিকার লইয়া বিবেচনা করা কর্তব্য। কিন্তু ঐ অধিকারের বিষয় বিবেচনা করিলে সেতারা গ্রহণ করিতে আমাদের কি অধিকার আছে? সেতারার কোন রূপ অত্যাচার বা অরাজকতার অভিযোগ উত্থাপিত হয় নাই। এস্থলে লর্ড ডালহৌসী ও তাঁহার বিলাতী বণিক প্রভুগণ এই হেতুবাদ প্রদর্শন করিয়াছেন, “সেতারা একটি অধীন রাজ্য এবং কলিকাতা তাহার শাসন-বিধাত্রী প্রভুশক্তি”। যদি এইরূপ প্রভুশক্তি-সম্পন্ন বলিয়া কলিকাতা-প্রচারিত বিধি সেতারার স্বাধীনতা হরণ করে, যদি সেতারা সিদ্ধিয়া ও হোলকারের রাজ্য অপেক্ষা নিম্ন শ্রেণীর হয়, তাহা হইলে ব্রিটিশ কোম্পানির ১৮১৮ অব্দের ঘোষণা-পত্রের অর্থ কি?

“কোম্পানি ১৮১৮ অব্দের ঘোষণা-পত্রে স্পষ্ট স্বীকার করিয়াছেন, ‘সেতারার রাজা বাজীরাওর হস্ত হইতে মুক্তিলাভ করিয়া স্বাধীনভাবে রাজত্ব করিবেন।’ ঘোষণা-পত্রের এই স্বাধীন ভাবে রাজত্ব করার স্বরূপ ও অর্থ কি? প্রতাপ সিংহের রাজ্যচ্যুতির পর আপা সাহেবকে গদি দেওয়াতে আমরা অবশ্যই সাক্ষাৎ সম্বন্ধে সন্ধি-নির্দিষ্ট স্বাধীন রাজত্বের অর্থ হৃদয়ঙ্গম করিয়াছিলাম, মতে আপা সাহেবকে স্বাধীন রাজা বলিয়া সম্মান করিবার সার্থকতা কি? কিন্তু আপা সাহেবের মৃত্যুর পর আমরা সাক্ষাৎ সম্বন্ধে ঐ অর্থের প্রতি অবজ্ঞা প্রদর্শন করিলাম। কিরূপে ঐদৃশ ব্যবহারের সামঞ্জস্য হইল? প্রতাপ সিংহ রাজা থাকিতে দত্তক পুত্র গ্রহণ করেন নাই, এ জ্ঞাত্য আমরা সেই দত্তককে রাজা বলিয়া স্বীকার করিতে বাধ্য না হইতে পারি, কিন্তু আপা সাহেবের দত্তক পুত্রের সম্বন্ধে এরূপ আপত্তি হইতে পারে না। যদি বণিক কোম্পানির অধিকার-পত্র (charter) উপস্থিত করা যায়, তাহা হইলে আমরা ঐ দত্তক পুত্রকে বিধি-সম্মত রাজা বলিয়া স্বীকার করিতে বাধ্য, যদি আইনের বশীভূত হই, তাহা হইলেও আমরা বাধ্য, যদি মতের গুরুত্ব রক্ষিত হয়, তাহা হইলেও আমরা বাধ্য, এবং যদি নীতির অনু-

সরণ করি, তাহা হইলেও আমরা বাধ্য ; যে কার্য্য কখনও পর্য্যদন্ত হইবে না, তাহার নিমিত্ত বিশেষ লঙ্ঘিত হইয়া বলিতে হইতেছে যে, সত্যবাদী ও সাধু ব্যক্তি আমাদের জ্ঞান অবশ্যই এইরূপ সিদ্ধান্তে উপনীত হইবেন” * ।

অপরূপাত লেখকের অপরূপাত লেখনী হইতে এইরূপ সারগর্ভ বাক্য বহির্গত হইয়াছে, জ্ঞান-পরায়ণ মনস্কিগণ এইরূপ জ্ঞান-সঙ্গত যুক্তির উল্লেখ করিয়া অস্থায়ী জীবলোক সত্যের মাহাত্ম্য রক্ষা করিয়াছেন। আশ্চর্য্যের বিষয় এই, এরূপ গভীর যুক্তি, এরূপ গভীর জ্ঞান-বুদ্ধি ডিরেক্টর-সমাজের মস্তিষ্কে নীত হয় নাই, স্ততরাং কলিকাতায় লর্ড ডালহৌসীর মুখ হইতে যে স্বর সমুখিত হয়, তাহাই লিডনহল ট্রীটে প্রতিধ্বনিত হইয়া সকলকে মন্ত্রমুগ্ধ করিয়া তুলে। সেই অবধি যোগরত ভারতীয় আৰ্য্য তাপসগণের গভীর জ্ঞানের চিহ্ন স্বরূপ ভারতমাগ্ন শ্রুতি ও স্মৃতির হৃদয়ে কুঠারাঘাত আরম্ভ হয়, এবং সেই অবধিই ইঙ্গলণ্ডীয় রাজপুরুষদিগের উদ্ভাবিত দস্তক-গ্রহণের অসিদ্ধতা-সমর্থক আইনের বলে মিত্ররাজ্য সমূহ ভারত-মানচিত্রে লোহিত রেখায় অঙ্কিত হইতে থাকে ।

লর্ড ডালহৌসীর সর্ব-সংহারিণী রাজনীতির গুণে সেতারার পর আরও কয়েকটি রাজ্য ব্রিটিশ কোম্পানির হস্তগত হয়। তদ্বিবয়ের বিবরণ যথাক্রমে বর্ণিত হইতেছে ।

ভারত-মানচিত্রের কেন্দ্র স্থলে বন্দেলখণ্ডস্থ অন্নায়তন রাজ্য-সমষ্টি মধ্যে বাঁসী নামে একটি ক্ষুদ্র রাজ্য দৃষ্ট হইয়া থাকে। এই রাজ্য মহারাষ্ট্র কুল-গৌরব পেশবার আশ্রিত ও অনুগত মহারাষ্ট্রবংশীয়ের শাসিত। বন্দেলখণ্ডস্থ রাজ্য-সমষ্টি ব্রিটিশ সিংহের করায়ত্ত হইলে ১৮১৭ অব্দে তদানীন্তন বাঁসীরাজ রামচন্দ্র রাওর সহিত একটি সন্ধি হয়। সন্ধির নিয়মানুসারে রামচন্দ্র ও তাঁহার উত্তরাধিকারিগণ পুরুষানুক্রমে বাঁসীর স্বত্বাধিকারী বলিয়া স্বীকৃত হন † । এই সন্ধির পর রামচন্দ্র ব্রিটিশ গবর্ণ-মেন্টের প্রতি যাবজ্জীবন সৌজন্ত ও বন্ধুত্ব প্রদর্শন করিয়া আসিতেছিলেন। ১৮২৫ অব্দে যখন লর্ড কছরমিরর ভরতপুরের দুর্ভেদ্য দুর্গ আক্রমণ করেন, তখন নানা পণ্ডিত নামে মধ্যভারতের জনৈক সর্দার বিস্তর সৈন্ত সংগ্রহ

* Arnold, Dalhousie's Administration of British India, Vol. II., pp 121, 122, 123, 124, 125.

† Empire in India, p. 203. Comp. Kaye's Sepoy war. Vol. I., p. 89.

পূর্বক কাশ্মীর নগর অবরোধ করিতে উদ্যত হন। এই সঙ্কটাপন্ন সময়ে কাশ্মীররাজ পরম মিত্র ব্রিটিশ গবর্ণমেন্টের উপকারার্থ অবিলম্বে ৪০০ অশ্বা-
রোহী, ১,০০০ পদাতিক ও দুইটি কামান প্রেরণ করিয়া শত্রুর করাল কবল
হইতে কাশ্মীর নগর রক্ষা করেন *।

এইরূপ সৌজন্য, এইরূপ হিতৈষিতা ও এইরূপ সুহৃৎপ্রেম দর্শনে
ব্রিটিশ গবর্ণমেন্ট রামচন্দ্র রাওর প্রতি বিশিষ্ট সম্ভাষণ প্রদর্শন করেন। এই
সম্ভাষণ কেবল মুখের কথাই শেষ হয় নাই। ভারতের গবর্ণরজেনেরল
লর্ড উইলিয়ম বেণ্টিঙ্ক ১৮৩২ অব্দের ১৯ এ ডিসেম্বর কাশ্মীর সুপ্রশস্ত রাজ-
ত্ববনে অসুস্থক দরবারে রামচন্দ্র রাওকে আহ্বান পূর্বক “মহারাজ” উপাধি
এবং ছত্র, চামর প্রভৃতি রাজলক্ষণের দ্রব্যজাত প্রদান করিয়া তাঁহার গৌরব
বর্দ্ধন করেন †। এইরূপ রাজসম্মান ভোগের তিন বৎসর পরে রামচন্দ্র
রাওর পরলোক প্রাপ্তি হয়।

রামচন্দ্র নিঃসন্তান ছিলেন। তাঁহার আত্মীয় স্বজনের মধ্যে চারি
জন কাশ্মীর গদি-প্রার্থী হইয়া উপস্থিত হন। গবর্ণরজেনেরলের এজেন্ট
রামচন্দ্রের পিতৃব্য রঘুনাথ রাওকে অধিকতর শ্রায়-সম্ভত অধিকারী বিবেচনা
করিয়া কাশ্মীর গদিতে আরোহিত করেন। যদিও রঘুনাথ কুষ্ঠরোগাক্রান্ত
ও রাজ্যশাসনের অল্পপয়ুক্ত ছিলেন, তথাপি সাধারণে তাঁহাকে আদর-
সহকারে মনোনীত করাত্তে তাঁহার নামেই কাশ্মীর রাজকার্য্য নির্বাহিত
হয়। তিন বৎসর পরে রঘুনাথও অপুত্রকাবস্থায় পরলোক গমন করেন।

রঘুনাথ রাওর পরে ১৮৩৮ অব্দে পুনর্বার উত্তরাধিকারীর নির্বাচন
সম্বন্ধে গোলযোগ উপস্থিত হয়। তদানীন্তন গবর্ণরজেনেরল লর্ড অক্-
লাণ্ড এজন্স একটি অনুসন্ধানসমিতি প্রতিষ্ঠাপিত করেন। সমিতির সদস্য-
গণের অনুসন্ধানে রঘুনাথের ভ্রাতা গঙ্গাধর রাও প্রকৃত উত্তরাধিকারী বলিয়া
বিবেচিত হন, সুতরাং ব্রিটিশ গবর্ণমেন্টের প্রসাদে কাশ্মীর রাজলক্ষ্মী গঙ্গাধর
রাওর অঙ্ক-শায়িনী হয়।

কিন্তু ইহাতে কাশ্মীর-রাজের অদৃষ্ট প্রসন্ন হইল না। পুমান্ননরক পরি-
১৮৫৩ খ্রীঃ অব্দ।
ভ্রাতা একটি পুত্র-সন্তানও ভূমিষ্ঠ হইয়া তাঁহার হৃদয় আলো-
কিত করিল না। পূর্ববর্তী অধিকারিগণের শ্রায় গঙ্গাধর

* Empire in India, p. 217.

† Ibid., p. 217.

রাওও নিঃসন্তান হইলেন। অবিলম্বে নির্দারুণ ব্যাধি আসিয়া শর্তাহাকে জীর্ণ ও শীর্ণ করিয়া তুলিল। গঙ্গাধর মৃত্যু নিকটবর্তী জানিয়া ১৯এ নবেম্বর ঔরঙ্গ পুত্রের অভাবে ব্রিটিশ রেসিডেন্ট মেজর এলিস্ ও মেজর মার্টিন নামক জনৈক সৈন্তাধ্যক্ষের সমক্ষে যথাবিধানে দস্তক পুত্র গ্রহণ করিলেন *। এই দস্তকের সঘন্ধে তিনি একদা রেসিডেন্টকে লিখেন—

“আমি এক্ষণে সাতিশর অস্থস্থ হইয়া পড়িয়াছি। একটি ক্ষমতাপন্ন গবর্ণমেন্টের বিশেষ অহুগ্রহ থাকাতো এত দিনের পর আমার পূর্ব পুরুষগণের নাম বিলুপ্ত হইল ভাবিয়া, আমার বড় মনঃক্লান্ত জন্মিয়াছে। আমি এই জন্ত ব্রিটিশ গবর্ণমেন্টের সহিত আমাদের যে সন্ধি হয়, তাহার দ্বিতীয় ধারা অহুসারে আনন্দরাও (দস্তক গ্রহণ-ক্রিয়ার পর এই বালক দামোদর গঙ্গাধর রাও নামে অভিহিত হয়) নামে আমার একটি পঞ্চম বর্ষীয় ঘনিষ্ঠ আত্মীয় বালককে দস্তক পুত্র রূপে গ্রহণ করিয়াছি। যদি ঈশ্বরের অহুকম্পায় এবং আপনার গবর্ণমেন্টের অহুগ্রহে আমি রোগ হইতে মুক্ত হই, এবং আমি যেরূপ ভরুণ-বয়স্ক, তাহাতে যদি আমার কোন পুত্রসন্তান জন্মে, তাহা হইলে আমি এ বিষয়ে যথাবিহিত কার্য্যপদ্ধতির অহুসরণ করিব। আর যদি আমি জীবিত না থাকি, তাহা হইলে আমার বিশ্বস্ততার অহুরোধে যেন ব্রিটিশ গবর্ণমেন্ট এই বালকের প্রতি অহুগ্রহ দেখাইয়া বালকের মাতা ও আমার বিধবা পত্নীকে আজীবন সমস্ত বিষয়ের স্বত্বাধিকারিণী করেন; তাঁহার প্রতি যেন কখনও কোন রূপ অসদ্ব্যবহার প্রদর্শিত না হয়” †।

মুন্সুর্ গঙ্গাধর রাওর লেখনী হইতে এইরূপ বিনয়-নম্র-বাক্য বহির্গত হইয়াছিল, একরূপ সৌজন্ম তাঁহার জীবনের শেষ লিপির প্রতি অক্ষর উদ্ভাসিত করিয়াছিল। কিন্তু মুন্সুর্ এই শেষ অহুরোধ রক্ষিত হইল না। এই সময়ে লর্ড ডালহৌসী গবর্ণমেন্টের শিরঃস্থানীয় ছিলেন। যিনি প্রতিশ্রুত সন্ধি ভঙ্গ করিয়া রণজিতের রাজ্যে ব্রিটিশ পতাকা উড্ডীন করেন, বাহার হরবগাহ রাজনীতির মহিমায় সেতারা রাজ্যে ঈতিহাস-প্রসিদ্ধ মহারাষ্ট্র-বংশীয়ের আধিপত্য বিলুপ্ত হই, এক্ষণে ঝাঁগী তাঁহারই হস্তে ক্রীড়াকন্দুক হইয়া উঠিল। ডালহৌসী অবসর বুলিয়া সেতারার শ্রায় ঝাঁগী গ্রহণেও

* Empire in India. p. 202.

† Arnold, Dalhousie's Administration. Vol. II., p. 148-149.

কৃতসঙ্কল্প হইলেন, সঙ্কল্প সিদ্ধির পক্ষে বিলম্ব হইল না, অচিরেই আদেশ-লিপি প্রচারিত হইল। বাঁসী ডালহৌসীর সর্বসংহারিণী লেখনীর আশ্রমে মহারাষ্ট্র-সম্ভূত রাও বংশীয়ের হস্ত হইতে স্থলিত হইয়া পড়িল।

গঙ্গাধরের বিধবা পত্নী লক্ষ্মীবাই পুরুষোচিত অটলতা ও তেজস্বিতার আধার ছিলেন। তাঁহার হৃদয় বেরূপ কমণীয় কামিনীজনোচিত মধুরতা ও নিষ্কৃত্য আর্দ্র ছিল, সেইরূপ স্থিরতা ও দৃঢ় প্রতিজ্ঞাতেও অনমনীয় হইয়াছিল। যদি কেহ মাধুর্যময় কোমল সৌন্দর্যের সহিত ভীমশূণাঙ্কিত ভাবের একত্র সমাবেশ দেখিতে ইচ্ছা করেন, যদি কেহ প্রভাস্ত-কমলের অন্ধবিলাসের সহিত বিশাল সাগরের ভয়াবহ দৃশ্য অবলোকন করিতে চাহেন, যদি কেহ কোমল বীণাধ্বনির সহিত লোকারণ্যের পর্কত-বিদারক কলরব শুনিতে স্পৃহাবিত হন, তাহা হইলে লক্ষ্মীবাই নিঃসন্দেহ তাঁহার নিকট অমুপম স্বর্গীয় ভাবের একমাত্র আশ্রয় বলিয়া পরিগণিত হইবেন। লক্ষ্মীবাইর হৃদয় অতি উচ্চভাবে পূর্ণ ছিল। ১৮৫৭ অব্দে ব্রিটিশ এজেন্ট মেজর মাল্‌কম স্পষ্টাক্ষরে নির্দেশ করিয়াছেন, “লক্ষ্মীবাই সাতিশয় সম্মানার্থী ও রাজ-প্রতিনিধিদের সম্পূর্ণ যোগ্যপাত্রী। তাঁহার স্বভাব অতি উচ্চ ভাবের পরিচায়ক। বাঁসীর সকলেই তাঁহার প্রতি প্রগাঢ় সম্মান দেখাইয়া থাকে *।” ফলে লক্ষ্মীবাই বেরূপ উচ্চ ভাবের আদর্শ-স্থল, সেইরূপ উনবিংশ শতাব্দীর ভারতীয় বীরদ্বন্দ্বের অদ্বিতীয় দৃষ্টান্ত-ভূমি।

লক্ষ্মীবাই ব্রিটিশ গবর্ণমেন্টের করাল গ্রাস হইতে স্বামীর রাজ্য রক্ষা করিতে যথাসাধ্য প্রয়াস পাইলেন, সন্ধির নিয়ম, বন্ধুতার দৃষ্টান্ত ও দত্তক-গ্রহণের বিধি-সিদ্ধতা দেখাইয়া বাঁসীর স্বাধীনতা রক্ষা করিতে আগ্রহসহকারে ব্রিটিশ গবর্ণমেন্টের নিকট প্রার্থনা করিলেন। কিন্তু তাঁহার সেই প্রার্থনা ও সেই চেষ্টা কলবতী হইল না। লর্ড ডালহৌসী যে বজ্রদণ্ড উত্তোলন করিয়াছিলেন, অবিলম্বে তাহা বাঁসীর মস্তকে নিপতিত হইল। এই অবিচার ও অবমাননায় লক্ষ্মীবাই সাতিশয় ব্যথিত হইলেন। তাঁহার হৃদয়গত ব্যথা কেবল নয়ন-জলের সহিত বিলীন হইল না। অবিলম্বে উহা উদ্দীপ্ত হইয়া প্রচণ্ড হতাশনে পরিণত হইল। দৃঢ়প্রতিজ্ঞা বাঁহার প্রকৃতি উন্নত করিয়াছে, অটলতা বাঁহার হৃদয় অবিচলিত ও অনমনীয় করিয়া রাখিয়াছে, এবং অধ্যবসায় বাঁহার চিন্তাবৃত্তি সমস্ত বিষয়বস্তুর

আক্রমণ সহ্য করিবার উপযোগী করিয়া তুলিয়াছে, তিনি কখনও কোন প্রকার বিপৎপাতে ভীত বা কর্তব্যবিমূখ হইয়া ভবিষ্যৎ মঙ্গলের আশায় জলাঞ্জলি দেন না। লক্ষ্মীবাই এইরূপ প্রকৃতির ছিলেন, ক্ষুত্রস্রাং এই বিপদে কিছুমাত্র ভীত বা আশাশূন্য হইলেন না এবং আপনার দশা-বিপর্য্যয়েও দৃঢ়-তর অধ্যবসায় হইতে স্থলিত হইয়া পড়িলেন না। ব্রিটিশ এজেন্টের সহিত সাক্ষাৎকালে তিনি আন্তরগণপটের অন্তরাল হইতে সক্রোধে বজ্রগস্তীর স্বরে কহিলেন, “মেরি বাঁসী দেছে নেহি।” লক্ষ্মীবাইর এই ধ্বনিতে রাজপ্রতিনিধির হৃদয় কম্পিত হইয়া উঠিল। বাঁসী ব্রিটিশ গবর্নমেন্টের হস্তগত হইল বটে, কিন্তু এই অবমাননারেখা বীরজায়া বীরঙ্গনার হৃদয়ে গাঢ়রূপে অঙ্কিত রহিল।

লর্ড ডালহৌসী সেতারার স্তার বাঁসীর গ্রহণ-সম্বন্ধে নিতান্ত অহুদারতা প্রদর্শন করিয়াছেন। লর্ড মেট্‌কাফ্ বন্দেলখণ্ডস্থ ক্ষুত্র রাজ্যাধিকারিগণের সম্বন্ধে যে মন্তব্য প্রকাশ করেন, তাহারই একটি বাক্য ডালহৌসীর বাঁসী গ্রহণের প্রধান অবলম্ব হইয়াছিল। মেট্‌কাফ্ স্বীয় মন্তব্যে প্রকাশ করিয়াছেন :—

“হিন্দু রাজ্যাধিকারিগণের সম্বন্ধে আমি এই মত প্রকাশ করিতেছি যে, যদি তাঁহাদিগের ঔরস পুত্রের অভাব হয়, তাহা হইলে তাঁহাদের যথাবিধানে দত্তক গ্রহণের অধিকার আছে। ব্রিটিশ গবর্নমেন্ট এইরূপ রীতিষিগ্ধ হু হিন্দু আইনসম্মত দত্তকগ্রহণের বৈধতা স্বীকারে বাধ্য।

“কিন্তু যাহারা রাজার নিকট হইতে কেবল ভূ-সম্পত্তি প্রাপ্ত হন, অথবা রাজ-প্রদত্ত কোন উপস্বত্ব ভোগ করেন, তাঁহারা এইরূপ নিয়মেই সম্পত্তির অধিকারী হইবেন যে, তাঁহাদিগের ঔরস পুত্র হইলে সেই পুত্রই উক্ত সম্পত্তি অধিকার করিতে পারিবে। ঔরস পুত্রের অভাবে ঈদৃশ স্থলে গবর্নমেন্ট ঐ সমস্ত সম্পত্তি অধিকার করিতে সমর্থ *।”

লর্ড ডালহৌসী মেট্‌কাফের শেষোক্ত বাক্য উদ্ধৃত করিয়া বাঁসী গ্রহণের সমর্থন করিয়াছেন †। কিন্তু তাঁহার এই সমর্থন ফলোপধায়ি হয় নাই। লর্ড মেট্‌কাফ্ কেবল জাইগীরদারদিগের সম্বন্ধে পূর্বোক্ত বিধির উল্লেখ

* Empire in India, p. 204-205.

† Ibid p. 205. কে সাহেবও স্বপ্রণীত ইতিহাসে এ বিষয়ে ডালহৌসীর মতামুবর্তী হইয়াছেন। Kay's Sepoy War. Vol. I., p. 91, note.

করিয়াছেন, পুরুষাভূক্তমিক রাজ্যাধিপতিগণ ঐ বিধির বিষয়াক্রান্ত নহেন । সুতরাং যে বিধি জাইগীর-শ্রেণীতে উপগত হইয়াছে, তাহা রাজ্যাধিকারীর পর্যায়ে প্রয়োজিত করা, নিতান্ত অপসিদ্ধান্তের পরিচায়ক, সন্দেহ নাই ।

ঝাঁসীরাজ জাইগীরদার শ্রেণীতে নিবিষ্ট নহেন, ব্রিটিশ গবর্ণমেন্টও ঔরঙ্গ পুত্রের অধিকার-বিষয়ক নিয়মে আবদ্ধ করিয়া তাঁহাকে ঝাঁসী অর্পণ করেন নাই । ঝাঁসীর রাজবংশীয়গণ পুরুষাভূক্তমে ঝাঁসীতে আধিপত্য করিয়া আসিয়াছেন । ১৮০২ অব্দে যখন লর্ড উইলিয়ম বেণ্টিন্ক ঝাঁসীর দরবারে রামচন্দ্র রাওকে “মহারাজাধিরাজ” উপাধি, ও ছত্র, দণ্ড প্রভৃতি রাজ্যচিহ্ন অর্পণ করেন, তখন ঝাঁসীর অধিপতি জাইগীরদার বলিয়া স্বীকৃত হন নাই । ১৮১৭ অব্দে যখন ব্রিটিশ গবর্ণমেন্টের সন্ধিত সন্ধি হয়, তখনও ঝাঁসীর অধিপতি জাইগীরদার বলিয়া অভিহিত অথবা গবর্ণমেন্ট-প্রদত্ত ভূ-সম্পত্তি-ভোগী বলিয়া স্বীকৃত হন নাই । রামচন্দ্র রাওকে কোন সম্পত্তি দান করা হয় নাই, কারণ তিনি পূর্বাধিই স্বীয় সম্পত্তি অধিকার করিয়া আসিতেছিলেন, রাজ্যপ্রজা-ঘটিত কোন সম্বন্ধ স্থাপিত হয় নাই, কারণ উভয় পক্ষ মিত্রতাসূত্রে দৃঢ়বদ্ধ ছিলেন । কোনরূপ বিষয়ক ব্রিটিশ গবর্ণমেন্ট কর্তৃক প্রদত্ত হয় নাই, কোন রূপ সনাক্ত ব্রিটিশ গবর্ণমেন্ট হইতে অর্পিত হয় নাই । ঝাঁসীরাজ জাইগীরদার নহেন, তিনি পুরুষাভূক্তমিক হিহ্ম দ্বিতীয় নরপতি । ১৮১৭ অব্দের সন্ধি তাঁহাকে পুরুষ-পরম্পরায় রাজ্যাধিকারের ক্ষমতা অর্পণ করিয়াছিল * ।

ডালহৌসী অস্ত্র স্থলে একটি গুরুতর ভ্রমে পতিত হইয়া লিখিয়াছেন, “১৮০৫ অব্দে রামচন্দ্র রাওর মৃত্যু হয় । যদিও তিনি মৃত্যুর এক দিবস পূর্বে একটি বালককে দত্তক পুত্র করিয়াছিলেন, তথাপি ব্রিটিশ গবর্ণমেন্ট ঐ বালককে প্রকৃত উত্তরাধিকারী বলিয়া স্বীকার করেন নাই । এজন্য রামচন্দ্রের মৃত্যুর পর তদীয় পিতৃব্য ঝাঁসীর রাজা হন †” । ডিউক অব্ আর্পাইল ও স্যার চার্লস্ জাঙ্কন ও ডালহৌসীর এই যুক্তি অবলম্বন পূর্বেক ১৮৫০ অব্দে যে দত্তক পুত্র গৃহীত হয়, তাহার অসিদ্ধতা প্রতিপন্ন করিতে চেষ্টা পাইয়াছেন ‡ । কিন্তু ইবান্সবেলের স্মরণ বিচারে লর্ড ডালহৌসীর

* Empire in India, pp. 209, 210.

† Jhansi Blue-book, pp. 21, 22. Comp. Empire in India, p. 211.

‡ Duke of Argyll, India under Dalhousie and Canning, p. 31-32.

Sir Charles Jackson, A Vindication, p. 11.

ঐ উক্তির যার্থার্থ্য প্রতিপন্ন হয় নাই। ১৮০৫ অব্দে ঝাঁসীর উত্তরাধিকারী লইয়া অনেক গোলযোগ উপস্থিত হয়। সে সময়ে চারি জন গদি-প্রার্থী হইয়াছিলেন। রামচন্দ্র রাওর দত্তক পুত্রগ্রহণ সম্বন্ধে অনেক সন্দেহ থাকাতে সে সময়ে তাঁহার পিতৃব্য আনন্দ রাও গদিতে আরোহণ করেন। ভারতবর্ষীয় গবর্ণমেন্টের সেক্রেটারি এবিষয়ে স্পষ্টাক্ষরে উল্লেখ করিয়াছেন, “যদি এই দত্তক-গ্রহণ রীতি-বিশুদ্ধ হইত, তাহা হইলে উক্ত বালক নিঃসন্দেহ রামচন্দ্র রাওর পিতৃব্যের পরিবর্তে তাঁহার পিতার সমুদয় সম্পত্তির উত্তরাধিকারী হইতে পারিত, কিন্তু এই দত্তকের (এই দত্তক যথাবিধি গৃহীত হইয়াছে কি না, তদ্বিষয় সন্দেহযুক্ত) বিষয় অনুসন্ধান না করিয়া গবর্ণমেন্ট রামচন্দ্রের পিতৃব্য আনন্দ রাওকে গদিতে আরোহিত করিয়াছেন *।” এতদ্বারা প্রতিপন্ন হইতেছে, ১৮০৫ অব্দে যে দত্তকপুত্র গৃহীত হয়, তদ্বিষয় সন্দেহ-যুক্ত ছিল। কিন্তু ১৮৫৩ অব্দের দত্তকপুত্রের সম্বন্ধে এরূপ কোন সন্দেহ হয় নাই। গঙ্গাধর রাও পবিত্র হিন্দুধর্মের অনু-বর্তী হইয়া যথানিয়মে দত্তক গ্রহণ পূর্বক ব্রিটিশ গবর্ণমেন্টকে ঐ বিষয় যথারিতি বিজ্ঞাপিত করিয়াছিলেন। ১৮৩৫ অব্দের দত্তকগ্রহণ ১৮৫৩ অব্দের দত্তকগ্রহণের সমান্তরাল ঘটনা নহে †। তথাপি কি জন্ত এই শেষোক্ত দত্তকপুত্র ঝাঁসীর গদিতে আরোহিত হইল না? কোন্ নিয়মে কোন্ যুক্তিতে অকস্মাৎ গঙ্গাধর রাওর সিংহাসন ব্রিটিশ সিংহের হস্তগত হইল? কোন্ অপরাধে গঙ্গাধর-পত্নীর প্রার্থনা অবজ্ঞাকূপে নিক্ষেপ হইল? পবিত্র স্মৃতি প্রেমের কি এই বিষময় ফল? পবিত্র মন্দির কি এই শোচনীয় পরিণাম?

লর্ড ডালহৌসী স্থানান্তরে উল্লেখ করিয়াছেন, “ঝাঁসী ব্রিটিশ অধিকারের মধ্যস্থলে অবস্থিত। স্মরণ্য উহা আমাদের অধিকারে আসিলে সমুদয় বন্দেলখণ্ডের অনেক অভ্যন্তরীণ উৎকর্ষ সাধিত হইবে। ব্রিটিশ রাজ্যের সহিত এই সন্মিলনে ঝাঁসীর অধিবাসিদিগেরও অনেক উপকার হইবে ‡।” লর্ড ডালহৌসীর এই বাক্য প্রকৃত সম্ভবতা ও উদারতার সীমা অতিক্রম করিতেছে। ঝাঁসী রাজ্যের সম্বন্ধে কোন রূপ বিশৃঙ্খলা উপস্থিত হয় নাই,

* Jhansi Blue-book, p. 18. Comp. Empire in India, p. 212.

† Empire in India. p. 212.

‡ Kaye's Sepoy War Vol. I., p. 92.

এবং উহার অধিবাসীগণও অত্যাচারিত বা নিপীড়িত হয় নাই। প্রত্যুত ঝাঁসীর রাওবংশীয়গণ শাসন-কর্ম বলিয়া বিখ্যাত ছিলেন *। ঝাঁসীর অধিপতিগণের এরূপ সদাশয়তা থাকাকেও লর্ড ডালহৌসী উপকারের ভাণ করিয়া উক্ত রাজ্য ব্রিটিশ কোম্পানির অধিকারভুক্ত করিয়াছেন। যাঁহার চিরকাল ব্রিটিশ গবর্নমেন্টের সহিত দৃঢ়তর মিত্রতা-পাশে আবদ্ধ ছিলেন, স্নসময়ে দুঃসময়ে চিরকাল যাঁহার ব্রিটিশ গবর্নমেন্টের উপকারার্থ প্রস্তুত থাকিতেন, অদ্য ব্রিটিশ গবর্নমেন্ট একটি অসহায় বিধবাকে কারা-গৃহে আবদ্ধ † ও একটি স্নুকুমার-বতি বালককে তাড়িত করিয়া অবলীলাক্রমে অসঙ্কচিত-হৃদয়ে তাঁহাদিগের রাজ্যের অধিপতি হইলেন। সভ্যতার কি উৎকর্ষ! উদারতার কি অপূর্ব দৃষ্টান্ত!

ব্রিটিশসিংহ জ্বায়ের মস্তকে পদাঘাত করিয়া বিনা গোলযোগে ঝাঁসী অধিকার করিলেন বটে, কিন্তু তেজস্বিনী লক্ষ্মীবাইর হৃদয়ে শান্তি স্থাপন করিতে পারিলেন না। যে ক্ষোভে, রোষে ও অপমানে লক্ষ্মীবাই জর্জরিত হইতেছিলেন, শীঘ্রই তাহা উদ্দীপ্ত হইয়া প্রতিহিংসা বৃত্তি চরিতার্থ করিল। যথাসময়ে যথাস্থলে এই বিষম অগ্নিকাণ্ডের চিত্র প্রদর্শিত হইবে।

লর্ড ডালহৌসীর হ্রবগাহ রাজনীতি যেক্রমে সেতারা ও ঝাঁসীর সর্বনাশ করে, সেইরূপেই উহা আবার নাগপুরের স্বাধীনতা হরণে প্রবৃত্ত হয়। সেতারা ও ঝাঁসীর জ্বায় এ রাজ্যও অমিত-পরাক্রম মহারাষ্ট্রকুলের শাসিত, সেতারা ও ঝাঁসীর জ্বায় এ রাজ্যের অধিপতিরও ঔরস পুত্রের অভাবে দত্তক পুত্র গৃহীত হয়, এবং সেতারা ও ঝাঁসীর জ্বায় এ রাজ্যেও লর্ড ডালহৌসীর রাজনীতির প্রভাবে ব্রিটিশ কোম্পানির মল্লুক হইয়া যায়।

নাগপুর রাজ্য সূপ্রসিদ্ধ ভৌঁসলা বংশীয়ের অধিকারে স্থাপিত। ১৮১৮ অব্দে মহারাজ আপা সাহেব তদানীন্তন গবর্নরজেনেরল লর্ড হেষ্টিংস কর্তৃক গদি-চ্যুত হইলে নাগপুরের সিংহাসন শূন্য হইয়া উঠে। রাজবংশীয়গণ ও রাজ্যের প্রধান প্রধান লোক একত্র হইয়া এ বিষয়ে পরামর্শ করেন। এই পরামর্শের শেষ ফল—ভৌঁসলা বংশীয় একটা ঘনিষ্ঠ আত্মীয় বালকের নাগপুরের গদিতে আরোহণ। ১৮২৬ অব্দে এই বালক বয়ঃপ্রাপ্ত হইলে

* Arnold, Dalhousie's Administration. Vol. II, p. 147.

† Ibid, p. 151.

ব্রিটিশ গবর্নমেন্টে তাঁহার সহিত সন্ধিস্থলে আবদ্ধ হইয়া নাগপুর রাজ্য পুরুষানুক্রমে ভৌঁসলাবংশীয়ের অধীনে রাখিতে প্রতিশ্রুত হন * ।

এই বয়ঃপ্রাপ্ত রাজার নাম তৃতীয় রঘুজী ভৌঁসলা । ১৮৫৩ অব্দের ১১ই ডিসেম্বর ইহার আয়ুষ্কাল পূর্ণ হয় । মৃত্যুর সময়ে ইহার বয়স ৪৭ বৎসর মাত্র হইয়াছিল । এই রাজা যখন অপ্রাপ্তবয়স্ক ছিলেন, তখন দ্বিতীয় রঘুজীর পত্নী বহুবাই রাজ-কার্য্য করিতেন । বহুবাই উন্নতচরিত্রা ও রাজ্য-শাসনোপযোগী ক্ষমতার অধিকারিণী ছিলেন । পঞ্চাশ বৎসর কাল সর্ব্বপ্রকার পারিবারিক ও রাজনৈতিক কার্য্যে তাঁহার আধিপত্য ছিল । তৃতীয় রঘুজী অপুত্রকাবস্থায় পরলোক-গত হওয়াতে বহুবাই যশোবন্ত অহর রাও (সাধারণতঃ ইহার নাম আপাসাহেব) নামক তৃতীয় রঘুজীর এক জন ঘনিষ্ঠ আত্মীয় বালককে দত্তক পুত্র করিবার প্রস্তাব করেন † । রাণীর এই প্রস্তাব ব্রিটিশ রেসিডেন্ট মানসেল্ সাহেবকে জানান হয় । মানসেল্ উহা কার্য্যে পরিণত করিতে কোন প্রকার উৎসাহ বা বাধা দেন না ‡ । তিনি এসম্বন্ধে কেবল এই মাত্র উত্তর দেন যে, প্রধান-তম গবর্নমেন্টের সম্মতি ব্যতীত তিনি কোন প্রকার দত্তকগ্রহণ বিধি-সিদ্ধ বলিয়া স্বীকার করিতে পারেন না § । যাহাহউক, দত্তক-গ্রহণক্রিয়া নাগপুর-প্রাসাদে যথাবিধি সমাহিত হয়, যথাবিধি আপাসাহেব তৃতীয় রঘুজীর প্রেতকৃত্য—শ্রাদ্ধ তর্পণাদি নির্ব্বাহ করেন । ইহার পর আপাসাহেবের জনোজী ভৌঁসলা নামকরণ হয় ¶ ।

মানসেল সাহেব প্রধানতম গবর্নমেন্টের নিকট নাগপুররাজ্যের অবস্থার সম্বন্ধে রিপোর্ট করেন । লর্ড ডালহৌসী নববিজিত পেশ্ব প্রদেশ পরিদর্শন করিতে গমন করিয়াছিলেন, সুতরাং তখন এবিষয়ের কোন চূড়ান্ত নিষ্পত্তি হয় না । ডালহৌসী রাজধানীতে প্রত্যাগত হইয়া নাগপুরের বিষয় বিচার করিতে প্রবৃত্ত হইলেন, প্রধানতম শাসন-সমিতিতে^১ এবিষয়ে তর্কবিতর্ক হইতে লাগিল । অন্ততম সভ্য সেনাপতি লো, স্যার জন্

* Arnold's Dalhousie's Administration, Vol. II., p. 156.

† Empire in India, p. 174.

‡ First Nagpore Blue-book, 1854, p. 56.

§ Empire in India, p. 175.

¶ Ibid, p. 175.

মাল্ কন্ঠের শ্রায় প্রগাঢ় রাজনীতিজ্ঞ ব্যক্তির মস্ত্রে দীক্ষিত হইয়া দীর্ঘ-কাল ভারতবর্ষের অবস্থা দেখিয়াছিলেন, দীর্ঘকাল ভারতবর্ষীয় রাজাদিগের রাজধানীতে থাকিয়া তাঁহাদের মনোগত ভাব হৃদয়ঙ্গম করিয়াছিলেন। তিনি দৃঢ়তাসহকারে নাগপুররাজ্যের স্বাধীনতা রক্ষা করিতে উদ্যত হইলেন। কিন্তু তাঁহার স্বল্প বুদ্ধি, প্রগাঢ় কর্তব্যজ্ঞান, সেতারী ও ঝাঁসীর স্বাধীনতা-হারীর অল্পমোদিত হইল না। তৃতীয় রঘুজীর মৃত্যুর এক মাসেরও অধিক কাল পরে ১৮৫৪ অব্দের ২৮এ জানুয়ারি পুনর্কার সংহারিণী আদেশ-লিপি প্রচারিত হইল। ডালহৌসী সেতারী ও ঝাঁসীর শ্রায় নাগপুররাজ্যও প্রকৃত উত্তরাধিকারীর অভাব দেখাইয়া ব্রিটিশ কোম্পানির অধিকারভুক্ত করিলেন *।

যশোবন্ত অহর রাও তৃতীয় রঘুজীর অতি ঘনিষ্ঠ আত্মীয়। তাঁহার মাতা ময়না বাই নাগপুরের রাজ-প্রাসাদেই অবস্থান করিতেন। এই প্রাসাদে অবস্থিতি সময়েই ১৮৩৪ অব্দের ১৪ই আগষ্ট তাহার একটি পুত্রসন্তান ভূমিষ্ঠ হয়। সন্তানের জন্মগ্রহণের পর আনন্দপ্রকাশার্থ প্রাসাদ হইতে ২১টি তোপধ্বনি করা হয় †। ঐমাসের ২৫এ তারিখ রাজ্যের প্রধান প্রধান সর্দার ও অমাত্যগণ নাগপুররাজ্যের প্রতিনিধিস্বরূপ হইয়া মিষ্টান্ন বিতরণ উপলক্ষে ব্রিটিশ রেসিডেন্টের সহিত সাক্ষাৎ করেন। নাগপুরে অশ্রু কাহারও জন্মের পর এরূপ উৎসব হয় নাই। বাহাইউক, ময়না বাইর পুত্র নাগপুরের রাজ-প্রাসাদে রাজ-কুমারের শ্রায় পরিবর্ধিত হইতে লাগিলেন। তাঁহার পরিচর্য্যার নিমিত্ত অনেক দাস দাসী নিয়োজিত হইল, তিনি যেখানে গমন করিতেন, দশ অথবা বার জন মাহুরী (রাজকর্মচারী বিশেষ), বস্ত্রম-ধারী অলুচর এবং হস্তী ও অশ্বারোহিণী তাঁহার অঙ্গুগমন করিত। এদিকে মহারাজ স্বয়ং তাঁহার শিক্ষার বন্দোবস্ত করেন। বয়ঃ-প্রাপ্ত হইলে কুমার দরবার-স্থলে অথবা ব্রিটিশ রেসিডেন্টের সহিত সাক্ষাৎ-সময়ে মহারাজের সহিত এক গদিতে উপবেশন করিতেন। মহারাষ্ট্রদিগের মধ্যে বাল্যবিবাহের নিয়ম প্রচলিত, কিন্তু ময়না বাইর পুত্রের সখকে নাগপুর-রাজ ঐ নিয়ম লঙ্ঘন করেন। সংক্ষেপে তৃতীয় রঘুজীর সন্তান-সন্তাবনা যতই অল্পত্তর হইতে লাগিল, ততই সাধারণে ময়না বাইর

* Empire in India, p. 125. Comp. Kaye's Sepoy War. Vol. I., p. 77-83.

† Ibid, p. 176.

পুত্রকেই ভাবী নাগপুররাজ বলিয়া মনে করিতে লাগিল ; সকলেরই বিশ্বাস জন্মিল, তৃতীয় রঘুজী শীঘ্রই ময়নাবাহীর পুত্রকে দত্তকপুত্র স্বরূপ গ্রহণ করিবেন। অহর রাওর বিবাহে নাগপুর-রাজের আপাততঃ অসম্মতি দেখিয়া ঐ বিশ্বাস ক্রমে বন্ধমূল হইয়া উঠিল। যশোবন্ত অহর রাও নাগপুররাজের সহিত এইরূপ ঘনিষ্ঠ সন্ধন্ধে আবদ্ধ। লর্ড ডালহৌসী ১৮৫৪ অব্দের ২৮এ জানুয়ারির মস্তব্যালিপিতে এইরূপ আত্মীয় বালককে একজন “সাধারণ মহারাজীয়,” স্থানান্তরে একজন “ঐবেদেশিক” বলিয়া উল্লেখ করিয়াছেন *।

দত্তকগ্রহণসন্ধন্ধে অহর রাওর মাতা ময়না বাইর সহিত বন্ধবাই অথবা তৃতীয় রঘুজীর প্রধানা মহিষী অন্নপূর্ণা বাইর কোনও প্রকার বিরোধ ঘটে নাই। অনুমতি পাওয়া মাত্র সমবেত বন্ধুজনের সমক্ষে নানা অহর রাও (আপাসাহেবের পিতা) ও ময়না বাই স্বীয় সন্তানকে অন্নপূর্ণা বাইর হস্তে সমর্পণ করেন। রাণী ও তাঁহাদের মন্ত্রিগণ ধীরভাবে এবিষয় ব্রিটিশ রেসিডেন্টকে জানান, ধীরভাবে এবিষয়ে ব্রিটিশ গবর্নমেন্টর সম্মতির প্রতীক্ষা করেন। যখন নাগপুর অধিকারের আদেশ রাণীদিগকে জানান হয়, তখন তাঁহারা যথাসাধ্য ঐ অন্তায় বিচারের বিরুদ্ধে আপত্তি উপস্থিত করেন, যথাসাধ্য দত্তক-গ্রহণ বিধিসিদ্ধ বলিয়া আপনাদিগের রাজ্য রক্ষা করিতে চেষ্টা পান। কিন্তু তাঁহাদের এই যত্নে, এই আগ্রহে কোনও ফল দর্শে নাই। অধিক কি, একরূপ বিধিসিদ্ধ দত্তকপুত্র বর্তমান থাকাতেও লর্ড ডালহৌসী ভারতবর্ষ পরিত্যাগসময়ে ১৮৫৬ অব্দের ২৮এ ফ্রেব্রুয়ারির মস্তব্যালিপিতে অসঙ্কুচিতহৃদয়ে স্পষ্টাক্ষরে লিখিয়াছিলেন, “নাগপুররাজের কোনও পুত্রসন্তান জন্মগ্রহণ করে নাই, রাজার বিধবা পত্নীগণও স্বীকার করিয়াছেন, তাঁহারা রাজার মৃত্যুর পর কোনও বালককে দত্তকপুত্র করেন নাই।”

লর্ড হেলিংস ১৮১৮ অব্দের নাগপুররাজ্যের সন্ধন্ধে যে নীতি অবলম্বন করেন, তৎবিষয়ে লর্ড ডালহৌসী লিখিয়াছেন, “আপাসাহেব যে, নিজের কার্য্যদোষে নাগপুর রাজ্য হারাইয়াছেন, এবং তজ্জন্য যে, বন্ধুত্ব-সূচক সন্ধি নিঃশেষে ভঙ্গ হইয়াছে, ইহা গবর্নরজেনেরলের মনে দৃঢ়রূপে অঙ্কিত ছিল। এই জন্ত তিনি নিজের ইচ্ছানুসারে একটি বালককে

* Empire in India, p. 177.

+ Papers, Minute by the Marquis of Dalhousie, dated February 28th, 1856. No 245 of 1856. Comp. Retrospects and Prospects &c, p. 29.

রাজা বলিয়া স্বীকার করেন, নিজের ইচ্ছানুসারে তাঁহার একজন প্রতিনিধিও নির্বাচন করেন। দত্তকগ্রহণ সম্বন্ধে কোন বিষয়ই সে সময়ে অঙ্গীকৃত হয় নাই। দত্তকপুত্র রূপে গৃহীত হইয়াছে বলিয়াই যে, লর্ড হেষ্টিংস ঐ বালককে রাজা বলিয়া স্বীকার করিয়াছেন, তাহা নয়। কারণ, নির্বাচিত হইবার বহু পরে ঐ বালককে দত্তকপুত্র করা হয়। রাজ্য ও রাজবংশের মধ্যে ঐ বালকের অহুকূলে একটি বিশেষ দাগ ছিল বলিয়া কেবল একমাত্র রাজনীতিই সে সময়ে লর্ড হেষ্টিংসকে এই কার্যে প্রবর্তিত করিয়াছিল। এক কথায় বলিতে গেলে ইহাই বলিতে হইবে যে, ব্রিটিশ গবর্ণমেন্ট সে সময়ে নাগপুররাজ্য আপনাদের হস্তগত মনে করিয়াছিলেন। গবর্ণমেন্ট ঐহাকে উপযুক্ত বলিয়া মনে করিতেন, তাঁহাকেই নাগপুরের গদি দিতেন। ঐরূপ দান-কার্যে কোন প্রকার বিবেচনা অথবা বিচারের আধিপত্য লক্ষিত হইত না। উহা কেবল গবর্ণমেন্টের স্বাধীন ইচ্ছা ও অভিরুচির উপর নির্ভর করিত *”।

লর্ড ডালহৌসীর এই মন্তব্য সরল ও অল্প কথায় বলিতে গেলে ইহাই বলিতে হইবে যে, নাগপুররাজ্য নিঃসন্দেহ ব্রিটিশ গবর্ণমেন্টের পদানত হইয়াছিল। কোন একটি রাজ্য জয় করিলে সেই রাজ্যের উপর যে যে ক্ষমতা জন্মিয়া থাকে, আপাসাহেবের বিশ্বাসঘাতকতার পর নাগপুররাজ্যের উপরেও ব্রিটিশ গবর্ণমেন্টের ঠিক সেই সেই ক্ষমতা জন্মিয়াছিল। তবে গবর্ণমেন্ট কেবল সৌজন্য ও উদার রাজনীতির অনুরোধে পূর্ববর্তী অধিপতির একজন ঘনিষ্ঠ আত্মীয় ব্যক্তিকে নাগপুরের গদিতে আরোহণ করিতে অনুমতি দিয়াছিলেন †।

কিন্তু লর্ড হেষ্টিংসের নিজের কথার সহিত ডালহৌসীর ঐ মন্তব্যের তার-তম্য করিলে পরস্পরের মধ্যে সম্পূর্ণ অনৈক্য দৃষ্ট হইবে। লর্ড হেষ্টিংস ১৮২৩ অব্দের ৬ই মে জিভ্রণ্টের হইতে নিজের পত্রসহ ইঙ্গলণ্ডের ডিরেক্টর-সভায় রাজ্যশাসন-সংক্রান্ত যে বিবরণ প্রেরণ করেন, তাহাতে নাগপুর রাজ্যের সম্বন্ধে উল্লেখ ছিল:—

“নাগপুরের একজন রাজ্য-লিপ্সু ব্যক্তি আপাসাহেবকে রাজ্য হইতে তাড়িত করিয়া নাগপুরের সিংহাসন অধিকার করেন। আপাসাহেব এই

* First Nagpore Blue-book, p. 27. Comp. Empire in India, p. 185-186.

† Empire in India, p. 186.

রূপে রাজ্যচ্যুত হইয়া সৰ্ব্বটাপন্ন অবস্থায় পতিত হইলে আমরা আশ্রয় দিয়া তাঁহার প্রাণ রক্ষা করি। ইহার পর সেই সিংহাসনহারীর মতিভ্রংশ ও সম্পূর্ণ বাতুলতা উপস্থিত হইলে ব্রিটিশ গবর্ণমেন্ট আপাসাহেবকেই রাজ-প্রতিনিধি করিয়া তাঁহার হস্তে রাজ্যশাসনের ভার সমর্পণ করেন। পাছে বাতুল রাজা কোন দত্তকপুত্র গ্রহণ করেন, এই আশঙ্কায় রাজ-প্রতিনিধি বিষয়প্রয়োগে রাজার প্রাণবিনাশে চেষ্টা পান। এ বিষয়ে গুরুতর সন্দেহ উপস্থিত হয়। কিন্তু প্রমাণ দ্বারা উহা স্থিরীকৃত হয় না, সুতরাং আপাসাহেবের গদিপ্রাপ্তির পক্ষে কোন প্রকার বাধা উপস্থিত না হওয়াতে তিনিই নাগপুরের বিধি-সম্মত রাজা বলিয়া স্বীকৃত হন”। ইহার পর হেষ্টিংস আপাসাহেবের বিশ্বাসঘাতকতা তাঁহার পদচ্যুতি ও তল্লিবন্ধন নাগপুররাজ্যের গোলযোগের বিষয় সংক্ষেপে বর্ণন করিয়া উল্লেখ করিয়াছেন, “নাগপুরের বিশৃঙ্খলা প্রযুক্ত আমরা নূতন বন্দোবস্ত করিতে উদ্যত হই। রাজবংশের ও রাজ্যের প্রধান প্রধান ব্যক্তি এবিষয়ে পরামর্শ করিয়া সকলেই একবাক্যে ভৌঁসলাবংশীয়ের একটি নিকটতম আত্মীয় বালককে নাগপুরের গদি দিবার প্রস্তাব করেন। তদনুসারে উক্ত বালক আপা সাহেবের স্থলে নাগপুরের সিংহাসনে আরোহিত হয় *”। নাগপুরের রাজ্যসম্বন্ধে এইরূপ বিবরণ লর্ড হেষ্টিংসের বিজ্ঞাপনীতে বর্তমান; অথচ লর্ড ডালহৌসী বলিয়াছেন, লর্ড হেষ্টিংসের নির্বাচন অনুসারে একটি কালক নাগপুরের গদিতে আরোহণ করে†। রাজনীতির কি বিচিত্র লীলা! রাজনৈতিক বাক্যের কি অপূর্ণ সাদৃশ্য!

নাগপুর রাজ্য ভৌঁসলাবংশীয়ের হস্তচ্যুত হইয়াছিল; ব্রিটিশ গবর্ণমেন্ট স্বীয় ইচ্ছা ও রুচি অনুসারে তথায় শাসনসংক্রান্ত নূতন ব্যবস্থা প্রতিষ্ঠিত করিয়া ভূতপূর্ব রাজার হস্তে উহার পরিচালনের ভার সমর্পণ করেন; উক্ত রাজা যে ভৌঁসলাবংশের সহিত ঘনিষ্ঠ সম্বন্ধে আবদ্ধ, গবর্ণমেন্ট তাহার ক্ষেপণ অনুসন্ধান করেন নাই। এই সকল বিষয়ের সমর্থন জন্মাই লর্ড ডালহৌসীর বিশেষ প্রয়াস, ইহার জন্মই যুক্তির পর যুক্তিতে তাঁহার মন্তব্যাদিপি পুষ্টাবয়ব হইয়াছে। কিন্তু আক্ষেপের বিষয় এই,

* Report of Select Committee of the House of Commons on the East India Company, 1833, Appendix, pp. 103, 104.

† Empire in India, p. 186.

তঁাহার যুক্তি অনেক স্থলেই অভীষ্টসিদ্ধির পক্ষে কার্যকারিণী হয় নাই। তিনি স্বীয় লিপির একস্থলে উল্লেখ করিয়াছেন, “আপাসাহেবের শক্ততা ও বিশ্বাসবাতকতার পর নাগপুর রাজ্য আমাদের বিজয়লক্ষ সম্পত্তির মধ্যে পরিগণিত হয়। সেই বৎসরেই ব্রিটিশ গবর্ণমেন্ট, উক্ত রাজ্যের কিয়দংশ ভূতপূর্ব রাজার হস্তে সমর্পণ করেন, এবং ১৮২৬ অব্দের সন্ধি অনুসারে উক্ত অংশ পুরুষানুক্রমে তঁাহার ভোগদখলে রাখিতে প্রতিশ্রুত হন *”। মেজর ইবান্সবেল এবিষয়ে দুইটি গুরুতর ভ্রম প্রদর্শন করিয়াছিলেন। এক, নাগপুররাজ্য কখনও ব্রিটিশ গবর্ণমেন্টের বিজয়লক্ষ সম্পত্তির মধ্যে পরিগণিত হয় নাই, সামরিক নিয়ম অনুসারে নিঃসন্দেহ ঐ রাজ্য তঁাহাদের হস্তগত বলিয়া ঘোষিত হইতে পারিত, কিন্তু কখনও এরূপ কোনও ঘোষণা করা হয় নাই। দ্বিতীয়, ১৮১৮ অব্দে নাগপুররাজ্যের কিয়দংশ ভূতপূর্ব রাজাকে দান করা হয় নাই। তৃতীয় রঘুজী ভোঁসলা ব্রিটিশ গবর্ণমেন্টের অনুগ্রহে সমস্ত অবিভক্ত নাগপুররাজ্যের স্বত্বাধিকারী হন। ১৮২৬ অব্দের সন্ধির পঞ্চম ধারায় দৃষ্ট হইবে, আপাসাহেব শক্ততাচরণ করিবার পূর্বে, নাগপুরে ব্রিটিশ গবর্ণমেন্টের যে সৈন্য ছিল, তাহার ব্যয়নির্কীর্ষার্থ সাগর ও নর্মদা প্রদেশ ও অন্যান্য স্থান দান করেন। তৃতীয় রঘুজী বয়ঃপ্রাপ্ত হইয়া উহার অত্যাচার করেন নাই। বস্তুতঃ ব্রিটিশ গবর্ণমেন্ট কখনও নাগপুর অধিকার করিয়া, পরে পূর্বতন রাজাকে দান করেন নাই। প্রত্যুত ব্রিটিশ কর্মচারিগণ রাজার অপ্রাপ্তব্যবহার অবস্থায় তঁাহার নামেই রাজ্য শাসন করেন, পরে ১৮২৬ অব্দে রাজা বয়ঃপ্রাপ্ত হইলে সন্ধির নিয়ম অনুসারে প্রকৃত্ত রূপে নাগপুরের স্বত্বাধিকারী বলিয়া ঘোষিত হন। এই সময়ে আপাসাহেব ব্রিটিশ সৈন্তের ব্যয় নির্কীর্ষ জন্ত যে সমস্ত ভূ সম্পত্তি দিয়াছিলেন, তৃতীয় রঘুজী তাহা ব্রিটিশ গবর্ণমেন্টের অধীনেই রাখেন। যদি নাগপুর রাজ্য তঁাহাকে দানসামগ্রী স্বরূপ প্রদত্ত হইত, তাহা হইলে তিনি কখনও সাগর ও নর্মদা প্রদেশ ব্রিটিশ গবর্ণমেন্টকে দান করিতেন না †।

যে দুই প্রধান ব্যক্তি লর্ড ডালহৌসীর মতের পরিপোষক হইয়া সেতারার প্রভৃতির সম্বন্ধে লেখনী চালন করিয়াছেন, নাগপুরঘটিত ব্যাপারে তঁাহারা নীরব থাকেন নাই। ডিউক অব্ আর্গাইল ও শ্রার চার্লস জাক্সন্, উভয়েই

* First Nagpore Blue-book, p. 23. Comp. Empire in India, p. 192.

† Empire in India, p. 192-193.

নাগপুরগ্রহণ বিধিসিদ্ধ বলিয়া প্রতিপন্ন করিতে প্রয়াস পাইয়াছেন। লর্ড ডালহৌসী মার্কুইন্স অব্ হেষ্টিংসের নাগপুর-ঘটিত কার্য্য সম্বন্ধে যে অভিপ্রায় ব্যক্ত করিয়াছেন, তাহাই ডিউক অব্ আর্গাইলের লেখনীতে প্রতিফলিত হইয়াছে*। লর্ড হেষ্টিংস যে ভাবে নাগপুরের কার্য্য সম্পন্ন করেন, এবং লর্ড ডালহৌসী যে ভাবে হেষ্টিংসের মত বিপর্য্যস্ত করিয়া অন্ধ-বিশ্বাসের পরিচয় দেন, তাহা পূর্বে যথায় যথায় বিবৃত হইয়াছে। উক্ত বিবরণে স্পষ্ট প্রতিপন্ন হইবে, ডালহৌসী ও আর্গাইল, উভয়েই হেষ্টিংসের কার্য্যপ্রণালী বুঝিতে না পারিয়া নিতান্ত অসুদারতা প্রকাশ করিয়াছেন; উভয়েই চল-নী হইয়া এক অর্থ অত্র অর্থে প্রতিবিহিত করিয়া নাগপুরে ব্রিটিশ গবর্ণমেন্টের আধিপত্যস্থাপন বিধিসিদ্ধ বলিয়াছেন।

শ্রীর চার্লস জাক্সন স্বীয় পুস্তকে লর্ড ডালহৌসীর কথা প্রতিক্ষণিত ক্রটি করেন নাই। তিনি অবলীলাক্রমে ডালহৌসীর এই বাক্য উদ্ধৃত করিয়াছেন:—“১৮১৮ অব্দে ব্রিটিশ গবর্ণমেন্ট নাগপুর রাজ্য গুজর-বাংলায়কে দানসামগ্রী স্বরূপ অর্পণ করেন†”। এই কথা যে নিয়বচ্ছিন্ন স্তম্ভপূর্ণ ও দূষিত সংস্কারের পরিচায়ক, তাহা পূর্বে প্রতিপন্ন হইয়াছে।

ভারতবর্ষ পরিত্যাগ সময়ে লর্ড ডালহৌসী, আপনার মস্তবালিপিতে নাগপুরগ্রহণসম্বন্ধে লিখিয়াছেন, “নাগপুরের কোন বিধিসিদ্ধ উত্তরাধি-কারী সর্ব্বমান না থাকিতে উক্ত রাজ্য ব্রিটিশ গবর্ণমেন্টের অধীন করা হই-য়াছে। আপাসাহেবের বিশ্বাসঘাতকতার নাগপুর রাজ্য গবর্ণমেন্টের হস্ত-গত হয়, গবর্ণমেন্ট সে সময়ে উহা ভৌসলাবাংশীয় রাজাকে দান করেন। ঐ রাজার মৃত্যুর পর নাগপুররাজ্যের কোনও উত্তরাধিকারী ছিল না, পূর্ব্বতন রাজার কোনও পুত্রসন্তান জন্মপরিগ্রহ করে নাই, কোনও বালক দত্তক পুত্র স্বরূপ পরিগৃহীত হয় নাই। রাজার বিধবা পত্নীগণ স্বীকার করি-য়াছেন, তাঁহারা রাজার মৃত্যুর পর কাহাকেও দত্তকপুত্র করেন নাই‡”। লর্ড ডালহৌসী যখন অসঙ্কুচিত হৃদয়ে এই সকল কথা লিখিয়াছেন, তখন সমুদয় বিষয় একবার স্মরণপে অল্পসন্ধান করা তাঁহার কর্তব্য ছিল। তিনি

* India under Dalhousie and Canning, p. 34.

† A Vindication, p. 17.

‡ Papers, Minute by the Marquis of Dalhousie, dated February 28th, 1856. No 245 of 1856. Comp. Retrospects and Prospects &c, p. 29. . .

কিঞ্চিৎ মনোযোগী হইয়া বিচার করিলেই স্পষ্ট দেখিতে পাইতেন, রেসি-ডেন্ট মান্‌সেল সাহেব ১৮৫৪ অব্দের ১৪ই ডিসেম্বর তৃতীয় রঘুজীর মৃত্যুর তিন দিবস পরে নাগপুর-ঘটিত কার্যের যে বিবরণ প্রেরণ করেন, তাহাতে স্পষ্টাক্ষরে নাগপুরের গদির উত্তরাধিকারী বিষয় লিখিত আছে * । মান্‌সেল সাহেব দুই জনকে রাজার ঘনিষ্ঠ আত্মীয় বলিয়া উল্লেখ করেন । ইহাদের মধ্যে প্রথমটিকে নাগপুরের গদি দিবার প্রস্তাব করা হয় । এই প্রথম আত্মীয়—নানা অহর রাওর পুত্র যশোবন্ত অহর রাও । মান্‌সেল সাহেবের মতানুসারে এই যশোবন্ত অহর রাওই শাসন-সংক্রান্ত প্রধান কর্মচারিগণ কর্তৃক নির্বাচিত হন † । দত্তক-গ্রহণক্রিয়ার পর ইহার জনোজী ভোঁসলা নাম হয় । উপস্থিত গ্রহে যে যুদ্ধের ইতিহাস লিখিত হইতেছে, সেই যুদ্ধের সময়ে নাগপুরের রাজবংশীয়গণ গবর্ণমেন্টের অনেক উপকার করিতে ১৮৬০ অব্দে লর্ড কানিংগ্ এই জনোজী ভোঁসলাকে ঠৈগড়ক ভূ সম্পত্তি প্রত্যর্পণ পূর্বক 'রাজা বাহাদুর' উপাধি দান করেন ‡ । ইহার সাত বৎসর পূর্বে লর্ড ডালহৌসী এই বালককেই নাগপুরের গদির অনধিকারী বলিয়া প্রত্যাখান করিয়াছিলেন ॥

লর্ড ডালহৌসী দত্তক-গ্রহণ সম্বন্ধে যে অভিপ্রায় ব্যক্ত করিয়াছেন, তাহাও নিতান্ত অসঙ্গত । তৃতীয় রঘুজীর মৃত্যুর পরেই তাঁহার জ্যেষ্ঠ বিধবা পত্নী যথাবিধানে দত্তকপুত্র গ্রহণ করেন । মাননীয় বৃদ্ধা বন্ধুবাই এবিষয় প্রধানতম গবর্ণমেন্টের গোচর করিয়া অল্পমতি প্রার্থনা করিতেও ক্রটি করেন নাই § । রেসিডেন্ট মান্‌সেল সাহেবও ১৮৫৩ অব্দের ১১ই ডিসেম্বর, নাগপুরের রাজবংশীয়ের ও রাজ্য-শাসনসংক্রান্ত ব্যক্তিদ্বিগের দত্তক-গ্রহণের ইচ্ছা ব্রিটিশ গবর্ণমেন্টকে জানান ‖ । অধিকন্তু নাগপুররাজের বিধবা পত্নীগণ যদি বিধিপূর্বক দত্তক গ্রহণ না করিতেন, তাহা হইলে তাঁহারা কখনই লর্ড ডালহৌসীর কলিকাতাপরিভ্যাগ করা পর্য্যন্ত, গৃহীত দত্তকের অধিকার রক্ষার জন্য পীড়াপীড়ি করিতেন না ॥ এরূপ প্রবল প্রমাণ

* Papers Rajah of Berar, 1864, p. 20

† Ibid. 1854, p. 20. Comp. Retrospects and Prospects &c, p. 31.

‡ Calcutta Gazette. April 14, 1860.

§ Empire in India, p. 174-175.

¶ Papers Rajah of Berar, 1854, p. 56.

॥ Retrospects and Prospects &c, p. 31.

ধাকাতোও কোন্ যুক্তি অবলম্বন করিয়া লর্ড ডালহৌসী বিধবা রাণীদিগের দত্তকগ্রহণ অপ্রতিপন্ন করিলেন ? কোন্ বিধি, কোন্ নীতি, কোন্ শাস্ত্রের অনুগামী হইয়া জনোজী ভৌসলাকে স্বত্বচ্যুত করিলেন ? তত্ত্বদর্শী ঐতিহাসিকগণ অবশ্যই এই প্রশ্ন উত্থাপন করিবেন, অবশ্যই এই প্রশ্নের উত্তর দানস্থলে সভ্যতাম্পর্কী ব্রিটিশ রাজত্বেও যথেষ্টাচারের অথগুণী প্রতাপ দেখিয়া লজ্জা, ক্রোধ ও বিস্বাদে অবনতমস্তক হইবেন ।

তৃতীয় রঘুজী স্বয়ং দত্তক গ্রহণ করেন নাই । তাঁহার বিধবা পত্নী শাস্ত্রানুসারে গ্রহণ করিয়াছেন মাত্র । স্বামী গ্রহণ করেন নাই বলিয়াই, পত্নীর গৃহীত দত্তকের অসিদ্ধতা প্রতিপন্ন হইতে পারে না । হিন্দুদিগের চিরাচরিত পদ্ধতি অনুসারে স্বামীর মৃত্যুর পর তদীয় জ্যেষ্ঠা পত্নী যথাবিধি দত্তক গ্রহণ করিতে পারেন । ব্রিটিশ গবর্ণমেন্টেও অনেক স্থলে ঐরূপ দত্তকের বিবিসিদ্ধতা স্বীকার করিয়াছেন । ১৮১৭ অব্দে যখন দিবল রাও সিন্ধিয়ার জ্ঞী, স্বামীর মৃত্যুর পর দত্তক গ্রহণ করেন, তখন গবর্ণমেন্ট উহার বিপক্ষে কোন কথা বলেন নাই । ১৮৩৬ অব্দে যখন জহজী সিন্ধিয়ার বিধবা পত্নী উক্ত বিধানের অনুবর্ত্তী হন, তখনও গবর্ণমেন্ট উহার বিরুদ্ধ পক্ষ অবলম্বন করেন নাই । ১৮৩৪ অব্দে ধারের রাজা ও ১৮৪১ অব্দে কৃষ্ণগড়ের রাজার মৃত্যুর পরেও তাঁহাদিগের বিধবা পত্নীগণ ঐ নিয়মের অনুসরণ করেন * । এইরূপ প্রবল দৃষ্টান্ত ও প্রমাণ ধাকাতো কি জন্ম ১৮৫৩ অব্দে নাগপুরের দত্তকগ্রহণ অসিদ্ধ হইল ? কি জন্ম গ্রহিণী ও গৃহীতের সমুদয় সম্পত্তি ব্রিটিশ কোম্পানির অধিকারভুক্ত হইল ? ইহাতে কি পবিত্র নীতির অবমাননা হয় নাই ? পবিত্র ধর্মের গোঁরব লোপ পার নাই ?

নাগপুরের সম্বন্ধে লর্ড ডালহৌসী এক স্থলে লিখিয়াছেন, “নাগপুর ব্রিটিশ রাজ্যের অন্তর্ভুক্ত হইলে একটি সমবেদনাহীন ও ভিন্ন-স্বার্থ রাজ্যের লোপ হইবে, এবং যে সৈনিক বল সম্ভবতঃ আমাদের আয়াস ও কষ্টের স্থল হইতে পারে, তাহাও হস্তগত হইয়া উঠিবে । এতদ্ব্যতীত আমরা ৮০,০০০ বর্গ মাইল পরিমাণের ও বার্ষিক ৪০ লক্ষ টাকা আয়ের একটি ভূ-সম্পত্তি লাভ করিব । নাগপুরের লোকসংখ্যা ৪০ লক্ষ । ইহারা সকলেই

* Dalhousie's Administration. Vol. II. p. 157.

বহুদিনস্ হইতে আমাদের শাসনাধীন থাকিতে ইচ্ছুক। নাগপুর ব্রিটিশ অধিকারের সহিত সংযোজিত হইলে ব্রিটিশ খণ্ডরাজ্যসকল নিজামের রাজ্যের চতুর্দিক বেষ্টিত করিয়া আমাদের অভ্যন্তরীণ শাসনকার্যের অনেক অনুকূলতা সাধন করিবে। এক্ষণে যে সমস্ত ব্রিটিশাধিকৃত প্রদেশ ভিন্ন রাজ্য দ্বারা অন্তরিত রহিয়াছে, নাগপুর অধিকৃত হইলে তৎসমুদয় সংযোজিত হইয়া যাইবে। উড়িষ্যার পূর্বদিক, খন্দেশের পশ্চিমদিকের সহিত সংলগ্ন হইবে, দক্ষিণাপথভুক্ত বেরার, সাগর ও নর্মদা প্রদেশের অন্যাবহিত উত্তরদিগ্‌বর্তী হইবে, এবং কলিকাতা ও বোম্বাই গমনাগমনের পথ, প্রায় সমস্তই ব্রিটিশ রাজ্যের মধ্যে পতিত হইবে। এক কথায় বলিতে গেলে, নাগপুর অধিকৃত হইলে সৈনিক, বলের একত্র সমাবেশ হইবে, বাণিজ্যক্ষেত্র প্রসারিত হইবে এবং আমাদের ক্ষমতা অপেক্ষাকৃত সুদৃঢ় হইবে *”।

ডালহৌসী অত্র স্থলে লিখিয়াছেন, “নাগপুরবাসীদিগের উপকার সাধনাই আমার মুখ্য উদ্দেশ্য। এই উদ্দেশ্যই আমাকে উক্ত রাজ্য আমাদের অধিকারভুক্ত করিতে প্রবর্তিত করিয়াছে। কারণ, আমার দৃঢ় বিশ্বাস, নাগপুরবাসিগণ স্থায়ীরূপে ব্রিটিশ শাসনের অধীনে থাকিলে তাহাদের সুখস্বচ্ছন্দতার অনেক উন্নতি হইবে। নাগপুরের অধিবাসীদিগের মঙ্গল সাধন ব্যতীত অত্র কোন বিষয় লক্ষ্য করিয়া আমি উক্ত রাজ্য অধিকারের প্রস্তাব করি নাই †”।

স্থলান্তরে লিখিত হইয়াছে:—“আমরা এক জনকে নাগপুরের রাজা করি। তাঁহার সুবিধার জন্ত যাহা করা আবশ্যিক, সমস্তই আমরা করিয়া দিই। তিনি বাল্যকালে আমাদের অনুগ্রহে শিক্ষিত হন। একটি কার্যক্রম সম্ভ্রান্ত মহিলা তাঁহার অভিভাবক হইয়া প্রতিনিধিত্ব করেন। তাঁহার অপ্রাপ্তব্যবহার অবস্থায় আমরা দশ বৎসর কাল পর্যন্ত, তাঁহার রাজ্য শাসন করি, পরে প্রকৃষ্টপদ্ধতিক্রমে পরিচালিত উৎকৃষ্ট শাসন-প্রণালীর সহিত সুশৃঙ্খল সৈন্ত, পরিপূর্ণ রাজকোষ ও সুস্ফুট প্রজা, তাঁহার হস্তে সমর্পণ করি। এত সুবিধা করিয়া দিলেও ঐ রাজা, মৃত্যুর পর, মনুষ্য ও রাজত্ব, উভয়েরই নিম্ননীয় চরিত্র ব্যতীত আর কোনও কীর্তি পৃথিবীতে রাখিয়া

* A Vindication, p. 36-37.

† Ibid p. 21.

যাইতে পারেন নাই। এইরূপ অমুগ্ধীত ও এইরূপ সহায়তাপ্রাপ্ত হইয়াও ইনি শ্রায়-বিক্রয়কারী, মদ্যস্বপ্নী ও ইঞ্জিয়পরায়ণ হইয়া পরলোকগত হন।

“এই রাজার উক্তরাধিকারীও যে, উক্তরূপ অসদৃষ্টান্তের অমুগ্ধী হইবেন না, তদ্বিষয়ে ব্রিটিশ গবর্ণমেন্ট নাগপুরের প্রজাদিগের নিকট কি প্রকারে প্রতিশ্রুত হইতে পারে? আর বস্তুতঃই যদি নাগপুর-রাজ পূর্ববর্তী রাজার শ্রায় অসংকার্য না করেন তাহাহইলেও, ক্ষমতা থাকতেও যে, ব্রিটিশ গবর্ণমেন্ট নাগপুরের অধিবাসিগণের হিতসাধনে ওদসীন্ত দেখাইলেন, ভবিষ্যতে তদ্বিষয়ে কি বলিয়া সাধারণের নিকটে আপনাদের দোষ স্ফালন করিবেন?”*

যে তিনটি স্থল উদ্ধৃত হইল, তাহাতে স্পষ্টরূপে লর্ড ডালহৌসীর অভিপ্রায়ের পার্থক্য লক্ষিত হইবে। ডালহৌসী একস্থলে বলিয়াছেন, সর্বপ্রকারে ব্রিটিশ অধিকারের উন্নতি সাধনই নাগপুর গ্রহণের উদ্দেশ্য। পুনর্বার স্থলান্তরে লিখিয়াছেন, নাগপুরবাসীদিগের উপকারসাধনই নাগপুর গ্রহণের প্রধান কারণ। ইহাতে একস্থলে ব্রিটিশ রাজনীতির স্বার্থপরতা ও আত্মসম্মতি প্রকাশ পাইতেছে, অত্রস্থলে কুটিলতা ও ছলগ্রাহিতা পরিস্ফুট হইতেছে। নাগপুর ভৌমসলাবংশীয়ের অধিকারে থাকিলে যে, তদ্দেশবাসীদিগের সুখসমৃদ্ধির উন্নতি হইত না, সহৃদয় ব্যক্তিমাতেই এরূপ বাক্যের পোষকতা করেন নাই। প্রত্যুত অনেকেই উহার বিরুদ্ধবাদী হইয়া সত্যাপ্রয়তার পরিচয় দিয়াছেন। শ্রাব্ জন লো স্পষ্টাক্ষরে উল্লেখ করিয়াছেন, “ভারতবর্ষের সকলেই অবগত আছে যে, নাগপুর রাজ্যে কোন প্রকার শাসনবিশৃঙ্খলা উপস্থিত হয় নাই†”। যে রাজ্যে সুশৃঙ্খলরূপে শাসনকার্য্য নির্বাহিত হয়, সে রাজ্যের অধিবাসীদিগের যে, সুখসমৃদ্ধির উন্নতি হয় না, কেহই ইহার অমুমোদন করিবেন না। ফলতঃ এস্থলে লর্ড ডালহৌসী কেবল ব্রিটিশ রাজ্যের উন্নতিসাধনার্থ নাগপুর গ্রহণ করিয়া যথেষ্টাচারের পরাকাষ্ঠা দেখাইয়াছেন।

লর্ড ডালহৌসী নাগপুর অধিকার করিয়া, কেবল শ্রায়পরতার মস্তকে পদাব্যাত করেন নাই, সঙ্গে সঙ্গে দয়া, দাক্ষিণ্য ও স্নানীতিরও উচ্ছেদ সাধন

* India under Dalhousie and Canning, p. 37-38.

† Empire in India, p. 31.

করিয়াছেন। নাগপুরের হতভাগ্য রাণীগণ আপনাদের রাজ্যরক্ষার্থে যে উপায় অবলম্বনে প্রবৃত্ত হইলেন, তৎসমুদয়েই সাক্ষাৎসম্বন্ধে বাধা দেওয়া হইতে লাগিল। বুদ্ধা মহারাণী বঙ্কবাই বৃথা এই অত্যাচার, অবিচারের প্রতিবাদে প্রবৃত্ত হইলেন, বৃথা সন্ধির নিয়ম, বন্ধুতার দৃষ্টান্ত দেখাইয়া নাগপুরের গদিরক্ষার্থে চেষ্টা করিতে লাগিলেন, বৃথা শ্রায়পরতার দিকে উৎকৃষ্ট হইয়া কাতরস্বরে সুবিচার প্রার্থনা করিতে লাগিলেন, বৃথা প্রতিনিধি পাঠাইয়া ব্রিটিশ সিংহের দ্বারে অনুগ্রহপ্রার্থী হইয়া, উপস্থিত হইলেন। তাঁহার সমুদয় চেষ্টা, সমুদয় আশা নিফল হইল। বঙ্কবাই প্রভৃতি একপ্রকার কারারুদ্ধ হইয়া রহিলেন, কয়েক মাস পর্য্যন্ত কেহই তাঁহাদের নিকটে যাইতে পারিত না। মেজর আউস্লে নাগপুরের গদি রক্ষার জন্ত তাঁহাদের পক্ষ অবলম্বন করাতে অপরুদ্ধ হইলেন; কতিপয় মহাজন আবশ্যক ব্যয় নির্বাহের জন্ত তাঁহাদিগকে টাকা ধার দেওয়াতে ঐরূপ কারাদণ্ড ভোগ করিতে লাগিলেন *।

বঙ্কবাই অশীতিবর্ষে পদার্পণ করিয়াছিলেন; বার্কক্যাপ্রযুক্ত তাঁহার শরীর ভগ্ন হইয়া গিয়াছিল, মন নিস্তেজ হইয়া পড়িয়াছিল। তিনি এই আকস্মিক বিপদে একবারে অবসন্ন হইয়া পড়িলেন। বিলাতে আপিল করাই এক্ষণে বুদ্ধার আশার শেষ অবলম্ব হইল। ক্ষোভে, রোষে ও অপমানে বুদ্ধা ইঙ্গলণ্ডে প্রতিনিধি পাঠাইলেন। কিন্তু তাঁহার জন্মদেয়ে যে অগ্নি উদ্দীপ্ত হইয়াছিল, দীর্ঘকাল তাহা এক অবস্থায় রহিল না। অশীতিবর্ষের জাড্যদোষে তাহার গতি শীঘ্রই মন্দীভূত হইল। এ দিকে রঘুজীর বিধবা পত্নীর দুঃখবস্তার এক শেষ হইল, যিনি এক সময়ে সকলের ভীতিস্থল ছিলেন, নাগপুরের অধিবাসিগণ এক সময়ে যাহার প্রতি শ্রদ্ধা ও প্রীতি প্রদর্শন করিত, তাঁহাকেই এক্ষণে নাগপুরের স্বত্বভাগ-পত্রে স্বাক্ষর করাইতে বলপূর্ব্বক ধরিয়া আনা হইল। এই শেষ সময়েও যশোবন্ত রাওর অধিকার-চ্যুতির সম্বন্ধে কোন কথা বলা হইল না। রঘুজীর পত্নী অশ্রুমুখী ও কম্পান্বিত কলেবর হইয়া স্বাক্ষর করিলেন, অবিলম্বে নাগপুরের সৈন্তদিগকে নিরস্ত্র করা হইল, বিশ্বস্ত ব্রিটিশ সৈন্ত রাজ্যের যথোপযুক্ত স্থানে সন্নিবেশিত হইল, বিশ্বস্ত ব্রিটিশ কর্মচারী সন্নিধি সর্দারদিগের উদ্‌যোগ পর্য্য-

* Torrens, Empire in Asia, p. 371.

বেক্ষণে নিয়োজিত হইল। এইরূপ কলিকাতা-প্রচারিত বিধি অবলীলাক্রমে পুরুষ-পরম্পরাগত রাজ্যশাসনের মূলে কুঠারাঘাত করিল। অনন্ত-প্রবাহ অত্যাচার, অনন্ত-প্রবাহ অবিচারস্রোতে ভেঁসলা-শাসিত রাজ্যের শেষ চিহ্ন বিলুপ্ত হইয়া গেল *।

লর্ড ডালহৌসীর গবর্নমেন্ট কেবল নাগপুর গ্রহণ করিয়াই নিরস্ত হইলেন না; রাজ্যের সঙ্গে সঙ্গে রাজার নিজের দ্রব্যাদিও আত্মসাৎ করিয়া পরস্বাপহারিতার একশেষ দেখাইলেন। নাগপুরের হস্তী, অশ্ব প্রভৃতি ব্যবহার্য্য পশু, মণি মুক্তা প্রভৃতি বহুমূল্য দ্রব্যজাত ব্রিটিশ কোম্পানি আটক করিয়া বাজারে উপস্থাপিত করিলেন। হস্তী ষোটক প্রভৃতি সীতাবল-দীতে প্রকাশ্র নীলামে বিক্রীত হইল †। এ দিকে মণিমুক্তা প্রভৃতি কলিকাতার হামিণ্টন কোম্পানির দোকানের শোভা বর্দ্ধন করিল। ১৮৫৫ অব্দের ১২ই অক্টোবরের মণিঞ্জকনিকল্ নামক সংবাদপত্রে ঐ দ্রব্যাদিবিক্রয়ের বিজ্ঞাপন দেওয়া হইল ‡। এতদ্ব্যতীত নাগপুরের প্রাসাদে প্রাসাদে তন্ন তন্ন করিয়া অনুসন্ধান আরম্ভ হইল। অশ্রুতম রাণীর পর্য্যবেক্ষের নীচে স্বর্ণ ও রৌপ্যে ৪ লক্ষ টাকা প্রোথিত ছিল। কোম্পানির অনুচরগণ তাহা বাহির করিয়া আনিল §। রাণীগণ অবশেষে কোন সৎকার্য্যে আপনাদিগের নাম স্মরণীয় করিতে ইচ্ছা করিয়া আপনাদের অর্থদ্বারা কোমায়ুন নদীর উপর একটি সেতুনির্মাণের অভিপ্রায় জানাইলেন, কিন্তু তাঁহাদের এই শেষ ইচ্ছা, অস্তিম অহুরোধেও পূর্ণ হইল না ¶। রঘু-জীর বিধবা পত্নীগণ সাধারণ সৎকার্য্যে যে অর্থ উৎসর্গ করিয়াছিলেন, তাহা ব্রিটিশ কোম্পানির হস্তগত হইল। জগৎ বিশ্বয়-স্তম্ভিত হইয়া এই শোচনীয় অভিনয় চাচিয়া দেখিল, নীতি যথেষ্টাচারের প্রভাবে পরিম্লান হইয়া অবনতমস্তক হটল, ধর্ম্ম পাপের প্রশ্রয় দেখিয়া দূরে পলায়ন করিল। সভ্যতাস্পর্ধী গবর্নমেন্ট উনবিংশ শতাব্দীর শেষার্ধ্বে দণ্ডায়মান হইয়া সভ্যতার মস্তকে পদাঘাত করিলেন। লর্ড ডালহৌসীর কার্য্যের কি অপূর্ক

* Empire in Asia, p. 371-372.

† Arnold's Dalhousie's Administration. Vol. II., p. 167.

‡ Empire in Asia, p. 372-373.

§ Arnold's Dalhousie's Administration. Vol. II., p. 168.

¶ Ibid, p. 169.

মহিমা ! যখন ইংলণ্ডের মহারাণী প্রতীচ্য মিত্ররাজ্যের রক্ষাকার্য্যে ব্যাপৃত ছিলেন, তখন তাঁহার প্রতিনিধি প্রাচ্য মিত্র রাজ্য আত্মসাৎ করিতে হস্ত প্রসারণ করিলেন, যখন ইংলণ্ডের পররাষ্ট্র-বিভাগের সেক্রেটারি পোলগুদেশীয় কতিপয় সম্ভ্রান্ত ব্যক্তির সম্পত্তি-হরণ-সন্দেহে ক্রশিয়াকে তিরস্কার করিতেছিলেন, তখন ভারতের ব্রিটিশ গবর্নমেন্ট নাগপুরের সম্পত্তি-হরণে উদ্যত হইলেন।

ভৌসলাবংশীয়ের ভরণপোষণোপযোগী ধনভাণ্ডার স্থাপনই নাগপুরের-রাজ-পরিবারের সম্পত্তিবিক্রয়ের প্রধান উদ্দেশ্য ; অনেকে এই কথা বলিয়া লর্ড ডালহৌসীর রাজনীতির সমর্থন করিয়া থাকেন * । সমর্থনচেষ্টা যে, নিতান্ত দূষিত রুচি ও দূষিত সংস্কারের পরিচায়ক, তদ্বিষয়ে মতবৈধ নাই । লর্ড ডালহৌসীর গবর্নমেন্ট যখন নাগপুর গ্রহণ করিয়াছেন, তখন তাঁহার আপনাদের অর্থদ্বারা নাগপুরেররাজবংশীয়ের ভরণপোষণে বাধ্য । লর্ড ডালহৌসী ইহা না করাতে উদার রাজনীতির সীমা অতিক্রম করিয়াছেন । এক জনের বিসৃত রাজ্য গ্রহণ করিয়া, তাঁহার খাস সম্পত্তি বিক্রয়পূর্ব্বক, তাঁহার ও তৎপরিবারবর্গের ভরণপোষণের ব্যবস্থা করা, সহৃদয়তার লক্ষণ নহে । রেসিডেন্ট মান্‌সেল সাহেব নাগপুররাজের জব্যাদি নাগপুরেররাজবংশীয়ের নিকটে রাখিবার প্রস্তাব করেন । তিনি এসম্বন্ধে 'গবর্নমেন্টে যে পত্র লিখেন, তাহাতে স্পষ্ট উল্লেখ ছিল "প্রায় ২০ লক্ষ নাগপুরটাকার সম্পত্তি, ৫০ হইতে ৭৫ লক্ষ নাগপুর টাকার মণি মুক্তা প্রভৃতি সমস্তই রাজপরিবারের নিকটে রাখা উচিত । তাঁহার নিজেই ইচ্ছা ও সাধারণের মতানুসারে যেরূপ ভাল বিবেচনা করেন, সেইরূপে উহা বিক্রয় করিতে পারিবেন । আমার মতে রাজসিংহাসন ব্যতীত আর সমস্ত বিষয়েই নাগপুরের রাজবংশীয় স্ত্রী ও পুরুষ, উভয়েরই সমান অধিকার আছে ।" কিন্তু লর্ড ডালহৌসী রেসিডেন্টের এই প্রস্তাব গ্রাহ্য করেন নাই । তিনি প্রস্তাবিত বিষয়ে এই মত প্রকাশ করিয়াছেন যে, নিজের মর্যাদার অমুরূপ যে সমস্ত সম্পত্তি রাখা আবশ্যক

* Sir Charles Jackson, A Vindication, p. 74-81.

† Letter from C. G. Mansel Esqr ; to Secretary to Government, dated 29th April 1854 (Parly, Papers, Annexation of Berar 1859, p. 9.) Comp. Empire in India, p. 229.

নাগপুরের রাণীগণ তাহা স্বাধিতে পারিবেন, অবশিষ্ট সমুদয় বিক্রয় করিয়া তাঁহাদের ভরণপোষণোপযোগী ধনভাণ্ডার স্থাপন করা যাইবে । কমিশনের ধনভাণ্ডারের মূলধনসম্বন্ধে যে রূপ হিসাব করিয়াছেন, তাহাতে যদি টাকার অনাটন হয়, তাহা হইলে গবর্ণমেন্ট তাহা পূরণ করিয়া দিবেন* ।

লর্ড ডালহৌসী এই যুক্তি, এই নীতির অনুগামী হইয়া নাগপুরের রাজবংশের সম্পত্তি বিক্রয় করেন । গবর্ণমেন্ট নাগপুরের ঋণ একটি বিস্তৃত রাজ্য গ্রহণ করিলেন, অথচ নাগপুরের রাজবংশীয়ের ভরণপোষণে সমর্থ হইলেন না ; তাঁহাদের নিজ সম্পত্তি বিক্রয় করিয়া ভরণপোষণের ব্যবস্থা করিলেন । বৃদ্ধা রাণী বহুবাইর সঙ্ঘর্ষে ঐ সকল সম্পত্তি বাহির করা হইল, তাঁহার পুনঃ পুনঃ নিষেধ-বাক্যেও কেহ বিরত হইল না । ক্রোধে ও অপমানে তিনি নাগপুর-প্রাসাদে আশ্রয় লাগাইয়া সম্পত্তি ভস্ম করিতে চাহিলেন, তথাপি কেহ বিরত হইল না । ঐতিহাসিকগণের সমক্ষে ইহা কি ঋণবিগর্হিত বলিয়া প্রতিপন্ন হইবে না ? তাঁহারা কি এইরূপ সম্পত্তি-গ্রহণ ডাকাইতির পর্যায়ের নিবেশিত করিবেন না ?

অায়পরায়ণ উদার ব্যক্তি মাত্রেই লর্ড ডালহৌসীর এই অযথা কার্যের প্রতিবাদে ক্রটি করেন নাই । কে, টরেন্স প্রভৃতি সমুদয় অপকৃপাত ঐতিহাসিকগণ এই দূষিত রাজনীতির প্রতি কলঙ্কারোপ করিয়াছেন । কে সাহেব স্বপ্রণীত সিপাহিযুদ্ধের ইতিহাসে লিখিয়াছেন, “আমি অনেককেই বলিতে শুনিয়াছি, এইরূপ আটক, এইরূপ বিক্রয়ে কেবল বেরারে নয়, চতুঃপার্শ্ববর্তী প্রদেশসমূহেও ব্রিটিশ গবর্ণমেন্টের বড় ছুর্নাম হইয়াছিল । নাগপুর অধিকার করাতোও লোকের মনে এত বিরাগ জন্মে নাই ।

“এইরূপ বিক্রয়ে ভৌসলাবংশীয়ের মন বেরূপ ব্যথিত হইয়াছিল, সেইরূপ সমস্ত ভারতবর্ষও ব্রিটিশ গবর্ণমেন্টের প্রতি নিতান্ত বিরক্ত হইয়া উঠিয়াছিল । যথার্থতঃই হউক, আর অযথার্থতঃই হউক, ইহাতে আমাদের সুনাম নষ্ট হইয়াছে ।, অর্থের বিনিময়ে এইরূপে চলিত কলঙ্কিত করা সম্ভব নয় + ।”

* Parliamentary Papers, Annexation of Berar, 1859, p. 10.

† + Kaye's Sepoy War. Vol. I, p. 84, and note.

হামিল্টন কোম্পানি নাগপুরের সম্পত্তিবিক্রয়ের যে বিজ্ঞাপন দেন, তাহা লক্ষ্য করিয়া টরেন্স লিখিয়াছেন :—“যে ব্যক্তি আপনার রাজত্ব কাল ব্যাপিয়া আমাদের বিশ্বস্ত মিত্র ছিল, তাঁহার খাস সম্পত্তি প্রাচ্য রাজধানীতে সাধারণের সমক্ষে বিক্রীত হওয়াতে ভারতবর্ষীয় রাজগণের মনে কি রূপ সংস্কার জন্মিয়াছিল, তাহা কি কেহ বুঝিতে পারেন না ? প্রতি বাজারে, প্রতি অন্তঃপুরে এই বিজ্ঞাপন যে, সরোবে গৃহীত হইয়াছিল, শুদ্বিষয়ে কি কেহ সন্দেহ করিতে পারেন ? সকলেই মনে করিয়াছিল, এবার যথেষ্টাচার দেশ ধ্বংশ করিতে অগ্রসর হইবে, এবং পর-ক্ষেপে কাহারও না কাহারও রাজত্ব বা রাজকোষ বিলুপ্তি হইবে। নেপোলিয়ান যে আদেশলিপি দ্বারা ফ্রান্সে বোরবৌবংশের রাজত্ববিলোপ-সংবাদ সমস্ত পৃথিবীকে জানাইয়াছিলেন, এবং যে পরুবাচারদ্বারা একটি ক্ষীণ-শ্রদ্ধতি রাজাকে রাজ্যপরিত্যাগ করিতে বাধ্য করিয়াছিলেন, সেই আদেশ-লিপি ও সেই পরুবাচারের নিন্দা করিতে আমাদের ঐতিহাসিক-গণ কখনও ক্লান্ত হন নাই। নেপোলিয়ান বোরবৌবংশীয়দিগের আলেখ্য ও ধাতুনির্মিত ঘোটক অপসারণ করাতে তাঁহার প্রতি অনেক ঞায়-সঙ্গত কঠোর বাক্যও প্রয়োজিত হইয়াছে। কিন্তু নেপোলিয়ান কাহারও ভূষণাদি অপহরণ বা বিক্রয়দ্বায়ে দূষিত নহেন। ফ্রেডরিকের তরবারি আত্মসাৎ করা অন্তায় হইয়াছিল বটে, কিন্তু নেপোলিয়ান প্রুশীয় রাজার অঙ্গুরীয়ক ও কর্তৃহার সরাইয়া উহা তাঁহার রাজধানীতে সাধারণের সমক্ষে বিক্রয় করিতে অবশ্যই লজ্জিত হইতেন। সাধারণের উপর অত্যাচার অর্থ-পিশাচিতার সহিত যুক্ত হইলে নিতান্ত ঘৃণার্ত হইয়া উঠে। যে সময়ে ব্রিটিশ রাজার প্রতিনিধি এশিয়াতে এইরূপ বিলুপ্ত ও বিক্রয়ে ব্যাপ্ত ছিলেন, সেই সময়ে রুশিয়া, বিদ্রোহ ঘটাইবার সন্দেহে কতিপয় পোলওদেশীয় সম্রাজ্ঞ ব্যক্তির সম্পত্তি হরণ করাতে আমাদের পররাষ্ট্রবিভাগের সেক্রেটারি সেন্টপিটসবার্গের শাসন-সমিতিতে কঠোর ভৎসনা করিতেছিলেন। জারের মন্ত্রী এস্থলে ঘৃণাসহকারে অবশ্যই বলিতে পারেন, “চিকিৎসক ! অগ্রে আপনাকে নীরোগ কর *”।

কে, টরেন্সের ঞায় আর্নেল্ড, বেল্ প্রভৃতিও লর্ড ডালহৌসীর এই

দূষিত কার্যের যথোচিত নিষ্কা করিয়াছেন * । বস্তুতঃ নাগপুরের সম্পত্তি-গ্রহণ ডালহৌসীর গবর্ণমেন্টের একটি ছরপনয় কলঙ্ক । যাবৎ পবিত্র ইতিহাসের সম্মান থাকিবে, যাবৎ পবিত্র ধর্মের গৌরব অপ্ৰতিহত রহিবে, যাবৎ পবিত্র নীতি, সদাচার ও উদারতা, লোকসমাজে আদরসহকারে পরিগৃহীত হইবে, তাবৎ ঐ কলঙ্করেখা কখনও বিলুপ্ত হইবে না † ।

এই রূপে কয়েক বৎসরের মধ্যে তিনটি প্রধান মহারাষ্ট্র-বংশের রাজ সম্মান ও রাজচিহ্ন বিলুপ্ত হইল । তিনটি প্রধান মহারাষ্ট্র-শাসিত রাজ্য ব্রিটিশ ইণ্ডিয়ার লোহিত রেখায় বেষ্টিত হইয়া পড়িল । ব্রিটিশ কোম্পানির অধিকার প্রসারিত হইল, এবং ভারতের ইতিহাস বিচিত্র ঘটনায় পরিপুষ্ট হইয়া সাধারণের সমক্ষে উপস্থিত হইতে লাগিল । যদি ঞ্জয়ের সম্মান রক্ষা করিতে হয়, তাহা হইলে ইহা অবশ্য বলিতে হইবে যে, সেতারা ও নাগপুর এক সময়ে বিজয়লক্ষ সম্পত্তির মধ্যে পরিগণিত হইয়াছিল, ব্রিটিশ গবর্ণমেন্ট ইচ্ছা করিলে উহা অনায়াসে অধিকার করিতে পারিতেন । কিন্তু সে সময়ে বিজয়লক্ষীর ছিন্নিবার ভোগ-লালসা চরিতার্থ হয় নাই । ব্রিটিশ গবর্ণমেন্টও কোনরূপ নিয়ম অবলম্বন করিয়া ভবিষ্যতে উহা আপনাদের অধিকারে আনিবার উপায় করেন নাই । প্রত্যুত তাঁহারা সে সময়ে উদার রাজনীতির বশবর্তী হইয়া সেতারা ও নাগপুর-রাজ, উভয়কেই বন্ধুভাবে আলিঙ্গন করেন, উভয়েরই সহিত পবিত্র সন্ধিসূত্রে আবদ্ধ হন, এবং উভয়কেই পুরুষানুক্রমে রাজ্যভোগের ক্ষমতা সমর্পণ করেন । কিন্তু লর্ড ডালহৌসী ভারতবর্ষে পদার্পণ করিলে অতর্কিত কারণ-বলে, অভূতপূর্ব কৌশলসহকারে ঐ উদার রাজনীতির মূলোচ্ছেদ হয় । ডালহৌসী স্বার্থপরতায় অন্ধ হইয়া পবিত্র বন্ধুত্ব-পাশ বিচ্ছিন্ন করেন, পবিত্র সন্ধির অবমাননা করেন, এবং পবিত্র রাজনীতির গৌরব-হারী হন । সেতারাগ্রহণ-

* Arnolds', Administration of Lord Dalhousie. Vol. II., p. 166-169.
Bell, Empire in India, p. 229-230.

† কেত্রগীত সিপাহিযুদ্ধের ইতিহাসে সেতারার পরেই নাগপুরের বিবরণ লিখিত হইয়াছে । নাগপুরের পর ঝাঁসীর উল্লেখ দৃষ্ট হয় । কিন্তু সনয়ের ক্রমানুসারে অগ্রে ঝাঁসী, পরে নাগপুরের বিবরণ লিপিবদ্ধ হওয়া উচিত । এই ভ্রমাই উপস্থিত গ্রন্থে ঝাঁসীর পর নাগপুরের বিষয় লিখিত হইল । Arnold's Dalhousie's Administration. Vol. II., pp. 130, 146, 154.

স্থলে যেরূপ স্বার্থপরতা প্রদর্শিত হয়, তাহা পূর্বে লিখিত হইয়াছে, বাঁসীর সম্বন্ধে যেরূপ অব্যবস্থিততা পরিষ্কৃত হয়, তাহারও যথাযথ উল্লেখ করা গিয়াছে। নাগপুরগ্রহণসময়ে এই স্বার্থপরতার পূর্ণবিকাশ হয়। পূর্বে ডালহৌসীর বাক্য উদ্ধৃত করিয়া ইহা প্রদর্শিত হইয়াছে, এস্থলেও তাঁহার কতিপয় বাক্য উদ্ধৃত করিয়া ইহার সমর্থন করা যাইতেছে। লর্ড ডালহৌসী নাগপুর গ্রহণের কারণান্তর প্রদর্শনস্থলে লিখিয়াছেন:—“নাগপুর রাজ্য উত্তম রূপে শাসিত হইলে ইঙ্গলণ্ডের একটি অভাব পূরণ হয়। এই অভাব পূরণের উপরেই ইঙ্গলণ্ডের বাণিজ্য-বিষয়িণী উন্নতি সম্পূর্ণরূপে নির্ভর করিতেছে। এই উন্নতি অনেক প্রকার বাণিজ্য-দ্রব্য দ্বারা হইতে পারে, ইঙ্গলণ্ডে নিয়মিত-রূপে তুলার আমদানি হইলে যেমন এই উন্নতি হয়, বোম্ব হয় অন্য কোন দ্রব্য দ্বারা তেমন হইতে পারে না। যাহারা ইঙ্গলণ্ড কিংবা ভারতবর্ষের রাজকার্য্যে ব্যাপৃত আছেন, তাঁহাদের নিকট এই বিষয়টি গুরুতর বলিয়া বোধ হয়। দশ বৎসর কাল রাজকার্য্যে ব্যাপৃত থাকিতে উহার গুরুত্ব আমিও বিশেষরূপে বুঝিতে পারিয়াছি। ইঙ্গলণ্ড ত্যাগ করিবার পূর্বে মাঞ্চেষ্টরের বণিক-সম্প্রদায় আমার নিকট এ বিষয়ের প্রস্তাব করেন। ইঙ্গলণ্ডের প্রধান মন্ত্রীও আমার ভারত সাম্রাজ্য-শাসনসময়ে অনেকবার আমাকে লিখিয়াছেন যে, ইঙ্গলণ্ডের সকলেই এবিষয়ে অধিকতর আগ্রহ দেখাইতেছেন। যাহাতে ইঙ্গলণ্ডে নিয়মিত রূপে ঐ বাণিজ্যদ্রব্যের আমদানি হইতে পারে, তদ্বিষয়ে আমার ঘে, বিশেষ মনোযোগ আছে, তাহা বলা অনাবশ্যক। এইরূপ আমদানি হইলে ইঙ্গলণ্ডকে আর কখনও ঐ প্রয়োজনীয় দ্রব্যের জন্ত কোন বিদেশীয় রাজ্যের উপর নির্ভর করিতে হইবে না *।”

স্বার্থপরতার কি মোহিনী শক্তি! নাগপুর তুলার জন্ত চিরপ্রসিদ্ধ, ইঙ্গলণ্ডে এই তুলার আমদানি হইলে মাঞ্চেষ্টরের বণিক-কোম্পানির বিশেষ লাভ হইবে, সঙ্গে সঙ্গে ব্রিটিশ গবর্ণমেন্টও লাভবান হইবেন। কিন্তু নাগপুর হাতে না পাইলে তুলার একচেটিয়া হইতে পারে না; সুতরাং তুলার একচেটিয়া ও আপনাদের লাভের নিমিত্ত নাগপুরগ্রহণ অবশ্যই শ্রাস্তব। লর্ড ডালহৌসী এই অপূর্ণ যুক্তিও অপূর্ণ কারণ দেখাইয়া নাগপুর অধিকার করিয়াছেন। ডিউক অব আর্গাইলের শ্রায় রাজনীতিজ্ঞ-গণও এই অপূর্ণ যুক্তির পোষকতা করিয়া সভ্য জগতে—প্রশস্ত রাজ-

* Duke of Argyll, India under Dalhousie and Canning, p. 38.

নৈতিক ক্ষেত্রে আপনাদিগের নাম স্মরণীয় করিয়াছেন *। গবর্ণমেন্ট নাগপুর-রাজের হস্তে পুরুষালুক্রেম-রাজ্যভোগের যে ক্ষমতা সমর্পণ করিয়াছিলেন, কেবল লোভের কুহকে পড়িয়া চিরন্তন বন্ধুত্ব, চিরন্তন সন্ধি, সমুদয়ই বিস্মৃত হইয়া, তাহা গ্রহণ করিলেন। কল্যাণ বাহারা রাজসম্মানে গৌরবান্বিত ছিলেন, অদ্য তাঁহারা ই সামান্য লোকের অবস্থায় পতিত হইয়া নির্দিষ্ট বৃত্তি-ভোগী হইলেন। অদৃষ্টক্রমে কি শোচনীয় পরিবর্তন! স্মৃতিচারণের কি অপূর্ণ মিডঘন! জটনক অপক্ষপাত ব্রিটিশ লেখক এ স্থলে যথার্থই বলিয়াছেন, “তুলা ব্রিটিশ শ্রায়পরতার কর্ণ অবরোধ করিয়া তাহাকে ধ্বংস করিয়াছিল, এবং চক্ষু অবরোধ করিয়া তাহাকে অন্ধ করিয়া তুলিয়াছিল †”।

সেতারার অধিকারের পর আর একটি উত্তরাধিকার-শূণ্য রাজ্যের প্রতি-
 ডালহৌসীর গবর্ণমেন্টের মনোযোগ আকৃষ্ট হয়।
 ১৮৫২ খ্রীঃ অব্দ।
 সেতারার গ্রহণের পর কাঁদী ও নাগপুর অধিকারের
 পূর্বে গবর্ণমেন্ট এই বিষয়ের বিচারে প্রবৃত্ত হন ‡। বিষয়টি নিতান্ত
 ক্ষুদ্র নহে। উহা ভারতবর্ষ ও ইঙ্গলণ্ড, উভয়েরই মনোযোগ আকর্ষণ করে,
 উভয়স্থলের রাজনৈতিক সমাজেই উল্লাস ঘোরতর তর্কবিতর্কের বিষয়ীভূত
 হইয়া উঠে।

১৮৫২ অব্দের গ্রীষ্মকালে রাজপুতনার অন্তর্গত কেরৌলী রাজ্যের অধি-
 পতি পরলোকগত হন। মৃত্যুর পূর্বে তিনি ভরতপাল নামে একটি আত্মীয়
 বালককে দত্তক পুত্র করেন। এই সময়ে সেনাপতি লো রাজপুতনায়
 ব্রিটিশ গবর্ণমেন্টের প্রতিনিধি ছিলেন। তিনি একবারেই এই অভিপ্রায়
 জানাইলেন যে, শীঘ্রই এই দত্তক গ্রহণের অনুমোদন করা ব্রিটিশ গবর্ণ-
 মেন্টের অবশ্য কর্তব্য।

লর্ড ডালহৌসী দোলায়মাম-চিত্ত হইলেন। তাঁহার বোধ হইল,
 উত্তরাধিকারীর অভাব দেখাইয়া কেরৌলী রাজ্যও সেতারার শ্রায় ব্রিটিশ
 ইণ্ডিয়ায় সংযোজিত হইতে পারে। ডালহৌসী এই সঙ্কল্পসিদ্ধির উপায়
 অবেষণে প্রবৃত্ত হইলেন। যে সংহারিণী লেখনী সেতারার সর্বনাশ

* India under Dalhousie and Canning, p. 36-39.

† J. B. Norton, The Rebellion in India : How to prevent another, p. 98.

‡ Bell, Retrospects and Prospects, &c., p. 190.

করিয়াছিল, তাহা এক্ষণে কেরোলীর বিরুদ্ধে পরিচালিত হইল। ডাল-হোসী ৩০ এ আগষ্ট কেরোলীর সম্বন্ধে একটি মিনিট * লিখিলেন। কিন্তু এই মিনিট প্রতিদ্বন্দ্বি-শূণ্য হইল না। স্যার ফ্রেডরিক কারি ১৮৫২ অব্দে ভারতবর্ষীয় ব্যবস্থাপক সভার সভ্যপদে প্রতিষ্ঠিত ছিলেন, তিনি গবর্নরজেনেরলের বিরুদ্ধ পক্ষ অবলম্বন করিয়া কেরোলীর দস্তক পূত্রের স্বত্বরক্ষার্থ দণ্ডায়মান হইলেন †। ৩১ এ আগষ্ট কারির 'মিনিট' লিপিবদ্ধ হইল। কারি এই 'মিনিটে' স্বীয় গবেষণা, সন্ধিচার ও সদ্যুক্তির বিশেষ পরিচয় দিলেন। এদিকে স্যার জন লো, স্যার ফ্রেডরিক কারির পক্ষ অবলম্বন করিলেন। লোর পর স্যার হেনরি লরেন্স রাজপুতনায় রেসিডেন্টের কার্যভার গ্রহণ করেন, তিনিও ঐ মতের সমর্থন করিতে ক্রটি করিলেন না। এই রাজনৈতিক বিচার-তরঙ্গ কেবল কলিকাতা ও রাজপুতনা আন্দোলিত করিয়াই নিবৃত্ত হইল না; জনে উহা ইঙ্গলণ্ডের উপকূলে আঘাত আরম্ভ করিল। জন ডিকিন্সন্, হেনরি সেমুর প্রভৃতি কতিপয় ভারত-হিতৈষী ব্যক্তির যত্নে ও উদ্বোধনে ইঙ্গলণ্ডে ভারত-সংস্কারক নামে একটি সভা প্রতিষ্ঠাপিত হইয়াছিল। এই সভা কেরোলী-রাজ্যের স্বত্ব রক্ষা করিতে উদ্যত হইলেন ‡। জনে এবিষয় পালিয়ার্মেন্টে মহাসভায় উপস্থিত হইল, জনসাধারণের প্রতিনিধিগণের অনেকেই কেরোলীর পক্ষ অবলম্বন করিলেন §। ভারতের হর্তা, কর্তা, বিধাতা ডিরেক্টরগণও যথাসময়ে এবিষয়ের বিচারে প্রবৃত্ত হইলেন; বিচারে কেরোলীর পক্ষ প্রবল হইল ¶। ডিরেক্টরগণ একবাক্যে বলিলেন, "আমাদের নিকট কেরোলী ও সেভারা, এই উভয় রাজ্যটিত বিধয় সম্পূর্ণ পৃথক্ বলিয়া বোধ হইতেছে। গবর্নরজেনেরল এ

* "গবর্নমেন্ট" "গবর্নরজেনেরল" প্রভৃতির স্থায় "মিনিট" কথাও ইতিহাসে ব্যবহৃত হইয়া থাকে। উহার সাধারণ অর্থ, "শাসন-সংক্রান্ত মন্তব্য লিপি" অর্থাৎ রাজপুরুষগণ রাজকায় বিষয়বিশেষের ব্যবস্থাসম্বন্ধে যে মন্তব্য লিপিবদ্ধ করেন, সেই লিপিকে 'মিনিট' বলা যায়।

† Kerowlee Papers, 1855. p. 7.

‡ Retrospects and Prospects &c., p. 190. Comp. Empire in Asia, p. 368.

§ Quarterly Review. 1858, p. 269.

¶ Retrospects and Prospects &c., p. 190.

বিষয় স্বল্পরূপে বিবেচনা করিয়া স্বীয় মিনিটে লিখেন নাই। সেতারা রাজ্য নূতন। উহা সর্বাংশে ব্রিটিশ গবর্ণমেন্টের সৃষ্টি; গবর্ণমেন্ট যে ভূসম্পত্তি দান করেন, তাহা হইতেই ঐ রাজ্য উদ্ভূত হইয়াছে। পক্ষান্তরে কেরোলী রাজ্য রাজপুতনার মধ্যে অতি প্রাচীন বলিয়া পরিগণিত। ভারতে ব্রিটিশ ক্ষমতা বদ্ধমূল হইবার বহু পূর্বে হইতে উহা ভারতবর্ষীয় রাজ্যের অধীনে শাসিত হইয়া আসিতেছে। ঐ রাজ্য এক্ষণে আমাদের আশ্রিত, উহার অধিপতি এক্ষণে আমাদের সহিত বন্ধুত্বভ্রমে আবদ্ধ। অতি গুরুতর কারণ ব্যতীত এইরূপ রাজ্যে আমাদের অধিপত্য স্থাপন ভারতবর্ষের কাহারও অভিপ্রেত নহে। আমাদের মতে তাদৃশ গুরুতর কারণ কেরোলী রাজ্যে উপস্থিত হয় নাই। সুতরাং আমরা ভারতপালকেই বিধিসম্মত রাজা বলিয়া স্বীকার করিতে ইচ্ছা করিয়াছি *”।

কিন্তু ভারতপালের অদৃষ্ট প্রসঙ্গ হইল না। ডিরেঙ্ক্টরদিগের লিপি ভারতবর্ষে পূর্নছিব্বার পূর্বেই তাহার একজন প্রতিদ্বন্দ্বী রক্তভূমিতে অবতীর্ণ হইলেন। প্রতিদ্বন্দ্বীর নাম মদনপাল, ভারতপাল অপেক্ষা বয়োজ্যেষ্ঠ, এবং ভারতপাল অপেক্ষা ভূতপূর্ব রাজার সহিত নিকটতম সম্বন্ধে আবদ্ধ। যখন কলিকাতা ও লণ্ডনের কর্তৃপক্ষের মধ্যে কেরোলীর আন্দোলন চলিতেছিল; তখন মদন পাল আপনার স্বত্বরক্ষার্থে দণ্ডায়মান হন। কেরোলীর রাজপরিবারগণ, সন্দারগণ ও প্রজাগণ, সকলেই ইহার পক্ষ সমর্থন করেন। রাজপুতনার ব্রিটিশ প্রতিনিধিও ইহাদের সহযোগী হন। হেনরি লরেন্সের আশ্রয় এক জন প্রগাঢ় রাজনীতিজ্ঞ ও সন্ধিবেচক ব্যক্তি যখন মদনপালের পক্ষ অবলম্বন করিলেন, তখন ভারতপালের গদিপ্রাপ্তির আশা সমূলে বিনষ্ট হইল। কিন্তু দত্তক গ্রহণ-ক্রিয়া হিন্দুদিগের পুঞ্জস্ববন্ধনের অনাধার সাধন। এই ক্রিয়া যথারীতি সম্পাদিত হইলে কোনও প্রতিবন্ধক পুঞ্জ সম্বন্ধের উচ্ছেদ করিতে পারে না। সুতরাং ভারতপালকে গ্রহণ করিবার সময়ে শাস্ত্রসম্মত ক্রিয়া যথারীতি সম্পাদিত হইয়াছে কি না, হেনরি লরেন্স তাহার অনুসন্ধানে প্রযুক্ত হইলেন। অনুসন্ধানে প্রাপ্ত পত্র হইল, হিন্দুপদ্ধতি অনুসারে দত্তক-গ্রহণ কালে যে যে কার্য ও ব্যবহারের অনুষ্ঠান আবশ্যিক, ভারতপালকে লইবার সময়, তাহার অধিকাংশই সম্পন্ন হয় নাই। অধিক কি, কেবলমাত্র অধিবাসিগণের এই দত্তকের বিধিসিদ্ধতা স্বীকারে

*Kaye's Sepoy War, Vol. I, p. 91.

সম্মত নহেন। সুতরাং হেন্‌রি লরেন্সের অভীষ্টসিদ্ধির কাণ্ডাত উপস্থিত হইল না। বিশেষতঃ ডিরেঞ্জরগণ তখন পর্য্যন্ত ভরতপালকে গদি দিতে অস্বীকার করেন নাই, তখন পর্য্যন্ত এবিষয়ে তাঁহাদিগের কোন লিপি যথানিয়মে প্রচারিত হয় নাই। যখন এই রূপ কোন চূড়ান্ত নিষ্পত্তি হয় নাই, তখন হেন্‌রি লরেন্স একবারে প্রধানতম গবর্নমেন্টকে মদনপালের পক্ষ সমর্থন করিতে অনুরোধ করিলেন, ডালহৌসীর গবর্নমেন্ট আর বিরুদ্ধ পক্ষ অবলম্বন না করিয়া হেন্‌রি লরেন্সের বাক্যে সম্মত হইলেন, সুতরাং কেরৌণীর গদি ভরতপালের পরিবর্তে মদনপালের হস্তগত হইল।

এইরূপে ডালহৌসীর সর্বসংহারক বিধি এস্থলে পরাস্ত হইল, এইরূপে অচিন্ত্য-পূর্ব কারণে একটি প্রাচীন রাজপুত রাজ্য ডালহৌসীর আক্রমণ হইতে রক্ষা পাইল। ১৮৫২ অব্দের জুলাই মাসে কেরৌণীর বিষয়ে আন্দোলন উপস্থিত হয়, ১৮৫৫ অব্দের ৫ই জুলাই বিলাতের ডিরেঞ্জরগণ এবিষয়ে চূড়ান্ত আদেশ লিপিবদ্ধ করেন *। এই সুদীর্ঘকাল ব্যাপিয়া সকলেই ঔৎসুক্যসহকারে ব্রিটিশ গবর্নমেন্টের মুখাপেক্ষী হইয়া থাকে; সকলেই কেরৌণীর সম্বন্ধে কিরূপ আদেশ হয়, জানিবার জন্য পরস্পরের নিকট সংবাদ লইতে থাকে। জনশ্রুতি ক্রমে ভারতবর্ষের নগরে নগরে, পল্লীতে পল্লীতে, গৃহে গৃহে, কেরৌণীর সম্বন্ধে আন্দোলন উপস্থিত করে। মহারাষ্ট্র শাসিত রাজ্যের প্রতি যেরূপ কঠোর দণ্ড প্রয়োগিত হইয়াছিল, তাহা কেহই বিস্মৃত হয় নাই। কিন্তু রাজপুতশাসনের তুলনায় মহারাষ্ট্রশাসন অতি অল্প দিনের; মোগল সাম্রাজ্যের শেষ অবশ্যায় মহারাষ্ট্ররাজ্য পরিপুষ্ট ও পরিবর্দ্ধিত হয়। যে সময়ে ইঙ্গরেজগণ বণিকবেশে ধীরে ধীরে ভারতবর্ষে প্রবেশ করিতেছিল, সেই সময়েই মহারাষ্ট্র রাজ্য সুখ সমৃদ্ধিতে পরিপূর্ণ হইতেছিল। রাজপুত রাজ্য একরূপ নূতন নহে। যখন মহারাষ্ট্র-বংশ ভবিষ্যৎ কালগর্ভে নিহিত ছিল, তখন রাজপুতরাজ্য উন্নতির শিখরে সমাক্রুত, যখন মুসলমানগণ ভারতবর্ষে প্রবেশ করে নাই, যখন তিরোরীর ক্ষেত্রে ভারতবর্ষের কীর্ত্তি বিলুপ্ত হয় নাই, তখনও রাজপুতরাজ্যের গৌরবে সমগ্র ভারতবর্ষ উদ্ভাসিত; যখন ইঙ্গরেজ বণিকগণ উত্তমাশা অস্তরূপে ঘৃণাক্ষরেও জানিতে পারে নাই, তখনও রাজপুতরাজ্যে সৌভাগ্যের পূর্ণ বিকাশ; বস্তুতঃ রাজপুত-রাজ্য ও রাজপুত-বংশ ভারতবর্ষের

* Karwlee Papers, 1855, p. 5. Comp. Retrospects and Prospects &c., p. 195

অদ্বিতীয় মহত্ব স্থল। এইরূপ প্রাচীন ও এইরূপ মহত্বের মূলীভূত বংশে অদ্য নবাগত ইঙ্গরেজ কোম্পানি অনায়াসে কুঠায়াঘাত করিবে, সকলে ইহা ভাবিয়া ব্যাকুল হইল। হেনরি লরেন্সের প্রতি অনেকেরই বিশেষ আস্থা ও বিশ্বাস ছিল, তথাপি সেতারার দিকে চাহিয়া কেরোলীর সম্বন্ধে সকলেই হতাশাস হইয়া পড়িল। কেহই বুঝিতে পারিল না, কেরোলী কিরূপে এই ভীষণ আক্রমণ হইতে রক্ষা পাইবে, কেহই বুঝিতে পারিল না, কিরূপে বাজপুত-বংশীয়গণ অপ্রতিহত ভাবে কেরোলীর সিংহাসনে সমাসীন থাকিবেন; গভীর আন্দোলনের পর সকলেই নীরব, সকলেই কর্তব্য বিমূঢ় হইয়া পরস্পরের দিকে চাহিয়া রহিল; যখন হেনরি লরেন্স গভীর যুক্তি দেখাইয়া কেরোলীর পক্ষসমর্থনে প্রবৃত্ত হইলেন, তখনও কেহই বুঝিতে পারিল না, কিরূপে তাঁহার চেষ্টা ফলবন্তী হইবে, কিরূপে কেরোলীর সিংহাসন রাজপুতের হস্তগত থাকিবে; অবশেষ চূড়ান্ত আদেশ প্রচারিত হইল; মদনপাল কেরোলীর সিংহাসনে আরোহিত হইলেন; সার্ক-জনীন আশঙ্কা নিবারিত হইল এবং সকলে অঘনতমস্তক হইয়া গভীর-ভাবে ডালহৌসীর গবর্ণমেন্টের রাজনৈতিক চাতুরীর আলোচনায় নিমগ্ন রহিল।

লর্ড ডালহৌসীর দৃষ্টি অবিলম্বে আর একটি রাজ্যের উপর পতিত হয়। ভারতের মানচিত্রের প্রতি দৃষ্টিপাত করিলে

১৮৫০ খ্রীঃ অঙ্গ।

দক্ষিণভারতবর্ষের কেজ্জস্থলে বেরার, পইমঘাট, তুঙ্গভদ্রা ও কৃষ্ণার মধ্যবর্তী রায়চোর দোয়াব প্রভৃতি কতিপয় প্রদেশ দৃষ্ট হইয়া থাকে। উর্করতাগুণে এগুলি সবিশেষ প্রসিদ্ধ। ঐ সকল স্থানে যেমন উৎকৃষ্ট অহিফেন ও তুলা জন্মিয়া থাকে, পৃথিবীর মধ্যে তেমন আর কোথাও উৎপন্ন হয় না। ঐ ফলসম্পত্তিশালী রাজ্যের অধিপতির পুরুবাহুক্রমিক উপাধি নিজাম, রাজধানী হয়দরাবাদ। যে নবাবের প্রসাদে কতিপয় সাধারণ অবস্থাপন্ন ইঙ্গরেজ বণিক দক্ষিণ ভারতবর্ষে প্রথমে স্থান লাভ করিয়া ক্রমে ক্রমে আপনাদের অধিপত্য বিস্তার করে, সেই নবাব এক সময়ে এই হয়দরাবাদের নিজামের আশ্রিত ও করদ ছিলেন।

প্রাণিজগতের কীট বিশেষে এক প্রকার আশ্চর্য্য প্রকৃতি আছে। এই কীটের অণু অপরের শরীরের রক্ত, মাংস, মজ্জা প্রভৃতি হরণ করিয়া আপনি পরিপুষ্ট হইতে থাকে। প্রবেশদাতা ক্রমে রক্ত, মাংস হারাইয়া মৃত্যুমুখে

পতিত হয় । ডালহৌসীর গবর্ণমেন্ট মিত্ররাজ্য-সমূহে আপনাদের যে সকল সৈন্ত রাখিয়া থাকেন, সংহারিণী প্রকৃতি অনুসারে তাহাদের সহিত ঐ অণুসমূহের কিছুমাত্র বৈলক্ষণ্য দেখা যায় না । অণ্ডের স্ত্রায় ঐ সমস্ত সৈন্তও প্রবেশ-দাতা মিত্ররাজ্যসমূহের শত্রু । অণ্ডের স্ত্রায় ঐ সমস্ত সৈন্তও প্রবেশদাতা মিত্র-রাজ্য-সমূহের সারভাগ গ্রহণ করিয়া উহাদিগকে কঙ্কালাবশিষ্ট ও মৃত্যু-মুখে পাতিত করিয়া থাকে ।

১৮০০ অব্দের ১২ই অক্টোবর লর্ড ওয়েলেসলি নিজামের সহিত যে সন্ধি স্থাপন করেন, তাহার দ্বাদশ ধারা হইতে ঐ অনিষ্টের সূত্রপাত হয় । এই ধারা অনুসারে ব্রিটিশ গবর্ণমেন্ট আপনাদের কতকগুলি সৈন্ত নিজামের সৈন্তের সহিত একত্র করেন । যুদ্ধাদির সময় নিজাম এই সম্মিলিত সৈন্তের সমস্ত ব্যয়ভার বহন করিতে সম্মত হন * । যখন দক্ষিণাপথে টিপু সুলতানের ক্ষমতা বিলুপ্ত হয়, তখন হযদরাবাদের তদানীন্তন রেসিডেন্ট হেনরি রাসেল পার্শ্বধর্তা অধিপতিদিগের সৈন্ত-বল দেখিয়া নিজামের প্রধানমন্ত্রী চণ্ডুলালকে কহেনঃ—“মহারাষ্ট্রীয়গণ ক্রমেই বর্দ্ধিত-বিক্রম হইয়া উঠিতেছে, হোলকার ও সিক্কিয়া বহুসংখ্য সৈন্তের অধিনায়ক হইয়াছেন, এই সৈন্ত-সমষ্টি আবার যুদ্ধ-যাত্রার্থ প্রস্তুত রহিয়াছে †” । নিজামের মন্ত্রী রেসিডেন্টের কথায় ব্রিটিশ সৈনিক পুরুষের সাহায্যে আপনাদের সৈন্তের শৃঙ্খলা বিধান করেন । ইহাতে ব্রিটিশ কোম্পানির সৈন্ত নিজামের রাজ্যে বদ্ধমূল হইয়া উঠে ।

কিন্তু নিজাম চিরকাল এই সমস্ত সৈন্তের ব্যয় নির্বাহে কোন-রূপ অঙ্গীকার করেন নাই, চিরকাল এই সমস্ত সৈন্ত নিজের রাজ্যে রাখিতে কোনরূপ প্রতিজ্ঞায় আবদ্ধ হন নাই ‡ । যাহাহউক, বন্ধুতার অহুরোধে নিজাম চল্লিশ বৎসর কাল ঐসৈন্তের ব্যয় নির্বাহ করিলেন । ক্রমে উহার নিমিত্ত তাঁহার ঋণ হইতে লাগিল ; বৎসরের পর বৎসরে এই ঋণের সংখ্যা বর্দ্ধিত হইয়া শেষে ৭৮ লক্ষ হইল । ১৮৫১ অব্দে ডালহৌসীর গবর্ণমেন্ট আর বিলম্ব না করিয়া স্পষ্টাক্ষরে কহিলেন, “নিজামকে শীঘ্রই ঋণ পরিশোধ করিতে হইবে, নচেৎ

* Aitchison, A collection of Treaties, Vol. V, pp. 8, 73.

† Arnold's Dalhousie's Administration. Vol. 11, p. 132.

‡ Ibid, p. 133.

বার্ষিক অন্যান্য ৬৫ লক্ষ টাকা আয়ের একটি ভূসম্পত্তি ব্রিটিশ গবর্নমেন্টকে দিতে হইবে। গবর্নমেন্ট তিন বৎসরের মধ্যে ঐ আয় হইতে আপনাদের আসল টাকা তুলিয়া লইবেন *”। ইহাতে নিজাম স্বীয় ঋণ পরিশোধ করিতে যত্নশীল হইলেন। ৪০ লক্ষ টাকা অবিলম্বে ব্রিটিশ গবর্নমেন্টের হস্তে প্রদত্ত হইল, অবশিষ্ট শীঘ্রই পরিশোধ করা হইবে বলিয়া, কথা দেওয়া হইল †। কিন্তু সমুদয় ঋণ পরিশোধ হইল না, ১৮৫৩ অব্দে উহা আবার বর্দ্ধিত হইয়া ৪৫ লক্ষ হইল। ডালহৌসী আর কোন কথায় কর্ণপাত না করিয়া আপনাদের টাকা আদায়ের জন্ত নিজামের অধিকৃত ভূসম্পত্তি গ্রহণ করিতে উদ্যত হইলেন ‡।

নিজাম ভূসম্পত্তি দিয়া ঋণ পরিশোধ করিতে অসম্মত হইলেন। কিন্তু ডালহৌসী ছাড়িবার পাত্র নহেন; তিনি এক প্রকার বলপূর্বক নিজামের নিকট হইতে উহা লইতে উদ্যত হইলেন। নিজামের বিশ্বস্ত মন্ত্রী সুরাজুলমুলক এই অত্যাচার নিবারণ করিতে অনেক চেষ্টা করিলেন, সুলতান সৌজন্তের দোহাই দিয়া প্রভুর রাজ্য অক্ষুণ্ণ রাখিতে অনেক কথা কহিলেন, কিন্তু কেহই তাঁহার কথায় কর্ণপাত করিল না। অবিলম্বে সন্ধির ছলে সম্পত্তিগ্রহণের নিয়ম লিপিবদ্ধ হইল। রেসিডেন্ট কর্ণেল লো সাহেব নিজামকে বলিলেন, কলিকাতা হইতে সন্ধিপত্র প্রস্তুত হইয়া আসিতেছে, উহাতে শীঘ্রই তাঁহাকে স্বাক্ষর করিতে হইবে। রেসিডেন্টের এই বাক্য নিজামের সহনীয় হইল না। তিনি গভীর ক্ষোভ, রোষ ও অপमानে অধীর হইয়া রেসিডেন্টকে সম্বোধনপূর্বক কহিলেন :—“আপনার ন্যায় ব্যক্তিগণ—বাহারা এক সময়ে ইউরোপে অবস্থিতি করেন, অত্র সময়ে ভারতবর্ষে আগত হন, এক সময়ে গবর্নমেন্টের চাকরী গ্রহণ করেন, অন্য সময়ে সৈনিক কার্যে নিয়োজিত হন, এক সময়ে নাবিক-শ্রেণীতে প্রবেশ করেন, অন্য সময়ে বাণিজ্য-ব্যবসায় ব্যাপৃত থাকেন (আমি

* Dalhousie's Administration. Vol., II., p. 139.

† Aitchison, A collection of Treaties. Vol. V., p. 9. আর্গেণ্ডের সহিত ইহার কিছু বৈষম্য লক্ষিত হয়। আর্গেণ্ড বলেন, সর্বসমেত ৭৫ লক্ষ টাকার ঋণ হইয়াছিল, নিজাম উহার মধ্যে ৩৪ লক্ষ টাকা পরিশোধ করিলেন। Arnold's Dalhousie's Administration Vol. II, pp. 38, 39.

‡ Aitchison's Treaties &c., Vol. V., p. 9.

তিনিয়াছি, আপনাদের জাতির অনেক প্রধান প্রধান ব্যক্তি বাণিজ্য-
 কার্যে লিপ্ত);—কখনই এবিষয়ে আমার মনের অবস্থা বৃদ্ধিতে পারিবেন
 না। আমি একজন স্বাধীন রাজ্যাধিপতি; সাত পুরুষ হইতে এই রাজ্য
 আমার বংশের অধীনে রহিয়াছে। আমি এই রাজ্যে জন্মগ্রহণ করিয়াছি,
 এই রাজ্যে পরিবর্তিত হইয়াছি এবং ভবিষ্যতে এই রাজ্যেই দেহত্যাগ
 করিব। আপনারা মনে করিতেছেন, আমি আমার রাজ্যের কোন অংশ
 কোম্পানিকে দিগে স্মৃথী হইব; ইহা সম্পূর্ণ অসম্ভব, আমি উহাতে কখনই
 স্মৃথী হইতে পারিব না। রাজ্যের অংশ দিলে আমি আপনাকে যারপর-
 নাই অপমানিত জ্ঞান করিব। আমি শুনিয়াছি, আপনাদের জাতির
 এক ব্যক্তি ভাবিয়াছেন, যদি আমি মহম্মদ শাহের (আর্কটের নবাব)
 দশাগ্রস্ত হই, তাহাহইলেও আমার সম্ভ্রষ্ট থাকা উচিত। তাহাহইলে আমার
 আর কোনও কাজ থাকিবে না; গবর্ণমেন্টের পুরাতন চাকরের ন্যায়
 পেমেন্ট গ্রহণ করিয়া কেবল ভোজন, নিদ্রা ও উপাসনাতে কালা কাটা-
 ইব*। এই পর্য্যন্ত বলিয়া দুঃসহ মনোযাতনায় নিজায় আরব্য ভাষায়
 একটি শব্দ উচ্চারণ করিলেন। উহাতে তাঁহার গভীর ক্রোধ ও বিশ্বয় পরি-
 ক্ষুট হইল; তিনি কিঞ্চিৎ স্মৃহ হইয়া পুনর্বার বলিলেন, “আপনারা
 নিজের অবস্থার দিকে চাহিয়া আমার প্রতি এই অভিপ্রায় প্রকাশ করিলে
 আমি আপনাদিগকে তাদৃশ অসঙ্গত ভাবপ্রকাশক বলি না, কিন্তু ইহাতে
 একজন স্বাধীন রাজ্যাধিপতির মনের কিরূপ অবস্থা হয়, তাহা আপনারা
 কখনই বৃদ্ধিতে সমর্থ নহেন। কারণ, আপনারা বলিতেছেন, এই সন্ধি হইলে
 আমার প্রতিবৎসর ৮ লক্ষ টাকা বাচিবে; ইহাতে আমার সম্ভ্রষ্ট থাকা
 উচিত। কিন্তু আমি আপনাদিগকে বলিতেছি, যদি চারিগুণ ৮ লক্ষ টাকা
 বাচে, তাহা হইলেও আমি সম্ভ্রষ্ট থাকিতে পারিব না। রাজ্যের অংশ হস্তা-
 স্তরিত হইলে আমি আপনাকে যারপরনাই অসমানিত জ্ঞান করিব *”।

নবাব নসিরউদ্দৌলা এই পর্য্যন্ত বলিয়া নিশ্চল হইলেন। কিন্তু তাঁহার
 এইরূপ ক্রোধোন্নত স্বর, এইরূপ যাতনা-প্রকাশক বাক্যে কোনও ফল
 হইল না। যাবৎ তাঁহার ঋণ পরিশোধ না হইবে, তাবৎ তিনি বাধ্য
 হইয়া বেতার প্রদেশ বিটিশ-গবর্ণমেন্টের হস্তে রাখিতে সম্মত হইলেন।

* Blue-book, The Nizam, 1854, p. 120. Comp. Empire in India, p. 123.
 Dalhousie's Administration. Vol. II., p. 142-143.

অবিলম্বে সন্ধিপত্র উপস্থাপিত হইল। নিজাম নিতান্ত অনিচ্ছা দেখাইয়া ১৮৫৩ অক্টোবর ২১ এ মে উহাতে স্বাক্ষর করিলেন। ১৮ ই জুন উহা কলিকাতার বিধি-নির্দিষ্ট সন্ধি বলিয়া প্রচারিত হইল। (হরস্ব সাইলক অবলীলাক্রমে নিরীহ-স্বভাব আণ্টোনিওর দেহ হইতে মাংস কাটরা লইল, একটি পোর্সিরাও এসময়ে উপস্থিত হইয়া ন্যায়ের সম্মান রক্ষা করিতে সমর্থ হইল না।)

এইরূপে ৪৫ লক্ষ টাকার জন্য আদজুস্তা হইতে উণ পৰ্য্যন্ত বিস্তৃত পৰ্ব্বতমাগার উত্তরবর্তী সমস্ত বেরার বিভাগ; আহম্মদ নগর ও সোলাপুরের দীনাগুস্থিত ১৬টি জনপদ; পইম্ঘাট এবং কুষা ও তুঙ্গভদ্রার মধ্যবর্তী রাইচোর দোয়াব বিটিশ কোম্পানির হস্তগত হইল। ক্রুরপ্রকৃতি উত্তমৰ্ণ যেমন অধমর্ণের সহিত ব্যবহার করে, ডালহৌসীও এস্থলে নিজামের সহিত সেইরূপ ব্যবহার করিলেন। বেরার প্রদেশ তুলার জন্য বিশেষ্য প্রসিদ্ধ। বহুসংখ্য জলাশয় বর্তমান থাকিতে রাইচোর দোয়াব শস্ত সম্পত্তিতে পরিপূর্ণ। উর্বরতা-গুণে ঐ ভূখণ্ড ভারতবর্ষের অশ্রান্ত স্থান অপেক্ষা কোনও অংশে নিকৃষ্ট নহে। ডালহৌসীর গবর্ণমেন্ট করেক লক্ষ টাকার জন্ত এইরূপ একটি শস্তশালী বিস্তৃত ভূভাগ এক জন মিত্র-রাজের হস্ত হইতে কাড়িয়া লইয়া আপনাদিগের অর্থ-লালসা ও মিত্র-দ্রোহিতার একশেষ দেখাইলেন * ।

বেরারের পব আর একটি মুসলমান-রাজ্যের প্রতি ডালহৌসীর নেত্র পাত হয়। বর্ণনীর ইতিহাসের সহিত উহার তাদৃশ ঘনিষ্ঠ সম্বন্ধ নাই। স্মৃতরাং অতি সংক্ষেপে ঐ বিষয় লিখিত হইতেছে।

দক্ষিণাপথে কর্ণাট নামে একটি রাজ্য আছে। মোগলশাসন-সময়ে ১৮৫৫ খ্রীঃ অব্দ-
উহা নিজামের রাজ্যের অন্তর্নিবিষ্ট ছিল। উহার রাজ-
ধানী আর্কট। কর্ণাট রাজ্যের সহিত ইঙ্গরাজ্যবিকৃত
ভাবতের ইতিহাসের অতি ঘনিষ্ঠ সম্বন্ধ আছে। এই স্থানে বিটিশ কোম্পা-
নির আদি আশ্রয়স্থল সেন্ট ডেভিড্ হুর্গ অবস্থিত ছিল, এই স্থানে বিটিশ

* আর্পোন্ডপ্রণীত ডালহৌসীর "ভারত-সাম্রাজ্যশাসন" নামক পুস্তকের দ্বিতীয় খণ্ডে দৃষ্ট হয়, (Dalhousie's Administration. Vol. II, pp. 141, 143) নিজাম বেনিডেটের সহিত কথোপকথনসময়ে এইরূপ ভাব প্রকাশ করিয়াছিলেন যে, বেরার প্রদেশ ব্রিটিশ গবর্ণমেন্ট চিরকালের জন্য আপনাদের হস্তে রাখিবেন। বিত্ত ১৮৫৩.

রণ-গৌরব ডুপ্পের সৌভাগ্য ও লালির জীবন নাশের কারণ হইয়াছিল, এই স্থানেই রবর্ত ক্লাইব সর্বপ্রথমে বিজয়-পতাকার পরিশোভিত হইয়াছিলেন, এবং এই স্থানেই প্রেসিদ্ধ হযদর আলী ইঙ্গরেজদিগের বিশ্বাস-ঘাতকতার জন্য আপনাদিগের প্রতিহিংসা বৃদ্ধি চরিতার্থ করিয়াছিলেন । ১৭৬৩ অব্দে মহম্মদ আলি ব্রিটিশ কোম্পানির সহায়তার এইরূপ ইতিহাস-প্রেসিদ্ধ কর্ণাটের সিংহাসনে অধিষ্ঠিত হন । মহম্মদ আলিকে সিংহাসনে আরোহিত করিয়া কোম্পানি তাঁহার রাজ্যরক্ষার্থ কর্ণাটে কতকগুলি সৈন্য রাখেন । নবাব ঐ সৈন্যের ব্যয় নির্বাহ করিতে প্রতিশ্রুত হন । ক্রমে অমিতব্যয় ও স্ত্রুশাসনের অভাব বশতঃ মহম্মদ আলি ঋণজালে জড়িত হইয়া পড়েন । এজন্য ব্রিটিশ কোম্পানি ১৭৮৫ অব্দে মহম্মদ আলির সহিত সন্ধি করিয়া ঐ ঋণ পরিশোধের বন্দোবস্ত করেন । ১৭৯০ অব্দে মহীশূরে যুদ্ধ উপস্থিত হয় । নবাবের কর্মচারিগণ ঐ সময়ে প্রতিশ্রুত টাকা আদায় করিয়া দিতে অসমর্থ হওয়াতে কোম্পানি যুদ্ধের সময়ে কর্ণাটের সমস্ত শাসনভার আপনাদের হস্তে আনিতে কৃতসঙ্কল্প হন । ১৭৯২ অব্দে লর্ড কর্ণওয়ালিস্ নবাবের সহিত যে সন্ধি করেন, তাহাতে ঐ সঙ্কল্পসিদ্ধির পথ পরিকৃত হইয়া উঠে । সন্ধির নিয়মানুসারে নবাব উৎপন্ন রাজস্বের এক পঞ্চমাংশ লইয়া কর্ণাটের সমস্ত শাসনভার কোম্পানির হস্তে দিতে প্রতিশ্রুত হন * ।

অন্ধের সন্ধি উহার বিরুদ্ধ পক্ষ সমর্থন করিতেছে । উক্ত সন্ধির ষষ্ঠ ধারায় স্পষ্ট লিপিত আছে, যাবৎ নিজামের ঋণ পরিশোধ না হয়, তাবৎ বেয়ার ব্রিটিশ গবর্নমেন্টের অধীনে থাকিবে । রেসিডেন্ট ঐ ভূভাগ শাসন করিবেন । অধিকন্তু ঐ সন্ধির অষ্টম ধারানুসারে রেসিডেন্টকে নিজামের নিকট প্রতি বৎসর উক্ত বিভাগের হিসাব দিতে হইবে । হিসাবে যদি ব্রিটিশ সৈন্যের ব্যয় বাদে টাকা উত্ত্বৃত্ত হয়, তাহা হইলে সেই উত্ত্বৃত্ত অংশ নিজাম পাইবেন । Vide C. U. Aitchison, A Collection of Treaties, Engagements, &c., relating to India and neighbouring countries. Vol. V, p. 104105. Comp. J. M. Ludlow, British India, its Races and its History. Vol. II, p. 189.

১৮৬০ অব্দের ২৬ই ডিসেম্বর লর্ড কানিংজ্ অফ্ জুল উদ্বোলা নিজামুলমুলক আসফজা বাহাদুরের সহিত যে সন্ধি স্থাপন করেন, তাহার ষষ্ঠ ধারানুসারেও ব্রিটিশ গবর্নমেন্ট তাঁহাদের হযদরাবাদস্থ সৈন্যের ব্যয়নির্ব্বাহার্থ বেয়ারবিভাগ প্রতিভূতরূপ আপনাদের হাতে রাখেন ।

C. U. Aitchison, A Collection of Treaties &c. Vol. V., p. 116.

ব্রিটিশ গবর্নমেন্ট বেয়ার হইতে নির্দিষ্ট ঋণ অপেক্ষা অধিক টাকা তুলিয়া লইয়াছেন ।

* Aitchison's Treaties, Vol. V., p. 181-182.

মহম্মদ আলির পর ১৭৯৫ অব্দের ১৬ই অক্টোবর ওমর আলি-
 টের সিংহাসনে আরোহণ করেন। এই নবাব টিপু সুলতানের সহিত
 ষড়যন্ত্র করিয়াছেন বলিয়া তদানীন্তন গবর্নরজেনেরল লর্ড ওয়েলেস্লির
 মনে গভীর সন্দেহ উপস্থিত হয়। কিন্তু মৃত্যু, ১৮০১ অব্দের ১৫ই জুলাই
 ওমর আলিকে ওয়েলেস্লির কঠোর হস্ত হইতে পরিভ্রাণ করে। ওয়ে-
 লেস্লির সন্দেহ ওমর আলির সহিত পর্য্যবসিত হইল না। তিনি
 অদ্ভুত কারণ, অপূর্ব সংস্কার-বলে ওমর আলির পুত্র আলিহুশেনকে
 পৈতৃক ষড়যন্ত্রের উত্তরাধিকারী বলিয়া মনে করিলেন। ওমর আলির
 জীবিতাবস্থায় গবর্নমেন্ট আপনাদের হস্তে কর্ণাটের শাসনভার গ্রহণ
 করিবার জন্য যে সন্ধিপত্র প্রস্তুত করিয়াছিলেন, তাহা আলিহুশেনের
 নিকট উপস্থিত হইল। আলিহুশেন অতি তেজস্বী ও আত্ম সম্মান-পর
 ছিলেন, তিনি ঐ স্বর্ণিত সন্ধিতে আবদ্ধ হইতে সন্মত হইলেন না। আলি-
 হুশেনের অসম্মতিতে ওমর আলির ভ্রাতৃপুত্র আজিমুদ্দৌলা গবর্নমে-
 ন্টের মনোমত সন্ধিতে আবদ্ধ হইয়া কর্ণাটের সিংহাসন গ্রহণ করিলেন।
 ১৮০১ অব্দের ৩১এ জুলাই এই সন্ধি হইল। সন্ধির নিয়মানুসারে আজি-
 মুদ্দৌলা আপনার ব্যয়ের জন্য উৎপন্ন রাজস্বের এক পঞ্চমাংশ লইয়া সমস্ত
 দেওয়ানী ও ফৌজদারী-সংক্রান্ত ক্ষমতা কোম্পানির হস্তে সমর্পণ করি-
 লেন *। এইরূপে কর্ণাটের নবাবের অধঃপতন হইল; এই রূপে ব্রিটিশ
 কোম্পানির অধঃগ্রহের বিনিময়ে নবাব উপাধিমাতে পর্য্যবসিত হইলেন।
 যাহারা এক দিন ব্রিটিশ কোম্পানির আশ্রয়-দাতা ছিলেন, তৃতীয় অর্জেক্সের
 স্তায় নৃপতি স্বহস্ত-লিখিত বন্ধুত্ব-সূচক পত্র ও উপহার প্রেরণ করিয়া এক-
 দিন ঐহাদিগের সম্মান করিয়াছিলেন †, তাহারাই অদ্য ইঙ্গলণ্ডীয় বণিক-
 সম্প্রদায়ের আশ্রিত ও অধঃগত হইলেন।

১৮১৯ অব্দের ৩রা আগষ্ট আজিমুদ্দৌলার মৃত্যু হয়। তৎপুত্র অজি-
 ম্জা নবাব বলিয়া স্বীকৃত হন। ১৮২৫ অব্দের ১২ই নবেম্বর ইনি মহম্মদ
 ষাউস ঈ নামে একটি অপ্রাপ্তবয়স্ক পুত্র রাখিয়া পরলোক গমন করেন।
 মহম্মদ ষাউসের বয়ঃপ্রাপ্তি পর্য্যন্ত তদীয় পিতৃব্য আজিম্জা ঠাঁহার অভি-
 ভাবক হন। ১৮৫৫ অব্দের ৭ই অক্টোবর অপুত্রক অবস্থায় মহম্মদ ষাউস

* A collection of Treaties, Vol. V, p. 250.

† Empire in India, p. 50-51.

খার পরলোক প্রাপ্তি হয়। আজিমজা ব্রিটিশ গবর্ণমেন্টের নিকটে সিংহাসন প্রার্থনা করেন। এই সময়ে ডালহৌসী গবর্ণমেন্টের শিরঃস্থানীয় ছিলেন। রাজ্য-সংহারিণী নীতি বাহার উপাস্ত দেবতা, পরশ্বরগ্রহণ বাহার বীজমন্ত্র ; আজিমজা তাঁহারই নিকট আর্কটের সিংহাসন-প্রার্থী হইয়া উপস্থিত হইলেন।

বলা বাহুল্য, ডাঁহৌসী আজিমজার প্রার্থনার কর্ণপাত্ত করিলেন না। ১৮০১ অব্দের সন্ধিতে নবাব কেবল দেওয়ানী ও ফৌজদারী-সংক্রান্ত ক্ষমতা ব্রিটিশ গবর্ণমেন্টের হস্তে সমর্পণ করিয়াছিলেন। উহাতে পুরুষানুক্রমিক রাজসম্মান কি রাজসিংহাসন বিলুপ্ত হয় নাই। ১৮০৩ অব্দের ১লা ফেব্রুয়ারি মাদ্রাজ গবর্ণমেন্ট আজিমুদ্দৌলাকে স্বাধীন রাজা ও কর্ণাটের সুবাদার বলিয়া ঘোষণা করেন *। অধিকন্তু আজিমুদ্দৌলার পরেও ব্রিটিশ গবর্ণমেন্ট অসম্মুচিতচিত্তে কতিপয় ব্যক্তিকে আর্কটের নবাব বলিয়া স্বীকার করিয়াছেন। কিন্তু লর্ড ডালহৌসী এ সকল বিবেচনা করিলেন না। তিনি ১৮৫৩ অব্দে যে নিয়মে নিজামের নিকট হইতে বেরার গ্রহণ করিয়া ব্রিটিশ রেসিডেন্টের হস্তে সমর্পণ করেন, সেই নিয়মেই যে, লর্ড ওয়েলেস্লি ১৮০১ অব্দে আজিমুদ্দৌলার হস্ত হইতে কর্ণাটের দেওয়ানী ও ফৌজদারী ক্ষমতা গ্রহণ করেন, তাহাও তিনি বুঝিলেন না †। ডালহৌসী ১৮০১ অব্দের সন্ধির উচ্ছেদ পূর্বক আর্কটের সিংহাসনে কুঠারাঘাত করিলেন ; বিলাতের ডিরেক্টরগণ এই নির্দয় কার্যের অনুমোদন করিতে সক্ষুচিত বা ব্যথিত হইলেন না ‡। আজিমজা ও তৎপরিবারগণ বার্ষিক দেড়লক্ষ টাকা পেঙ্গন লইয়া মাদ্রাজ প্রেসিডেন্সির সম্রাজ্ঞ সম্প্রদায়ে নিবিষ্ট হইলেন *। রাজ্যের সহিত তাঁহাদের রাজ সম্মান ও রাজ উপাধি অতীত কালে বিলীন হইল।

মোগল সম্রাট আওরঙ্গজেবের সমকালে তাজোর রাজ্য হিন্দু নরপতি-

* Carnatic Papers, 1861, p. 126.

† ব্রিটিশ গবর্ণমেন্ট বেরারের স্থায় কর্ণাটের শাসনভারও প্রতিভূ স্বরূপ আপনাদের হস্তে লইয়াছিলেন। লর্ড ক্লাইব ১৮০১ অব্দের ৩১ জুলাইর ঘোষণাপত্রে স্পষ্ট উল্লেখ করিয়াছিলেন, —“গবর্ণমেন্ট বর্তমান সন্ধির নিয়মানুসারে পবিত্র প্রতিভূত গ্রহণ পূর্বক কর্ণাটের অধিবাসীদিগকে সন্তুষ্টিতে কোম্পানীর আনুগত্য স্বীকার করিতে আহ্বান করিতেছেন।” Carnatic Papers, 1861, p. 105, Comp. Empire in India, p. 93.

* A collection of Treaties. Vol. III, p. 184.

১৮৫৫ খ্রীঃ অব্দ ।

দিগের শাসন-ভ্রষ্ট হইয়া মহারাষ্ট্রীয়দিগের হস্তগত হয়। ১৭৯৯ অব্দে তাঞ্জোরের মহারাষ্ট্রপতি সরফজী সন্ধিতে বাধ্য হইয়া নিজের আবাস-দুর্গ ও তৎসন্নিহিত স্থান ব্যতীত, সমস্ত বিষয়ের শাসন-কমতা ব্রিটিশ গবর্ণমেন্টের হস্তে সমর্পণ করেন। ১৮৩২ অব্দে সরফজীর মৃত্যু হইলে তাহার একমাত্র পুত্র শিবজী তাঞ্জোরের সিংহাসন অধিকার করেন। ১৮৫৫ অব্দের ২৯এ অক্টোবর শিবজী দুইটি কত্ম রাখিয়া পরলোক-গত হন।

শিবজীর জ্যেষ্ঠা কত্মা তখন মৃত্যুদশায় উপনীত হইয়াছিলেন, সুতরাং তাঞ্জোরের ব্রিটিশ রেসিডেন্ট ফরব্‌স্ সাহেব শিবজীর দ্বিতীয় কত্মাকে সিংহাসন দিবার প্রস্তাব করেন। পুরুষের অভাবে স্ত্রী যে, সিংহাসনের অধিকারিণী হইতে পারে, রেসিডেন্ট প্রমাণ দিয়া তাহার সমর্থন করেন। ইহার উদাহরণ স্থলে ১৭৩৫ অব্দের ঘটনার উল্লেখ করা হয়। এই অব্দে অস্ত্র কোন উত্তরাধিকারী না থাকাতে তাঞ্জোরের বিধবা রাণী ভর্তার সিংহাসনে অধিরোধ করিয়াছিলেন।

লর্ড ডালহৌসী এই সময়ে শৈল-বিহার, পরিত্যাগ করিয়া নীলগিরি হস্তে কলিকাতায় আসিতেছিলেন, যে দিন মাদ্রাজের শাসনসংক্রান্ত বিষয় তাঞ্জোরের বিষয়ে তর্ক হয়, সে দিন তিনি তথায় উপস্থিত ছিলেন। সভা রেসিডেন্টের প্রস্তাব অগ্রাহ্য করেন। ডালহৌসী কলিকাতায় প্রত্যাবর্তিত হইলে এবিষয় প্রধানতম শাসন-সমিতিতে উপস্থিত হয়। গবর্ণর-জেনারেল মাদ্রাজ-শাসন-সমিতির সমর্থন করেন, সুতরাং মার্কার্টের স্থায় তাঞ্জোরের রাজ-সিংহাসন ও রাজকীয় কমতাও শিবজীর সহিত অন্তর্ভুক্ত হয়।

প্রসঙ্গক্রমে এই অধ্যায়ে আরও একটী উত্তরাধিকারি-শুল্ক কৃত্ত রাজ্যের বিবরণ লিপিবদ্ধ হইতেছে। উহার সহিত রাজনীতির তাদৃশ সংক্রান্ত সন্দেহ নাই; সুতরাং অতি সংক্ষেপে ঐ বিষয় লিখিত হইলেই বর্তমান গ্রন্থের উদ্দেশ্য সাধিত হইবে।

বঙ্গদেশের দক্ষিণ পশ্চিম সীমায় সঞ্চলপুর বিভাগ অবস্থিত। উহা

১৮৪৯ খ্রীঃ অব্দ।

পূর্বে নাগপুর রাজ্যের অন্তর্ভুক্ত ছিল; কালক্রমে ভোঁসলাবংশীয়গণ উহার স্বত্ব পরিত্যাগ করিলে ব্রিটিশ গবর্ণমেন্ট উহা সঞ্চলপুরের অন্ততম প্রাচীন রাজার বংশধরকে দান

করেন। ১৮৪২ অব্দে এই বংশের অন্ততম রাজা নারায়ণ সিংহের পর-লোকপ্রাপ্তি হয়। ইহার কোনও পুত্রসন্তান ছিল না, কোনও বনিষ্ঠ আত্মীয় বর্তমান ছিল না, কোনও বিধিসিদ্ধমন্তকও উপস্থিত ছিল না। সুতরাং সত্বলপুরের গদি প্রার্থি-শূন্য হইয়া পড়িয়া রহিল। ভারতবর্ষ ও বিলাতের কর্তৃপক্ষ অল্পমাত্র বিতর্ক না করিয়া আদেশ-লিপি প্রচার করিলেন, নিরীক্সবাদের ও নিকটকে সত্বলপুর ব্রিটিশ গবর্ণমেন্টের অধিকার-ভুক্ত হইল।

লর্ড ডালহৌসী কেবল পররাজ্য গ্রহণ করিয়াই নিবৃত্ত হন নাই, কেবল রাজ-সম্মান ও রাজ-পদ লোপ করিয়াই জগতের সমক্ষে আপনার কঠোর নীতির পরিচয় দেন নাই। রাজ্যগ্রহণ ও রাজসম্মান লোপের স্থায় অস্থাবিধ কার্যোও তাঁহার কাঠিন্দ প্রকাশ পাইয়াছে। বিজয়-লক্ষ্মীর প্রসাদ বলিয়া ষাঁহাদের রাজ্য গ্রহণ করা হইয়াছে, ষাঁহার রাজ্য-ভ্রষ্ট—শ্রী-ভ্রষ্ট হইয়া ব্রিটিশসিংহের আশ্রয় লইয়াছেন, কেবল তাঁহাদের জগ্গই ডাল-হৌসীর এই শেখোক্ত কঠোর কার্য অল্পশ্রিত হয়। বর্ণনীয় ইতিহাসের অনুরোধে এই শ্রেণীর একটি কার্য অপেক্ষাকৃত বিস্তারিতরূপে লিখিত হইতেছে।

ভারতের ইতিহাসে সেতারা, নাগপুর ও পূনা, এই তিন স্থানের মহারাষ্ট্র-

১৮১৮ খ্রী: অব্দ।

বংশ সর্বেশেষ প্রসিদ্ধ। লর্ড ডালহৌসীর সংহারিণী নীতির প্রভাবে প্রথম দুইটির রাজত্ব ও রাজ-সম্মান যেক্রমে বিনষ্ট হয়, তাহা যথাস্থলে যথায়থ বর্ণিত হইয়াছে। তৃতীয়টির রাজ্য ডালহৌসীর বহুপূর্বে ব্রিটিশ কোম্পানির হস্তগত হয়। ১৮১৮ অব্দের ৩রা জুন দ্বিতীয় মহারাষ্ট্র-যুদ্ধের শেষে পূনার প্রসিদ্ধ পেশবা বাজীরাও ব্রিটিশ সেনা-নায়ক স্ত্রী জন মাল্কমের হস্তে আত্মসমর্পণ করেন *। বাজীরাও বীর-ধর্ম—বীর-পদ্ধতি অল্পসারে সমরে দীক্ষিত হইয়াছিলেন, সমর-লক্ষ্মীর প্রসাদ লাভের আশায় অস্ত্র ধারণ করিয়াছিলেন, এবং পরিশেষে সমরে পরাজিত হইলে পলাতক না হইয়া অস্ত্র পরিত্যাগপূর্বক সামরিক নিয়ম অল্পসারে বিজেতার শরণাগত হইয়াছিলেন। বিজেতা পবিত্র সামরিক নিয়মের অবমাননা করেন নাই, পবিত্র বীরধর্মের গৌরব-হারী হন

* The Life and correspondence of Major-General Sir John Malcolm Vol. II., p. 253.

নাই। তিনি যুদ্ধ-কুশল শরণাগত শত্রুর শিবিরে যাইয়া তাঁহাকে বন্ধুভাবে আলিঙ্গন করেন এবং বন্ধুভাবে তাঁহার দশাবিপর্যায় সমবেদনা প্রদর্শন করেন। বাজী রাও এই রূপে পরাজিত ও সন্ধি-বদ্ধ হইয়া পুনায় সমুদয় স্বয়ং ও রাজকীয় ক্ষমতা পরিত্যাগ পূর্বক আপনার ও পরিবারগণের ভরণ-পোষণনির্বাহার্থ নির্দিষ্ট বৃত্তি-ভোগী হইতে প্রতিশ্রুত হন, মালুকমও সৌজন্ত, উদারতা ও সমবেদনার অনুরোধে পেশবার ঐ বৃত্তি বাষিক ৮ লক্ষ টাকা নির্দ্ধারিত করিতে গবর্ণমেন্টকে অনুরোধ করেন *।

বার্ষিক ৮ লক্ষ টাকা অধিক হইয়াছে বলিয়া অনেকেই শ্রী জন মালুকমের প্রতি দোষারোপ করেন, কিন্তু মালুকম উহাতে কর্ণপাত করেন নাই। তিনি দোষারোপকারীদিগের বাক্যের উত্তরদান-স্থলে স্পষ্টাক্ষরে উল্লেখ করিয়াছেন:—“যেসমস্ত রাজা বিশ্বাসঘাতকতা প্রভৃতি দোষে আপনাদের রাজ্য ও রাজকীয় ক্ষমতা, সমস্তই ব্রিটিশ গবর্ণমেন্টের হস্তে সমর্পণ করিতে বাধ্য হইয়াছেন, তাঁহাদের অপরাধের প্রতি দৃষ্টিপাত না করিয়া বিশিষ্ট সৌজন্ত প্রদর্শন করাই গবর্ণমেন্টের চিরন্তন নীতি। ভারতবর্ষে প্রথমে প্রবেশ করিয়াই গবর্ণমেন্ট এই নীতির অনুসরণ পূর্বক কার্য করিয়া আসিতেছেন। এইরূপ কার্য, সকল শ্রেণীর লোকদিগকেই নির্বিবাদে গবর্ণমেন্টের শাসনাধীন করিয়া মহৎ ফল প্রসব করে। আমি আহ্লাদসহকারে নির্দেশ করিতেছি যে, এই প্রকার কার্যে যে সৌজন্ত প্রদর্শিত হয়, তাহা অল্প অপেক্ষা ভারতে ব্রিটিশ ক্ষমতা দৃঢ়তর করিয়া থাকে। বস্তুতঃ এতদ্বারা মনের উপর আধিপত্য প্রসারিত হয়, এবং যাহারা ভারতবর্ষীয় আচার ও কুসংস্কারে আচ্ছন্ন হইয়া রহিয়াছে, তাহাদের মধ্যে ইহা অদৃষ্টভাবে গণনা-তীত সফল উৎপাদন করিয়া থাকে †”। এই সদাশয় বোদ্ধার মহৎ বাক্য অনাদৃত হয় নাই; মাউন্টষ্টুয়ার্ট এলফিন্‌ষ্টোন, ডেবিড অক্টরলোনি এবং তমাস্ মনরোর জ্ঞান শাসন-ক্ষম, রাজনীতিজ্ঞ ও যুদ্ধবীরগণ মালুকমের পোষকতা করিয়া আপনাদের উদারতার পরিচয় দিয়াছিলেন।

* A collection of Treaties Vol. III. p. 99, Comp. Life of Sir John Malcolm. Vol, II. p. 248. British India its Races and its History. Vol. 11, p. 30.

† Kaye's Sepoy War. Vol. 1. p. 99.

এইরূপে পেশবা বাজী রাওর অধঃপতন হইল—এইরূপে বাজী রাও আপনার রাজকীয় ক্ষমতা পরিত্যাগ পূর্বক বাৰ্ষিক ৮ লক্ষ টাকা পেছন্ গ্রহণ করিয়া নিৰ্জনবাসে অহুমতি পাইলেন। কাণপুরের প্রায় বার মাইল দূরবর্তী বিঠুর নামক স্থানে তাঁহার আবাস-স্থল নিরূপিত হইল। বাজী রাও স্বগণসমভিব্যাহারে ঐ স্থানে যাইয়া গঙ্গার পবিত্র তটে জীবনের শেষ অংশ অতিবাহিত করিতে প্রবৃত্ত হইলেন। বহুসংখ্য মহারাষ্ট্রীয় তাঁহার অনুবর্তী হইল, বহুসংখ্য দাসদাসী আসিয়া বিঠুরের আবাসগৃহ পরিপূর্ণ করিতে লাগিল। গবর্ণমেন্ট বাজীরাওকে বিঠুরে একটি জাটগীর দিলেন। ১৮৩২ অব্দের ব্যবস্থা অনুসারে ঐ জাইগীরের অধিবাসিগণ গবর্ণমেন্টের দেওয়ানী ও ফৌজদারী শাসন হইতে বিমুক্ত হইল *। বাজী রাও এইরূপে জাইগীর লাভ পূর্বক অনুচরগণে পরিবৃত্ত হইয়া অবস্থিতি করিতে লাগিলেন।

ব্রিটিশ গবর্ণমেন্ট বাজী রাওকে এইরূপ দলবদ্ধ দেখিয়া কিছু শঙ্কান্বিত হইলেন, তদানীন্তন সময়ে সৰ্বত্র শান্তি ছিল না; সুতরাং মহারাষ্ট্রীয়দিগের শ্রায় এক দল যুদ্ধ-কুশল ব্যক্তি একত্র অবস্থিতি করিলে যদি কোন অনর্থ ঘটে, এই ভাবিয়া গবর্ণমেন্ট কিছু সতর্ক হইলেন; কিন্তু ভূতপূর্ব পেশবার বিশ্বস্ততা অটল ভাবে রহিল, তাঁহার অনুচরগণও প্রভুব শ্রায় নিরীহভাবে ও সন্তুষ্টচিত্তে কালাতিপাত করিতে লাগিল। বাজী রাও ব্রিটিশ গবর্ণমেন্টের সহিত বন্ধুত্বত্রে, এতদূব আবদ্ধ ছিলেন যে, তিনি দুঃসময় উপস্থিত হইলে তাঁহাদের যথাশক্তি সাহায্য করিতেও ক্রটি করিতেন না। যখন আফগানিস্তানের যুদ্ধে ব্রিটিশ গবর্ণমেন্টের কোষাগার শূণ্য হয়, যখন সেই সফটাপুর সময়ে ব্রিটিশ কোম্পানি টাকার অভাবে চারি দিকে দৃষ্টিপাত করেন, তখন বাজীরাও ৫ লক্ষ টাকা ঋণ দিয়া সরল সুহৃৎ-প্রেমের পরিচয় দেন, এবং পরিশেষে যখন পঞ্জাব ব্রিটিশ কোম্পানির বিরুদ্ধে যুদ্ধ-বেশ ধারণ করে, যখন রণভূমিদ খালসা সৈন্য ব্রিটিশ রাজ্য আক্রমণের অভিপ্রায়ে অসীম সাহসসহকারে শূত্রুপার হয়, তখনও বাজীরাও কোম্পানিকে নিজের ব্যয়ে এক সহস্র অশ্বরোহী ও এক সহস্র পদাতিক সৈন্য দিয়া আপনার সদাশয়তা ও বিশ্বস্ততা প্রদর্শন করেন।

এইরূপ সৌজন্ত ও এইরূপ বন্ধুত্ব দেখাইয়া বাজী রাও ব্রিটিশ

* A collection of Treaties. Vol III., p. 9.

গবর্ণমেন্টের নিতান্ত প্রিয় পাত্র হইয়া উঠিলেন। তিনি যে, এক সময়ে পুনার অধিষ্ঠাত্রী দেবতা ছিলেন, এক সময়ে যে, তাঁহার দোর্দণ্ড প্রতাপে সমগ্র পশ্চিমভারতবর্ষ কম্পিত হইত, তাহা তিনি সমস্ত বিস্মৃত হইলেন। যে ব্রিটিশ কোম্পানি এক সময়ে তাঁহার ভয়ে সশঙ্ক থাকিতেন, এক্ষণে তিনিই সেই ব্রিটিশ কোম্পানির আশ্রয়ে থাকিয়া সুসময়ে হুঃসময়ে তাঁহাদের ভুক্তি সম্পাদন করিতে লাগিলেন, সুসময়ে হুঃসময়ে তাঁহাদের সাহায্য করিয়া স্ক্লেং-মৌজ্ঞের পরিচয় দিতে লাগিলেন। সে সাহস, সে বীর্যবত্তা, সে রণোন্মাদ বিগত সময়ের সহিত মিশিয়া গেল। বাজী রাও পবিত্র গঙ্গার তটে পবিত্র-স্বভাব, সংঘতচিত্র তপস্বীর শ্রায় কালাতিপাত করিতে লাগিলেন।

বাজী রাওর অর্থের অভাব ছিল না। বিঠুরের জাইগীর ও বার্ষিক ৮ লক্ষ টালা রুত্তি পাটয়া তিনি অনেক ঐশ্বৰ্য্যের অধিপতি হইয়াছিলেন। কিন্তু এই ঐশ্বৰ্য্যের উত্তরাধিকারী হইল না। সকলেই ভাবিতে লাগিল, বাজী রাও যখন অপুত্রক অবস্থায় লোকাস্থর-গত হইবেন, তখন কে এই ধন ভোগ করিবে। কাহার হস্তে এই অর্থরাশি সংরক্ষিত হইবে? বাজী রাওরও এই রূপ ভাবনা হইল। বাজীরাও অবিলম্বে দত্তক পুত্র-গ্রহণ পূর্বক স্বীয় বংশ ও সম্পত্তি রক্ষা করিবার উপায় বিধান করিলেন। মৃত্যুর কয়েক বৎসর পূর্বে বাজী রাও স্বীয় দত্তক পুত্রকে পেশবা উপাধি ও বার্ষিক রুত্তির বিধিসম্মত উত্তরাধিকারী বলিয়া স্বীকার করিতে ব্রিটিশ গবর্ণমেন্টের নিকট আবেদন করিলেন। আবেদন অগ্রাহ হইল; কিন্তু ইহাতে বাজী রাওর সমুদয় আশাভরসা বিলুপ্ত হইল না। ব্রিটিশ কোম্পানি সংক্ষিপ্তভাবে এই কথা বলিলেন যে, তাঁহারা বিবেচনা

* শ্রীর চার্লস জায়নের মতে বাজী রাও দুই জনকে দত্তক পুত্র করেন। A Vindication p. 54. কিন্তু বাজী রাওর উইলের সহিত উহার একতা দৃষ্ট হয় না। উইল অনুসারে বাজী রাওর দত্তক পুত্র তিনটি ও দত্তক পোত্র একটি। বাজীরাও নিজের উইলে লিখিয়াছেন:— “ধনুপস্থ নানা আমার প্রথম পুত্র, গঙ্গাধর রাও আমার সর্ব্ব কনিষ্ঠ ও তৃতীয় পুত্র; এবং সদাশিব পস্থ দাদা আমার দ্বিতীয় পুত্র পাণ্ডুরঙ্গ রাওর পুত্র, এই তিনটি আমার পুত্র ও একটি পোত্র। আমার মৃত্যুর পর আমার সর্ব্বজ্যেষ্ঠ পুত্র ধনুপস্থ নানা মুখ্যপ্রধান হইয়া আমার পেশবার গদির অধিষ্ঠায় অধিপতি হইবে” ইত্যাদি। Ms. Records. Comp. Kaye's Sepoy War. Vol. I, p. 101, note.

করিয়া পেশবার মৃত্যুর পর তদীয় পরিবারবর্গের ভরণপোষণের ব্যবস্থা করিতে পারেন। সুতরাং এ বিষয়ের মীমাংসা ভবিষ্যৎ সময়ের উপর নির্ভর করিয়া রহিল; বাজী রাও এই ভবিষ্যতের উপর নির্ভর করিয়াই সন্তুষ্ট হইলেন। ক্রমে তাঁহার শরীর ভগ্ন ও পক্ষাঘাতগ্রস্ত হইয়া উঠিল, চক্ষু প্রায় দৃষ্টিশূন্য হইয়া পড়িল, বাজী রাও কালবশে ঐহিক জীবনের চরম সীমায় উপনীত হইলেন।

৭৭ বৎসর কাল দেহ-ভার বহন করিয়া বাজীরাও ১৮৫১ অব্দের ২৮এ জানুয়ারি লোকান্তরিত হইলেন। তিনি ১৮৩৯ ১৮৫১ খ্রি: অব্দ।

অর্কে যে উইল করেন, তাহাতে তাঁহার জ্যেষ্ঠ দত্তক পুত্র পেশবার গদি এবং সমস্ত স্থাবর ও অস্থাবর সম্পত্তির অধিকারী বলিয়া স্থিরীকৃত হন। এই জ্যেষ্ঠ দত্তক পুত্র ধন্দুপহু নানা সাহেব নামে প্রসিদ্ধ। যখন বাজীরাওর মৃত্যু হয়, তখন নানা সাহেবের বয়স ২৭ বৎসর। নানা সাহেব শাস্ত্রস্বভাব, মিষ্টভাবী, অমিতাচার-বর্জিত ও ব্রিটিশ কমিশনরের পরামর্শ-গ্রাহী ছিলেন। ব্রিটিশ ঐতিহাসিকের কঠোর লেখনীও তাঁহার গুণগ্রামের প্রশংসাবাদে কাতর হয় নাই*। পিতার মৃত্যুর পর নানা প্রায় ৩০ লক্ষ টাকার অধিকারী হন। তিনি উহার অর্দ্ধাংশেরও অধিক দিয়া কোম্পানির কাগজ ক্রয় করেন†। বাজী রাওর বহুসংখ্য পরিবার ও দাস দাসী ছিল; ইহাদের ভরণপোষণের ভার নানা সাহেবের স্কন্ধেই নিক্ষিপ্ত হয়। নানা সাহেব এজন্ত বাজী রাওর বৃত্তি পাইবার জন্ত ব্রিটিশ গবর্ণমেন্টের উপর নির্ভর করেন। এই সময়ে সুবাদার রামচন্দ্র পহু নামে বাজী রাওর একজন বিশ্বস্ত বন্ধুর হস্তে সমস্ত পারিবারিক কার্যের ভার ছিল। রামচন্দ্র পহু বাজী রাওর সংপরামর্শ-দাতা ও তদীয় অহু-চরবর্গের সংপথ-পরিচালক ছিলেন। রামচন্দ্র পহু এক্ষণে বন্ধু-পুত্রের স্বত্ব-রক্ষার্থ উদ্যত হইলেন। তিনি বিলক্ষণ সৌজন্ত ও সম্মান প্রদর্শন পূর্বক গবর্ণমেন্টের প্রতি নানা সাহেবের অটল বিশ্বাসের বিষয় নির্দেশ করিয়া,

* Kaye's Sepoy War. Vol. I. p. 101. Comp. British India its Races and its History Vol. II. p. 220.

† কমিশনরের রিপোর্ট অনুসারে নানা সাহেব ১৬ লক্ষ টাকার গবর্ণমেন্ট কাগজ, ১০ লক্ষ টাকার মণিমুক্তা প্রভৃতি, ৩ লক্ষ টাকার স্বর্ণ-মুদ্রা, ৮০ হাজার টাকার স্বর্ণভরণ ও ২০ হাজার টাকার রূপার বাসনের অধিকারী হন।

উল্লেখ করেন:—“মাননীয় কোম্পানি যে ভাবে ভূতপূর্ব মহারাজের রক্ষণ ও প্রতিপালন-কার্য্য নিৰ্ব্বাহ করিয়া ছিলেন, তদ্বিবন্ন মনে করিষ্ঠা নানা সাহেব বৰ্ত্তমান বিষয়ে সম্পূর্ণ আশান্বিত ও সৰ্ব্বপ্রকার ভাবনা-শূন্য হইয়াছেন। ব্রিটিশ গবৰ্ণমেন্টের দয়া ও উদারতাই এক্ষণে তাঁহার একমাত্র অবলম্ব হইয়াছে। তিনি গবৰ্ণমেন্টের ক্ষমতা ও অভ্যুদয় দেখিতে সৰ্ব্বদাই ইচ্ছা করেন; ভবিষ্যতেও তাঁহার এই ইচ্ছার কিছুমাত্র ব্যত্যয় হইবে না।”

বিঠুরের ব্রিটিশ কমিশনার * পেশবার পরিবারপক্ষীয়ের প্রার্থনার সমর্থন করিলেন; কিন্তু উহা উর্দ্ধতন কর্তৃপক্ষের অনুমোদিত হইল না। তমাসন সাহেব এই সময়ে উত্তরপশ্চিমাঞ্চলের লেফ্টেনেন্ট গবৰ্ণর ছিলেন। কার্য্যক্রম ও সংস্কারবাহিত বলিয়া বাহিরে তাঁহার প্রতিপত্তি ছিল। কিন্তু তমাসন অভিনব রাজনৈতিক সম্প্রদায়ের পরিপোষক ছিলেন; এজন্য ভারতবর্ষীয় রাজা ও সম্রাট ব্যক্তিগণের প্রতি তাঁহার তাদৃশ সমবেদনা ছিল না। তিনি কমিশনারকে বিঠুরের আবেদনকারীদিগের হৃদয়ে আশা উদ্দীপ্ত করিতে নিবেদন করিলেন। ডালহৌসী এই সময়ে ভারতের গবৰ্ণর-জেনেরল; সুতরাং তমাসনের আদেশ কোথাও প্রতিহত হইল না। অবিলম্বে গবৰ্ণমেন্টের আদেশ-লিপি প্রচারিত হইল। ডালহৌসী এই লিপিতে স্পষ্টাক্ষরে উল্লেখ করিলেন:—“পেশবা ৪৩ বৎসর কাল বার্ষিক ৮ লক্ষ টাকা বৃত্তি ভোগ করিয়াছিলেন, এতদ্ব্যতীত জাইগীরের উপস্বত্ব ছিল। তিনি সেই সময়ে আড়াই কোটি টাকারও অধিক লাভ করিয়াছেন। তাঁহাকে কোন রূপ ব্যয়ভার বহন করিতে হয় নাই। তাঁহার কোন ঔরস পুত্রও বৰ্ত্তমান নাই। তিনি মৃত্যু কালে আপনার পরিবারদিগের জন্য ২৮ লক্ষ টাকার সম্পত্তি রাখিয়া গিয়াছেন। এক্ষণে পেশবার যে সমস্ত আত্মীয় স্বজন বৰ্ত্তমান আছেন, গবৰ্ণমেন্টের বিবেচনা অনুসারে তাঁহাদের কোনও রূপ দাবি নাই। গবৰ্ণমেন্টের দয়ার উপরেও এসময়ে তাঁহারা কোন রূপ দাবি উপস্থিত করিতে পারেন না। কারণ, পেশবা যে সম্পত্তি রাখিয়া

* মূল্য রূপে বলিতে গেলে “দুই জন ব্রিটিশ কমিশনার” এইরূপ লিখিতে হয়। যখন পেশবার মৃত্যু হয়, তখন কর্ণেল মান্দান বিঠুরের কমিশনার ছিলেন। কিন্তু কিছু দিন পরেই তিনি স্থানান্তরিত হন। কাপপুরের তদানীন্তন মাজিষ্ট্রেট মরলাও সাহেব কর্ণেল মান্দানের পদ গ্রহণ করেন। প্রধানতঃ মরলাও সাহেবের উপরেই এই বিষয়ের বিচার-ভার সমর্পিত হয়। Kaye's, Sepy War. Vol. I., p. 102, note 2.

গিয়াছেন, তাহাই তাঁহাদের ভরণপোষণের পক্ষে বথেষ্ট। এক্ষণে যেক্রম বলা হইতেছে, সম্ভবতঃ পেশবা তাহা অপেক্ষা অনেক সম্পত্তি রাখিয়া গিয়াছেন * ।”

এই রূপে নানা সাহেবের পক্ষীয়ের আবেদন বিফল হইল, এই রূপে নানা সাহেব আজীবন পৈতৃক বৃত্তি হইতে বঞ্চিত হইলেন। পেশবা যে আশায় বুক কাঁধিয়াছিলেন, ভবিষ্যতের দিকে চাহিয়া যে আশায় সম্ভ্রু-চিত্ত ছিলেন, স্নহৎপ্রেম, স্নহৎসৌজন্নে বিশ্বাস করিয়া যে আশায় দত্তক পুত্রাদি গ্রহণ করিয়াছিলেন; অদ্য ডালহৌসীর কঠোর লেখনীর আঘাতে সে আশা-মতা ছিন্ন হইল, যিনি কাবুল ও পঞ্জাবের যুদ্ধের সময় ব্রিটিশ কোম্পানিকে অর্থ ও সৈন্য দিয়া পবিত্র মিত্রতার গৌরব রক্ষা করিয়া-ছিলেন, অদ্য ব্রিটিশ কোম্পানি তাঁহার পুত্রকে বৃত্তি হইতে বঞ্চিত করিয়া সেই পবিত্র মিত্রতার গৌরব হরণ করিলেন। গবর্ণমেন্ট পেশবার মৃত্যুর পর তাঁহার বৃত্তিসম্বন্ধে বিচার করিতে প্রতিশ্রুত হইয়া-ছিলেন, এক্ষণে বিশেষরূপে স্নায়সঙ্গত বিচার করিয়া সেই প্রতিশ্রুতি রক্ষা করিলেন। বন্ধুর বিচারে বন্ধু-পুত্র দয়া ও সৌজন্নের অপাত্ন বলিয়া পরি-গণিত হইলেন। ডালহৌসীর মতামুসারে গবর্ণমেন্টের এই আদেশ অবিলম্বে বিঠুরে ঘোষিত হইল। ডালহৌসী তমাসনের মতের অনুমোদন করিয়া নানা সাহেবের বৃত্তিনাত্র বন্ধ করিলেন; তমাসন বিঠুরের জাইগীরের প্রতি হস্তার্পণ করেন নাই; স্তত্রাং উক্ত জাইগীর নানা সাহেবেরই রহিল। ডালহৌসী হহাতে কোন রূপ আপাত্ত করিলেন না। কিন্তু পেশবার সময়ে ঐ জাইগীরের অধিবাসিগণ যে নিয়মে আবদ্ধ ছিল, সে নিয়ম রহিত হইল। গবর্ণমেন্ট ১৮৩২ অব্দের ব্যবস্থা রহিত করিয়া বিঠুরের জাইগীরের অধিবাসীদিগকে দেওয়ানী ও কোজদারী শাসনের অধীন করিলেন † ।

যখন ভারতবর্ষে ধনুপন্থের সমুদয় আশা বিফল হইল, যখন ভারত-

* Letter of Sir H. Elliot, Secretary to the Government of India, to the Governor of the N. W. P., dated 24th September, 1851. বর্ষাৰ্থতঃ বলিতে গেলে হুই লর্ড ডালহৌসীর “মিন্ট”। তখনকার প্রথা অনুসারে পত্রের নাম উত্তরপশ্চিম প্রদেশের লেফটেনেন্ট গবর্ণরের নিকট প্রেরিত হইয়াছিল। A Vindication, p. 56, note.

† A collection of Treaties Vol. III., p. 10.

বর্ষীয় গবর্ণমেন্ট ধন্দু পেষ্টের প্রার্থনা অগ্রাহ্য করিলেন, ১৮৫২ খ্রীঃ অব্দ । তখন ধন্দুপেষ্ট আর ডালহৌসীর গবর্ণমেন্টের দিকে দৃকপাত না করিয়া একবারে বিলাতের ডিরেক্টরসভায় আবেদন করিতে কৃতনিশ্চয় হইলেন । বাজী রাওর জীবদ্দশায় একবার এইরূপ আবেদনের প্রস্তাব হইয়াছিল, সুবাদার রামচন্দ্র পেষ্টের অগ্রতম পুত্র এই আপিল চাণাইবার ভার গ্রহণ করিয়াছিলেন ; কিন্তু কমিশনর তাঁহা-দিগকে এবিষয়ে নিরস্ত করেন । নানা সাহেব এক্ষণে কমিশনরের কথায় কর্ণপাত না করিয়া আপিল করিতে স্থির-প্রতিজ্ঞ হইলেন । অবিলম্বে আবেদন-পত্র প্রস্তুত হইল । প্রচলিত নিয়ম অনুসারে নানা সাহেব উহা ভারতবর্ষীয় গবর্ণমেন্টদ্বারা ডিরেক্টরদিগের নিকট প্রেরণ করিলেন । নানা সাহেব ঐ আবেদনে বিশেষ যুক্তি ও সারণ্যাহিতার পরিচয় দিয়া উল্লেখ করিলেন ;—“মৃত পেশবার বহুসংখ্য পরিবার কেবল ব্রিটিশ কোম্পানির প্রতিশ্রুতির উপর নির্ভর করিয়া রহিয়াছে । স্থানীয় গবর্ণমেন্ট ইহাদের সহিত যে রূপ ব্যবহাব করিয়াছেন, তাহা কেবল সমবেদনার হানিকর হয় নাই, একটি প্রাচীন রাজবংশের প্রতিনিধির প্রাপ্য স্বত্বেরও বিরোধী হইয়াছে । আবেদনকারী এই জগৎ কেবল সন্ধির উপর নির্ভর করিয়া আপনাদের নিকট সুবিচার-প্রার্থী হইয়া উপস্থিত হইতেছে না, ব্রিটিশ কোম্পানি মহারাষ্ট্রসাম্রাজ্যের শেষ অধিপতির নিকট হইতে যে কিছু উপকার পাইয়াছেন, অংশতঃ তাহার উপর নির্ভর করিয়াও এই আপিল করিতে প্রবৃত্ত হইয়াছে” । ইহার পর আবেদনকারী নির্দেশ করেন যে, পেশবা যখন আপনার উত্তরাধিকারিগণের প্রতিনিধি-স্বরূপ হইয়া স্বীয় রাজ্য ব্রিটিশ কোম্পানির নিকট বিক্রয় করিয়াছেন, তখন কোম্পানি, পেশবা ও তাঁহার উত্তরাধিকারীদিগকে তাহার মূল্য দিতে অবশ্যই বাধ্য । এই বিধিবন্ধন যদি এক দিকে স্থায়ি হয়, তাহা হইলে অপর দিকেও উহার স্থায়িৎসম্পাদন বিধেয়” । পরে সন্ধিপত্রোক্ত “পরিবার” শব্দের ব্যাখ্যা করা হয় । কোম্পানি যে সন্ধিপত্র অনুসারে পেশবার রাজ্যগ্রহণ পূর্বক তাঁহার ও তৎপরিবারগণের ভরণ-পোষণার্থ নির্দিষ্ট বৃত্তি দিতে প্রতিশ্রুত হন, সেই আবেদনপত্রের “পরিবার” শব্দ যে, বংশানুক্রমিক উত্তরাধিকারীর পরিচায়ক, তাহা আবেদনকারী স্পষ্ট রূপে প্রতিপন্ন করেন । এই রূপ কারণ প্রদর্শনের পর নানা

সাহেব ইতিহাসের আশ্রয় গ্রহণ করিয়া উল্লেখ করেন, “কোম্পানি অন্তান্ত রাজবংশীয়দিগের সহিত পেশবার পরিবারবর্গের যেরূপ ইতরবিশেষ করিয়াছেন, তাহা মনে হইলে হতবুদ্ধি হইতে হয়। মহীশূরের শাসন-কর্ত্তা কোম্পানির প্রতি বিশিষ্ট শত্রুতা প্রদর্শন করেন। যে সমস্ত রাজার সাহায্যে সেই ক্রুর-প্রকৃতি শত্রু পরাজিত হয়, আবেদনকারীর পিতা তাঁহাদের অন্ততম। যখন অসি-হস্তে সেই অধিপতির পতন হয়, তখন কোম্পানি তাঁহার বংশধরদিগের মধ্যে কোন রূপ ইতরবিশেষ না করিয়া সকলকেই বাস-স্থান দেন এবং সকলকেই সমান ভাবে ভরণপোষণোপযোগী বার্ষিক বৃত্তি প্রদান করেন। কোম্পানি দিল্লীর সম্রাটের সহিতও এইরূপ, বরং ইহা অপেক্ষা অধিকতর সদয়ভাবে ব্যবহার করিয়াছেন। এই অধিপতি পদচ্যুত হইয়া কারারুদ্ধ হইয়াছিলেন, কোম্পানি তাঁহাকে বিমুক্ত করিয়া রাজচিহ্ন সমর্পণ পূর্বক পর্য্যাপ্ত পরিমাণে বৃত্তি দিতে ক্রটি করেন নাই। সম্রাটের বংশধরগণ এক্ষণ পর্য্যন্ত ঐ বৃত্তি ভোগ করিতেছেন। কিন্তু আবেদনকারীর বিষয়ে এরূপ বৈষম্য প্রদর্শিত হইল কেন? সত্য বটে, পেশবা বহুদিন ব্রিটিশ গবর্নমেন্টের সহিত বন্ধুত্ব-স্বত্রে আবদ্ধ থাকিয়া এবং সেই বন্ধুত্ব সময়ে অর্দ্ধ কোটি টাকার রাজস্ব দিয়া পরিশেষে কোম্পানির বিরুদ্ধে অস্ত্র-ধারণ পূর্বক আপনার সিংহাসন বিপদাপন্ন করিয়াছিলেন। কিন্তু তিনি যখন ব্রিটিশ সেনাপতির প্রস্তাব অনুসারে নির্দিষ্ট নিয়মে আবদ্ধ হইয়াছিলেন, আপনাকে ও আপনার পরিবারবর্গকে কোম্পানির দয়ার উপর স্থাপন করিয়া যখন স্বীয় বহুমূল্য রাজ্য সমর্পণ করিয়াছিলেন, এবং কোম্পানি যখন তাঁহার বংশানুগত রাজ্যের উপস্থিত হইতে লাভবান হইতেছেন, তখন কোন্ বিধান অনুসারে সেই সমস্ত সন্ধির নিয়ম ও রাজচিহ্ন লোপপূর্বক তাঁহার বংশধরদিগকে পেন্সন হইতে বঞ্চিত করা হইল? কিরূপে কোম্পানির বিবেচনায় তাঁহার বংশধরগণের স্বত্ব বিজিত মহীশূর ও কারারুদ্ধ মোগলের বংশধরগণের স্বত্ব অপেক্ষা নূন হইল”? ইহার পর নানা সাহেব আপনাকে যথাবিধিগৃহীত দত্তক বলিয়া প্রতিপন্ন করেন, এই রূপ দত্তক পুত্র যে, ঔরস পুত্রের ত্রায় পিতার সমস্ত বিষয়ের “অধিকারী হইতে পারে, ব্রিটিশ কোম্পানিও যে, এই দত্তক-পুত্রাধিকারের বৈধতা স্বীকারে বাধ্য, বিশেষ করিয়া তদ্বিষয়ের সমর্থন করেন। /

ইহার পর নানা সাহেব অল্প একটি বিষয়ের বিচারে প্রবৃত্ত হন।

বাজী রাও নিজের পেন্সন্ বাঁচাইয়া অনেক সম্পত্তি রাখিয়া গিয়াছেন, সুতরাং তাঁহার উত্তরাধিকারীকে কোনরূপ পেন্সন্ দেওয়া নিরর্থক, এই আপত্তির সম্বন্ধে নানা সাহেব ঘণার সহিত বলেন:—“ভূতপূৰ্ণ পেশবা স্বীয় পেন্সন্ হইতে পরিবারবর্গের ভরণপোষণোপযোগী অনেক অর্থ রাখিয়া গিয়াছেন, একরূপ মনে করা বর্তমান ব্যাপারের বিষয়ীভূত হইতে পারে না, এবং ব্রিটিশ ভারতের ঐতিহাসিক ঘটনাবলী হইতেও উহার দ্বিতীয় উদাহরণ সংগ্রহ করা যাইতে পারে না। ব্রিটিশ গবর্ণমেন্ট সন্ধি অনুসারে ভূতপূৰ্ণ পেশবা ও তৎপরিবারবর্গের ভরণপোষণার্থ বার্ষিক ৮ লক্ষ টাকা দিতে প্রতিশ্রুত হইয়াছেন। পেশবা ঐ বৃত্তির কত অংশ ব্যয় করিয়াছেন, ব্রিটিশ গবর্ণমেন্টের তাহার অনুসন্ধান করিবার কোনও প্রয়োজন নাই। পেশবাও কোন রূপ নির্দিষ্ট নিয়মে বাধ্য হইয়া ঐ বৃত্তির প্রত্যেক ভগ্নাংশ ব্যয় করিতে প্রতিশ্রুত হন নাই। আবেদনকারী সাহসসহকারে জিজ্ঞাসা করিতেছে, ব্রিটিশ গবর্ণমেন্টের যে সমস্ত বৃত্তিভোগী কর্মচারী আছে, তাহাদের পেন্সনের টাকা কি পরিমাণে ব্যয়িত ও কি পরিমাণে উদ্ধৃত হয়, তাহা কি গবর্ণমেন্ট জিজ্ঞাসা করিতে পারেন? সন্ধিবদ্ধ ব্যক্তিদিগের পেন্সনের টাকা অধিক পরিমাণে উদ্ধৃত হইয়াছে মনে করিয়া কি, তাঁহাদের সম্মানগণের পেন্সন্ বন্ধ করা যুক্তিসঙ্গত? যে একজন ভারতবর্ষীয় রাজ্যাধিপতি—একটি প্রাচীন রাজবংশধর গবর্ণমেন্টের দয়া ও শ্রায়-পরতার উপর নির্ভর করিয়া রহিয়াছেন, তাঁহাকে কি গবর্ণমেন্টের কর্মচারী অপেক্ষা হীনতর বিবেচনা করা উচিত? যদি এ বিষয়ে ব্রিটিশ গবর্ণমেন্টের কোন রূপ ভ্রমাত্মক সংস্কার থাকে, তাহা হইলে আবেদনকারী তাহার উন্মূলন জন্ত বিশিষ্ট সম্মানসহকারে নির্দেশ করিতেছে যে, ১৮১৮ অব্দের সন্ধি অনুসারে, কেবল পেশবা ও তৎপরিবারবর্গের ভরণপোষণার্থ বার্ষিক ৮ লক্ষ টাকা বৃত্তি নির্দ্ধারিত হয় নাই, প্রত্যুত যে সমস্ত বিশ্বস্ত অনুচর নির্জনপ্রবাসী পেশবার অনুগামী হয়, তাহাদের জীবিকানির্বাহার্থও উহা নিরূপিত হইয়াছিল। গবর্ণমেন্ট বিলক্ষণ জানিতেন, পেশবার যেরূপ সঙ্কীর্ণ আয়, তাহাতে তাঁহার বহুসংখ্য পরিবারের সঁম্পোষণ হইত না। অধিকন্তু ভারতবর্ষীয় রাজগণ যদিও ক্ষমতা-শূন্য হউন, তথাপি তাঁহাদিগকে মানসম্মত রক্ষা করিয়া চলিতে হয়; যদি এটি বিবেচনা করা যায়, তাহা হইলে স্পষ্ট বোধ হইবে যে, পেশবা বার্ষিক ৩৪ লক্ষ টাকা আয়ের ভূসম্পত্তি দিয়া, বার্ষিক যে

৮ লক্ষ টাকা পেমন্ট পাইয়াছিলেন, তাহা হইতে যাহা বাঁচাইয়াছেন, তাহা অধিক হইবে না। পেশবা অভি সাবধানে স্বীয় সম্পত্তি বাঁচাইয়া যে কোম্পানির কাগজ করেন, তাঁহার মৃত্যু কালে তাহা বার্ষিক ৮০ হাজার টাকা আয়ের হইয়াছে। এইরূপ পরিণাম-দৃষ্টি ও পরিমিত ব্যয় কি তাঁহার মহাপাপস্বরূপ হইয়াছিল? এই পাপে কি তাঁহার পরিবারবর্গ সঙ্কি-নির্দিষ্ট বৃত্তি হইতে বঞ্চিত হইবেন * ?”

কিন্তু এইরূপ যুক্তি, এইরূপ বিচার-প্রণালী ও এইরূপ লিপি-কৌশল ইঙ্গলণ্ডে কোনও সুফল উৎপাদনে সমর্থ হইল না। ডিরে-
১৮৫৩ খ্রীঃ অব্দ।
ক্টরগণ কঠোর পরীক্ষার জায় অটল হইয়া রহিলেন; ছন্দুপেছের কাতর প্রার্থনার তাঁহাদের হৃদয় কোমল হইল না। তাঁহারা পূর্বেই ডালহৌসীর মতের অনুমোদন করিয়াছিলেন; ১৮৫২ অব্দের ১৯এ মে এ বিষয়ে তাঁহাদের যে লিপি প্রচারিত হয়, তাহাতে স্পষ্ট উল্লেখ ছিল:—
“আমরা সম্পূর্ণরূপে গবর্নরজেনারেলের নিষ্পত্তির অনুমোদন করিয়া নির্দেশ করিতেছি যে, ব্রিটিশ গবর্নমেন্টের উপর বাজী রাওর দত্তক পুত্র বা পোষাবর্গের কোন রূপ দাবি নাই। ভূতপূর্ব পেশবা ৩৩ বর্ষকাল পেমন্ট পাইয়া সে সমস্ত সম্পত্তি রাখিয়া গিয়াছেন, তাহাতেই তাঁহার পরিবার ও পোষাবর্গের পর্যাপ্তপরিমাণে জীবিকা-সংস্থান হইতে পারিবে +।” যাহা এই রূপ কাঠিন্ত প্রদর্শন করিয়া লর্ড ডালহৌসীর রাজনীতির অনুমোদন করিলেন, তাঁহাদের নিকটেই পুনর্বার নানা সাহেবের আবেদন-পত্র উপস্থিত হইল। ডিরেক্টরগণ আবেদনপত্র পাইয়া ভারতবর্ষীয় গবর্নমেন্টকে লিখিলেন, “আবেদনকারীকে যেন জানান হয় যে, তাঁহার পিতার বৃত্তি পুঙ্খানুপুঙ্খিক নয়, সুতরাং উহাতে তাঁহার কোন রূপ দাবি নাই। তাঁহার আবেদন-পত্র সম্পূর্ণ রূপে অগ্রাহ হইল।” এই কঠোর উত্তর বিঠুরে পল্ল ছিবার পূর্বেই নানা সাহেব নিজের স্বল্পসমর্থনজনক বিলাতে এক জন দূত পাঠাইয়াছিলেন। এই দূত পূর্বকার প্রাচীন মহারাজীয় সুবাদারের পুত্র নহেন; ইনি এক জন সুগঠিত, সুজ্ঞী, দীর্ঘকায় ইঙ্গরেজী ভাষাভিজ্ঞ মুসলমান যুবক! ইহার নাম আজিমুল্লা খাঁ। ১৮৫৩ অব্দের গ্রীষ্মকালে

* Ms. Records. Comp. Kaye's Sepoy War. Vol. I., p. 104-108.

† The Court of Directors to the Government of India. Ms.

আজিমুল্লা ইঙ্গলণ্ডে উপস্থিত হইয়া বিডল্ নামে এক জন ইঞ্জরেজের সাহায্যে নানা সাহেবের পক্ষসমর্থনে প্রবৃত্ত হইলেন, কিন্তু কৃতকার্য হইতে পারিলেন না। ডিরেক্টরদিগের আদেশ পূর্বেই প্রচারিত হইয়াছিল। আজিমুল্লা যথাসাধ্য উদ্যোগ, কৌশল ও চেষ্টা করিলেন, কিছুতেই তাহা বিপর্যস্ত করিতে পারিলেন না।

এই রূপে নানা সাহেবের সমুদয় আশা উন্মূলিত হইল, এই রূপে বাজী-রাওর পরিবারবর্গ ব্রিটিশ কোম্পানির অনুরূপে বঞ্চিত হইলেন। বাজী রাও অগ্নানবদনে ষাঁহাদের দয়ার উপর নির্ভর করিয়াছিলেন, অগ্নানবদনে ষাঁহাদের হস্তে স্বীয় বহুমূল্য রাজ্য সমর্পণ পূর্বক নির্জন-বাসী হইয়াছিলেন, এক্ষণে তাঁহারাই অসঙ্কুচিতহৃদয়ে সন্ধিনির্দিষ্ট বৃত্তি বন্ধ করিলেন। একজনের নিকট হইতে বার্ষিক ৩৪ লক্ষ টাকা আয়ের ভূসম্পত্তি প্রাপ্ত হইয়া তাহার নিমিত্ত বার্ষিক ৮ লক্ষ ব্যয় করা এক্ষণে কোম্পানির নিকটে মহাপাপস্বরূপ পরিগণিত হইল। ব্রিটিশ কোম্পানি এই পাপের ভয়ে সঙ্কুচিত হইলেন নানা সাহেব কোম্পানিকে এই পাপে প্রবর্তিত করিতে উদ্যত হইয়াছিলেন বলিয়া বিলাতে দূত পাঠাইয়া প্রায়শ্চিত্ত করিলেন।

এদিকে আজিমুল্লা খাঁ বিলাতে বার্থ-মনোরথ হইয়া স্বীয় অভিলাষানুরূপ ভোগসুখে আসক্ত হইলেন। তাঁহার দেহ-সৌন্দর্য্য ও বেশপরিপাট্য প্রভৃতি ঐ সুখের পথ উন্মুক্ত করিয়া দিল। আজিমুল্লা পরিচ্ছিন্নবেশে ও পরিচ্ছিন্নভাবে ইঙ্গলণ্ডের প্রধান প্রধান বিলাস-সমিতিতে গমনাগমন করিতে লাগিলেন। তাঁহার সদানন্দ ভাব ও গঠন-মহিমায় অনেকেই তৎপ্রতি আকৃষ্ট হইলেন, ইঙ্গলণ্ডের কামিনী-কুলও এই আকর্ষণের হস্ত হইতে পরিভ্রাণ পাইলেন না। তাঁহাদের বিশেষ অনুরূপে আজিমুল্লার দেহ-লক্ষ্মী অধিকতর গৌরবান্বিত হইয়া উঠিল। ইঙ্গলণ্ডে আজিমুল্লার বধন এইরূপ সৌভাগ্য, ইঙ্গলণ্ডীয় মহিলামণ্ডলীর অনুরূপে আজিমুল্লা যখন এইরূপ গৌরবান্বিত, তখন অল্প এক ব্যক্তি পদচূত সেতারারাজের দূত স্বরূপ হইয়া ব্রিটিশ রাজধানীতে অবস্থিতি করিতেছিলেন; ইনি এক জন মহারাজীয়, নাম রঙ্গ বাপাজী। রঙ্গবাপাজী দূতসমূহের আদর্শস্থানীয়; ইহার শ্রায় কর্তব্যনিষ্ঠ, স্থিরবুদ্ধি ও স্থিরপ্রতিজ্ঞ দূত প্রায় দেখা যায় না। ইনি বিশেষ উদ্যোগ, পরিশ্রম ও অধ্যবসায়সহকারে সেতারারাজের স্বত্বসমর্পনে

প্রবৃত্ত হইলেন ; কিন্তু ঐ উদ্‌যোগ পরিশ্রম ও অধ্যবসায় সফল হইল না । রঙ্গ বাপাজীর প্রগাঢ় বৈষয়িক জ্ঞান ও প্রগাঢ় কর্তব্যনিষ্ঠায় ইঙ্গলণ্ডীয় বিচারকগণের হৃদয় আকৃষ্ট হইল না । ১৮৫৩ অব্দের শরৎকালে আজিমুল্লা ও রঙ্গ বাপাজী, উভয়েই কার্য্যসিদ্ধিতে নিরুৎসাহ হইলেন, উভয়েই অকৃতার্থ হইয়া পরস্পর একতাসূত্রে সম্বন্ধ হইলেন । ধর্ম্ম, জাতি ও ব্যবহার-বৈসাদৃশ্যে উভয়ের এই সমবেদনার ব্যত্যয় হইল না । একপ্রকার সম্বন্ধ ও এক প্রকার অকৃতকার্য্যতা উভয়কেই এই দূরতর দেশে ঘনিষ্ঠ সম্বন্ধে আবদ্ধ করিল । ইহার পরস্পর কি বলিয়াছেন, কি করিয়াছেন, ইতিহাসে তদ্বিষয়ের কোনও বিবরণ দৃষ্ট হয় না ; এবিষয়ে ইঙ্গলণ্ডীয় ঐতিহাসিকগণ প্রায়ই নীরবে রহিয়াছেন । বাহাহউক, কিছুদিন পরে মহারাষ্ট্রীয় ও মুসলমান, পরস্পর বিচ্ছিন্ন হইয়া বিভিন্ন দিকে বিভিন্ন পথে ধাবিত হইলেন । প্রথমটি স্বীয় কর্তব্য-নিষ্ঠা ও স্থির বুদ্ধিবলে ইঙ্গলণ্ডীয় লোকের মনে এরূপ অমুরাগ উদ্দীপ্ত করিয়াছিলেন যে, তিনি মোকদ্দমা উপস্থিত করিয়া যাহাদিগকে বিরক্ত করেন, তাঁহারাই তাঁহার সমস্ত ঋণ পরিশোধ করিলেন । রঙ্গ বাপাজী এই রূপে স্বীয় বুদ্ধি-চাতুর্য্যে ইঙ্গলণ্ডীয় লোকের হৃদয় আকর্ষণ করিয়া ইষ্টইণ্ডিয়া কোম্পানির অর্থে বোম্বাইতে উপস্থিত হইলেন * । কিন্তু দ্বিতীয়টি ঐ পথের অনুসরণ করিলেন না । ইঙ্গলণ্ডের বাহু সৌন্দর্য্য তাঁহাকে ইঙ্গলণ্ডেই আবদ্ধ করিয়া রাখিল । আজিমুল্লা প্রিয়তম জন্মভূমির মায়া পরিত্যাগ করিয়া ইঙ্গলণ্ডে প্রফুল্লহৃদয়ে প্রফুল্ল বিলাসি-সমাজে ভোগ-সুখে ব্যাপৃত রহিলেন ।

* রঙ্গ বাপাজী ১৮৫৩ অব্দের ডিসেম্বর মাসে ভারতবর্ষে প্রত্যাবৃত্ত হন । ইষ্ট ইণ্ডিয়া কোম্পানি তাঁহাকে নগদ ২,৫০,০০০ টাকা দিয়া বিনাতাড়ায় পাঠাইয়া দেন । Kaye's Sepoy War, Vol. I., p. 110, note.

সিপাহিযুদ্ধের ইতিহাস ।

সূচনা ।

প্রথম অধ্যায় ।

এছের সূচনা—লর্ড ডালহৌসীর শাসনকাল—প্রথম শিখযুদ্ধ—কম্বুসন্ধি—রাঁচা লাল সিংহের পতন—বাইরাবলসন্ধি—প্রতিনিধি শাসন-প্রণালী—মহারাজী বিন্দনের নির্বাসন—মুলতানের গোলযোগ—দ্বিতীয় শিখযুদ্ধ—পঞ্জাব অধিকার ।

বঙ্গে ব্রিটিশ কোম্পানির অভ্যুদয়-সময়ে অন্ধকূপ হত্যার বিবরণ বড় ভয়ঙ্কর । ঐ সময়ে প্রচণ্ড নিদাঘের গভীর নিশীথে ১২০ জন ইঙ্গ-রেজ একটি স্বল্পায়তন গবাক্ষশূণ্ণ গৃহে, বায়ুর অভাবে জলের অভাবে কালের অনন্ত শয্যায় শায়িত হয় । উহার ঠিক একশত বৎসর পরে আর একটি ভয়ঙ্কর ঘটনার তরঙ্গাঘাতে সমগ্র ভারত আন্দোলিত হইয়া উঠে । ঐ তরঙ্গাভিঘাত অন্ধকূপ হত্যা অপেক্ষাও ভয়ঙ্কর । অন্ধকূপের ঘটনায় ভারতবর্ষের কেবল একটি ক্ষুদ্রতর অংশেই নৈরাশ্র, বিবাদ ও আতঙ্ক বিরাজ করিতেছিল, কিন্তু ঐ সর্বব্যাপী তরঙ্গ সমস্ত ভারতবর্ষে ব্যাপ্ত হইয়া, সকলকেই গভীরতম আশঙ্কা-সাগরে নিমগ্ন করে । অন্ধকূপের ঘটনাসময়ে ভারতে ব্রিটিশ প্রতাপ বন্ধমূল ছিল না, তখন ভারতে ব্রিটিশগণ সামান্ত ব্যবসায়ী মাত্র ছিল, কিন্তু ঐ তরঙ্গের রঙ্গসময়ে হিমালয় হইতে সুদূর কুমারিকা পর্যন্ত ব্রিটিশ প্রতাপ পরিব্যাপ্ত হইয়াছিল । সিন্ধু ও পঞ্জাবের বিশাল ভূমিতে, বিহার ও বঙ্গের শ্রামল ক্ষেত্রে, বোম্বাই, মাদ্রাজের সমৃদ্ধ স্থলে ব্রিটিশ পতাকা উড্ডীন হইতেছিল, এবং ইঙ্গলণ্ডের বণিকসমাজের একজন অল্পগত কর্মচারীর ক্ষমতা অশোক ও বিক্রমাদিত্য বা পিতৃর ৭ও নেপোলিয়নের ক্ষমতার সহিত গৌরব ও তেজোমহিমার স্পর্ধা করিতেছিল ।

কি কারণে ঐ তরঙ্গাভিঘাত আরম্ভ হইল ? কি কারণে উহা বিশ্বক্রাস

আক্রমণে ব্রিটিশ শাসনের বেলাভূমি ভাঙ্গিয়া ফেলিতে উপক্রম করিল? যাহারা রাজাকে মহতী দেবতাব ন্যায় জ্ঞান করিয়া থাকে, কি কারণে তাহারা সেই রাজশক্তির বিরুদ্ধে অভ্যুত্থিত হইল? প্রথমে ইহা নির্দেশ করা কর্তব্য হইতেছে। কারণনির্দেশের পর তদুৎপন্ন ঘটনাবলি যথাযথ বর্ণিত হইবে।

লর্ড ডালহৌসী আট বৎসর কাল ভারতসাম্রাজ্য শাসন করিয়া

ইঙ্গলেণ্ডে গমন করেন। এই অনতিদীর্ঘ সময়ের মধ্যে
১৮৫৬ খ্রীঃ অব্দ।

ভারতবর্ষের অবস্থা অনেক পরিবর্তিত হয়। লর্ড ওয়েলেসলির শাসনকাল ভিন্ন অল্প কোন সময়ে ভারতবর্ষের অবস্থা এত পরিবর্তিত হয় নাই। এক দিকে রেলওয়ে, টেলিগ্রাফ প্রভৃতি প্রসারিত হইয়া বিভিন্ন প্রদেশসকলকে যেরূপ পরস্পরের নিকটবর্তী করিতেছিল, অপর দিকে সেইরূপ অপূর্ণ রাজ নীতি স্বাধীন রাজ্য সকলকে ব্রিটিশ সিংহের পদানত করিয়া তুলিতেছিল। লর্ড ডালহৌসীর সময়ে পঞ্জাব, অযোধ্যা প্রভৃতি অনেকগুলি স্বাধীন রাজ্যে ব্রিটিশ পতাকা উড্ডীন হয়। ভাবতবর্ষে পদার্পণ করিয়া লর্ড ডালহৌসী ঐ সকল রাজ্য পররাষ্ট্রশ্রেণীতে নিবেশিত দেখেন, এবং ভারত-পরিত্যাগের সময়ে উহা স্বরাষ্ট্রের অন্তর্ভুক্ত দেখিয়া গমন করেন।

সেত্রাণ্ড * যুদ্ধক্ষেত্রে প্রসিদ্ধ যুদ্ধবীর লর্ড হার্ভিঞ্জ শিকদিগকে পরাজিত করেন। ব্রিটিশ সেনানায়কগণের অসীম চাতুরীতে এবং শিখ সেনাপতিদিগের অদৃষ্টপূর্ণ ও অশ্রুতপূর্ণ বিশ্বাসঘাতকতায় তাহাদের পরাজয় হয় † কিন্তু উহাতে শিখ-রাজ্যের স্বাধীনতা নষ্ট হয় নাই। হার্ভিঞ্জ

* মচরাচর এই স্থান সেত্রাণ্ড নামে কথিত হইয়া থাকে। কিন্তু উহার প্রকৃত নাম সোত্রাহন্। দুইটি স্তূপ পলী হইতে ঐ নামের উৎপত্তি হইয়াছে। সোত্রানামক জাতি ঐ পলীঘরে বাস করিয়া থাকে। ঐ সংজ্ঞার বহুবচনে সোত্রাহন্ হয়। Cunningham's History of the Sikhs. Second Edition, p. 324, note.

† প্রথম শিখযুদ্ধের সময় খালসাদিগের সেনাপতি সর্দার তেজ সিংহ ও রাজা লাল সিংহ গোপনে ইঙ্গ সৈন্যদিগের সহিত মিলিত হইয়া ষড়যন্ত্র করিয়াছিলেন। যখন শিখ-সৈন্য ফিরোজপুরে উপস্থিত হয়, তখন লাল সিংহ তত্রত্য এজেন্ট কাংশন নিকলসনের সহিত ষড়যন্ত্র করিতে ক্রটি করেন নাই। ইঙ্গসৈন্যদিগের উৎকোচে এইরূপ জ্ঞানশূন্য হইয়া লাল সিংহ ফিরোজপুরের (ফিবোজ সহর) যুদ্ধে প্রথমেই পলায়নপর হন। এই সময় সর্দার তেজ সিংহ ২৫ হাজার সৈন্য লইয়া উপস্থিত হইলেও অল্প-সংখ্যক পরিপাশ্রিত ব্রিটিশ সৈন্যদিগকে আক্রমণ

শিখ-প্রধানদিগকে একটী সন্ধিহুত্রে আবদ্ধ করিয়া মহারাজ রণজিৎ সিংহের রাজ্য স্বাধীন অবস্থায় রাখেন । ৯ই মার্চ নিয়ামীরের প্রশস্ত সন্ধিতে ঐ সন্ধি নিৰ্দ্ধারিত হয় * । সন্ধির নিয়মানুসারে ব্রিটিশ পৰ্বণমেন্ট শতক্র ও বিপাশা নদীর মধ্যবর্তী জলধর দোয়াব গ্রহণ করেন, যে সমস্ত খালসা সৈন্ত ব্রিটিশ শাসনের বিরুদ্ধে অস্ত্রধারণ করিয়াছিল, তাহাদিগকে নিরস্ত্রীকৃত এবং সৈন্ত সংখ্যা ন্যূন করিয়া ২০,০০০ পদাতিক এবং ১২,০০০ অশ্বারোহী করা হয় । এতদ্ব্যতীত হার্ডিজ মুকের বায় স্বরূপ দেড় কোটী টাকা গ্রহণ করেন † । মহারাজ রণজিৎ সিংহ কোষাগারে ১২ কোটী টাকা রাখিয়া গিয়াছিলেন, কিন্তু তাঁহার মৃত্যুর পরে অমাত্যদিগের পাপাচারবশতঃ উহা ব্যয়িত হইয়া অধিকোটা মাত্র অবশিষ্ট থাকে । হার্ডিজ ঐ অধিকোটা লইয়া অপর কোটীর নিমিত্ত কাশ্মীর প্রদেশ গ্রহণ করিতে উদ্যত হন । জয়র শাসন-কর্তা রণজিৎ সিংহের প্রিয়পাত্র রাজা গোলাপ সিংহ এই সময়ে লাহোর দরবারের প্রধান মন্ত্রী ছিলেন । তিনি কোটীমুদ্রা দিয়া কাশ্মীর প্রদেশ হার্ডিজের নিকট হইতে ক্রয় করেন । এইরূপে মহারাজ রণজিৎ সিংহের বিস্তৃত রাজ্যের অধঃপতনের সূত্রপাত হয় ‡ ।

এই সন্ধির সময়ে দলীপ সিংহ অপ্রাপ্তবয়স্ক ছিলেন । রাজ্যশাসনোপযোগী বয়ঃক্রমের অধিকারী হইতে তাঁহার আরও কয়েক বৎসর বাকী ছিল । উপস্থিত সঙ্কটাপন্ন সময়ে পঞ্জাবে একজন দ্বিতীয় রণজিৎ সিংহের বর্তমান থাকা উচিত ছিল, কিন্তু পঞ্জাবে আর তাদৃশ মহামনস্কী ব্যক্তি জন্ম করেন নাই । এতদ্ব্যতীত লালসিংহ সৈন্যগণ কর্তৃক পুনঃ পুনঃ উত্তেজিত হইয়াও ফিরোজপুর আক্রমণে নিরস্ত হন । সৈন্যপতিদিগের এইরূপ বিশ্বাসঘাতকতায় শিখদিগের পরাজয় হয় । কলিকাতা বিবিষ্টিতে কাপ্তেন কানিংহাম প্রণীত শিখইতিহাসের সনালোচনায় লেখক স্বীকার করিয়াছেন যে, লাল সিংহ ১৮৪৬ অক্টোবর ফেব্রুয়ারি মাসে কাপ্তেন লরেন্সের নিকট দোত্রাহন যুদ্ধক্ষেত্রে স্বীয় সৈন্যনিবেশের বিবরণ শ্রেণ করেন । Vide Captain Cunningham's History of the Sikhs p. 268-299. Comp. Macgregor's History of the Sikhs, Vol. II, p. 80-81. Calcutta Review for June 1849, p. 549-550. Edwen Arnold's Dalhousie's Administration of British India. Vol. I, p. 45.

* কহ্লব নামক স্থানে উভয় পক্ষে সম্মিলন হয় বলিয়া এই সন্ধি “কহ্লব” বলিয়া প্রসিদ্ধ । Arnold's Administration of Dalhousie. Vol. I, p. 46.

† Cunningham's History of the Sikhs. Appendix XXXIV., p. 428-433.

‡ Arnold's Administration of Dalhousie Vol. I, p. 47.

গ্রহণ করেন নাই । দলীপের মাতা মহারাণী বিন্দনের * হস্তে রাজ্য-শাসনের ভার ছিল । ভারতবর্ষের ইতিহাসে বীরনারীর অভাব নাই । মহা-ভারতকার বেদব্যাস হইতে রাজস্থানের ইতিহাস লেখক কর্ণেল টড পর্য্যন্ত, সকলেই তেজস্বিনী ভারতমহিলার গুণ গান করিয়া গিয়াছেন । ভারত-মহিলাগণ যেমন তেজস্বিনী ছিলেন, তেমনই সময়ে সময়ে রাজ্যশাসনেও ক্ষমতা দেখাইতেন । রণজিৎমহিষী বিন্দন এইরূপ তেজস্বিতা ও শাসন-ক্ষমতার জন্য পঞ্জাবের ইতিহাসে প্রসিদ্ধ † । বিন্দন অবলা-হৃদয়ের অধিকারিণী হইয়াও তেজস্বিনী ছিলেন এবং বাল্যকাল হইতে পরবশে থাকিয়াও রাজ্যশাসনের সমুদয় কৌশল শিখিয়াছিলেন ; কিন্তু পরিতাপের বিষয় এই, এইরূপ তেজস্বিনী নারী পঞ্জাবের শীর্ষস্থানে থাকিতেও রাজা গোলাপ সিংহের পর একজন অকর্ণগণ ও অবিশ্বাসী ব্যক্তি তাঁহার প্রধান মন্ত্রী হইয়াছিলেন ।

রাজা লাল সিংহ কোনও অমাত্যোচিত গুণের অধিকারী ছিলেন না । তিনি দরবার গৃহে যেরূপ সকলের বিরাগভাজন ছিলেন, রাজ্যের প্রকৃতি-সমষ্টির মধ্যেও সেইরূপ সকলের বিরাগভাজন হইয়াছিলেন । অপ্রসিদ্ধ বংশ হইতে উদ্ভূত হইয়া লালসিংহ উচ্চতম সৌভাগ্যের ক্রোড়ে লালিত হইয়াছিলেন বটে, কিন্তু ঐ সৌভাগ্য তাঁহাকে মানবস্পৃহণীর গুণ-সমূহে অলঙ্কৃত করিতে পারে নাই । তাঁহার সৌন্দর্য্য কেবল দেহেই শেষ হইয়াছিল, উহা অভ্যন্তরীণ প্রকৃতিতে সংক্রান্ত হইয়া চিন্তের উদারতা সাধন করিতে পারে নাই, স্মৃশাসনক্ষমতা কোন অন্তঃপুরপ্রকোষ্ঠেই সীমাবদ্ধ ছিল, উহা বহিঃপ্রদেশে প্রসারিত হইয়া রাজ্যের উন্নতিসাধনে সমর্থ হয় নাই, রণ-নিপুণতা কেবল স্বীয় ভোষামোদপ্রিয় কুপোষ্য সম্প্রদায়ের সমক্ষেই প্রকাশিত হইত, উহা সমরক্ষেত্রে প্রদর্শিত হইয়া সৈন্যদিগকে উৎসাহ দেয় নাই । কলে লাল সিংহ শিখসমাজে বড় অযোগ্য ছিলেন । তাঁহারই বিশ্বাসঘাতকতায় রণজিতের বিস্তৃত রাজ্যের অধঃপতনের সূত্রপাত হয়, তাঁহারই স্বজাতি-দ্রোহিতায় অতুল পরাক্রমশালী খালসাগণ অল্পসংখ্যক ব্রিটিশ সৈন্যের নিকটে পরাভব স্বীকার করে । এইরূপ ক্ষীণবৃদ্ধি, ক্ষীণমনা ও ক্ষীণতেজ ব্যক্তির হস্তে প্রথম শিখযুদ্ধের পর পঞ্জাব-রাজ্যের শাসনভার সমর্পিত হয় ।

* পুস্তকবিশেষে হাঁহার নাম চন্দ্রা দেখিও আছে ।

† Calcutta Review, 1869, No 95, p. 39

কিন্তু পঞ্জাব দীর্ঘকাল এই অন্তঃসারশূন্য ব্যক্তির ক্রীড়ার সামগ্রী থাকে নাই। সন্ধির নিয়মামুসারে গোলাপ সিংহ কাশ্মীর প্রদেশ অধিকার করিতে গমন করেন, এই সময় সেখ ইমামউদ্দীন নামক জনৈক মুসলমানশ্রেষ্ঠের হস্তে কাশ্মীরের শাসন-ভার ছিল। লাল সিংহ ইমামউদ্দীনের সহিত ব্রিটিশ গবর্নমেন্টের বিরুদ্ধে ষড়যন্ত্র করিয়া কাশ্মীর প্রদেশে গোলাপ সিংহের গতি রোধ করেন। রেসিডেন্ট হেনরি লরেন্স কোন কার্যই অর্দ্ধ-সমাপ্ত রাখিবাব লোক ছিলেন না। তিনি ইমামউদ্দীনের অসম্মতি দেখিয়া দশ সহস্র শিখ ও কতিপয় ব্রিটিশ সৈন্যসমভিব্যাহারে শিশিরসঞ্চিত তুষার-স্তুপ অতিক্রম করিয়া কাশ্মীরে উপস্থিত হন *। অবাধ্য ইমামউদ্দীন ইজরেক সেনাপতির বিক্রমদর্শনে বশীভূত হন এবং আত্মরক্ষার নিমিত্ত প্রধান অমাত্য, গোলাপ সিংহের গতিরোধ করিতে যে অনুজ্ঞাপত্র প্রেরণ করিয়াছিলেন, তাহা হেনরি লরেন্সের সমক্ষে উপস্থাপিত করেন। লাল সিংহের ঐ পত্রের ভাব ব্রিটিশ রেসিডেন্টের সহনীয় হইল না। অচিরে এই বিশ্বাস-ঘাতকতার বিচারার্থ ইউরোপীয় রাজপুরুষ হইতে সূক্ষ্ম লোক নির্বাচিত হইয়া একটি সমিতি স্থাপিত হইল †। বিচারে লাল সিংহ পেশন পাইয়া আগ্রায় নির্বাসিত হইলেন। লাল সিংহ ডিসেম্বর মাসে আগ্রায় প্রেরিত হইয়া কেবল অস্তিত্বমাত্রে পর্য্যবসিত হইলেন, আর তাঁহার সহিত পঞ্জাবের কোনও সম্বন্ধ রহিল না। এইরূপে তাঁহার বিশ্বাসঘাতকতা ও স্বজাতিদ্রোহিতা গরলময় ফল প্রসব করিয়া, বিলম্ব পাইল।

* Marshman's Abridgment of the History of India, p. 454. Comp. Life of Sir Henry Lawrence. Vol. II., p. 73.

† মাসমান সাহেব ষষ্ঠী ও ভারতবর্ষের ইতিহাসে (Abridgment of the History of India, p. 454,) লিখিয়াছেন যে, রাজা লাল সিংহের বিচারার্থ ইউরোপীয় কর্মচারী ও শিখ সর্দার হইতে লোক নির্বাচিত হইয়া একটি মিশ্র সমিতি স্থাপিত হইয়াছিল। কিন্তু মেজর এডওয়ার্ডস ও হারমান্ নেরিবেল স্পষ্ট লিখিয়াছেন যে, সমিতিতে কেবল ইউরোপীয় কর্মচারীগণই ছিলেন। নিম্নলিখিত ব্যক্তিগণ ঐ সমিতিতে নির্বাচিত হইয়াছিলেন :—

সভাপতি:—

এফ. কারি।

সভ্য :—

লেফ্টেনেন্ট কর্নেল লরেন্স, মেজর জেনারেল স্যার জন লিটলথ, জন লরেন্স, লেফ্টেনেন্ট কর্নেল গোলডিং। Life of Sir Henry Lawrence. Vol. II, p. 82. Comp. Edwardes's A year on the Punjab frontier. Vol. I, p. 10.

রাজা লাল সিংহের অধঃপতন হইলে রাজ্যরক্ষার্থ পুনর্বার ব্রিটিশ গবর্ণমেন্টের সহিত সন্ধি হয়। বাইরাবল নামক স্থানে নিৰ্দ্ধারিত হয় বলিয়া, এই সন্ধি বাইরাবলসন্ধিনামে প্রসিদ্ধ। সন্ধির নিয়মানুসারে ষাণ্ঠাহোক দরবার হইতে কতিপয় স্তম্ভ লোক নিৰ্দ্ধাৰিত হইয়া একটি সভা সংগঠিত হয়। ব্রিটিশ রেসিডেন্ট এই শাসন-সংক্রান্ত সভার অধ্যক্ষ হন। দলীপ সিংহের বয়ঃপ্রাপ্তি অর্থাৎ ১৮৫৪ অব্দের ৪ঠা সেপ্টেম্বর পর্যন্ত, সন্ধির নিয়মানুসারে এই প্রতিনিধিসভা দ্বারা রাজ্যশাসন করিবার ব্যবস্থা হয় *। সুতরাং যাবৎ মহারাজ দলীপ সিংহ প্রাপ্তবয়স্ক না হইবেন, তাবৎ ব্রিটিশ গবর্ণমেন্ট তাঁহার অভিভাবক স্বরূপ হইয়া পঞ্জাবের শাসন-ভার গ্রহণ করেন। মহারাজ রণজিৎ সিংহের বাহুবলজিত বিস্তৃত রাজ্যের কোন অমঙ্গল না ঘটে, এই নিমিত্তই হার্ডিঞ্জ বর্তমান নিয়ম ব্যবস্থাপিত করেন। বাণ্যকাল হইতে সমরলক্ষ্মীর ক্রোড়ে সম্বন্ধিত হইয়া এবং বর্তমান সময়ে বিজয়-গৌরব ও বিজয়শ্রীর পুরস্কার স্বরূপ একটি বিস্তৃত রাজ্য হাতে পাইয়াও হার্ডিঞ্জ উহা গ্রহণ করিলেন না, প্রত্যুত উহার সূক্ষ্মতার নিমিত্ত ন্যোনোনিবেশ করিলেন †। হার্ডিঞ্জ শিখ-জাতির অদম্য চঞ্চল প্রকৃতি বিশেষ-রূপে হৃদয়ঙ্গম করিয়াছিলেন, তিনি বুঝিতে পারিয়াছিলেন যে, একজন দৃঢ়-প্রতিজ্ঞ রাজনীতিকুশল ব্যক্তিব হস্তে পঞ্জাবের শাসন ভার সমর্পিত না হইলে উত্তরকাল কখনও শুভাবহ হইবে না, এই জন্ম প্রধান অমাত্যের পরিবর্তে ঐরূপ শাসন-পদ্ধতি স্থাপিত হইল। সুতরাং এক্ষণে হেন্‌রি লরেন্সই সাক্ষাৎ সম্বন্ধে পঞ্জাবের হর্তা, কর্তা ও বিধাতা হইলেন।

লর্ড হার্ডিঞ্জ অবোধ্যা পাত্রের ঐ ভার সমর্পণ করেন নাই। যৌদ্ধজনোচিত বীরতা ও রাজনীতিজোচিত দক্ষতা, উভয়বিধ গুণই হেন্‌রি লরেন্সকে অলঙ্কৃত করিয়াছিল। যে ভেজস্বিতা নেপোলিয়ান বোনাপার্টিকে আশ্রয় করিয়া জগতে বড় জন্মাইয়াছিল, সে সর্বসংহারিণী ভেজস্বিতা হেন্‌রি লরেন্সে ছিল না, তথাপি তাঁহার ভেজ অসাধারণ ছিল। শত্রুগণ রণস্থলে

* Cunningham's History of the Sikhs. Appendix XXXVII, p 437-442.
Comp. Life of Sir Henry Lawrence. Vol. II, p 90.

† A speech delivered at the Farewell banquet to the marquis of Tweedale, at Madras. Arnold's Administration of Dalhousie. Vol. I, p.

ঠাঁহার সংহার মূর্ত্তি দেখিয়া যেরূপ ভীত হইত, অভ্যন্তরীণ প্রকৃতিতে বালস্বভাবসুলভ কোমলতা ও মুহূতা দেখিয়া সেই রূপ প্রীতি লাভ করিত। ফলে হেনরি লরেন্স তেজস্বিতা ও কোমলতা উভয়েরই আধার ছিলেন, উভয়েরই ঠাঁহার প্রকৃতিকে সুশোভিত করিয়াছিল।

সৌভাগ্য ক্রমে ঈদৃশ অনলস প্রকৃতি ও কার্যকুশল ব্যক্তির হস্তে পঞ্জাবের শাসন-দণ্ড সমর্পিত হইল। হেনরি লরেন্স নিজের দায়িত্ব ১৮৪৭ খ্রী: অব্দে।

বুঝিয়া এই গুরুতর কার্য্য-ভার বহন করিতে প্রবৃত্ত হইলেন। ঠাঁহার শাসন শৃঙ্খলায় পঞ্জাব পুনর্বার ক্রমে ক্রমে উন্নত হইতে লাগিল। রণজিতের রাজ্য এইরূপ সুখ ও শান্তিতে রমণীয় হইয়া ১৮৪৭ অব্দের বসন্ত-কাল অতিবাহন করে। যে সমস্ত চঞ্চলপ্রকৃতি খালসা সৈন্ত এক সময়ে ভীষণ রণোন্মাদে মত্ত হইয়া পঞ্জাব ও তৎপ্রান্তবর্ত্তী প্রদেশ অগ্নিস্কুলিঞ্জে ব্যাপ্ত করিয়াছিল, তাহার এক্ষণে সৌম্য মূর্ত্তি ধারণ করিয়া জীবনের শান্তিময় পথে অগ্রসর হইতে লাগিল। রেসিডেন্ট বিজ্ঞাপনীতে প্রকাশ করিলেন যে, নিরস্ত্র খালসা সৈন্তের অধিকাংশ শান্তভাবে ভূমিকর্ষণে মনোনিবেশ করিয়াছে। যাহারা এক সময়ে ব্রিটিশ গবর্নমেন্টের ভীতি-স্থল ছিল, কৃষাণ-জনোচিত সরলতা ও নিরীহতা এক্ষণে তাহাদিগকে উত্তরোত্তর অলঙ্কৃত করিতেছে। যদিও রেসিডেন্ট এইরূপ প্রকাশ করিয়াছিলেন, তথাপি তিনি পঞ্জাবের ঐ আপাতরমণীয় অবস্থা দেখিয়া কর্তব্য-বিমুখ হন নাই। তিনি ধীরভাবে পঞ্জাবের অবস্থা উন্নত করিতে লাগিলেন এবং ধীরভাবে সর্বত্র শান্তিস্থাপনে যত্নপর হইলেন।

মহারানী বিন্দন দৃঢ়তা ও তেজস্বিতায় মহিলাগণের গৌরবস্থানীয় ছিলেন। ঠাঁহার রাজ্য পরপদানত হইয়াছে, পর জাতি সাত সমুদ্র তের নদীর পর হইতে ঠাঁহার রাজ্য আসিয়া আপনাদের ইচ্ছানুসারে শাসন-দণ্ড পরিচালনা করিতেছে, ইহা ঠাঁহার অসহনীয় হইল। বিন্দন বুঝিতে পারিলেন, ব্রিটিশ সিংহ ইহার মধ্যেই যেরূপ বর্দ্ধিতবিক্রম হইয়া পঞ্জাবের প্রতি ভোগলালসাময়ী দৃষ্টি নিক্ষেপ করিতেছে, তাহাতে সমস্ত পঞ্জাব অচিরে তাহার উদরস্থ হইবার সম্ভাবনা, বুঝিলেন, ইহার মধ্যেই ঠাঁহার আশঙ্কা অনেকাংশে কার্য্যে পরিণত হইয়া উঠিয়াছে। ব্রিটিশ গবর্নমেন্ট ঠাঁহার প্রিয়পুত্রকে আপনাদের করস্বত্বগ্রহণ ক্রীড়াপুস্তুল করিতেও দৃষ্টি করে নাই। বিদেশীর এই আশ্পঙ্কা, এই অনধিকার-প্রিয়তা তেজ-

বিনীর হৃদয় প্রতিহত করিতে লাগিল। কিন্তু আর ধীরতার সীমা অক্ষুণ্ণ রাখিতে পারিলেন না। দুর্নিবার দৌরাভ্যকারী বলিয়া তিনি ইঙ্গরেজ-দিপকে ঘৃণা করিতে লাগিলেন। কামিনীর কোমল হৃদয় অপমানবিষে কালীময় হইয়া উঠিল।

রেসিডেন্ট এই তেজস্বিনী নারীর মর্শ্বগত তেজ নিরোধ করিতে কৃত-সঙ্কল্প হইলেন। যে অগ্নি অস্থিতে অস্থিতে মজ্জায় মজ্জায় প্রসৃত হইয়া হৃদয়কে স্তরে স্তরে দগ্ধ করে, হুই এক বিন্দু বারি-প্রক্ষেপে সে অগ্নির গতি রোধ করা সুসাধ্য নয়, সুধ দুঃখের সহচর আত্মীয়জন হইতে বিচ্ছিন্ন করিয়া নির্জন-প্রদেশে নির্জন গৃহে সে অগ্নির আধার সংরক্ষণই ভবিষ্য অমঙ্গল নিরূপণের অমোঘ উপায়। রেসিডেন্ট অবশেষে এই উপায় অবলম্বনে কৃতনিশ্চয় হইলেন। বিনা আইনে, বিনা বিচারে, কেবল সন্ধেহের উপর নির্ভর করিয়া, বিন্দনের প্রতি নির্দাসনদণ্ড বিহিত হইল। তদীয় ভ্রাতা এই দণ্ডাজ্ঞা বহন করিয়া রাজ-ভবনে উপস্থিত হইলেন। কিন্তু অবনতমস্তকে এই গুরুতর দণ্ড গ্রহণ করিলেন। দুঃসহ মনোযাতনা প্রকাশক কোনও শব্দ তাঁহার কণ্ঠ হইতে নিঃসৃত হইল না, অটলভাবে অটলচিত্তে তেজস্বিনী বীরজায়া স্বীয় ভবিষ্য জীবনের অতিবাহন ভূমি কারগৃহে যাইতে প্রস্তুত হইলেন। মুসলমান অধিবাসী-পরিবেষ্টিত সেখপুর নামক নির্জন স্থানে বিন্দনের আবাসগৃহ নিরূপিত হইল। বিন্দন অতঃপর রাজলক্ষ্মীর ক্রোড় হইতে বিচ্যুত হইয়া ১২ এ আগষ্ট ঐ কদর্যা স্থানে কদর্যা গৃহে কারারুদ্ধ হইলেন*। বিধাতা যদিও বিন্দনকে অজানা-জনোচিত কোমল উপাদামে নিৰ্ম্মাণ করিয়াছিলেন, তথাপি তাঁহার অভ্যস্তরীণ প্রকৃতি নিরবচ্ছিন্ন কোমলতার পর্যাবসিত হয় নাই। বিন্দন লাভশ্যামরী ললনা হইয়াও অটলতার আশ্রয় ছিলেন, কোমলতাময় নারীহৃদয়ের অধিকারিণী হইয়াও ধীরতার অবলম্বন ছিলেন এবং কমনীর কান্তির আধার হইয়াও ভীমগুণাবিত তেজস্বিতার পরি-পোষক ছিলেন। যে বিকার ক্লিপেজ্ঞাতে সংক্রান্ত হইয়া হৃদয়-গ্রহি শিথিল করিয়া তুলিয়াছিল, সে বিকার বিন্দনে উপগত হইয়া ধৈর্য্য-চ্যুতির কারণ হয় নাই। বিন্দনের হৃদয় সর্বক্ষণ অটলতার পূর্ণ ছিল, এই গুরুতর

* A general proclamation of H. B. Edwardes, Assistant to the Resident. Vide Life of Sir Henry Lawrence. Vol. II., p. 99.

বিপদে তাঁহার ঐরাভাস্ত অটলতা স্থলিত হইল না। হৃদয়গ্রন্থি বিচ্ছিন্ন হইয়া শৈথিল্যের সীমা অতিক্রম করিল না। প্রকৃত বীরজানা ও বীরনারীর আয় ঝিন্দন অটলভাবে স্বীয় দশাবিপর্যায়কে আনিয়ন করিলেন। বৈদেশিক নেত্রে তাঁহার চরিত্রগতি যতই নিম্নগামিনী বলিয়া প্রতিভাত হউক না কেন, বৈদেশিক চিত্রকরের হস্তে পড়িয়া তাঁহার চরিত্র-চন্দ্র যতই কালিমায় পরিণত হউক না কেন, ঝিন্দন এই অটলতা ও স্তিরহৃদয়-তাব জগ্ন নাশীসমাজে গরীয়সী বলিয়া পরিগণিত হইবেন, সন্দেহ নাই।

এই রূপে ঝিন্দন রাজপদ ও রাজসম্মান হইতে বিচ্যুত হইয়া জন্মের মত কারাবাসিনী হইলেন। রাজবনিতা ও রাজমাতার এই শোচনীয় পবিত্রাঙ্গ ইতিহাসের হৃদয় কালীময় করিয়া রাখিয়াছে। যাঁহারা হেন্‌রি লরেন্সের আয়পরতা ও মতানিষ্ঠার সহিত পরিচিত আছেন, ঝিন্দনের এই নির্যাসনবিধি তাঁহাদিগকে একান্ত বিস্মিত করিয়া তুলিবে, সন্দেহ নাই। উদ্ভূত ইতিহাসিকগণ লিখিয়াছেন যে, ঝিন্দন পবর্ণমেন্টের বিরুদ্ধে ষড়-যন্ত্র ও বেসিডেন্টের প্রাণসংহারের অভিসন্ধি কবান্তে তাঁহার প্রতি এই কণা নির্যাসন-দণ্ড বিহিত হইয়াছিল*। কিন্তু যেক্ষেপে রাজা লাল সিংহের বিষয় বিচারিত ও দণ্ড প্রয়োগিত হইয়াছিল, ঝিন্দনের অপরাধসম্বন্ধে তদ্রূপ কোন বিচার যথাপদ্ধতি অনুষ্ঠিত হয় নাই। ব্রিটিশ রেসিডেন্ট বিনা বিচারে কেবল সন্দেহের উপর নির্ভর করিয়া দলীপসিংহের মাতাকে নির্যাসিত করিয়াছিলেন। এ স্থলে কেবল সন্দেহই নন্দী ও সন্দেহই শাস্তা হইয়াছিল। যে কল্পনা এইরূপ সন্দেহে সঙ্ঘটিত হইয়া গবলনয় ফল প্রসব করে, তাহা সঙ্গীতির অনুমোদিত কি না, সহৃদয়গণ বিবেচনা করিবেন। স্বল্পবিচারে দোষ মপ্রমাণ করিয়া অপরাধীর দণ্ডবিধানই সভ্যজগতে রীতি। হেন্‌রি লরেন্স সভ্যদেশবাসী হইয়াও যে, এই সভ্য রীতি অতিক্রম করিয়াছিলেন, তদ্বিষয়ে মতদ্বৈধ নাই।

মহারাজী ঝিন্দনের নির্যাসনের সহিত আপাততঃ পঞ্জাবের সনুদয় অগ্নি ফুলিঙ্গ নির্যাসিত বোধ হইল। এইরূপ বিনা গোলযোগে ও বিনা উদ্বেগে শরৎকাল পঞ্জাবে উপস্থিত ও বিগত হয়। ঋতুপরিবর্তনের সঙ্গে

* Kaye's Sepoy War. Vol. I., p. 15. Comp. Life of Sir Henry Lawrence. Vol. II., p. 98-100.

সঙ্গে পঞ্জাবে শাসন-সমিতির অধিনায়কেরও পরিবর্তন হইয়া উঠে। হেন্‌রি লরেন্স কয়েক বৎসর কাল গ্রীষ্ম-প্রধান দেশে বাস করিয়া নিতান্ত অসুস্থ হইয়া উঠিয়াছিলেন, স্বাস্থ্য লাভের উদ্দেশে তিনি সিমলায় যাত্রা করেন, স্থানপরিবর্তনে তাঁহার শারীরিক অবস্থার কিছু পরিবর্তন হয় বটে, কিন্তু চিকিৎসকগণ তাঁহাকে এদেশ পরিত্যাগ করিয়া স্বদেশে বাইতে পরামর্শ দেন। হেন্‌রি লরেন্স এই পরামর্শানুসারে ইঙ্গলণ্ডে বাইতে প্রস্তুত হন। এই সময়ে লর্ড হার্ডিঞ্জ লর্ড ডালহৌসীর হস্তে ভারতসাম্রাজ্যের শাসন-ভার সমর্পণ করিয়া স্বদেশে যাত্রা করেন। এদিকে হেন্‌রি লরেন্সও স্যার ফ্রেডরিক কারি নামক একজন সিবিল কর্মচারী ও ভারতবর্ষীয় ব্যবস্থাপক সভার সভ্যের হস্তে পঞ্জাবের শাসন-ভার অর্পণ করিয়া লর্ড হার্ডিঞ্জের সহিত ইঙ্গলণ্ডে প্রস্থান করেন। স্মরণ্য যুগপৎ ভারতসাম্রাজ্য লর্ড হার্ডিঞ্জের পরিবর্তে লর্ড ডালহৌসীর, এবং পঞ্জাবরাজ্য স্যার হেন্‌রি লরেন্সের পরিবর্তে স্যার ফ্রেডরিক কারির শাসনাধীন হয়।

এইরূপে অধিনায়কের পরিবর্তন হওয়াতেও কোন গোলযোগের চিহ্ন দৃষ্ট হইল না। নূতন বর্ষ প্রসন্নভাবে পঞ্জাবে উপস্থিত হইল। পঞ্জাবে আপাততঃ কোন গোলযোগ না থাকিলেও স্থানান্তরে হঠাৎ একটি অগ্নি-ক্ষুণ্ণ উৎখিত হইয়া ভয়ঙ্কর ব্যাপার সংঘটিত করিল।

মহারাজ রণজিৎসিংহ মুলতান জয় করিয়া তথায় স্বীয় আধিপত্য স্থাপিত করেন। সেই সময় হইতে এক এক জন দেওয়ান লাহোর-দরবারের অধীন হইয়া মুলতানের শাসন-কার্য নিৰ্বাহ করিয়া আসিতে-ছিলেন। ১৮৪৪ অব্দে মুলতানের শাসন-কর্তা সাবনমল্ল এক জন ঘাতকের হস্তে নিহত হন। তদীর পুত্র মুলরাজ পিতৃহত্যার পর মুলতানের দেওয়ানী পদ অধিকার করেন। লাহোরদরবার মুলরাজের কোষাগারে অনেক অর্থ আছে ভাবিয়া, তাঁহার নিকটে দেওয়ানী পদ গ্রহণের নজরানা স্বরূপ ৩০ লক্ষ টাকা প্রার্থনা করেন। জন লরেন্সের (পরে লর্ড লরেন্স) মতে, পণ্ডিত জলাপ্রসাদ ও তদানীন্তন মন্ত্রী রাজা হীরা সিংহ জীবিত থাকিলে ঐ টাকা যথাসময়ে প্রদত্ত হইত, কিন্তু তাঁহাদের মৃত্যু প্রযুক্ত লাহোর দরবার বিব্রত হইয়া পড়াতে ঐ প্রস্তাবানুসারে কার্য হয় নাই * ।

* Blue Book, 1847-49. p. 88. Edwardes, A year on the Punjab Frontier. Vol. II., p. 38.

মিয়নমিয়ের সন্ধির পর শিখরাজ্যে শান্তিস্থাপিত হইলে লাহোর-দরবারের মন্ত্রী রাজা লাল সিংহ মুলরাজের নিকট পূর্বপ্রাপ্য কয়েক লক্ষ টাকা ও রাজ্যের কর আদায় করিতে মুলতানে সৈন্ত প্রেরণ করেন। ঝঙ্গ নামক স্থানের নিকট মুলরাজের সৈন্ত ইহাদিগকে পরাজিত করে *। এই সময়ে লাহোরের রেসিডেন্ট মধ্যবর্তী হইয়া বহু বিলম্ব ও গোলযোগের পর উভয় পক্ষের বিবাদের মীমাংসা করিয়া দেন। ইহাতে এই স্থির হয় যে মুলরাজ ঝঙ্গ বিভাগের স্বত্বপরিচ্যাগ এবং নজরানা ও পূর্ববাকীর দক্ষণ ২০ লক্ষ টাকা লাহোর দরবারে অর্পণ করিবেন, এতদ্ব্যতীত তাঁহাকে বর্দ্ধিত হারে কর দিতে হইবে। মুলরাজ উপস্থিত সময়ে এই মীমাংসার বিরুদ্ধে কোন কথা বলিলেন না, প্রতুত সন্তোষসহকারে রেসিডেন্টের নিকট কৃতজ্ঞতা জানাইলেন †।

এই মীমাংসার পর মুলরাজ এক বৎসর কাল শান্তভাবে অতিবাহিত করিলেন। এই আপাত শান্তিপ্রিয়তা দর্শনে বোধ হইল যে, লাহোর ও মুলতানঘটিত বিবাদ-বহি একবারে নির্মাণ হইয়া গেল, ইহা হইতে আর কোন ক্ষুলিঙ্গ উঠিয়া ভবিষ্য শান্তির উন্মূলন করিবে না। কিন্তু মুলরাজ যে সন্তোষ দেখাইতেছিলেন, তাহা স্থায়ী হইল না, কিছু কালের মধ্যেই লাহোর দরবারের মীমাংসা তাঁহার নিতান্ত মর্শ্বপীড়ক হইয়া উঠিল। এই যাতনা হইতে মুক্তিলাভের আশায় তিনি কশ্ম পরিচ্যাগ করিবার বাসনা করিলেন।

পুস্তক বিশেষে লিখিত আছে, লাহোর দরবার মুলরাজের নিকট নজরানা স্বরূপ এক-কোটি টাকা প্রার্থনা করেন। পরে উক্ত সংখ্যা ১৮ লক্ষে পরিণত হয়। কিন্তু প্রথম শিখ যুদ্ধের গোলযোগে এই টাকা দেওয়া হয় নাই। *Arnold's Dalhousie's Administration of British India. Vol. I., p. 64. Comp. Kaye's Sepoy War. Vol. I., p. 18.*

* সান্জান কে প্রণীত সিপাহিযুদ্ধের ইতিহাসের সহিত ইহার কিছু বৈলক্ষ্য আছে। কে সাহেব বলেন, মুলরাজের বিরুদ্ধে সৈন্ত প্রেরিত হওয়াতে তিনি ভীত হইয়া ১৮৪৬ খৃস্টাব্দের শরৎকালে লাহোর গমন পূর্বক দরবারের দাবী পূরণ করিতে প্রতিশ্রুত হন *Kaye's Sepoy War. Vol. I., p. 19.*

† *Grounds of the Court's Judgment in convicting Dewan Moolraj of murder. Edwardes, Punjab Frontier Vol. II., p. 39-40.*

নবেম্বর মাসে মূলরাজ সংবাদ পাইলেন যে, রেসিডেন্ট হেনরি লরেন্স শীঘ্রই পঞ্জাব পরিত্যাগ করিয়া যাইবেন । মূলরাজ তাঁহার সহিত সাক্ষাৎ করিবার অভিপ্রায় ব্যক্ত করিয়া লাহোরে গমন করেন । কিন্তু যথাসময়ে উপস্থিত না হওয়াতে রেসিডেন্টের সহিত তাঁহার সাক্ষাৎ হয় না । মূলরাজ এজ্ঞ তদানীন্তন প্রতিনিধি রেসিডেন্ট জন্ লরেন্সের সহিত সাক্ষাৎ করিয়া স্বীয় পদত্যাগের অভিপ্রায় ব্যক্ত করেন । জন লরেন্স আপাততঃ তাঁহাকে ঐ সঙ্কল্প পরিত্যাগ করিতে পরামর্শ দেন । কিছুদিন পরে মূলরাজ আবার তাঁহার সহিত সাক্ষাৎ করিয়া পদ-ত্যাগ-পত্র অর্পণ করেন । এই পদত্যাগের দুইটি কারণ প্রদর্শিত হয় । প্রথম, নূতন কর-ঘটিত বন্দোবস্ত তাঁহার রাজস্বের সমূহ ব্যাঘাত জন্মাইতেছে, দ্বিতীয়, লাহোরদরবারে আপীল করিবার প্রথা থাকাতে তিনি রীতিমত প্রজাদিগকে শাসন করিতে পারিতেছেন না* । যাহাহউক, মূলরাজ সম্ভবতঃ বিরক্ত হইয়া একপানি পদত্যাগ-পত্র লাহোরদরবারে যথারীতি পাঠাইয়া দিলেন । দরবার মূলরাজের পত্র গ্রহণ করিলেন, এবং সর্দার খাঁ সিংহ নামক এক ব্যক্তিকে তৎপরিবর্তে দেওয়ানী পদে নিয়োজিত করিয়া মূলতানে পাঠাইলেন । সর্দার খাঁকে রাজ্যে যথাবিধি প্রতিষ্ঠাপিত করিবার জন্ত বাঙ্গু নামক একজন সিবিল কর্মচারী এবং বোম্বাই সৈন্য-দলের লেফটেনেন্ট আর্ডার্স নামক একজন সৈনিক পুরুষ পাঁচ শত সৈন্যের সহিত মূলতানে গমন করিলেন ।

সর্দার খাঁ এই দলবল লইয়া মূলতানে উপস্থিত হইলে মূলরাজ কোন বিরাগের চিহ্ন দেখাইলেন না, প্রত্যুত ধারভাবে তাঁহাদিগকে সজ্জ করিয়া দুর্গে প্রবিষ্ট হইলেন । দুর্গে আসিয়া মূলরাজ যথানিয়মে নবনিয়োজিত দেওয়ানের হস্তে দুর্গ সমর্পণ করিলেন । ইহার পর সর্দার খাঁ ও তৎসমভিব্যাহারিগণ যখন দুর্গ হইতে প্রত্যাগত হইতেছিলেন, তখন হঠাৎ ব্রিটিশ কর্মচারিগণ আক্রান্ত হইয়া সাংঘাতিক রূপে আহত হইলেন । মূলরাজ এই আক্রমণ নিবারণে কোন চেষ্টা না করিয়া অখারোহণে ক্রতগতিতে তাঁহার উদ্যানস্থ ভবনের অভিমুখে ধাবমান হইলেন ।

* Evidence of John Lawrence on Moolraj's trial. Edward's, Punjab Frontier. Vol. II., p. 42-44.

এদিকে সর্দার খাঁ আহত ব্রিটিশ কৰ্মচারীদিগকে তাঁহাদের বাসভবনে আনয়ন করিলেন।

পরদিন সমস্ত মুলতানবাসী প্রকাশ্যভাবে যুদ্ধবেশে সজ্জিত হইল। রাত্রির প্রাক্কালে মুলতানবাসিগণ দলবদ্ধ হইয়া আহত আশু ও আওসর্নের আবাসগৃহ অবরোধ করিল। নিরাশ্রয়, নিঃসহায় কৰ্মচারিদের আহত হইয়াও অটলভাবে প্রকৃত বীর পুরুষের জ্ঞান জীবনের শেষসীমা রক্ষা করিতে বদ্ধপরিকর হইলেন। কিন্তু আক্রমণকারিদিগের সংখ্যার আধিক্য বশতঃ অল্পক্ষণ মধ্যেই তাঁহাদিগের ক্ষমতা পূৰ্ণদস্ত হইল। আক্রমণকারিগণ দলে দলে আসিয়া ক্ষত দেহ আশু ও আওসর্নকে বিক্ষত করিতে আরম্ভ করিল, ব্রিটিশ কৰ্মচারিদের আর আত্মরক্ষা অসম্ভব দেখিয়া শাস্ত্যভাবে শান্তিময় মৃত্যুর ক্রোড়েশায়িত হইলেন।

এই ঘটনার পর মুলরাজ স্বীয় পলায়িত ভাব পরিত্যাগ করিলেন। প্রকৃত বীরত্ব ও প্রকৃত রণোন্মাদ এক্ষণে তাঁহাকে অধীরপ্রকৃতি করিয়া তুলিল। তিনি সৈন্তসমষ্টির শৃঙ্খলাবিধানে ব্যাপৃত হইলেন, কিরূপে রণবিশারদ ইঞ্জরেজ সৈন্তর সম্মুখীন হইবেন, কিরূপে তাঁহাদিগকে পরাজিত ও বিধ্বস্ত করিয়া স্বীয় আধিপত্য অক্ষুণ্ণ রাখিবেন, এক্ষণে এই চিন্তাই তাঁহার হৃদয়ে বিরাজ করিতে লাগিল। রণজিগীষা তাঁহাকে ভীরুতার বিনিময়ে সাহসিকতায়, ধীরতার বিনিময়ে রণদক্ষতায় এবং নিরীহতার বিনিময়ে যত্নপরতায় অলঙ্কৃত করিল। এক্ষণে তিনি স্বীয় অদৃষ্টের নিকট মস্তক অবনত করিলেন, এবং সৈন্তদলের অধিনায়ক হইয়া প্রকৃত যুদ্ধবীরের পদে সমাসীন হইলেন।

এইরূপে মুলতানযুদ্ধের সূত্রপাত হইল। এই যুদ্ধের সমকালেই ঐতিহাসিকখিত দ্বিতীয় শিখযুদ্ধ আরম্ভ হয়। এক্ষণে এই যুদ্ধের প্রকৃত কারণ নির্ণীত হইতেছে। এই যুদ্ধের পর কিরূপে পঞ্জাবে রণজিতের বংশধরদিগের আধিপত্য বিলুপ্ত হইল, তাহা যথারীতি বিবৃত হইবে।

অদম্য ব্রিটিশ সিংহ ক্রমে পঞ্জাবে স্বীয় আধিপত্য বিস্তার করিতে কৃতসঙ্কল্প হইলেন, সপ্তসিদ্ধুর প্রসন্নসলিলসিক্ত রণজিৎ-রাজ্যের সহিত তাহার ভোগলালসাময়ী দৃষ্টি ক্রমেই দৃঢ়বদ্ধ হইতে লাগিল। যে সমস্ত ত্রেজস্বী ব্যক্তি অদ্যাপি শিখ-সমিতির গৌরব বর্দ্ধন করিতেছিলেন, তাঁহারা ক্রমেই ক্ষমতাচ্যুত হইতে লাগিলেন। কমনীয় কামিনীজ্ঞান ও কঠোর

শাসন-দণ্ড হইতে নিষ্কৃতি পাইল না । রেসিডেন্ট আপনাদের প্রভুত্ব অক্ষুণ্ণ ও তেজস্বিতা অপ্রতিহত রাখিবার আশয়ে, পুরুষ ও নারী, উভয় জাতির উপরই সমভাবে কঠোর দণ্ড পরিচালনা করিতে আরম্ভ করিলেন । মহারানী বিন্দন অটলতা ও তেজস্বিতার আধার হওয়াতে পূর্বেই রেসিডেন্টের কোপ-দৃষ্টিতে পড়িয়াছিলেন । এই কোপ-বহুর আশু নির্কীর্ণ জগৎ তাঁহাকে বিধর্মা মুসলমান জাতি-পরিবেষ্টিত সেখপুর নামক নির্জন স্থানে কারারুদ্ধ থাকিতে হইয়াছিল ! কিন্তু বিন্দনের এই শোচনীয় পরিণামেও ঐ কোপাগ্নি একবারে নির্কীর্ণিত হয় নাই । ঐ বহু কিয়ৎকাল প্রধূমিত অবস্থায় ছিল, এক্ষণে ঘোরতর বিদ্রোহপবনে সঞ্চালিত হইয়া পুনর্কীর প্রজ্জ্বলিত হইয়া উঠিল । বিন্দন আবার অপরাধিনী হইয়া রেসিডেন্টের সমক্ষে আনীত হইলেন ।

মুলতানবাসীদিগের অভ্যুত্থান ও তৎপ্রযুক্ত অভিযান-নিয়োজিত ইঙ্গরেজ সেনাপতির সাহায্যপ্রার্থনার সংবাদ জুলাই মাসের প্রারম্ভে লাহোরের রেসিডেন্সিতে উপস্থিত হয় । উহার পূর্ববর্তী মে মাসে মহারানী বিন্দনের অদৃষ্ট-চক্র পুনর্কীর অবনত হইবার সূত্রপাত হইতে থাকে । ইঙ্গরেজ ইতিহাস-লেখকগণের নিকট অবগত হওয়া যায় যে, মুলতানঘটিত গোলযোগের পূর্বে লাহোর-দরবারে ইঙ্গরেজ গবর্নমেন্টের বিরুদ্ধে আর একটি চক্রান্তের সূত্রপাত হয় । মহারানীর কতিপয় প্রিয়পাত্র উহার অন্তর্নিবিষ্ট ছিলেন । ব্রিটিশ গবর্নমেন্টের অধীনস্থ সিপাহিদিগকে তদ্বিরুদ্ধে উত্তেজিত করাই চক্রান্তের প্রধান উদ্দেশ্য ছিল । কিন্তু ঐ চক্রান্ত দীর্ঘকাল গোপনে থাকে নাই । ৭ গণিত সেনাদলের কতিপয় ব্যক্তি তাহাদের অধিনায়কদিগকে এই বিষয় জানায় । অগ্রতম শিখসেনাপতি খাঁসিংহ ও মহারানীর জনৈক বিশ্বস্ত পাত্র গঙ্গারাম এবং অগ্র দুই ব্যক্তি প্রধান ষড়যন্ত্রকারী বলিয়া প্রতিপন্ন হন । অবিলম্বে প্রকাশ্য ভাবে ফাঁসিকাঠে প্রধান ষড়যন্ত্রকারিণের প্রাণবায়ুর অবসান হয় । রেসিডেন্টের সমুদ্যত বক্ত কেবল এই চক্রান্তকারিণের জীবন হরণ করিয়াই নিরস্ত হয় নাই, ঘটনাসংস্রষ্ট অন্যান্য ক্ষুদ্র দোষার্থ ব্যক্তিগণের প্রতিও এই সূত্রে যাবজ্জীবন নির্কীর্ণন-দণ্ড বিহিত হয় * । এইরূপে মুখ্য ও গৌণ বিপ্লবকারীদিগের

* Kaye's Sepoy War. Vol. I., p. 29-30. Comp. Arnold's Dalhousie's Administration. Vol. I., p. 85-86.

দণ্ড বিধান করিয়া রেসিডেন্ট অতঃপর মহারানী বিন্দনের প্রতি দৃষ্টি নিপাতিত করেন। তিনি স্পষ্ট বৃত্তিতে পারিয়াছিলেন যে, যাবৎ এই তেজস্বিনী নারী লাহোরদরবারের নিকটে থাকিবেন, তাবৎ ব্রিটিশ গবর্নমেন্টের মঙ্গল নাই। এক্ষণ তাঁহাকে একবারে পঞ্জাব হইতে নিষ্কাশিত করিবার সঙ্কল্প করা হয়; কিন্তু কারণ অভাবে এতদিন এই অভীষ্ট কার্যের অনুষ্ঠান হয় নাই। এক্ষণে প্রস্তাবিত ষড়যন্ত্র-চলে রেসিডেন্টের বাসনা সুদৃষ্টি হইয়া উঠিল। সেখপুরের নির্জন গৃহ আর বিন্দনের লাভণ্য-লীলাতরঙ্গের বিলাস-ভূমি রহিল না, রেসিডেন্টের দোদীপ্ত প্রতাপে রণজিৎ-শাসিত পঞ্চনদ রণজিৎ-রমণীকে জন্মের মত হৃদয় হইতে অপসারিত করিতে উদ্যত হইল। অপ্রাপ্তবয়স্ক মহারাজ দলীপ সিংহ রেসিডেন্টের হস্তে ছিলেন, সুতরাং স্যার ফ্রেড্রিক কারির অভীষ্টসিদ্ধির পথ কণ্টকিত হইল না। অবিলম্বে বিন্দনের নিষ্কাশন-দণ্ড-লিপি দলীপ সিংহের নামাক্ষিত মোহরে শোভিত হইল। দরবারের কতিপয় কর্মচারী ছই জন ব্রিটিশ সৈনিক পুরুষের সহিত ঐ লিপি লইয়া সেখপুরে বিন্দনের গৃহে উপস্থিত হইলেন *। মহারানী বিন্দন অটলভাবে স্বীয় শ্রাণ-প্রিয় পুত্রের নামাক্ষিত দণ্ডলিপির নিকট মস্তক অবনত করিলেন, অটলভাবে স্বীয় অদৃষ্টবিপর্যয়কে আলিঙ্গন করিয়া চিরজীবনের মত পঞ্জাব পরিত্যাগ করিতে প্রস্তুত হইলেন। মহারাজ রণজিৎ সিংহ এক সময়ে যে লাহোর দরবারের সিংহাসনভাগিনী করিয়া বিন্দনের গৌরব বর্দ্ধন করিয়াছিলেন, যে লাহোরের অমাত্য-সমিতি এক সময়ে বিন্দনের অপ্রতিহত প্রভুশক্তির নিকট অবনত-মস্তক ছিলেন, সেই সুখসৌভাগ্যের নিদর্শনক্ষেত্রে লাহোর পরিত্যাগকালে বিন্দনের বৈরাগ্য অটলতা ও বিকারশূন্যতা পরিলক্ষিত হইয়াছিল, সেখপুর পরিত্যাগ করিয়া পঞ্জাবের সীমা অতিক্রম সময়েও সেই অটলতা ও বিকারশূন্যতার কিছু মাত্র ব্যত্যয় হইল না। ধীরভাবে মহারানী বিন্দন স্বীয় দশাবিপর্যায়ের সাক্ষীভূত সেখপুরের আবাসগৃহের নিকট বিদায় গ্রহণ করিলেন। যে পঞ্জাব তাঁহাকে হৃদয়ের অধিষ্ঠাত্রী দেবীর স্তায় বক্ষুঃস্থলে ধারণ করিয়া আসিতেছিল, এতদিনের পর সেই পঞ্জাব তাঁহার নেত্র-বিনোদনের অধি-

* Kaye's Sepoy War. Vol. I, p. 30.

কার হইতে বিচ্যুত হইল। বিন্দন দুঃখসঙ্গিনীসহচরীগণে পরিবৃত্ত হইয়া জন্মের মত সেখপুর হইতে বহির্গত হইলেন। প্রথমে ফিরোজপুরে আনয়ন করিয়া পরিশেষে তাঁহাকে বারাণসীতে উপস্থিত করা হয়। মহারাণী বিন্দন, হিন্দুর আরাধ্য ক্লেত্র, হিন্দুদের নিদর্শন ভূমি কাশীধামে উপস্থিত হইয়া মেজর জর্জ ম্যাকগ্রেগর নামক একজন ব্রিটিশ সৈনিক পুরুষের প্রহরিতার পরিরক্ষিত হইলেন।

এইরূপে রণজিৎ-মহিষী বিন্দনের নির্কাসন-ব্যাপার শেষ হইল। পঞ্জাব অবাধবিক্ষোভিত জলধির ত্রায় ধীরভাবে স্বীয় অধিষ্ঠাত্রী দেবীর এই শোচনীয় নির্কাসন চাহিয়া দেখিল, একটি মাত্রও বারিবিন্দু তাহার নেত্রবিগলিত হইয়া দেহ অভিষিক্ত করিল না, যে বহিঃ ধীরে ধীরে শরীর দৃঢ় করিতেছিল, এসময়ে তাহার একটি ফুলিঙ্গও উখিত হইয়া অনলক্রীড়া প্রদর্শন করিল না, পঞ্জাব যোগনিদ্রাভিত্তত বিরটপুরুষের ত্রায় জাভাদোষে আচ্ছন্ন হইয়া রছিল। কিন্তু এই জড়ত্ব প্রকৃত জড়ত্বের লক্ষণাক্রান্ত নহে, এই নির্জীবত্ব প্রকৃত নির্জীবত্বের পরিচায়ক নহে। ইহা গভীর ক্রোধ, গভীর আশঙ্কার গভীর নিস্তব্ধতা। দলীপ সিংহ স্মৃৎস্বয়ং-বাল্যলীলা-তরঙ্গে দোলায়মান হইতেছিলেন, জননীর এই দশা-বিপর্যয় তাঁহার কোমল অন্তঃকরণ ক্রুদ্ধ করিতে পারিল না। ভবিষ্য জীবন ভবিষ্য-সংসারতবে অনতিজ্ঞ অপ্রাপ্তবয়স্ক বালক রেসিডেন্টের বন্দী-করণস্থত্রে পরিচালিত হইয়া অগ্নানবদনে, অতল অনন্ত সাগরে স্নেহময়ী গর্ভধারিণীর বিসর্জন দেখিল। মহারাণী বিন্দন প্রিয়তম স্বামীর অতুল রাজস্বসম্পৎ, প্রাণাধিক তনয়ের স্বর্গীয় সৌন্দর্য্যময় সহবাসসুখ হইতে জন্মের মত বিচ্যুত হইয়া কারাবন্দি হইলেন। যাহারা প্রকৃত সহৃদয়তার ক্রোড়ে পরিবর্দ্ধিত হইয়াছেন, তাঁহাদিগকে বিনতিসহকারে একবার এই সক্রম দৃশ্য স্থতিপটে চিত্রিত করিতে অমুরোধ করি, এবং একবার এই ছুরবগাহ রাজনীতির পর্যালোচনা করিয়া ত্রায়ের পক্ষপাত-বর্জিত সন্নিচারের সহিত উহার তারতম্য করিতে অমুরোধ করি। নির্জনে গভীরভাবে অতীত কার্য্যকারণ আলোচনা করিলেই তাঁহারা বুঝিতে পারিবেন যে, ব্রিটিশ স্বীপেও ভারতবর্ষের কণিক ও চাণক্য অথবা ইতালির মেকিয়াবেলির মন্ত্র-শিষ্য আছেন, ব্রিটিশ গবর্নমেন্টের কোন কোন কর্মচারীও কুট রাজনীতির পরিচয় দিয়া থাকেন। সহৃদয়গণ ইহা-

দের অদম্য তেজের নিকট মস্তক অবনত করিবেন, সভ্যতা ও উদারতার নিকট মস্তক অবনত করিবেন; কিন্তু স্বার্থসাধিনী কূট রাজনীতির নিকট কখনও নতশির হইবেন না। এই নীতি স্বয়ং নিষ্কামত্ব প্রদর্শন করিয়াও পরস্বাপহরণে রত, অনাসক্ত ভাবে পরিত্যক্ত হইয়াও ভোগলালসার আয়ত্ত এবং ভ্রাতৃদের অনুচািরণী রূপে প্রতিভাত হইয়াও অপরের সর্বনাশসাধনে উদ্যত হইয়া থাকে। ভবিষ্যৎবংশীয় মনীষিগণ এই নীতির মস্তশিষ্যদিগকে কখনও ক্ষমা করবেন না। কিন্তু পঞ্জাব এই নীতির কুহকিনী-মায়ায় বিমুগ্ধ হইয়া দীর্ঘকাল জড়ত্বাবস্থায় কালাতিপাত করে নাই, যে অগ্নি তাহার হৃদয়ে প্রবেশিত হইয়াছিল, তাহা দীর্ঘকাল তুষানলের ভ্রাতৃ অন্তর্নিগূঢ় ভাবে আপনার গতি প্রসারিত করে নাই। গুরুগোবিন্দ সিংহ পঞ্জাবের শিরায় শিরায় যে তেজ প্রসারিত করিয়াছিলেন, তাহার আর্লৌকিক শক্তিতে অচিরাত্রেই জড়ত্ব সঞ্জীবিতায় এবং ঐ অন্তর্নিগূঢ় তুষানল প্রচণ্ড হতাশনে পরিণত হইল। বিন্দনের নিষ্কাসনের অব্যবহিত পরেই সমস্ত পঞ্জাব অদৃষ্টের মন্ত্রশক্তিবলে, অপূর্ব জাতীয় জীবনের মহিমার প্রসাদে পুনরায় ঐ সর্বসংহারিণী নীতির বিরুদ্ধে সমুখিত হইয়া বিষম অগ্নিকাণ্ডের উৎপত্তি করিল।

যখন বাম্প্ আগ্নু ও আওর্সন মূলতানে সঙ্কটাপন্ন অবস্থায় পতিত হন, সেই সময়ে লেক্টেনেন্ট এডওয়ার্ডিস্ নামক একজন সৈনিক পুরুষ বঙ্গুর বন্দোবস্ত-কার্য্য নিয়োজিত ছিলেন। বাম্প্ আগ্নু মূলতানের দুর্গে আহত হইয়াই একজন অস্বারোহী কসিদ (ক্রতগামী সংবাদ-বাহক) দ্বারা সাহায্য-প্রাপ্তির আশায় এডওয়ার্ডিস্ ও তদধীনস্থ সেনাপতি কর্টলাণ্টের নামে একখানি পত্র প্রেরণ করেন। এই পত্র জেনেরল কর্টলাণ্টের শিরোনামাক্ত পত্রাধারে সংরক্ষিত হইয়া প্রেরিত হইয়াছিল। ২২এ এপ্রেলের অপরাহ্নকালে এডওয়ার্ডিস্ দেরাগাজিখাঁর শিবিরে বসিয়া চৌর্য্যাপরাধের বিচার করিতে ছিলেন, এমন সময়ে কসিদ ক্রতগতিতে কর্টলাণ্টের শিরোনামাক্ত পত্রাধার তাঁহার হস্তে সমর্পণ করিল। এডওয়ার্ডিস্ পত্রের প্রায়োজনীয়তা অবগত হইয়া উহা স্বয়ং উন্মোচন পূর্বক বাম্প্ আগ্নুর স্বাক্ষরিত পত্র পাঠ করিলেন *। আগ্নুর ঐ পত্রে তাঁহাদের হ্রবস্থার বিষয় অবগত

* Edwardes's Punjab Frontier. Vol., II. p. 75-76.

হইয়া এডওয়ার্ডিস্ একান্ত অধীর হইয়া উঠিলেন, কিরূপে বিশিষ্ট সম্ভ-
রতার সহিত মুলতানে উপস্থিত হইবেন, কিরূপে তাঁহার স্বদেশীয়দিগকে
শক্ত করান গ্রাস হইতে বিমুক্ত করিবেন, ইহাই তাঁহার প্রধান চিন্ত-
নীর বিষয় হইয়া উঠিল। তিনি যে কার্য সম্পাদন উদ্দেশে বস্তুতে উপস্থিত
হইয়াছিলেন, তাহাতে আর তাঁহার মনোযোগ রহিল না। এডওয়ার্ডিস্
অবিলম্বে রেসিডেন্ট স্যার ফ্রেডরিক কারির নিকটে একখানি পত্র লিখিয়া
স্বল্পমাত্র সৈন্য ও কামান, বাহা পাইলেন, তাহা লইয়া সিঙ্ঘ নদী পার
হইয়া মুলতানের নিকটবর্তী লিয়া নগর অধিকার করেন। এই অভিযানের
প্রাকালে এডওয়ার্ডিস্ আগ্র নিকটে একখানি পত্র প্রেরণ করেন। কিন্তু
ঐ পত্র পহঁ ছিবার পূর্বেই বিপ্লবকারীদিগের অজ্ঞাবাগে আগ্র ও আগুস-
নের প্রাণবায়ুর অবসান হয়। এডওয়ার্ডিস্ লিয়া নগরে স্বদেশীয়দি-
গের এই শোচনীয় পরিণামের সংবাদ অবগত হন। তিনি বাহা-
দিগকে রক্ষা করিতে প্রাণপণ করিয়া মুলতানে গমন করিতেছিলেন,
তাঁহার বখন নিহত হইলেন, তখন এডওয়ার্ডিসের প্রতিহিংসা বৃষ্টি
সাতিশয় বলবতী হইয়া উঠিল, মুলতান জয় ও মুলরাজের সর্বনাশ
সাধনই তিনি এক্ষণে বীজমন্ত্র স্বরূপ গণনা করিতে লাগিলেন। মুল-
তানের ৫০ মাইল দক্ষিণে ভাওয়ালপুর নামে একটি ক্ষুদ্র রাজ্য আছে। এই
রাজ্যের অধিপতি ব্রিটিশ গবর্ণমেন্টের সহিত বন্ধুত্বযুক্ত আবদ্ধ। এড-
ওয়ার্ডিস্ একান্ত আশঙ্কিতদরে ব্রিটিশ গবর্ণমেন্টের নামে ভাওয়ালপুরের
নবাবের নিকট সাহায্য প্রার্থনা করিলেন, নবাব সম্মত হইলেন; অনতি-
বিলম্বে তাঁহার সৈন্ত এডওয়ার্ডিসের সহিত সম্মিলিত হইল। এতদ্ব্যতীত
কেনেরল কর্টলান্ট ও লেফ্টেনেন্ট লোক প্রভৃতি ইন্ডিয়ান সৈনিকগণ এড-
ওয়ার্ডিসের সহকারী হইলেন। তদীয় সৈনিক বল কেবল এই বিভিন্ন দলের
সংযোগেই পরিপুষ্ট হয় নাই। লাহোরদরবারের রাজা শেরসিংহের
অধীনে এক দল শিখসৈন্ত মুলতান প্রেরিত হইল। এডওয়ার্ডিস এই
সমস্ত সৈন্তদল লইয়া মুলরাজের সহিত যুদ্ধে প্রবৃত্ত হইলেন। ইহার
মধ্যে তার ফ্রেডরিক কারি মুলতানে এক দল ইন্ডিয়ান সৈন্ত পাঠা
ইতে কৃতসঙ্কল্প হইয়া অজ্ঞানান্তের নিমিত্ত ২৭এ এপ্রেল প্রধান সেনা
পতির নিকটে একখানি পত্র পাঠাইলেন। এই উচ্চ-প্রধান দেশের
নিদাঘসময়ে লর্ড গফ্‌সিমলার শীতল সমীরণ সেবন করিতেছিলেন;

তিনি বর্তমান সময় যুদ্ধের অল্পপযোগী বলিয়া সৈন্তপ্রেরণ আপাততঃ স্থগিত রাখিতে আদেশ দিলেন। গবর্নর জেনেরলও এই প্রভাবে সন্মত হইলেন। কিন্তু প্রধানতম কর্তৃপক্ষের এই মীমাংসা রেসিডেন্টের মনঃপুত হইল না। গবর্নর জেনেরল ও প্রধান সেনাপতির সহিত স্মার ফ্রেডরিক কারির এইরূপ মতবৈষম্য হওয়াতে হারবর্ট এডওয়ার্ডিস্‌ও ক্ষুব্ধ হইলেন। মে ও জুন মাস এইরূপে অভিবাহিত হয়। জুলাই মাসের প্রারম্ভে মুলতান দুর্গের দৃঢ়তা ও মুলরাজের বলবহুলতা দেখিয়া এডওয়ার্ডিস সাক্ষাৎসমক্ষে রেসিডেন্টের সাহায্য প্রার্থনা করেন। স্মার ফ্রেডরিক কারি এই বিষয় প্রধান সেনাপতিকে বিজ্ঞাপিত করেন। এবারেও লর্ড গফ পূর্বসকল হইতে অল্পমাত্র বিচলিত না হইয়া অসম্মতি প্রকাশ করিলেন, সঙ্গে সঙ্গে লর্ড ডালহৌসী ও স্মার জন লিটলর নামক একজন সৈনিক পুরুষও মাথা নাড়িলেন। কিন্তু এবারে স্মার ফ্রেডরিক কারি স্থির করিতে পারিলেন না। ব্রিটিশ শাসন-সমিতির প্রধান অধিনায়কত্রয়ের অসম্মতিতে তাঁহার দৃঢ়ত্তর সক্ষম দূর হইল না। তিনি ১০ই জুলাই সূহসম্‌ সময়ক্ষেত্রে এডওয়ার্ডিসকে বিজয়ী হইতে দেখিয়া, নিজেই সমুদয় বিষয়ের দায়ী হইয়া, সাম্পসন্‌ হইক নামক একজন সেনাপতিকে ব্রিটিশ সেনা ও কামান লইয়া মুলতানে উপস্থিত হইতে আদেশ করিলেন। সুতরাং অকিলক্ষে ব্রিটিশ সৈন্য মুলতান বিধ্বস্ত করিতে উদ্যত হইল।

মুলতানে যুদ্ধ উপস্থিত করিবার জন্ত কে দায়ী? কাহার জন্ত নরশোণিতে মুলতান প্লাবিত হইল? কে যুদ্ধ-মাদকতার জ্ঞানশূন্য হইয়া দিনের জন্ত নয়, মাসের জন্ত নয়, জীবনের তরে হতভাগ্য মুলরাজকে আত্মীয়স্বজন হইতে বিচ্ছিন্ন করিয়া নির্বাসিত করিল? আমরা ইতিহাসের সম্মান রক্ষা করিয়া এ সকল প্রশ্নের সহজতর দিব। মুলতানখটিত গোলযোগের আদ্যোপান্ত আলোচনা করিলে স্পষ্ট বোধ হইবে যে, মুলরাজ প্রথম হইতে শেষ পর্যন্ত স্বীয় পদোচিত ধীরতা রক্ষা করিয়া আসিয়াছিলেন। তিনি ধীরভাবে লাহোরদরবারে স্বীয় অবস্থা জানাইলেন, ধীরভাবে রেসিডেন্টের সহিত সাক্ষাৎ করিলেন, এবং পরিশেষে ধীরভাবে স্বীয় পদ পরিত্যাগ করিয়া নূতন শাসনকর্তার হস্তে মুলতানের শাসন-ভার সমর্পণ করিলেন। এরূপ ধীরতা কখনও বিশ্বাসঘাতকতার জননী হইতে পারে না, এরূপ সরলতা হইতেও কখনও ছদ্মভিসন্ধি পরিক্ষুট হয় না। মুলরাজ,

ছুর্গের সহিত সর্দার খাঁসিংহের হস্তে যুদ্ধোপযোগী কামান ইত্যাদি সমর্পণ করিয়াছিলেন * । যদি মুলরাজ রণমদে উন্মত্ত হইতেন, তাহা হইলে কখনও ধীরভাবে কামান ইত্যাদি প্রতিদ্বন্দীর হস্তে সমর্পণ করিতেন না । যে দুই জন ব্রিটিশ কর্মচারী ছুর্গ মধ্যে সংঘাতিক রূপে আহত হন, মুলরাজ তাঁহাদিগের প্রতি ভদ্রতা ও সৌজন্য দেখাইয়া আসিয়াছিলেন । বাঙ্গ্ আধু নিজেই স্বীকার করিয়াছেন যে, মুলরাজের কোন ছুরভিসন্ধিতে তাঁহারা আহত হন নাই † । মুলরাজের সদাশয়তার এক্রপ বলবৎ প্রমাণ থাকাতেও কেবল স্মার ফ্রেডরিক কারির অব্যবস্থিত-তায় মুলতানে সমরাগ্নি প্রজ্জ্বলিত হইয়া উঠিল । স্মার ফ্রেডরিক মুলরাজের সমুদয় সম্পত্তি বাজেয়াপ্ত করিয়া তাঁহার নিকট দশ বৎসরের হিসাব চাহিলেন । মুলরাজ উত্তর দিলেন, “আমি কি প্রকারে পিঠঠাকুরের কাগজপত্র উপস্থাপিত করিব ? তৎসমুদয় কীটদষ্ট অথবা অকণ্ঠ্য হইয়া গিয়াছে ।” এই কথা শেষ হইবার পরক্ষণেই মুলরাজের হৃদয় নিরাশার ঘোর-তর অন্ধকারে আচ্ছন্ন হইল, ধমনীমধ্যে রক্তের গতি ক্রমশঃ মন্দী-ভূত হইতে লাগিল, রেসিডেন্টকে অবশ্যস্তাবি পতনের অধিনায়ক ভাবিয়া মনঃক্ষুণ্ণ শাসনকর্ত্তা পুনর্বার নম্রভাবে কহিলেন “আমি আপনার মুষ্টিমধ্যেই ত আছি” ‡ । মুলরাজের এই শেষ কথা শুনিয়া কে তাঁহাকে ষড়যন্ত্রকারী বলিয়া দিক্কার দিবে ? কে তাঁহাকে বিপ্লবকারী বলিয়া পবিত্র ইতিহাসের সম্মান নষ্ট করিবে ? কিন্তু আশ্চ-র্যের বিষয় এই যে, এক্রপ নম্রতাদর্শনেও স্মার ফ্রেডরিক কারির হৃদয় কঠিন হইয়া রহিল, তিনি মুলরাজের কাতরোক্তিতে কর্ণপাত করিলেন না, বাঙ্গ্ আধু ও আওর্সন মুলতানবাসিগণের রণমত্ততায় নিহত হইলেন । বাঙ্গ্

* Moostapha Khan's letter to Herbert Edwardes. A year on the Punjab Frontier. Vol. II., p. 129.

† বাঙ্গ্ আধু আহত হইয়া বঙ্গুতে জেনেরল কর্টলাট ও হরবর্ট এডওয়ার্ডসের নিকট যে পত্র লিখেন, তাহাতে এই বাক্যটি ছিল :—“আমার বোধ হয় না, মুলরাজ ইহার মধ্যে গাহেন” ।—Herbert Edwardes. A year on the Punjab Frontier. Vol. II., p. 78.

‡ Torrens, Empire in Asia, p. 338. Comp. Arnold's Dalhousie's Administration. Vol. I., p. 65-66.

আধু মুত্থার অব্যবহিত পূর্বে মুলরাজকে নির্দোষ বলিয়া হরবট এডওয়ার্ডিস্কে পত্রও লিখিলেন, তথাপি স্তার ফ্রেডরিক কারি মুলরাজের স্বন্ধে সমুদয় দোষভার নিষ্কেপপূর্বক তাঁহার সর্বনাশ করিতে এক দল সৈন্য পাঠাইলেন। প্রধান সেনাপতি ও গবর্ণর জেনেরলের পুনঃ পুনঃ নিষেধ-বাক্যেও তিনি নিরস্ত হইলেন না। স্তার ফ্রেডরিক কারি কে? দেওয়ানী কার্ণেয়র এক জন রণমূৰ্খ কৰ্মচারী মাত্র। আর লর্ড গক কে? সুবিস্তীর্ণ সৈন্যসমষ্টির সর্বপ্রধান অধিনায়ক *। একজন যুদ্ধানভিজ্ঞ দেওয়ানী কৰ্ম-চারী অনায়াসে এই রণপণ্ডিত অধিনায়কের বাক্য পদদলিত করিয়া মুল-রাজকে “যুদ্ধং দেহি” বলিয়া আহ্বান করিলেন!

ইঙ্গরেজ সৈন্য দলবদ্ধ হইয়া মুলতানে আসিলে মুলরাজ যখন বীরবেশ ধারণ করিলেন, তখনও তাঁহাকে দোষী করা যাইতে পারে না। রেসিডেণ্টের রণকণ্ঠস্বয়ন যখন অপরিহার্য হইয়া উঠিল, তখনই মুলরাজ আত্মমৰ্যাদা রক্ষার্থ সংগ্রামে প্রবৃত্ত হইলেন; ইহা প্রকৃত বীরপুরুষের লক্ষণ। যাহা হউক, মুলতানে যুদ্ধ উপস্থিত হইবার পূর্বে লাহোরদরবার রাজনীতির তরঙ্গে পুনর্বার দোলায়িত হইতে আরম্ভ হয়। এই রাজনীতিতেই দ্বিতীয় শিখ-যুদ্ধের প্রধান কারণ নিবদ্ধ রহিয়াছে। প্রকৃত পক্ষে দ্বিতীয় শিখযুদ্ধের কারণ নির্দেশ করিতে হইলে এই কয়েকটি ধরিতে হয়:—পঞ্জাব হইতে মহা-রাণী বিন্দনের নির্কাসন; মহারাজ দিলীপ সিংহের বিবাহের দিন নির্দ্ধারিত করিতে রেসিডেণ্টের অমত এবং সর্দার ছত্র সিংহের প্রতি কাপ্তেন আবট ও রেসিডেণ্টের চূৰ্ণ্যবহার †।

মহারাণী বিন্দনকে যেরূপ নিষ্ঠুরতার সহিত পঞ্জাব হইতে বারাণসীতে নির্কাসিত করা হয়, তাহা পূর্বে বিবৃত হইয়াছে। খালসা সৈন্য ষাঁহাকে মাতার শ্রায় ভক্তি করিত, তাঁহার এইরূপ শোচনীয় নির্কাসনে তাহাদের হৃদয় নিতান্ত ব্যথিত হইয়া উঠে। অধিক কি, পঞ্জাবের সকলেই এজন্ত আপনাদিগকে যারপরনাই অপমানিত জ্ঞান করে ‡। শিখ সেনা-পতি শেরসিংহ মহারাণী বিন্দনের নির্কাসনে নিতান্ত বিরাগ প্রদর্শন

* Sir Charles James Napier, Defects in the Indian Government, p. 222.

† Major Evans Bell, Retrospects and Prospects of Indian policy, p. 102. Comp. Torrens, Empire in Asia. Chap. XXIV.

‡ Arnold, Dalhousie's Administration, Vol. I., p. 115.

করিয়া স্পষ্টাকরে উল্লেখ করেন, “ইহা সকলেই ভালরূপে জানিতে পারিয়াছেন, সমস্ত পঞ্জাববাসী, সমস্ত শিখ, সংক্ষেপে সমস্ত পৃথিবীর বিদিত হইয়াছে যে, কিরিন্দিগণ কিরূপ দৌরাশ্বা, অত্যাচার ও বিশ্বাসঘাতকতা দেখাইয়া পরলোক-সুখভোগী রণজিৎসিংহের বিধবা মহিষীর সহিত ব্যবহার করিয়াছে, এবং কিরূপ দৌরাশ্বা এই রাজ্যের লোকদিগকে ব্যতিব্যস্ত করিয়া তুলিয়াছে। প্রথমতঃ, তাঁহারা সমস্ত প্রজার মাতা স্বরূপ মহারাণীকে কারারুদ্ধ ও হিন্দুস্থানে নির্বাসিত করিয়া সন্ধি ভঙ্গ করিতেও ক্রটি করে নাই, দ্বিতীয়তঃ, তাঁহাদের দৌরাশ্বা শিখগণ এতদূর নিপীড়িত হইয়া উঠিয়াছে যে, আমাদের ধর্ম নষ্ট হইয়া গিয়াছে, এবং তৃতীয়তঃ আমাদের রাজ্য পূর্বাপেক্ষা গৌরবশূন্য হইয়া পড়িয়াছে” * ।

কাবুলের আমীর দোস্ত মহম্মদ খাঁও মহারাণী ঝিন্দের প্রতি ইন্দ্ৰরেজদিগের দুর্ব্যবহার শিখদিগের অসন্তুষ্টির একটি প্রধান কারণ বলিয়া নির্দেশ করেন। তিনি কাপ্তেন আবটকে যে পত্র লিখেন, তাহাতে স্পষ্ট উল্লেখ ছিল, “মহারাজ দলীপসিংহের মাতা ঝিন্দনকে কারারুদ্ধ ও নির্বাসিত করাতে সমস্ত শিখজাতি দিন দিন অধিকতর অসন্তুষ্ট হইয়া উঠিতেছে”† । অধিক কি স্বরাজ্যের ফ্রেডরিক কারিও ১৮৪৮ অব্দের ২৫এমে এই বিষয়-প্রসঙ্গে গবর্নর জেনে-রালকে লিখিয়াছিলেনঃ—“সেনাপতি শের সিংহের শিবির হইতে সংবাদ আসিয়াছে যে, মহারাণী ঝিন্দের নির্বাসন শুনিয়া খালসা সৈন্য সাতিশয় উত্তেজিত হইয়া উঠিয়াছে। তাহারা বলিতেছে, ঝিন্দ খালসাদিগের মাতৃস্থানীয়া ছিলেন, তিনি যখন নির্বাসিত হইয়াছেন, এবং মহারাজ দলীপ সিংহ যখন ইন্দ্ৰরেজদিগের হস্তে আছেন, তখন তাহারা কখনই মূলরাজের ঝিকড়ে অস্ত্রধারণ করিবে না”‡ । এই সার্কজনীন বিরাগের মূল কারণ কে? কাহাব দোষে সমস্ত পঞ্জাব এইরূপ সংকুঙ্ক হইয়াছিল? এই প্রশ্নের উত্তর স্থলে আমরা অসঙ্কুচিত চিত্তে স্মার ফ্রেডরিক কারিকেই নির্দেশ করিতেছি। স্মার

* Torrens, Empire in Asia, p. 340-341. Comp. Retrospects and prospects &c., p. 108. Punjab Papers, 1849, p. 362.

† Punjab Papers. 1849, p. 512. Comp. Retrospects and Prospects.&c. p. 108.

‡ Punjab Papers. 1879, p. 179. Comp. Retrospects. and Prospects. &c. p. 108.

ফ্রেডরিক প্রতিনিধি-সভার সম্পূর্ণ অমতে কেবল গবর্নর জেনেরলের লিখিত অমুমতি লইয়া মহারাজী বিন্দনকে নির্কাসিত করিয়াছিলেন * ! যিনি চিরদিন ব্রিটিশ গবর্নমেন্টের সহিত বন্ধুত্বসূত্রে আবদ্ধ ছিলেন, চিরদিন বাহাদুরের প্রতি সম্মানসহকারে দেখাইয়া আসিয়াছিলেন, অদ্য গবর্নর জেনেরল সেই প্রিয়বন্ধু রণজিৎ সিংহের বিধবা পত্নীকে তাঁহার প্রিয়তম পুত্র হইতে বিচ্ছিন্ন করিয়া অপরিচিত, অজ্ঞাত স্থানে নির্কাসিত করিলেন ! সৌহার্দ্যের কি বিড়ম্বনা ! বন্ধুতার কি শোচনীয় পরিণাম !

কে প্রভৃতি ইতিহাস-লেখকগণ উল্লেখ করিয়াছেন যে, মহারাজী বিন্দন গোপনে ব্রিটিশ গবর্নমেন্টের বিরুদ্ধে ষড়যন্ত্র করিতে তাঁহার প্রতি এইরূপ নির্কাসন-দণ্ড বিহিত হইয়াছিল † । আর ফ্রেডরিক কারি এ সঙ্কে যে মন্তব্য প্রকাশ করেন, তাহাতেও বিন্দনের প্রতি ঐ দোষ আরোপিত হয় § । কিন্তু টরেন্স প্রভৃতি অপরূপাত ঐতিহাসিকগণ কহেন যে, যখন রেসিডেন্টের আদেশে মহারাজীকে কাগজপত্র ও অন্যান্য দ্রব্যের অহুসন্ধান আরম্ভ হইল, তখন তাহার মধ্যে ষড়যন্ত্র অথবা ছুরতিসঙ্কীর্ণাচরণ কিছুই পাওয়া গেল না ॥ । এ বিষয়ে ফ্রেডরিক কারিও স্বয়ং বলিয়াছেন, “যদিও বিন্দনের ষড়যন্ত্র সঙ্কে কোন প্রমাণ পাওয়া যাইবে না, তথাপি যে রূপ বোধ হইতেছে, তাহাতে ব্রিটিশ গবর্নমেন্টের সম্মান ও মর্যাদা রক্ষার্থে এ বিষয়ে আর আমাদেবর সন্দেহ-মোচায়মান হইবার অবকাশ নাই” ॥ । ইহাতেই স্পষ্ট বোধ হয়, আর ফ্রেডরিক কারি মহারাজী বিন্দনকে নির্কাসিত করিয়া ও অপ্রাপ্তবয়স্ক মহারাজ দলীপ সিংহকে হস্তে রাখিয়া কার্য করিতে কৃতসঙ্কল্প হইয়াছিলেন । গবর্নরজেনেরল মহারাজী বিন্দনকে কেবল নির্কাসিত করিয়াই কান্ত হন নাই ; নির্কাসনের সঙ্গে সঙ্গে তাঁহার বার্ষিক

* Retrospects and Prospects of Indian Policy, p. 103.

† Retrospects and Prospects &c. p. 106.

‡ History of the Sepoy War, Vol I., p. 30.

§ Retrospects and Prospects &c. p. 104. Comp. Punjab Papers. 1849, p. 168.

॥ Empire in Asia, p. 343. Comp. Retrospects and Prospects. &c. p. 107-108. Punjab Papers, 1849, pp. 263, 266.

¶ Empire in Asia, p. 342.

বৃত্তিও কমাইয়া দিয়াছিলেন। বাইরাবল সন্ধির নিয়মানুসারে বিন্দনের বার্ষিক বৃত্তি ১,৫০,০০০ টাকা নিরূপিত হইয়াছিল। সেখপূরে কারা-রোধের সময় উহা কমাইয়া ৪৮,০০০ টাকা করা হয়। পরিশেষে বারানসীতে নির্বাসন-সময়ে লেখনীর আর এক আঘাতে ৪৮ সহস্রের অঙ্ক দ্বাদশ সহস্রে পরিণত হয়। এতদ্ব্যতীত কারাবন্দিনী বলিয়া রেসিডেন্ট বিন্দনের সমুদয় অলঙ্কারও বাজেয়াপ্ত করেন *। এইরূপে রাজ-বনিতা ও রাজমাতার প্রতি অত্যাচারের পরাকাষ্ঠা প্রদর্শিত হইল, এই রূপে দ্বিতীয় শিখযুদ্ধের প্রথম কারণ ইতিহাসে স্থান পরিগ্রহ করিল। রণজিৎ-রাজ্যের সকলেই মহারাণীর এই নির্বাসন আপনাদের জাতীয় অবমাননা এবং মহারাজ দলীপ সিংহের সিংহানমনচ্যুতি ও পঞ্জাবরাজ্য-বিশ্ব্বংসের পূর্ব লক্ষণ বলিয়া জ্ঞান করিল †। যে রণজিৎসিংহের জীবদ্দশায় ব্রিটিশ গবর্ণমেন্ট মিত্রভাবে হৃদয়ের সারল্য দেখাইয়া আসিতে-ছিলেন, সেই রণজিৎ সিংহের অবর্তমানে তদীয় পত্নী নির্বাসিত ও কারা-রুদ্ধ হইলেন। অদ্য রণজিৎ-মহিষী ব্রিটিশ গবর্ণমেন্টের কারাবন্দিনী, অদ্য রণজিৎ-তনয় ব্রিটিশ গবর্ণমেন্টের ক্রীড়াপুতুল !

শিখযুদ্ধের দ্বিতীয় কারণ, দলীপ সিংহের বিবাহের দিন নির্দ্ধারিত করিতে ব্রিটিশ রেসিডেন্টের অমত। সর্দার ছত্রসিংহ হাজার শাসন-কর্তা ছিলেন। বয়োবৃদ্ধ ও গুণবৃদ্ধ বলিয়া শিখ-সমাজে তাঁহার বিশেষ প্রতিপত্তি ছিল। তাঁহার পুত্র শিখসেনাপতি শের সিংহও উদার-প্রকৃতি ও রণবিশারদ ছিলেন। মহারাজ দলীপসিংহের সহিত এই সর্দার ছত্র-সিংহের হুহিতা অথবা শের সিংহের ভগিনীর বিবাহের সম্বন্ধ হয়। সম্বন্ধকর্তা বিবাহের দিন নির্দ্ধারিত করিতে লাহোর-দরবারে রেসিডেন্টের নিকটে বথাবিধি আবেদন করেন। সেনাপতি শের সিংহ মেজর এড্‌ওয়ার্ডসের সাহায্যার্থ মুলতানে প্রেরিত হইয়াছিলেন, ভগিনীর বিবাহের সম্বন্ধে তাঁহার সহিত এড্‌ওয়ার্ডসের অনেক কথাবার্তা হয়। এড্‌ওয়ার্ডস, রণদক্ষতার সহিত প্রগাঢ় রাজনীতিজ্ঞতায় অলঙ্কৃত ছিলেন।

* Empire in Asia, p. 343. Comp. Retrospects and Prospects &c. pp. 106-107, 108. Punjab Papers, 1849, pp. 179, 577, 263, 575.

† Retrospects and Prospects &c. p. 109.

তিনি ২৮এ জুলাই প্রস্তাবিত বিষয়সম্বন্ধে পূর্বোক্ত আবেদনের সমর্থন ও সর্দার শেরসিংহের অভিপ্রায় বিবৃত করিয়া রেসিডেন্টের নিকটে একখানি পত্র লিখেন*। পত্রে উল্লেখ থাকিল, “এক্ষণে সকলেই প্রকাশ করিতেছে যে, ব্রিটিশ গবর্ণমেন্ট শীঘ্রই বর্তমান গোলযোগ ও সৈন্ত-গণের অসহ্যবহারের কারণ দেখাইয়া পঞ্জাব আত্মসাৎ করিবেন, এই সময়ে যদি মহারাজকে একটি মহারাণীর সহিত সংযোজিত করা হয়, তাহা হইলে সন্ধিরক্ষা করিতে ব্রিটিশ গবর্ণমেন্টের বিশেষ যত্ন আছে বলিয়া সাধারণের মনে স্থির বিশ্বাস জন্মিতে পারে। এতদ্বারা লোকের হৃদয় নিঃসন্দেহ আশ্বস্ত হইবে”†। স্মার ফ্রেডরিক কারি এই পত্র পাইয়া বিলক্ষণ মৌখিক শিষ্টাচার দেখাইলেন। তিনি প্রতি-শ্রুত হইলেন, দরবারের সদস্যবর্গের সহিত এ বিষয়ে পরামর্শ করিবেন; স্বীকার করিলেন, ব্রিটিশ গবর্ণমেন্ট, মহারাজ, তাঁহার বিবাহপাত্রী এবং তৎপরিবারবর্গের সম্মান ও সুখ বর্দ্ধন করিতে বিলক্ষণ উৎসুক আছেন‡। কিন্তু তিনি মেকিয়াবেলির যে কুট মন্ত্রণায় দীক্ষিত ছিলেন, এক্রপ শিষ্টা-চারেও তাহা গোপনে রহিল না। মেকিয়াবেলির মন্ত্র-শিষ্য পুনর্বার রাজনীতির চাতুরী প্রদর্শন করিয়া লিখিলেন, “দলীপ সিংহের বিবাহ দিলেই যে, পঞ্জাবে আমাদের বর্তমান ও ভবিষ্যৎ রাজনীতির সম্বন্ধে প্রতি-শ্রুতি রক্ষা হইবে, তাহা আমার বোধ হইতেছে না। কত্বাপক্ষ ও দরবা-রের স্তুবিধা অনুসারে যে সময়েই হউক, মহারাজের বিবাহ হইতে পারে; এ বিষয়ে আমার কোন আপত্তি নাই§।” যাহারা সরলপ্রকৃতি, হৃদ-য়ের স্তরে স্তরে যাহাদের সারল্য লীলা করিয়া বেড়াইতেছে, তাঁহার রেসিডেন্টের এই লিখন-ভঙ্গীতেও সরলতা দেখিয়া স্তম্ভ হইবেন। কিন্তু যাহারা হৃৎকোথ্য রাজনীতির রহস্যোদ্ভেদে সক্ষম, যাহাদের মস্তিষ্কের সজীবতায় মণ্ডলেশ্বর রাজচক্রবর্তী রাজ্যলুপ্ত হইয়া সংসার-বিরাগী উদাসীন-

* Retrospects and Prospects, &c. p. 110. Comp. Empire in Asia, p. 343.

† Ibid. p. 111. Comp. Punjab Papers, 1849, p p. 270, 271. Empire in Asia, p. 343-344.

‡ Ibid. p. 111. Comp. Empire in Asia, p. 344.

§ Ibid. p. 111-112. Comp. Punjab Papers. 1849, pp. 272, 273, and Empire in Asia, p. 334.

বেশে বনে বনে ভ্রমণ করিতেছেন ; পক্ষান্তরে সংসার-বিরাগী উদাসীন ব্যক্তি মণ্ডলেশ্বর রাজচক্রবর্তীর পদে সমাসীন হইয়া স্বীয় ইচ্ছানুসারে শাসন-দণ্ড চালনা করিতেছেন ; তন্তুবায়-কর-সঞ্চালিত তুরীর শ্রায় একবার এক রাজ্য একের করতলস্থ হইতেছে, পুনর্ব্বার তাহা অপরের দিকে সঞ্চালিত হইতেছে, তাঁহারা অনায়াসেই উক্ত লিখন-ভঙ্গীতে রেসিডেন্টের হৃদয়ের তরঙ্গাবর্ত দেখিয়া ঈষদ্বাস্ত করিবেন । বুদ্ধিতে পারিবেন, রেসিডেন্ট প্রস্তাবিত বিবাহে সম্মতি দিয়া তেজস্বী শেরসিংহকে দলীপসিংহের ঘনিষ্ঠ করিতে সম্মত নহেন ; বুদ্ধিতে পারিবেন, দলীপসিংহের বিবাহ দিতে এখনও লাহোর-দরবারের স্ত্রবিধা হইয়া উঠে নাই । স্ত্রতরাং শিখ-হস্ত হইতে পঞ্জাবের পতন অবশ্যস্তাবি । অদ্য যাহা রণজিৎ রাজ্য বলিয়া সাধারণের নিকট পরিচিত হইতেছে, কলা তাহা ব্রিটিশ ইণ্ডিয়ার লোহিত বর্ণে রঞ্জিত হইয়া সর্বত্র ব্রিটিশ ভাব, ব্রিটিশ আচার ও ব্রিটিশ নীতির ক্রীড়াক্ষেত্র হইবে ।

কঠোর-প্রকৃতি রেসিডেন্টের এই কঠোর উত্তর মূলতান পছ ছিল । উত্তর পাইয়া হরবট এডওয়ার্ডিস্ সর্দার শেরসিংহকে জানাইলেন, শের সিংহ উহা আবার হাজরাতে তাঁহার বৃদ্ধ পিতার নিকট লিখিলেন । সর্দার ছত্রসিংহ ইহার পূর্বেই মহারাজী ঝিন্দনের কারারোধ দেখিয়া সান্তি শয় বিরক্ত হইয়াছিলেন, এক্ষণে রেসিডেন্টের ছদ্ম্ভিত্তি প্রযুক্ত তনয়ার বিবাহের গোপলযোগ দেখিয়া তাঁহার বিরক্তি শত গুণে বর্দ্ধিত হইয়া উঠিল । তিনি বুদ্ধিতে পারিলেন, রেসিডেন্ট গোপনে গোপনে বেক্রপ বন্ধপবিকর হইতেছেন, তাহাতে শীঘ্রই পঞ্জাব কোম্পানির মুন্নুক হইবে । তরঙ্গের উপর তরঙ্গের আঘাতে স্বদেশবৎসল বৃদ্ধ শিখ সর্দারের হৃদয় আলোড়িত হইয়া উঠিল । তিনি প্রিয়তম জন্মভূমিকে এই আশঙ্কিত বিপদ হইতে রক্ষা করিতে কৃত-নিশ্চয় হইলেন । প্রতিজ্ঞা করিলেন, যত দিন গুরু গোবিন্দ সিংহের মস্তপুত শেষ রক্তবিন্দু তাঁহার ধমনীতে প্রবাহিত থাকিবে, তত দিন তিনি পঞ্জাবের স্বাধীনতা রক্ষা করিবেন । এইরূপ দৃঢ় প্রতিজ্ঞ হইলেও সর্দার ছত্রসিংহ ব্রিটিশ গবর্নমেন্টের বিরুদ্ধে অস্ত্র ধারণ করেন নাই । তিনি সন্ধির নিয়ম যথাবৎ রক্ষা করিতে প্রয়াস পাইয়া আসিতেছিলেন । কিন্তু এই প্রয়াস দীর্ঘস্থায়ী হইল না, ছত্রসিংহ ঘোরতর অপদস্থ ও অপমানিত হইলেন । এই অপদস্থতা ও অপমানই দ্বিতীয় শিখ যুদ্ধের তৃতীয় ও সর্বশেষ কারণ ।

পূর্বে উক্ত হইয়াছে, সর্দার ছত্রসিংহ হাজরার 'শাসন-কর্তা' ছিলেন। কাপ্তেন আবট্ নামক রেসিডেন্টের একজন সহকারী তথায়। তাঁহার মন্ত্রণা-দাতা হন। কাপ্তেন আবট্ নিতান্ত সন্ধিদ্ধ ও অকর্মণ্য ছিলেন। অল্পচিত বিদ্বেষ-ভাব তাঁহার হৃদয় একপ কলুষিত করিয়া তুলিয়াছিল যে; তিনি ভারতবর্ষের সকলকেই বিষ নয়নে চাহিয়া দেখিতেন। উপস্থিত ঘটনার এক বৎসর পূর্বে আবট্ দেওয়ান জোয়ালাসাহি নামক এক জন শিখশ্রেষ্ঠের প্রতি সন্দেহ করিয়া সাতিশয় অসদ্ব্যবহার প্রদর্শন করেন। তাৎকালিক রেসিডেন্ট স্মার হেন্‌রি লরেন্স আবটের এই কার্যে অসন্তুষ্ট হইয়া গবর্নরজেনেরলকে লিখেনঃ—

“কাপ্তেন আবট এক জন উৎকৃষ্ট কর্মচারী, কিন্তু তিনি সমুদয় বিষয়ই বিরুদ্ধভাবে দেখেন। আমার বোধ হয়, তিনি না বুঝিয়া দেওয়ান জোয়ালাসাহির প্রতি অত্যাচার ব্যবহার করিয়াছেন।” এই দেওয়ান জোয়ালাসাহির সম্বন্ধে হেন্‌রি লরেন্স লিখিয়াছেন, “আমি কেবল একজন এতদ্দেশীয়কে ভাল বলিয়া জানি। শিক্ষা, অভিজ্ঞতা ও সময় অনুসারে তিনি প্রকৃতপক্ষে এক জন সম্মানার্থ ও সক্ষম ব্যক্তি *।” কেবল জোয়ালাসাহির বিষয়েই কাপ্তেন আবটের অত্যাচার তিরোহিত হয় নাই। স্মার ফ্রেডরিক কারির সময়ে অগ্রতম শিখ সর্দার বন্দা সিংহও আবটের বিষয়নে পতিত হন। স্মার ফ্রেডরিক এ জন্ত আবটকে বিলক্ষণ তিরস্কার কবিয়া বলিয়াছিলেন, “তাঁহার (আবটের) সন্দেহ নিতান্ত অমূলক। যে সর্দারের প্রতি সন্দেহ করা হইয়াছে, তিনি একান্তমনে ও সাবধানতা-সহকারে আমার আদেশ পালন করিয়াছেন” †। এইরূপ সন্ধিদ্ধচিত্ত ও পরদেষী ব্যক্তি ব্রিটিশ রেসিডেন্টের সহকারী হইয়াছিলেন, এইরূপ অধীরপ্রকৃতি ব্যক্তির হস্তে রাজ্যশাসন-সংক্রান্ত গুরুতর মন্ত্রণার ভার সমপিত হইয়াছিল।

নীতিশাস্ত্রকারেরা বলিয়া থাকেন, স্বভাব সমুদয় গুণ অতিক্রম করিয়া মাথার উঠিয়া থাকে। কাপ্তেন আবট ইহার জাঙ্ঘল্যমান উদাহরণ-স্থল। স্মার হেন্‌রি লরেন্স ও স্মার ফ্রেডরিক কারির নিকট তিরস্কার পাইয়াও

* Retrospects and Prospects of Indian policy, p. 113. Punjab papers, 1849, p. 30. Comp. Empire in Asia, p. 344.

† Ibid. p. 111. Empire in Asia, p. 315. Punjab. Papers, 1849, p. 328.

আবটের চরিত্র-দোষ দূর হয় নাই। মুলতান-বিপ্লবের অব্যবহিত পরে কাপ্তেন আবটের সন্ধিগ্ন হৃদয়ে আবার গভীর সন্দেহ উপস্থিত হইল। তাঁহার বিশ্বাস জন্মিল, সর্দার ছত্রসিংহ মুলরাজের সহিত সম্মিলিত হইয়া ইঙ্গরেজদিগকে পঞ্জাব হইতে নিষ্কাশিত করিবার চেষ্টায় আছেন। এই সন্দেহ ক্রমে গুরুতর হইয়া উঠিল। তিনি ছত্রসিংহকে ষড়যন্ত্রকারী ও বিশ্বাস-ঘাতক বলিয়া মনে করিতে লাগিলেন, এবং তাঁহার বাসস্থান ছত্র সিংহের আবাস-বাটার ৩৫ মাইল দূরে উঠাইয়া লইয়া তাঁহার সহিত সাক্ষাৎসম্বন্ধে সমুদয় সংশ্রব বন্ধ করিয়া দিলেন * ।

সর্দার ছত্রসিংহ বড় সাধু-প্রকৃতি ছিলেন। স্মার জন লরেন্স (পরে লর্ড লরেন্স) একদা কহিয়াছিলেন, “ছত্র সিংহ নিতান্ত নিরীহ-স্বভাব প্রাচীন ভাল নানুষ † ।” কিন্তু কাপ্তেন আবট যাঁহার প্রতি সন্দেহ করেন, তাঁহাব সচরিত্রতাসম্বন্ধে সহস্র প্রমাণ থাকিলেও তিনি তাহাতে আস্থাবান হন না। সুতরাং ছত্রসিংহের প্রতি আবটের যে বিদ্বেষ-ভাব অঙ্গুবিত হইয়াছিল, লরেন্স প্রভৃতির বাক্যে তাহা দূর হইল না।

একদল সৈন্য মুলতানযুদ্ধে বাইবার নিমিত্ত প্রস্তুত হইয়া ছত্রসিংহের বাসস্থানের নিকটবর্তী পল্লি নামক স্থানে অবস্থিত করিতেছিল। আগষ্ট মাসের প্রথম সপ্তাহে কাপ্তেন আবট অতর্কিতরূপে, শাসন-কর্তার অজ্ঞাতসারে, হাজার হাজার মুসলমান ক্রমকদিগকে দলবদ্ধ ও উত্তেজিত করিয়া উক্ত সৈন্যদলের গতিরোধ করেন। ৬ই আগষ্ট ঐ রণ-ছন্দে মুসলমান সৈন্য ছত্র সিংহের বাসস্থান হরিপু অবরোধ করে ‡ । ছত্র সিংহের অধীনে কাপ্তেন কানোরা নামক একটি মার্কিনদেশীয় ব্যক্তি হাজার সেনাপতি ছিল। ছত্রসিংহ আক্রমণকারীদিগকে শাসন করিতে তাহাকে আদেশ করেন। কানোরা বলিল, কাপ্তেন আবটের অনুমতিব্যতীত সে উহাদিগের বিরুদ্ধে যাইতে পারিবে না। দ্বিতীয় বার আদেশ হইল, এবার বলা হইল “কাপ্তেন

* Retrospects and Prospects, p. 113. Empire in Asia, p. 344-345. Punjab Papers, 1849, pp. 279, 285.

† Ibid p. 114. Comp. Empire in Asia., 345. Punjab Papers. p. 334.

‡ Ibid p. 115-116. Comp. Empire in Asia, p. 345.

আবট অবগত নহেন যে, কামান সকল নিয়োহিগণের কবতলুহু হইলে কিরূপ অনর্থের উৎপত্তি হইবে।” এভাবেও অবাধ্য সেনাপতি শাসনকর্তার বাক্যে অবহেলা করিল। কানোরার অসম্মতিতে জুইদল শিখ পদাতিক, সর্দারের আদেশ পালনার্থ প্রেরিত হইল। কানোরা আপনার কামান সকল গোলা-রাশিতে পরিপূর্ণ করিয়া, হাবিলদারদিগকে উহা ছুড়িতে অনুমতি দিল। হাবিলদারগণ অসম্মত হইল। কানোরা তাহাদের এক জনকে স্বীয় তরবারির আঘাতে দ্বিগুণ করিয়া স্বয়ং গোলাপূর্ণ কামানে আশুণ দিল, সৌভাগ্যক্রমে কামানের সন্ধান ব্যর্থ হইল। কানোরা পুনর্বার জুই জন শিখ সৈনিকের প্রতি পিস্তল ছুড়িল। ইহার মধ্যে সৈন্তগণ অগ্রসর হইয়া গুলি করিয়া কানোরাকে নিহত করিল *। অপক্ষপাত বিচারক-মাত্রেই কানোরার এই শাস্তি ঞায়সম্মত বলিবেন। কিন্তু কাপ্তেন আবট উহা পেশোরা সিংহের হত্যার ঞয় গুপ্ত-হত্যা বলিয়া ঘোষণা করিলেন †, এবং হত্যাকারী বলিয়া ছএসিংহের প্রতি সমুদয় দোষ দিয়া রেসিডেন্টের নিকটে পত্র লিখিলেন। স্তার ফ্রেডরিক কারি উপস্থিত বিষয়ের আমূল খুন্ডান্ত অবগত হইয়া বিশিষ্ট ধীরতা ও গান্ধীর্ষ্যের সহিত কাপ্তেনের অভিযোগ অসম্মত বলিয়া উল্লেখ করিলেন। তিনি আবটকে স্পষ্ট লিখিলেন, “উপস্থিত বিষয় আপনি যে ভাবে গ্রহণ করিয়াছেন, তাহাতে আপনার সহিত আমি একমত হইতে পারি না। সর্দার ছত্রসিংহ প্রদেশের শাসনকর্তা। সমস্ত ফৌজদারী কায তাহার অধীনে আছে। শিখ সৈন্ত-

* Retrospects and Prospects of Indian Policy, p. 116. Empire in Asia, p. 346. Punjab Papers, 1849, pp. 280, 301, 303.

† Ibid, p. 116, Punjab Papers, p. 302. যে কয়েক ব্যক্তি রঞ্জিং সিংহের উত্তরাধিকারী বলিয়া পঞ্জাবের সিংহাসন প্রার্থনা করেন, পেশোরা সিংহ তাঁহাদিগের মধ্যে একজন। ইনি ও ইহাঁর ভ্রাতা কাম্বীর সিংহ স্বীয় অধিকার রক্ষার জন্ত শ্যালকোটো লাহোরদরবারের বিরুদ্ধে সমুথিত হন। ১৮৪৫ অব্দের মাচ্চ মাসে পেশোরা সিংহ পুনর্বার অস্ত্র ধারণ করেন। অক্টোবর বহুবিধ পরিবর্তনের পর জুলাই মাসের শেষে তিনি সিক্কুর তীরবর্তী আটকের দুর্গ আক্রমণ করেন। কিন্তু উহার এক মাস পরে ছত্র সিংহের অধীনস্থ সৈন্তগণ ইষ্টকে অবরুদ্ধ করে। লাহোর-দরবারের তদানীন্তন উজীর মহারাজী খিন্দনের ভ্রাতা জহোর সিংহের আদেশে ইষ্টকে কারাগারে বধ করা হয়। এজন্য সৈন্তগণ উত্তেজিত হইয়া জহোর সিংহকে গুলি করিয়া বধ করে। ইহাতে বোধ হয় এই হত্যার সম্বন্ধে সর্দার ছত্রসিংহ সোণী নহেন। Lionel James Trotter's History of the British Empire in India, Vol. I, p. 42-43. Comp. Retrospects and Prospects &c, p. 116, note.

দলের সমুদয় কর্মচারী তাঁহার আদেশ পালনে বাধ্য। আমি পুস্তিতে পারিতেছি না, আপনি কি প্রকারে কানোরার হত্যা পোশোরা সিংহের হত্যার স্থায় ঘোর নিষ্ঠুরতাজনক গুপ্ত হত্যা বলিয়া নির্দেশ করিলেন* । যখন হাজরার এই গোলযোগের সংবাদ মুলতানে উপস্থিত হইল, তখন পিতার প্রতি কাপ্তেন আবটের দুর্ব্যবহারে শেরসিংহ নিতান্ত অসন্তুষ্ট হইলেন। মেজর এডওয়ার্ডস স্পষ্ট বলিয়াছেন, “শেরসিংহ তাঁহার পিতার পত্র দেখাইয়া এসম্বন্ধে বিলক্ষণ ধীরতাসহকারে অনেক ক্ষণ কথা বার্তা কহেন, এবং তাঁহার পিতা এ বিষয়ে যে সমস্ত কার্য্য করিয়াছেন, তাহাতে তাঁহার সাধুতার প্রমাণ পাওয়া যায় কি না, তদ্বিষয় বিচার করিতে আমাকে অনুরোধ করেন” † । রেসিডেন্টের এই প্রাথমিক ধীরত্ব ও অপক্ষপাতিতায় বোধ হইয়াছিল যে, তিনি এইরূপ ধীরতা ও অপক্ষপাতিতা রক্ষা করিয়া সর্দার ছত্রসিংহকে উপস্থিত গোলযোগ হইতে অব্যাহতি দিবেন, এবং সর্দার ছত্রসিংহ আত্মরক্ষার্থ বিদ্রোহীদিগের দমন জন্ত সৈন্য পাঠাইয়াছিলেন, ইহা বুঝিয়া স্থায়ের দণ্ড চালনা করিবেন। কিন্তু ছত্র সিংহকে অব্যাহতি দেওয়া হইল না। রেসিডেন্ট কোন বিচার করিলেন না। ছত্রসিংহ ধীরতার পরিবর্তে অধীরতা ও অপক্ষপাতিতার পরিবর্তে পক্ষপাতিতার শৃঙ্খলে আবদ্ধ হইয়া নিতান্ত অপদস্থ ও অপমানিত হইয়া উঠিলেন।

স্বার্সফ্রেডরিক কারির নিয়োগ অনুসারে কাপ্তেন নিকলসন্ উপস্থিত ব্যাপারের শৃঙ্খলাবিধানে ব্যাপৃত ছিলেন। তিনি কাপ্তেন আবটের সমর্থনকারী হইয়া ২০এ আগষ্ট রেসিডেন্টকে লিখিলেন, “সর্দার ছত্র সিংহের ব্যবহার সাতিশয় শঙ্কা-জনক। আমার বিবেচনায় নিজামতি হইতে পদচ্যুতি ও জায়গীর বাজেয়াপ্ত করাই তাঁহার অপরাধের উপযুক্ত শাস্তি। আমার বোধ হয়* আপনি এ বিষয়ে আমার সহিত একমত হইবেন ‡ ।”

* Retrospects and Prospects of Indian Policy, p. 117. Punjab Papers 1849, p. 313.

† Ibid, p. 123-124. Punjab Papers. 1849, p. 294. Empire in Asia, p. 347.

‡ Ibid p. 126, Comp, Punjab Papers, 1849, p. 295.

রেসিডেন্ট বিনা আইনে বিনা বিচারে এই কঠোর শাস্তির অনুমোদন করিয়া ২৩এ আগষ্ট কাপ্তেন নিকলসনের নিকট পত্র লিখিলেন, স্ত্রতরাং দণ্ডানুসারে ছত্রসিংহকে নিজামতি হইতে পদচ্যুত ও তাঁহার জায়গীর বাজেয়াপ্ত করা হইল * ।

এইরূপে বুদ্ধ সর্দার ছত্রসিংহ ব্রিটিশ রাজনীতির ছুরবগাহ কৌশলে জড়িত হইয়া কৰ্ম্মচ্যুত ও সম্পত্তিচ্যুত হইলেন । যে দিন রেসিডেন্ট কাপ্তেন নিকলসনের প্রস্তাবিত দণ্ডের অনুমোদন করেন, সেই দিনই তিনি মেজর এডওয়ার্ডস্কে লিখিয়াছিলেন, “সর্দার ছত্র সিংহ যে কার্য্য করিয়াছেন, তাহা কেবল কাপ্তেন আবটের প্রতি অবিখ্যাসে ও ভয়ে করা হইয়াছে, অথ কোন কারণে নহে । লেফটেনেন্ট নিকলসন্ ও মেজর লরেন্স এ বিষয়ে আমার সহিত এক মত হইয়াছেন † । তিনি ইহার পূর্বে প্রধান সেনাপতিকেও লিখেন, “লেফটেনেন্ট নিকলসন্ কানোরার মৃত্যু, হত্যার মধ্যে পরিগণিত করিতেছেন । তাঁহার মতে ছত্র সিংহই এই হত্যাকারিগণের অধিনায়ক । ইহাতে আমার বোধ হয়, তিনি কানোরার মৃত্যুর যথাবৎ বৃত্তান্ত অবগত নহেন” ‡ । এতদ্ব্যতীত যে দিন রেসিডেন্ট ছত্র সিংহের কৰ্ম্মচ্যুতির অনুমোদন করিয়া নিকলসনের নিকট পত্র প্রেরণ করেন, তাহার পর দিন (২৪এ আগষ্ট) আবার কাপ্তেন আবটের কার্য্যের অনুমোদন ও কানোরার মৃত্যু গুপ্ত-হত্যাকাণ্ডের মধ্যে পরিগণিত করেন নাই § । রেসিডেন্ট এক দিকে সর্দার ছত্র সিংহকে নির্দোষ বলিয়া উল্লেখ করিতে লাগিলেন, অপর দিকে নিকলসনের প্রস্তাবের অনুমোদন করিয়া তাহাকে কৰ্ম্মচ্যুত ও সম্পত্তিচ্যুত করিলেন ।

এই সেক্টেম্বরে রেসিডেন্ট প্রস্তাবিত বিবয়প্রসঙ্গে গবর্নমেন্টে লিখেন, “আমি ছত্র সিংহকে প্রাণদণ্ড হইতে অব্যাহতি দিতে ও সম্মান রক্ষা করিয়া তদীয় কার্য্য-পদ্ধতির যথাবৎ সমস্ত অনুসন্ধান করিতে প্রতিশ্রুত হইয়া-

* Retrospects, and Prospects of Indian Policy, p. 126. Punjab Papers 1849, p. 297.

† Ibid p. 126. Punjab Papers, p. 297.

‡ Ibid, 129. Ibid, p. 286.

§ Ibid, 126, Ibid, p. 316.

ছিলাম * । ঠাহাকে নির্দোষ বলিয়া প্রধান সেনাপতি ও কাপ্তেন-আবট প্রভৃতির নিকট পত্র লিখিত হইল, তিনি আবার কিরূপে প্রাণদণ্ডাই হইলেন যে, রেসিডেন্ট উক্ত দণ্ড হইতে অব্যাহতি দিতে প্রতিশ্রুত হইয়াছিলেন ? ঠাহার প্রতি হঠাৎ এরূপ গুরুতর দণ্ড প্রয়োজিত হইল, সম্মান রক্ষা করিয়া ঠাহার কার্যের অনুসন্ধানই বা কিরূপে হইল ? অধিক কি, ছত্রসিংহকে এরূপ কথাও বলা হইল না যে, যদি তিনি আত্মদোষ ফালন করিতে পারেন, তাহা হইলে ঠাহাকে এই দণ্ড হইতে অব্যাহতি দেওয়া যাইবে † । প্রস্তাবিত বিষয়ে আর ফ্রেডরিক কারির প্রত্যেক কার্যই এইরূপ পূর্বাণুর সম্ভতি-বিরুদ্ধ ।

যখন ছত্র সিংহ রেসিডেন্টের নিকট আপিল করিয়াও সিদ্ধকাম হইতে পারিলেন না, যখন ঠাহার কাষের যথাপদ্ধতি বিচার হইল না, তখন তিনি ইন্সপেক্টিভগকে ঘোর দৌরাখ্যাকারী বলিয়া ঘণা করিতে লাগিলেন । মহারানী ঝিন্দনের শোচনীয় নিরাসন ও মহারাজ দলীপ সিংহের বিবাহে রেসিডেন্টের অসম্মতিতে তিনি ইহার পূর্বেই ব্রিটিশ কাষ্যপ্রণালীর প্রতি সাতিশয় বিরক্ত হইয়াছিলেন, এক্ষণে নিজের এই অপমান ও অপদস্থতার ঠাহার সেই বিরক্তি শতগুণে বর্দ্ধিত হইয়া উঠিল । তিনি এক্ষণে স্পষ্ট বুঝিতে পারিলেন, পঞ্জাব শীঘ্রই ব্রিটিশ গবর্নমেন্টের উদরসাৎ হইবে, শীঘ্রই ঠাহাদিগের ধর্মলোপ ও সম্মম নষ্ট হইবে । ছত্র সিংহ আর স্থির থাকিতে পারিলেন না । নিজের পূর্ব প্রতিজ্ঞা স্মরণ করিলেন, গুরুগোবিন্দ সিংহের মন্ত্রপূত শোণিত কলঙ্কিত না করিয়া স্বীয় ধর্ম এবং স্বীয় জন্মভূমির উদ্ধারার্থ শরীর ও মন উৎসর্গ করিলেন ।

১০ই সেপ্টেম্বর শের সিংহ পিতার নিকট হইতে ঠাহার দুর্গতির সংবাদ পাইলেন । এই শোচনীয় সংবাদে ঠাহার মন নিতান্ত অধীর হইয়া উঠিল । তিনি আর ইন্সপেক্টিভগকে বন্ধুভাবে দেখিতে লাগিলেন না । ১৪ই সেপ্টেম্বর লাহোরে ঠাহার ভ্রাতার নিকট লিখিলেন যে, তিনি আপনাদের ধর্ম ও সম্মম রক্ষার জন্ত ব্রিটিশ সৈন্য হইতে বিচ্ছিন্ন হইতে ইচ্ছা করিয়াছেন ‡ । বীরতনয়, বীর পুরুষের এই প্রতিজ্ঞা স্থলিত হইল না ।

* Retrospects and Prospects &c. p. 127. Punjab Papers, 1849, 329.

† Ibid. p. 127.

‡ শের সিংহ ১২ই কি ১৩ই এইরূপ সঙ্কল্প করেন । Edwardes, A year on the Punjab Frontier, Vol. II. p. 606. Empire in Asia, p. 347-348.

৭ই সেপ্টেম্বর ব্রিটিশ সৈন্য মুলতানের দুর্গ আক্রমণ করিল, ১৪ই সেপ্টেম্বর শেরসিংহ দলবলসমভিব্যাহারে মুলরাজের সহিত মিলিত হইয়া আপনার পত্রের বাখার্থ্য রক্ষা করিলেন ।

শেরসিংহ পূর্বাধি ব্রিটিশ গবর্ণমেন্টের সহিত সস্তাব রক্ষা করিয়া আসিয়াছিলেন । মেজর এড্‌ওয়ার্ডিস্ স্বয়ংই স্বীকার করিয়াছেন যে, আগষ্ট মাসের শেষ পর্য্যন্ত শেরসিংহ বিলক্ষণ প্রভুপরায়ণ ছিলেন, এবং তিনি অধীনস্থ লোকদিগকে রাজনুরক্ত করিতে প্রয়াস পাইয়াছিলেন * । শেরসিংহের সদ্যবহারের ইহা অপেক্ষা বলবৎ প্রমাণ আর কি হইতে পারে ? কিন্তু স্ত্রার ক্রেডরিক কারি ও কাপ্টেন আবটের অধ্যবস্থিততায় এই তেজস্বী বীর পুরুষ ইন্ধরেজ-শাসনের বিরুদ্ধে অস্ত্র ধারণ করেন । কে জন্মদাতা প্রতিপালন-কর্তার অপমান ধীরভাবে চাহিয়া দেখিতে সমর্থ হয় ? কোন্ তেজস্বী ব্যক্তি আত্মমর্গ্যাদায় জলাঞ্জলি দিয়া পরপদ লেহন করিয়া থাকে ?

শেরসিংহ ব্রিটিশ সৈন্ত হইতে বিচ্ছিন্ন হইবেন, মুলরাজ ইহা স্বপ্নেও ভাবেন নাই । এক্ষণে এই অতর্কিত ঘটনা দেখিয়া তিনি শেরসিংহের প্রতি যথোচিত বিশ্বাস করিলেন না, প্রত্যুত আপনার সৈন্তদিগকে নগরের প্রাচীরের ভিতর লইয়া গিয়া শেরসিংহের সৈন্তদিগকে প্রাচীরের উপরিভাগে শত্রুর সম্মুখে দণ্ডায়মান করিয়া দিলেন † । সূতরাং শেরসিংহ কিছু দিনের মধ্যেই মুলরাজের সন্মুখে বিরক্ত হইয়া পিতার সহিত মিলিত হইবার জন্ত আপনার সৈন্ত লইয়া মুলতান হইতে বহির্গত হইলেন । এদিকে ডিসেম্বর মাসে বোম্বাই হইতে সাহায্যকারী সৈন্ত আসিয়া মুলতানে উপস্থিত হইলে ২৬এ ডিসেম্বর ব্রিটিশ সৈন্ত পুনর্বার নগর আক্রমণ করে । ১৮৪৯ অব্দের ২রা জানুয়ারি ইহাদিগের গোলায় নগর বিধ্বস্ত হয় । মুলরাজ দুর্গমধ্যে আশ্রয় গ্রহণ করিয়া বিশিষ্ট বীরত্ব ও দক্ষতা সহকারে আত্মরক্ষা করেন, কিন্তু পরিশেষে সৈন্ত-সমষ্টির বিশৃঙ্খলা দোষে তাঁহার পরাজয় হয় । সূতরাং তিনি ২২এ জানুয়ারি বিজেতার হস্তে আত্ম-সমর্পণ করেন ।

* Empire in Asia, p. 347. Comp. A year on the Punjab Frontier. Vol. II, p. 588-589.

† A year on the Punjab Frontier. Vol. II, p. 621.

এইরূপে মুলতান বিধ্বস্ত হইল, এইরূপে মুলরাজ পরাজিত ও নির্বাসিত হইলেন । কিন্তু ছত্র সিংহ ও শেরসিংহের হৃদয়ে যে অগ্নি প্রজ্জ্বলিত হইয়াছিল, তাহা নির্বাপিত হইল না । মুলতানের পতনের পূর্বে ১৮৪৮ অব্দের ২২এ নবেম্বর রামনগরে যে যুদ্ধ হয়, তাহাতে ব্রিটিশ সৈন্য পরাজিতপ্রায় হইয়া যথেষ্ট ক্ষতি সহ করে । শের সিংহ এক্ষণে ৬০টি কামান ও ৩০ হাজার সৈন্তের অধিনায়ক হইয়াছিলেন । এই সৈন্ত-দল লইয়া তিনি চিলিয়ানবালার নিকটে শিবির সন্নিবেশিত করেন ।

মুলতান-ঘটিত গোলযোগের সংবাদ ইঙ্গলণ্ডে পঁহছিলে স্মার হেন্‌রি লরেন্স পুনর্বার ভারতবর্ষে আসিয়া ১০ই জানুয়ারি লর্ড গফের শিবিরে উপস্থিত হন । কিন্তু সে সময়ে স্মার ফ্রেডরিক কারির কার্য-কাল শেষ না হওয়াতে হেন্‌রি লরেন্সকে প্রধান সেনাপতির অবৈতনিক এডিকং হইয়া শিবিরে থাকিতে হয় । এদিকে ব্রিটিশ সৈন্য ১৩ই জানুয়ারি চিলিয়ানবালায় উপস্থিত হয় । শিখ সেনাপতি শেরসিংহ অপূর্ক সামরিক কৌশলসহকারে সেনা সন্নিবেশ করিয়াছিলেন । বিপর্যয় উপস্থিত হইলে এই সন্নিবেশিত সৈন্তদল অসাধারণ বিক্রমে তাহাদিগকে আক্রমণ করে । উভয় দলে বোরতর যুদ্ধ আরম্ভ হয় । সেনাপতি কাম্পবেল (লর্ড ক্লাইড) ও সেনাপতি পেনিকুইক দুইদল পদাতিক সৈন্তের অধিনায়কতা করিতেছিলেন, শেরসিংহের সৈন্তের পরাক্রমে এই অধিনায়ক-দ্বয়ের সৈনিক দল পরাজিত ও বিধ্বস্ত হয় । প্রধান সেনাপতি লর্ড গফ দুইদল অশ্বারোহী সৈন্ত সম্মুখ-ভাগে সন্নিবেশিত করিয়াছিলেন, স্বল্পসংখ্যক রণমত্ত শিখ অশ্বারোহীর অমিত পরাক্রমে ঐ সৈন্তশ্রেণীও বিচ্ছিন্ন হইয়া ইতস্ততঃ ধাবিত হয় । বিজয়শ্রী শেরসিংহের পক্ষ অবলম্বন করেন । ব্রিটিশ পতাকা শত্রুর করগত, ব্রিটিশ কামান অধিকৃত, ব্রিটিশ অশ্বারোহী পলায়িত ও ব্রিটিশ পদাতিক বিধ্বস্ত হয় । সেনাপতি শেরসিংহ বীরত্বাভিमानে উদ্দীপ্ত হইয়া তোপধ্বনিতে চতুর্দিক কল্পিত করেন * ।

এইরূপে চিলিয়ানবালার সময়ের অবসান হয় । যঁাহারা ওয়াটালুর

* ইংরেজ লেখকদিগের মধ্যে কেহ কেহ লিখিয়াছেন যে, চিলিয়ানবালায় শিখ সৈন্ত সম্পূর্ণরূপে পরাজিত হইয়া অনেক ক্ষতি সহ করে । Lieutenant-General Sir George Lawrence's Fortythree years in India, p. 263.

ক্ষেত্রে অত্যন্ত অনল-ক্রীড়া প্রদর্শন করিয়া অলোকসামান্য যুদ্ধবীর নেপোলিয়ান বোনাপার্টিকে হতসর্কশ ও হতগৌরব করিয়াছিলেন, তাঁহার। অদ্য চিলিয়ানবালায় আৰ্ঘ্য-তেজ, আৰ্ঘ্য-সাহস, ও আৰ্ঘ্য-বীরত্বের নিকট মস্তক অবনত করিলেন। ইতিহাসের আদরের ধন ভারতবর্ষ এই লোকা-
 তীত বীরত্বের জ্ঞাত চির-প্রসিদ্ধ। যদি কেহ রণতরঙ্গায়িত গ্রীসের সহিত ভারতবর্ষের তুলনা করিতে চাহেন, যদি কেহ বীরেন্দ্রসমাজের বরণীয় গ্রীক সেনাপতিদিগের বিবরণ পাঠ করিয়া ভারতের দিকে চাহিয়া দেখেন, তাহা হইলে আমরা তাঁহাকে অসঙ্কুচিতহৃদয়ে বলিব, হলদিঘাট ভারতবর্ষের খন্দাপলী, আর এই চিলিয়ানবালা ভারতবর্ষের মারাথন। মিবানের প্রতাপ সিংহ ভারতের লিওনিদস্; আর এই শেরসিংহ ভারতের মিলতাইদিস্। ইতিহাসে খন্দাপলী ও মারাথন কিছু সামান্য যুদ্ধক্ষেত্র নহে, লিওনিদস্ ও মিলতাইদিস্ কিছু সামান্য যুদ্ধবীর নহেন। যদি পৃথিবীতে কোন পুণ্যপুঞ্জময় মহাতীর্থ বর্তমান থাকে, যদি পবিত্র স্বাধীনতার পবিত্র ধ্বজার কোন বিলাস-ক্ষেত্র থাকে, তাহা হইলে তাহা সেই খন্দাপলী ও মারাথন। যদি কোন বীরপুরুষ বীরেন্দ্র-সমাজের প্রীতির পুষ্পাঞ্জলি পাইয়া থাকেন, যদি কোন অদীনপরাক্রম মহাপুরুষ অলোকসামান্য দেশাতুরাগ জ্ঞাত স্বর্গহ দেব-সমিতিতে অপ্সরা-
 দিগের বীণানিন্দিত মধুর স্বরে স্তবত হইয়া থাকেন, তবে তিনি সেই লিওনিদস্ ও মিলতাইদিস্। এই খন্দাপলী ও মারাথনের সহিত হলদিঘাট ও চিলিয়ানবালা এবং এই লিওনিদস্ ও মিলতাইদিসের সহিত প্রতাপ সিংহ ও শের সিংহের নাম গ্রথিত করা ভারতবর্ষের অন্ন গৌরব ও অন্ন বীর-
 ত্বের পরিচয় নহে। ফলে চিলিয়ানবালা ঊনবিংশ শতাব্দীর একটি পবিত্র যুদ্ধক্ষেত্র। কবির রসময়ী কবিতায় উহা অনন্তকাল লীলা করিবে,—ঐতি-
 হাসিকের অপক্ষপাত বর্ণনায় উহা অনন্তকাল ঘোষিত হইবে। শের সিংহ অনন্তকাল বীরেন্দ্র সমাজে প্রাণগত শ্রদ্ধার পূজা পাইবেন এবং পবিত্র হই-
 তেও পবিত্রতর হইয়া অনন্তকাল, অনন্তশ্রেণীতে সন্নিবিষ্ট থাকিবেন *।

ইন্ডিয়ান সেনাপতি লর্ড গফও এই যুদ্ধে আপনাকে বিজয়ী বলিয়া ঘোষণা করেন।
 J. M. Ludlow's British India, its Races and its History. Vol. II, p. 164.

কিন্তু এই নির্দেশ সম্বন্ধে সন্দেহ নহে। প্রকৃতপক্ষে শের সিংহই যুদ্ধে জয়ী হন। Marsh-
 man's History of India, p. 465. Comp. Kaye's Sepoy War. Vol. I, p. 42.

* এই শেষ যুদ্ধ "ষিভায় শি খয়ুদ্দ" নামে ইতিহাসে প্রসিদ্ধিলাভ করিয়াছে। কিন্তু

কিন্তু সৌভাগ্য লক্ষ্মী চিরদিন এক জনের পক্ষে থাকেন না। সুখের পর দুঃখ, দুঃখের পর সুখ, চক্রবৎ পরিবর্তিত হইতেছে, অদৃষ্ট চক্রনেমির স্তায় একবার উর্দ্ধ আর একবার অধোগামী হইয়া ইতলোকে সংসারের চাঞ্চল্য প্রদর্শন করিতেছে। শেরসিংহ চিলিয়ানবালার যে বিজয় শ্রীতে পরিশোভিত হন, গুজরাটে তাহা অন্তর্হিত হয়। তিনি ব্রিটিশ সৈন্তের দৃষ্টি পরিহার করিয়া চিলিয়ানবালা হইতে গুজরাটে বাইয়া তাহার পিতার সহিত মিলিত হন। এদিকে সেনাপতি হুইসও মুলতান হইতে প্রভাগত হইয়া লর্ড গফের দল পরিপুষ্ট করেন। ২১এ ফেব্রুয়ারি গুজরাটে পুনর্বার উভয় পক্ষের সংগ্রাম হয়। এবার বিজয়ী ব্রিটিশ সেনাপতি বিজয়ী হন। হুইসিংহ ও শেরসিংহ আর যুদ্ধ না করিয়া ১৪ই মার্চ বশ্বতা স্বীকার করেন। ৩৫ জন সর্দার ও ১৫,০০০ সৈন্তের অস্ত্র বিজেতার হস্তে সমর্পিত হয়।

শিখ-সর্দারেরা পরাজিত হইলেও হৃদয়ের তেজস্বিতা হইতে বিচ্যুত হন নাই। শিখগুরু ব্রিটিশ সেনাপতি স্তার ওয়ার্টন্স গিলবার্টের দক্ষিণ পাশে উপস্থিত হইয়া অস্ত্র পরিত্যাগপূর্বক নিঃশঙ্কচিত্তে গম্ভীর স্বরে কহেন, “ইঙ্গরেজদিগের অত্যাচার প্রযুক্ত আমরা যুদ্ধে প্রবৃত্ত হইয়াছিলাম। আমরা স্বদেশের জন্ত যথাশক্তি যুদ্ধ করিয়াছি। এখন আমাদের হ্রবস্থা ঘটিয়াছে। আমাদের সৈন্তগণ পবিত্র যুদ্ধক্ষেত্রে বীরশয্যার শয়ন করিয়াছে, আমাদের কামান, আমাদের অস্ত্র, সমস্তই হস্তচ্যুত হইয়া গিয়াছে। আমরা এখন নানা অভাবে পড়িয়া আত্মসমর্পণ করিতেছি। আমরা বাহা করিয়াছি, তাহার জন্ত কিছুমাত্র ক্ষুব্ধ হই নাই। আমরা আজ বাহা করিয়াছি, ক্ষমতা থাকিলে কাল ও তাহা করিব।” এইরূপ তেজস্বিতার সহিত শিখসর্দারগণ একে একে আপনাদের অস্ত্র ভূমিতে রাখিলেন। পরে সকলেই গম্ভীরস্বরে ও অশ্রুপূর্ণ নয়নে কহিলেন, “আজ হইতে মহারাজ রণজিৎ সিংহের বধার্থ মৃত্যু হইল।” কিন্তু এই তেজস্বিতা—এই স্বদেশ-বৎসলতার সন্মান রক্ষিত হইল না। যেসকল শিখ গুজরাটের যুদ্ধক্ষেত্রে

লাহোর দরবার সাক্ষাৎ সন্ধকে এই যুদ্ধে লিপ্ত ছিলেন না। প্রথম শিখযুদ্ধ যেমন লাহোর দরবার ও ব্রিটিশ গবর্নমেন্টের সন্ধে ঘটিয়াছিল, তদীয় যুদ্ধ তেমন ঘটে নাই। লাহোর-দরবারের অনেক সৈন্ত এই যুদ্ধে ইঙ্গরেজপক্ষে ছিল। স্বদেশবৎসল সর্দার শেরসিংহ দ্বারা কারণে ব্রিটিশ গবর্নমেন্টের উপর বিরক্ত হইয়া এই যুদ্ধ উপস্থিত করিয়াছিলেন। সুতরাং ইহা দ্বিতীয় শিখযুদ্ধ বলিয়া নির্দেশ করা ততটা সঙ্গত বোধ হয় না।

আহত হইয়া পড়িয়া রহিয়াছিল, তাহার দয়ার অধিকার হইতে বঞ্চিত হইল। খ্রীঃ উনবিংশ শতাব্দীর সভ্যতার স্রোতে বীরত্বের সম্মান, বীরত্বের আদর, সমস্তই বিলুপ্ত হইয়া গেল।

এইরূপে উপস্থিত যুদ্ধ শেষ হইল। লর্ড ডালহৌসী এই অবসরে সর্কগ্রাসক মুখ ব্যাদান করিলেন। ইলিয়ট সাহেব গবর্ণরজেনেরলের প্রতিনিধি হইয়া লাহোর-দরবারে প্রেরিত হইলেন। স্মার্ট ফ্রেডরিক কারির কার্যকাল শেষ হওয়াতে স্মার্ট হেন্‌রি লরেন্স পুনর্বার রেসিডেন্টের কার্যভার গ্রহণ করিয়াছিলেন। ইলিয়ট তাঁহার সহিত মিলিত হইয়া ২৮এ মার্চ মহারাজ দলীপ সিংহকে স্বীয় রাজ্য কোম্পানির হস্তে সমর্পণ করিতে আহ্বান করিলেন। তৎপর দিন (২৯এ মার্চ) শেষ দরবার হইল। দলীপ সিংহ এই শেষ বার পিতার সিংহাসনে উপবেশন করিলেন। অদূরে শ্রেণী-বদ্ধ ব্রিটিশ সৈন্য সশস্ত্র দণ্ডায়মান রহিল। দেওয়ান দীননাথ এই অভ্যাচার নিবারণ করিতে অনেক চেষ্টা করিলেন, সন্ধির নিয়ম দেখাইয়া শিখ-রাজ্য রক্ষা করিতে অনেক কথা কহিলেন। কিন্তু কিছুতেই কিছু হইল না। ডালহৌসীর ঘোষণা-পত্র পঠিত হইলে দরবার শেষ হইল। অমনি রণজিৎ-দুর্গে ব্রিটিশপতাকা উড়িল। দুর্গ হইতে তোপধ্বনি হইতে লাগিল। মহারাজ রণজিৎ সিংহের বাক্য সফল হইল। পঞ্জাব-রাজ্য ভারত-মানচিত্রে লোহিতবর্ণে রঞ্জিত হইয়া গেল *।

৩০এ মার্চ ডালহৌসীর ঐ ঘোষণাপত্র ফিরোজপুর হইতে ভারতবর্ষের সমস্ত ব্রিটিশাধিকৃত স্থানসমূহে প্রচারিত হইল। ব্রিটিশ গবর্ণমেন্ট পঞ্জাব গ্রহণের অঙ্গীকারপত্রে মহারাজ দলীপ সিংহ ও তাঁহার পোষ্যবর্ষের জন্ম বার্ষিক বৃত্তি অন্যান্য ৪ লক্ষ ও অনধিক ৫ লক্ষ টাকা দিতে স্বীকার করিলেন। যে লোক-প্রসিদ্ধ কোহিনুর হীরক অঙ্গাধিপতি মহারাজ কর্তৃক হইতে বিপ্লবের পর বিপ্লবে রণজিৎ সিংহের হস্তগত হইয়াছিল, রণজিৎ বাহা অতি গোঁরবে বাহুতে ধারণ করিতেন, ডালহৌসী অদ্য “পাঁচ জুতি” মূল্য দিয়া তাহা তদীয় পুত্র দলীপ সিংহ হইতে গ্রহণ করিলেন †।

* Empire in Asia, p. 351.

† কোহিনুরের ইতিবৃত্ত নিতান্ত অল্পত। কিংবদন্তী অনুসারে ঐ মণি গোলকুণ্ডার আকর হইতে উন্মোচিত হইয়া মহারাজ কর্তৃক অধিকারে থাকে। তৎপর উহা উজ্জয়িনীরাজের শিরোভূষণ হয়। চতুর্দশ শতাব্দীতে আলাউদ্দীন মালবদেশ অধিকার করিয়া উহা প্রাপ্ত হন। পাঠানরাজত্বের ধ্বংস হইলে ঐ মণি যোগলদিগের অধিকারে আইলে। ইহার পর নাদির

কে সাহেব স্বপ্রণীত সিপাহি-যুদ্ধের ইতিহাসে লিখিয়াছেন, “লর্ড ডালহৌসী যে, মহারাজ দলীপ সিংহকে নানা বিপদ ও চিন্তা হয়তে নিষ্কৃতি দিয়া তাঁহাকে একটি বৃত্তি নির্দ্ধারিত করিয়া দিলেন, ইহা তাঁহার পক্ষে সুখময় পরিবর্তন হইল” * ! সঙ্কল্প ব্যক্তি মাত্রেই কে সাহেবের এই বাক্যের অর্থ হৃদয়ঙ্গম করিতে অসমর্থ হইবেন ।

কালের কি অচিন্ত্য প্রভাব । নিরতি নেমির কি নিদারুণ পরিবর্তন ! যে পঞ্চনদে আৰ্য্য মহর্ষিগণ “প্রশস্ত হৃদয়া তটিনীর মনোহর পুলিনে উপবিষ্ট হইয়া জলদ-গঙ্গীর মধুর স্বরে সাম গান করিতেন, যে পঞ্চনদের নির্জন গিরিগহ্বরে যোগাসনে সমাসীন হইয়া যোগরত আৰ্য্য তাপসগণ সৃষ্টির প্রাণরূপিনী পরমা শক্তির ধ্যানে সংযতচিত্ত থাকিতেন” যে পঞ্চনদে রাজা-ধিরাজ রণজিৎ সিংহ যুদ্ধকুশল জাতিকে বশীভূত করিয়া পরমসুখে রাজ্য শাসন করিতেন, অদ্য সেই পঞ্চনদ ব্রিটেনিয়ার করায়ত্ত, অদ্য সেই পঞ্চনদ ব্রিটিশ ইণ্ডিয়ার অন্তর্ভুক্ত । “প্রায় পয়োধির জলোচ্ছ্বাসে” সে পূর্বগোরব সে পূর্ব মহত্ব সমস্তই বিধৌত হইয়া গিয়াছে । অদ্য যাহা দেখিতেছি, তাহা ব্রিটিশ ইণ্ডিয়ার অধীনস্থ প্রদেশ, সংবাদপত্রে অদ্য যাহার বিবরণ পাঠ করিতেছি, তাহা এই অধীনস্থ প্রদেশের কাহিনী মাত্র । “নূতন সৃষ্টি, নূতন রাজ্য এবং সর্বত্রই নূতন শক্তির সঞ্চার-চিহ্ন ।”

যদি ত্রায়ের দিকে চাহিয়া জিজ্ঞাসা কর, তাহা হইলে নিঃসন্দেহ এই উত্তর পাইবে যে, লর্ড ডালহৌসী চিরন্তন প্রতিশ্রুতি ভঙ্গ করিয়া পঞ্জাব রাজ্য গ্রহণ করিয়াছেন । একরূপ প্রতিশ্রুতি ভঙ্গ, কখনও মার্জনীয় নহে । শের সিংহ যে, ব্রিটিশ গবর্ণমেন্টের বিরুদ্ধে অস্ত্র ধারণ করেন, তাহা কেবল পিতার অপমান জ্ঞান । লাহোরদরবারের প্ররোচনায়, তিনি যুদ্ধে প্রবৃত্ত হন নাই ।

শাহ মোগল সম্রাট মহম্মদ শাহকে পরাজিত করিয়া ঐ মণি গ্রহণ করেন । নাদিরের হত্যার পর কাবুলের আহম্মদ শাহ ইহা প্রাপ্ত হন । আহম্মদ শাহের পরলোকপ্রাপ্তির পর উহা তদীয় উত্তরাধিকারী শাহ হুজার হস্তগত হয় । মহারাজ রণজিৎ সিংহ শাহ হুজাকে পরাজিত করিয়া ঐ মণি গ্রহণ করেন । এক্ষণে উহা ইসলমাবাদের অধীনে রহিয়াছে । প্রথিত আছে একদা ব্রিটিশ রাজ-প্রতিনিধি কোহিমুরের মূল্য জিজ্ঞাসা করিলে রণজিৎ সিংহ হাসিয়া বলিয়া গিলেন, “একো কিম্ব পাঁচ জুতি ।” অর্থাৎ সকলেই ইহা পূর্বাধিকারীর নিকট হইতে বল পূর্বক কাড়িয়া লইয়াছেন । Encyclopædia Britannica (Eighth Edition) Vol., VIII., p. 4-5.

* *Kaye's Sepoy War*, Vol. I, p. 47.

ডিউক অব আর্গাইলের শ্রায় মনস্বী ব্যক্তিও স্বীকার করিয়াছেন, “খালসা সৈন্তই শিখযুদ্ধ উপস্থিত করিয়াছিল, লাহোর গবর্নমেন্ট উহার মধ্যে ছিলেন না” * । প্রতিনিধিসভায় যে আট জন সভ্য দ্বারা রাজকার্য্য নির্বাহিত হইতেন, তাহাদিগের মধ্যে ছয় জন সন্ধির নিয়ম ও ব্রিটিশ গবর্নমেন্টের সহিত সম্ভাব রক্ষা করিয়া আসিয়াছিলেন, অবশিষ্ট দুই জনের মধ্যে এক জনের প্রতি সন্দেহ হয় । কেবল এক মাত্র শেরসিংহ প্রকাশ্যভাবে ব্রিটিশ গবর্নমেন্টের বিরুদ্ধে অস্ত্র ধারণ করেন † । তাহাও স্বীয় জনকের ঘোরতর অপমান দেখিয়া, পূর্বেই উক্ত হইয়াছে, মেজের এড্‌ওয়ার্ডিস স্বীকার করিয়াছেন যে, শেরসিংহ আগষ্ট মাসের শেষ পর্য্যন্ত বিলক্ষণ সম্ভাবে কার্য্য করিয়া আসিয়াছিলেন । তিনি লাহোরে ব্রিটিশ রেসিডেন্টের নিকট যে সমস্ত পত্র লিখেন, তাহাতে শেরসিংহের ভয়সী প্রশংসা করা হয় ‡ । যখন শিখদিগের কেহই মূলতানে যাইয়া আপনাদের সম্প্রদায়ের বিরুদ্ধে অস্ত্র ধারণ করিতে সম্মত হয় না, তখন একমাত্র শেরসিংহ ব্রিটিশ সৈন্তদলের পৃষ্ঠপূরক হন, যখন মুলরাজের সৈন্ত-ব্রিটিশ সেনাদল আক্রমণ করে, তখন শেরসিংহ তাহাদিগকে পরাজিত ও দূরীভূত করেন, যখন মুলতানবাসিগণ ব্রিটিশ সেনানায়ককে অগ্রসর হইতে বাধা দেয়, তখন শেরসিংহ আপনার কামান সকল সজ্জিত করিয়া তাঁহার সাহায্যে প্রবৃত্ত হন § । ঈদৃশ ব্রিটিশাহরক্ত বীর পুরুষ পরিশেষে প্রাপীড়িত হইয়া অগত্যা ব্রিটিশ শাসনের বিরুদ্ধে অস্ত্র ধারণ করেন । অধিকন্তু প্রতিনিধিসভায় যে ছয় জন সভ্য সম্পূর্ণ বিশ্বাসী ছিলেন, লর্ড ডালহৌসী তাহাদিগকে কহেন, যদি তাঁহারা ব্রিটিশ গবর্নমেন্টের সহিত একমত না হন, যদি তাঁহারা দলীপ সিংহের রাজ্যাচ্যুতি ও পঞ্জাব অধিকারের নিয়ম-পত্রে স্বাক্ষর না করেন, তাহা হইলে তাহাদিগের সমস্ত সম্পত্তি বাজেয়াপ্ত করা হইবে । এইরূপে বলপূর্ব্বক তাহাদিগকে সন্ধি পত্রে স্বাক্ষর করান হইয়াছিল ¶ । এদিকে ব্রিটিশ রেসিডেন্ট লাহোর দরবারের শিরঃস্থানীয় ছিলেন । দলীপ সিংহ অপ্রাপ্তবয়স্ক । ব্রিটিশ গবর্নমেন্ট

* India under Dalhousie and Canning, p. 55.

† Retrospects and Prospects &c., p. 159.

‡ Edwardes, Punjab Frontier, Vol. II., p. 588-589.

§ Ibid. pp. 549, 564, 589.

¶ Retrospects and Prospects, p. 154-155.

ঔহাৰ অভিভাবক। মহাৰাণী ঝিনন বারণসীতে নিৰ্কাশিত। স্তত্ৰাং দরবারের সমস্ত বিষয়েই ব্ৰিটিশ গবৰ্ণমেণ্ট সৰ্কেসৰ্কা। তথাপি কোন্ দোবে দলীপ সিংহকে ৰাজ্যভ্ৰষ্ট, শ্ৰীভ্ৰষ্ট কৰা হইল? কোন্ দোবে ঔহাৰ পৈত্ৰিক ৰাজ্যে ব্ৰিটিশ পতাকা উড্ডীন হইল? যখন দিখিজয়ী সেকন্দর শাহ পঞ্জাবে প্ৰবেশ কৰিয়া মহাৰাজ পুৰুকে সমরে পৰাজিত কৰেন, তখন তিনি ঔহাৰ সহিত কিৰূপ ব্যবহার কৰিয়াছিলেন? পুৰুর লোকাভীত বিক্ৰম, লোকাভীত সাহস দেখিয়া সেকন্দর শাহ ঔহাকে স্বপদে স্থাপিত ও ঔহাৰ সহিত মিত্ৰতা বন্ধন কৰিয়া প্ৰস্থান কৰিয়াছিলেন। কিন্তু অদ্য ঊনবিংশ শতাব্দীর সূসভ্য দেশবাসী লৰ্ড ডালহৌসী সেই পঞ্জাবেৰ একটী নিৰ্দোষ নিরীহস্বভাব বালককে শ্ৰীভ্ৰষ্ট কৰিয়া অভিভাবকতার পৰাকাঠা দেখাইলেন। সময়ের কি অপূৰ্ণ পৰিবৰ্ত্তন! জ্ঞান ও ধৰ্ম্মের কি বিচিহ্ন উন্নতি!

পঞ্জাবে যুদ্ধ উপস্থিত হইলে লৰ্ড ডেলহৌসী একদা বারাকপুৰে বক্তৃত্বকালে কহিয়াছিলেন—“আমি শান্তির ইচ্ছা কৰি, আমি ঔহাৰ অন্ত বিশেষ লাগানিত। ভারতবৰ্ষের শত্ৰুগণ যদি যুদ্ধ আকাঙ্ক্ষা কৰে, যুদ্ধই তাহাৰা পাইবে, এবং আমাৰ কথা অনুসারে তাহাৰা ঔহা বিলক্ষণ প্ৰতিশোধের সহিত লাভ কৰিবে *।”

কিন্তু প্ৰস্তাবিত বিষয়ে লৰ্ড ডালহৌসীৰ ঐ উক্তি অপেক্ষা একজন ঐতিহাসিকের উক্তি আৰও ভয়ঙ্কর। পবিত্ৰ ইতিহাস লিখিতে গিয়া এই ঐতিহাসিক এক স্থলে লিখিয়াছেন—“শিখগণ যুদ্ধ ঘোষণা কৰিয়া, তাহা-দিগের সমুদয় বিষয়ই সঙ্কটাপন্ন কৰিয়া তুলিয়াছিল। জায় যুদ্ধে তাহাৰা ঐ সমস্ত বিষয় হইতে বিচ্যুত হইয়াছে। ব্ৰিটিশ গবৰ্ণমেণ্ট সহিষ্ণুতা ও ধীৰতা প্ৰদৰ্শন কৰিয়া আসিতেছিলেন, তাহাৰা বিশ্বাসঘাতকতা ও হঠকাৰিতা দ্বাৰা সেই সহিষ্ণুতা ও ধীৰতা বিলক্ষণ প্ৰতিশোধ তুলিয়াছে” †। এই ঐতিহাসিকের অপৰূপাত লেখনী হইতে পুনৰ্কাৰ অন্ত স্থলে এই বাক্য বহিৰ্গত হইয়াছে—“আপনাদিগের স্বাধীনতা রক্ষা কৰিতে একটী সাহনী জাতির এইকপ যুদ্ধ অবশ্যই মানব জাতির মধ্যে একটী প্ৰসিদ্ধ দৃষ্ট, এবং

* Speech at the Barrackpore Ball, October 5, 1848. Vide Arnold's Dalhousie's Administration Vol. I., p. 96.

† 'Kaye's Sepeoy War, Vol I. p 46.

উহার অধিনায়কগণ ঞ্ছায়তঃ সমবেদনা ও সম্মান লাভের অধিকারী। কিন্তু ঐ সকল ব্যক্তি মুখে আমাদিগকে বন্ধু বলিয়া গোপনে আমাদিগের বিরুদ্ধে অভ্যুত্থিত হইয়াছিল। ইহারা আপনাদের হিতৈষণা এইরূপ বিশ্বাস-যাতকতা দ্বারা কলঙ্কিত করে, এবং মিথ্যাবাদিতা ও প্রতারণা দ্বারা আপনাদের সম্মান হইতে বিচ্যুত হয়” * ।

এই ইতিহাসলেখক কেবল স্বজাতির গৌরব-প্রিয়তায় অন্ধ হইয়া ঐ রূপ অসঙ্গত বাক্যের উল্লেখ পূর্বক পবিত্র ইতিহাসের সম্মান বিনষ্ট করিয়াছেন। যে সূত্রে পূর্বোক্ত যুদ্ধ সঙ্ঘটিত হয়, তাহা পূর্বে যথাযথ বিবৃত হইয়াছে। তৎসমুদয় পর্যালোচনা করিলে স্পষ্ট প্রতীপন্ন হইবে যে, কেবল লর্ড ডালহৌসী ও ব্রিটিশ রেসিডেন্টের অব্যবস্থিততায় যুদ্ধ ঘটয়াছিল। ডালহৌসীর অধিষ্ঠিত গবর্ণমেন্ট মহারাণী ঝিন্দনকে তাঁহার প্রাণাধিক পুত্র ও অতুল রাজত্ব-সম্পৎ হইতে বিচ্ছিন্ন করিয়া নিরাসিত করেন, বৃদ্ধ শিখ-সর্দার ছত্রসিংহকে সম্মানচ্যুত ও সম্পত্তিচ্যুত করিয়া তুলেন এবং পরাক্রমশালী শেরসিংহের হৃদয়ে ভূষানল উৎপাদনের হেতুভূত হন। ঈদৃশী অব্যবস্থিততা ও ঈদৃশী রাজনৈতিক চাতুরী হইতে যে যুদ্ধ সঙ্ঘটিত হয়, তাহার জ্ঞান শিখগণ কখনও দায়ী হইতে পারে না। উদারচেতা অপক্ষপাত ঐতিহাসিকগণ সত্যের অনুরোধে অবশ্যই নির্দেশ করিবেন, শিখগণ আপনাদের সম্মানরক্ষার্থ যুদ্ধে প্রবৃত্ত হইয়াছিল। রেসিডেন্টের রণকণ্ঠন তাহাদিগকে উত্তেজিত করে এবং ডালহৌসীর যথেষ্টাচার তাহাদিগকে সমরক্ষেত্রে উপস্থাপিত পূর্বক নর-শোণিত শ্রোত প্রবাহিত করিতে উদ্যত করিয়া তুলে। ডালহৌসী বারাকপুরে শাস্তির আশা করিয়া জলদগম্ভীর-স্বরে যে বক্তৃতা করিয়াছিলেন, তাহাতে কোন সারবত্তা লক্ষিত হয় না। তিনি এক দিকে পঞ্জাবে কুটিল রাজনৈতিক চক্র আবর্তিত করিতেছিলেন, অপর দিকে “শান্তি শান্তি” বলিয়া লোকের হৃদয় আকর্ষণ করিতে সচেষ্ট হইয়াছিলেন। শিখগণ সমরকুশল ও স্বাধীনভাষিণী বলিয়া জগতে প্রসিদ্ধ। গোবিন্দ সিংহ তাহাদের হৃদয়ে যে তেজ প্রসারিত করিয়া গিয়াছেন, তাহা অপসারিত হইবার নহে। তাহারা উন্নত, সুব্যবস্থিত ও জাতীয় জীবনে সঞ্জীবিত। কিছুতেই তাহারা আত্মসম্মান হইতে স্থলিত হয় না, কিছুতেই

* Kaye's Sepoy War, Vol. I., p. 58.

তাহারা পর-পদানত হইয়া পর-পদ-লেহনে সময়ান্তিপাত করে না । ডাল-হোসী এই তেজস্বী সম্প্রদায়ের হৃদয়ে আঘাত করিয়া শান্তির আশা করিয়া ছিলেন এবং এই তেজস্বী সম্প্রদায়কে অপমানিত ও অপদস্থ করিয়া সহিষ্ণুতা ও ধীরতার একশেষ দেখাইয়াছিলেন ।

শিখ সেনানায়ক শেরসিংহ পূর্ক্বাবধি ব্রিটিশ গবর্ণমেন্টের প্রতি বন্ধুত্ব ও সৌজন্য প্রদর্শন করিয়া আসিতেছিলেন শেষে রেসিডেন্টের হুম্মতি বা অব্যবস্থিতভাবশতঃ বুদ্ধ জনকের ঘোরতর অপমান দেখিয়া ব্রিটিশ শাসনের বিরুদ্ধে অস্ত্র ধারণ করেন । অপমানিত ও অপদস্থ বীরপুরুষের এইরূপ সমরবেশ কখনও ইতিহাসে দিক্কৃত হইতে পারে না । শের-সিংহ হৃদয়ে আঘাত না পাইলে কখনও সমরক্ষেত্রে অবতীর্ণ হইতেন না । কখনও তাঁহার প্রতিহিংসাবৃত্তি উদ্দীপ্ত হইয়া উঠিত না । তিনি অপ-মানিত হইয়া অপমানকারীর বিরুদ্ধে অভ্যুত্থিত হইয়াছিলেন ; কোনরূপ প্রতারণা বা হঠকারিতা তাঁহাকে কলুষিত করে নাই, কোনরূপ বিশ্বাসঘাত-কতা বা মিথ্যাবাদিতা তাঁহার হিতৈষণাকে কলঙ্কিত করিয়া তুলে নাই । তিনি পবিত্র বীরধর্ম্মানুসারে সমরে দীক্ষিত হইয়াছিলেন এবং অদ্ভুত সামরিক কৌশল প্রদর্শন পূর্ক্বক পবিত্র বীরধর্ম্ম রক্ষা করিয়াছিলেন । স্বদেশের স্বাধীনতারক্ষার্থ তরুণবয়স্ক বীরপুরুষের এইরূপ কার্যকুশলতা অবশ্যই ইতিহাসের বরণীয় । কোন পরনিম্নক পরদেষ্টা ব্যক্তির হস্তে পড়িলে এই অলোক-সামান্য যুদ্ধবীর কলঙ্কিত হইতে পারেন এবং কোন অহুদার ও অদূরদর্শী ব্যক্তির হস্তে পড়িলে ইনি মিথ্যাবাদী ও বিশ্বাসঘাতক বলিয়া ইতিহাসে দিক্কৃত হইতে পারেন । কিন্তু ঞ্চার জনকের ঞ্চার উদার ব্যক্তির তেজস্বিনী লেখনী হইতে এরূপ অহুদার বাকা বহির্গত হওয়া সাতি-শয় অসূচিত । বলিতে হৃদয় ব্যথিত হয়, কে সাহেবের এইরূপ লিখন-ভঙ্গীতে পবিত্র ইতিহাসের সম্মান বিনষ্ট হইয়াছে, পবিত্র লেখনী কলঙ্কিত ও পক্ষপাতিত্বদোষে কলুষিত হইয়াছে ।

কিন্তু কেবল ঞ্চার সকলেই শিখ-সেনানায়ককে সাধারণ্যে দিক্কৃত ও অপ-দস্থ করেন নাই, সকলেই ডালহোসীর রাজ্য-জয়ের প্রশংসা করিয়া আপ-নাদের অহুদারতাবিকাশে সাহসী হন নাই । অনেকে বিলক্ষণ ধীরতা ও বিচক্ষণতাসহকারে এ বিষয়ের বিচার করিয়াছেন এবং অনেকে সঙ্কল্প-পরিচালিত হইয়া অপক্ষপাতিত্ব প্রদর্শন পূর্ক্বক ইতিহাসের সম্মান রক্ষা

করিতে প্রয়াস পাইয়াছেন। মেজর ইবাল্‌স বেল লিখিয়াছেন—“লর্ড ডালহৌসী কহিয়াছেন, ‘আমরা আমাদের অপ্রাপ্তবয়স্ক রাজার অধীনস্থ রাজ্য জয় করিয়াছি।’ কিন্তু ইহা জয় নহে—ঘোরতর বিশ্বাসঘাতকতা। দেওয়ানী ও ফৌজদারী কার্যের নিয়ন্ত্রণ বলিয়া পঞ্জাবে আমাদের সমস্ত উত্তরোত্তর বর্দ্ধিত হইয়াছিল। আমরা উহার দুর্গ সকল হস্তগত করিয়াছিলাম এবং উহার বিদ্রোহী অধিবাসীদিগকে নিরস্ত করিয়াছিলাম। আমরা দলীপ সিংহের রাজ্য রক্ষা করিতে বাধ্য হইয়াছিলাম; সন্ধির নিয়ম ভঙ্গ করিয়া পঞ্জাবের অধীশ্বর হইবার প্রত্যাশার উক্ত কার্য করিতে প্রবৃত্ত হই নাই। * * প্রাচ্য ধারণা অনুসারে, যিনি বহুসংখ্যক রাজাকে আপনার শাসন ও পালনের আয়ত্ত করিতে পারেন, তিনিই রাজাধিরাজ চক্রবর্তী। লর্ড ডালহৌসী হৃদয়ের সারলা দেখাইয়া অনায়াসে ভারতীয় রাজাদিগের হৃদয় আকর্ষণ করিতে পারিতেন, তিনি ইহা না করিয়া সন্ধি ভঙ্গ করিয়াছেন, পবিত্র ইতিহাসের অবমাননা করিয়াছেন, উত্তর ভারতের সংস্কারসম্বন্ধে উপযুক্ত সূযোগ নষ্ট করিয়াছেন, এবং অন্যায় ও অবিচারে ভারতসাম্রাজ্য ভাঙ্গিয়াছেন। ভবিষ্যৎ বংশ ও ইতিহাস আমাদের এই বাক্যের অনুমোদনকারী হইবেন” * ।

টরেন্স বলিয়াছেন—“সাধারণ নিয়ম অনুসারে, দলীপ সিংহের রাজ্যচ্যুতি ও পঞ্জাব অধিকার অবশ্য ন্যায়ে বহির্ভূত বলিতে হইবে। দলীপ সিংহ অপ্রাপ্তবয়স্ক, সুতরাং তিনি সাক্ষাৎসম্বন্ধে রাজনীতির কোন বিষয়েই দায়ী নহেন। রাজ-প্রতিনিধি সভার শিরঃস্থানে ব্রিটিশ রেসিডেন্ট অবস্থিতি করিতেছিলেন, রাজধানীতে কোন গোলযোগই উপস্থিত হয় নাই এবং সাধারণ্যে অধিবাসীদিগের মধ্যে কোনও প্রকার বিদ্রোহভাব লক্ষিত হয় নাই, রাণী সহস্র মাইল দূরবর্তী বারাণসীতে নির্বাসিত হইয়াছিলেন, পরাক্রান্ত গোলাপ সিংহ বিশিষ্ট সম্ভাবসহকারে ব্যবহার করিয়া আসিতেছিলেন। কেবল মুলতান ব্রিটিশ সৈন্যের প্রবেশ-পথ রোধ করিয়াছিল, কিন্তু পরিশেষে উহাও বিধ্বস্ত করিয়া নিষ্ঠুরপ্রকৃতি বিদ্রোহীদিগের অপরাধের প্রতিশোধ নেওয়া হয়। যদি সামরিক আইন প্রচার করিয়া অবাধ্য খালসাদিগকে সম্পত্তিচ্যুত করা হইত, তাহা হইলেই সমগ্র ক্ষতির পূরণ ও

প্রকৃত পক্ষে ত্রায়পরতা রক্ষিত হইত । ইহা না করাতে পরূপাতশূন্য ইতিহাস অবশ্যই বলিবে যে, পঞ্জাব অধিকার কেবল ডাকাতি মাত্র” ।

লাডলো লিখিয়াছেন—“দলীপসিংহ অপ্রাপ্তবয়স্ক । ১৮৫৪ অব্দেই তিনি বয়ঃপ্রাপ্ত হইতেন । আমরা প্রকাশভাবে তাঁহার রক্ষার ভার গ্রহণ করিয়াছিলাম । যখন আমরা শেষ বার তাঁহার রাজ্যে উপস্থিত হই, তখন (১৮৪৮ অব্দে, ১৮ই নবেম্বর) প্রকাশ করিয়াছিলাম যে, বাহার শাসনসমিতির বিরুদ্ধে অস্ত্র ধারণ করিয়াছে, তাহাদের শাস্তিবিধান জ্ঞতই আমাদিগকে আসিতে হইয়াছে । আমরা ছয় মাসের মধ্যে দলীপ সিংহের রাজ্য নিজের অধিকারভুক্ত করিয়া ঐ প্রতিশ্রুতি রক্ষা করিলাম । ১৮৪৯ অব্দে ২৪এ মার্চ পঞ্জাব রাজ্যের স্বাধীনতা শেষ হয়, আমাদের রক্ষিত বালক নির্দিষ্ট বৃত্তিভোগী হন, রাজ্যের সমস্ত সম্পত্তি কোম্পানির অধিকারভুক্ত হয়, এবং বিখ্যাত কোহিনুর মহারাণীর রত্ন ভাণ্ডারে প্রবেশ করে । সংক্ষেপে আমরা আমাদের রক্ষাধীন বাংলার সমস্ত বিষয় আত্মসাৎ করিয়া প্রকৃত প্রস্তাবে তাঁহার “রক্ষা-কার্য্য” নিৰ্ব্বাহ করিলাম ।

* * * একবার দলীপ সিংহের রক্ষার ভার গ্রহণ করিয়া পরক্ষণে তদীয় প্রজাদিগের অপরাধে তাঁহাকে শাস্তি দেওয়া সাতিশয় অব্যবস্থিতভার কার্য্য । আমরা বিদ্রোহী প্রজাদিগকে শাসন করিয়া অভিভাবকোচিত কার্য্য করিয়াছি মাত্র । ইহার জ্ঞত দলীপ সিংহকে সম্পত্তিচ্যুত করিবার আমাদের কোন অধিকার নাই । বোধ কর, কোন বিধবা মহিলার কতকগুলি ভৃত্য বিদ্রোহী হইয়া পুলিশকে আক্রমণ করিল, পুলিশ তাহাদিগকে পরাজিত করিয়া মহিলার রক্ষার ভার লইল ; উভয় পক্ষে আবার দাঙ্গা বাঁধিল, আবারও পুলিশ জয়ী হইল । ইহার পর পুলিশের তত্ত্বাবধায়ক আসিয়া বিধবাকে নম্র ভাবে কহিলেন, তাঁহার ভ্রাতৃসন, সম্পত্তি, সমস্তই পুলিশের অধিকৃত হইবে । তিনি উহার পরিবর্তে সম্পত্তির উপস্থিত হইতে নিজের ভরণ পোষণোপযোগী কিছু অংশ পাইবেন মাত্র । অধিকন্তু তাঁহার বহুমূল্য হীরকের হার পুলিশের প্রধান কমিউনরের ব্যবহারার্থ দিতে হইবে, এক্ষণে যে দলীপ সিংহ ত্রীষ্টধাখাবলম্বী হইয়া ইঙ্গলণ্ডীয় অভিজাত-শ্রেণীতে নিবিষ্ট হইয়াছেন, তাঁহার নিরীহভাব-পূর্ণ বাল্যাবস্থায় আমরা যেরূপ

যে রূপ ব্যবহার করিয়াছি, উল্লিখিত ঘটনা কি তাহার অতিরঞ্জিত চিত্র ?

“পররাজ্যাধিকার-স্থলে ব্রিটিশ শাসনপত্রের সম্বন্ধে আমাদের লর্ড ডালহৌসীর এইরূপ ধারণা ছিল। তদবধি ব্রিটিশ গবর্নমেন্ট, ব্রিটিশ পার্লামেন্ট ও ব্রিটিশ অধিপতি রেখা মাত্রও বিচলিত না হইয়া ঐ ধারণার অমুমোদক হইয়া আসিতেছেন *।”

পঞ্জাব অধিকৃত হইল। মহারাজ দলীপ সিংহ নিজরাজ্য হইতে নিষ্কাশিত হইলেন। ফতেগড় তাঁহার বাস স্থান নিরূপিত হইল। তাঁহার যে সমস্ত খাসসম্পত্তি ছিল, ইঙ্গরেজ গবর্নমেন্ট তাহাও অধিকার করিতে নিরস্ত থাকিলেন না †। পূর্বে উক্ত হইয়াছে, দলীপ সিংহ ও তাঁহার পোষ্য-বর্গের বার্ষিক বৃত্তি অনধিক ৫ লক্ষ ও অনূন ৪ লক্ষ টাকা নির্দ্ধারিত হইয়াছিল। কিন্তু রাজ্যচ্যুতির পরে দলীপ সিংহ প্রথমে বার্ষিক ১ লক্ষ ২০ হাজার টাকা পাইতেছিলেন। সাত বৎসর পরে উহা বাড়াইয়া বার্ষিক দেড় লক্ষ টাকা করা হয়। ১৮৫৮ অব্দ হইতে দলীপ সিংহকে বার্ষিক আড়াই লক্ষ টাকা দেওয়ার বন্দোবস্ত হয় ‡। নানা কারণে ঐ টাকা হইতে আবার প্রতি বৎসর ৭০ হাজার টাকারও অধিক কাটান যায়। স্মরণ্য মহারাজ পঞ্জাব-কেশরীর পুত্র ইঙ্গরেজ গবর্নমেন্ট হইতে বার্ষিক ১ লক্ষ ৮০ হাজার টাকারও কম পাইতেছেন।

* J. M. Ludlow, British India its Races and its History, Vol. II., p. 166-167.

† দলীপ সিংহ স্বয়ং উল্লেখ করিয়াছেন, তাঁহার খাসসম্পত্তির একটি হইতে বৎসর আড়াই লক্ষ টাকা আয় হইত। লবণের খনি হইতে বৎসরে প্রায় ৪০ লক্ষ টাকা পাওয়া যাইত। এতদ্ব্যতীত শাল অলঙ্কার প্রভৃতি দ্রব্যদ্রব্য ছিল। ইঙ্গরেজ গবর্নমেন্ট সম্পত্তির অছি স্বরূপ জিলেন। তথাপি গবর্নমেন্ট অসম্মুচিতচিত্তে উহা বিক্রয় করেন। সিপাহিযুদ্ধের সময়ে দলীপ সিংহের ফতেগড়ের আবাসবাটীতে অনূন আড়াই লক্ষ টাকার সম্পত্তি নষ্ট হয়। গবর্নমেন্ট উহার জন্য ৩০ হাজার টাকা দিতে চাহিয়াছিলেন। কিন্তু দলীপ সিংহ উহা গ্রহণ করেন নাই।

‡ এই আড়াই লক্ষ ব্যতীত দলীপ সিংহের আত্মীয় স্বজনের ভরণপোষণ জন্য, গবর্নমেন্ট প্রতি বৎসর ১ লক্ষ ৮০ হাজার টাকা দেওয়ার বন্দোবস্ত করিয়াছিলেন। ঐ সকল আত্মীয় স্বজনের অনেকের মৃত্যু হওয়াতে গবর্নমেন্ট বোধ হয়, এখন ৪০ কি ৫০ হাজার টাকা প্রতি-বৎসর দিতেছেন। অবশিষ্ট টাকা দলীপ সিংহের হস্তগত না হইয়া গবর্নমেন্টের কোষাগারেই বাইতেছে।

রাজ্যচ্যুতির সময়ে দলীপ সিংহের বয়স এগার বৎসর ছিল। তিনি এই সময়ে স্তার জন্ বজিন্ নামক একজন ইংরেজের শিক্ষাধীন হন। ১৮৫০ অব্দে ফতেগড়ের এক জন খ্রীষ্টধর্ম-প্রচারক স্বীয় ধর্ম গ্রন্থের অনুশাসন অনুসারে তাঁহাকে খ্রীষ্টীয় ধর্মে দীক্ষিত করেন। ইহার এক বৎসর পরে পঞ্জাব কেশরীর খ্রীষ্ট ধর্মাবলম্বী পুত্র ইঙ্গলঙে উপনীত হন *। দলীপ সিংহ এখন ইঙ্গলঙে আছেন। চিরপ্রসিদ্ধ কোহিমুর মহারাণী ভারতসাম্রাজ্যেশ্বরীর রত্নভাণ্ডার বিভাগিত করিতেছে। আর মহারাণী কিন্দন ? ঝাঁহার জন্ত প্রভুভক্ত খালসা সৈন্ত উন্মত্ত হইয়া ভীষণ অনল

* ইঙ্গলঙে স্থায়ীরূপে অবস্থিতি করা, প্রথমে দলীপ সিংহের অভিপ্রেত ছিল না। ব্রিটিশ গবর্নমেন্টের প্ররোচনায় তিনি এরূপ বাস করিতে বাধ্য হইয়াছিলেন। ১৮৫৭ অব্দে সিপাহিবুকের সময়ে গবর্নমেন্ট তাঁহাকে স্বদেশে আসিতে ঘেন নাই। বহুকাল ইঙ্গলঙে থাকিয়া দলীপ সিংহ স্বদেশবাসে উদ্ব্যত হইয়াছিলেন। তিনি ঐ সময়ে বিলাত হইতে তাঁহার প্রিয়তম জন্মভূমি পঞ্জাবের অধিবাসীদিগকে সন্ধান পূর্বক নিম্নলিখিত ভাবে আপনাদেহের বিষয় হৃদয়বেশনা পরিব্যক্ত করিতেও ক্রটি করেন নাই :—

“প্রিয়তম স্বদেশীয়গণ ! ভারতবর্ষে বাইয়া বাস করিতে আমার ইচ্ছা ছিল না। কিন্তু সদগুরু সকলের বিধাতা। তিনি আমা অপেক্ষা ক্ষমতাশালী। আমি তাঁহার জান্ত জীব। আমার ইচ্ছা না থাকিলেও আমি তাঁহার ইচ্ছায় ইঙ্গলঙে পরিভাগ করিয়া, ভারতে বাইয়া, সামান্ত ভাবে বাস করিব। আমি সদগুরুর ইচ্ছার নিকটে মস্তক অবনত করিতেছি ; বাহা ভাল, তাহাই হইবে !

“খালসাগণ ! আমি আমার পূর্ব পুরুষদিগের ধর্ম পরিত্যাগ করিয়া পরধর্ম গ্রহণ করাতে আপনাদের নিকটে ক্ষমা প্রার্থনা করিতেছি। কিন্তু আমি যখন খ্রীষ্টীয় ধর্মে দীক্ষিত হই, তখন আমার বয়স বড় অল্প ছিল।

“আমি বোম্বাই উপস্থিত হইয়া, শিখধর্ম গ্রহণ করিব। ** বাবা নানকের অনুশাসন অনুসারে চলিব এবং গুরু গোবিন্দ সিংহের আদেশ পালন করিব।

“আমার বিশেষ ইচ্ছা থাকিলেও, আমি পঞ্জাবে বাইয়া আপনাদের সহিত সাক্ষাৎ করিতে পারিব না ; এই জন্য আপনাদিগকে এই পত্র লিখিতে বাধ্য হইলাম।

“ভারত সাম্রাজ্যের অধীশ্বরীর প্রতি আমার যে প্রগাঢ় ভক্তি আছে, তাঁহার সমুচিত পূরকার পাইয়াছি। সদগুরুর ইচ্ছা পূর্ণ হউক।

ওয়া গুরুভীকি কতে,

প্রিয়তম স্বদেশীয়গণ,

আমি আপনাদের রক্তমাংসের

দলীপ সিংহ।”

ক্রীড়ায় প্রবৃত্ত হইয়াছিল, তাঁহার কি দশা হইল? স্বীয় অবস্থার বহুবিধ পরিবর্তন পରେ তিনি বুদ্ধ, ভগ্নচিত্ত ও প্রায় অন্ধ হইয়া “সাত সমুদ্র তের নদীর” পারে তনয়ের নিকট উপস্থিত হইলেন। ১৮৬৩ অঙ্কে বারিধি-বেষ্টিত অপরিচিত, অজ্ঞাত ও নিৰ্জন স্থানে প্রাণাধিক তনয়ের পার্শ্বে মহারাজ রণজিৎ সিংহের এই রাজ্যভ্রষ্ট শ্রীভ্রষ্ট মহিষীর জীবনশ্রোতঃ অনন্ত কাল-সাগরে মিশিয়া গেল।

লর্ড ডালহৌসী সন্ধি ভঙ্গ করিয়া পঞ্জাবরাজ্য ব্রিটিশ ইণ্ডিয়ায় সংযোজিত করিলেও উহার শাসনে ঔদাসীন্য অবলম্বন করেন নাই। যে ঘোষণাপত্র দ্বারা পঞ্জাবরাজ্য ব্রিটিশ সাম্রাজ্যের অন্তর্ভুক্ত বলিয়া বিজ্ঞাপিত করা হয়, তাহা গবর্নর জেনেরলের কার্য্যালয়ে দীর্ঘকাল পুঞ্জীকৃত বা অব্যবস্থিত হইয়া থাকে নাই। যখন লর্ড গফ্ জম্মাশায় উদীপ্ত হইয়া খালসাদিগের পরাজয়-সাধনার্থ বুদ্ধের শৃঙ্খলাবিধানে ব্যাপ্ত হন; তখনই গবর্নরজেনেরল পঞ্জাব আপনাদের হস্তগত মনে করিয়া ইলিয়ট সাহেবের সহিত উহার শাসনসংক্রান্ত বন্দোবস্ত করিতে উদ্যত হইয়াছিলেন। গুজরাটের বিজয়-লক্ষ্মীর সহিত নবাধিকৃত রাজ্যের শাসনসংক্রান্ত সমুদয় শৃঙ্খলাই গবর্নরমেণ্টের অধিগত হইয়াছিল। কর্মচারিগণ প্রস্তুত হইয়াছিলেন, কর্ম-পারিপাট্য নিয়মবদ্ধ হইয়াছিল। এক্ষণে কোন গোলযোগ উপস্থিত হইয়া অতীষ্ট পথ কণ্টকিত করিল না, কোন বিশৃঙ্খলা সঙ্ঘটিত হইয়া অতীষ্ট কার্য বিঘ্ন-সমুল করিয়া তুলিল না। কার্য্যক্ষেত্র প্রসারিত হইল; কার্য্যকারণকগণ যথা-বধ হলে যথাযথ কার্য্যে গমন করিলেন। কোন শাসনকর্ত্তা এই নিয়ো-জিত কর্মচারিগণ অপেক্ষা অল্প কর্মচারিগণের প্রতি অধিকতর বিশ্বাস-স্থাপন করেন নাই এবং কোন শাসনকর্ত্তা এই কর্মচারিগণকর্ত্ত্বক অধিকতর বিশ্বস্ততা বা শ্রদ্ধাসহকারে সম্পূজিত হন নাই।

গবর্নরমেণ্ট যে রাজ্য বিজয়লক্ষ্মীর প্রসাদ বলিয়া হস্তগত করিলেন, তাহার পরিমাণ পঞ্চাশ সহস্র বর্গমাইল এবং অধিবাসীর সংখ্যা চল্লিশ লক্ষ। অধি-বাসীর অধিকাংশই হিন্দু, শিখ ও মুসলমানধর্মাবলম্বী। শিখগণ নানকের গভীর সাধনাবলে সম্পূষ্ট ও গোবিন্দ সিংহের অভাবনীয় মহামন্ত্রে সঞ্জীবিত

রুলীপ সিংহ ভারতবর্ষে আসিতেছিলেন, কিন্তু ঐ পত্র প্রকাশিত হইলে, গবর্নরমেণ্ট নানা সন্দেহ করিয়া তাঁহাকে পথে আদন্ নগরে আটক করেন। পঞ্জাবকেশরীর পুত্র শিখধর্ম পরিগ্রহ করিয়াছেন। কিন্তু গবর্নরমেণ্টের আদেশে তাঁহাকে আবার ইক্সলেণ্ডে বাইতে হইয়াছে।

হইয়া পঞ্জাবে আবাস পরিগ্রহ করিয়াছিল। এই শিখ গবর্ণমেন্টকে ব্রিটিশ রাজ পর্য্যদস্ত করেন, এবং প্রধানতঃ এই শিখ-সৈন্যগণকেই ব্রিটিশ রাজ পরাজিত করিয়া তুলেন। কিন্তু শিখগণ পঞ্জাবের স্থাপয়িতা বা প্রাচীন অধিবাসী নহে। ইহারা ব্রিটিশ কোম্পানির অভ্যাদয়সময়ে পঞ্জাবে আপনাদের আধিপত্য প্রসারিত করিতে উদ্যত হইয়াছিল। মুসলমানগণ পঞ্জাবের অধিকাংশ নগরের পরিপুষ্ট সাধন করেন। মহম্মদের আবির্ভাবের পূর্বে পঞ্জাবের নগরশ্রেণী স্থাপিত হয়, এবং পরিশেষে মহম্মদখানাবলস্বিগণ উহা সম্প্রসারিত ও সুশোভিত করিয়া তুলেন। মুসলমানদিগের রাজত্ব-সময়ে দিল্লীর ত্রায় লাহোরও সমৃদ্ধ ছিল। মুসলমানসম্রাটগণ দিল্লীর ত্রায় লাহোরও সময়ে সময়ে অবস্থিত করিতেন। উহার পূর্বে পঞ্জাবের স্থলবিশেষ গ্রীস ও বাক্ত্রীয় রাজ্যের অধীন ছিল। বৌদ্ধধর্মের বিজয়-পতাকা যখন ভারতবর্ষের সর্বত্র উড্ডীন হইয়াছিল, শ্রমণদিগের প্রভাবে ব্রাহ্মণগণ যখন শীত-সঙ্কুচিত বুদ্ধের ত্রায় আপনাতে আপনি সঙ্কুচিত হইতেছিলেন, অশোক ও চন্দ্রগুপ্তের সুরাজকীর্তি যখন সূর্য্যবংশীয় নরপতি-গণের শাসন-মহিমার গৌরবম্পর্কী হইতেছিল, তখন পঞ্জাবের কোন কোন স্থলে গ্রীক ও বাক্ত্রীয় ভূপতিদিগেরও আধিপত্য প্রসারিত হইয়াছিল। পঞ্জাবের অধিবাসীরা যেমন নানা ধর্মে ও নানা সম্প্রদায়ে বিভক্ত, উহার প্রাকৃতিক দৃশ্যও সেইরূপ নানা ভাবে নানা বেশে প্রতিভাত। কোন স্থলে উর্বর ও কর্ষিত ভূমি, শস্যসম্পত্তিশোভিত ক্ষেত্র, মনোহর উদ্যান রহিয়াছে, কোন স্থানে বৃক্ষ-লতা-শৃণ্ড ও প্রথর স্ব্যাকিরণবিশুদ্ধ ভূখণ্ড বা বালুকারাশিসমাকীর্ণ মরুভূমি পথিকদিগের ভীতি উৎপাদন করিতেছে, কোন স্থলে ভীষণ অরণ্য ব্যাত্ত্রাদি স্থাপদগণের আবাসভূমি হইয়া রহিয়াছে, এবং কোন স্থলে স্তূরবিস্তৃত হিমালয়ের উন্নত শৃঙ্গরাজি আলোখ্যবৎ রমণীয়তা পরিবর্দ্ধিত করিয়া দিতেছে। এই মনোহর ভূখণ্ড দিয়া ইতিহাস-প্রসিদ্ধ সিদ্ধুর পঞ্চ শাখা প্রবাহিত হইতেছে। পঞ্জাব ঐতিহাসিক ঘটনায় পরিপূর্ণ ও অতীত গৌরবে বিভূষিত। যে স্থানে আর্ধ্যগণ গোধন সঙ্গে পদার্পণ পূর্বক ভক্তিরসার্জ হৃদয়ে বেদ গান করিয়া-ছিলেন, দিগ্বিজয়ী সেকন্দর শাহ সমরক্ষেত্রে অবতীর্ণ হইয়াছিলেন মহাতেজস্বী পুরু বীরধর্ম্মাহুসারে যুদ্ধ করিয়াছিলেন, মেগস্থেনিস ভার-তীয় ঘটনানিচয় লিপিবদ্ধ করিয়া ঐতিহাসিক জ্ঞানের পথ উন্মুক্ত করিয়া-

উদ্যত হইয়াছিলেন, এবং যে স্থানে স্বদেশগমনপ্রসঙ্গী আর্গস্‌বাসী গরী-
য়সী জন্মভূমির জন্ত দীর্ঘ নিঃশ্বাস পরিত্যাগ পূর্বক তাহাদের অধিনেতা
ও ভাগ্যের বিরুদ্ধাচরণ করিয়াছিলেন, সে স্থান মোহিনী কল্পনা ও গভীর
চিন্তাশক্তির প্রধান উদ্দীপক। এইরূপ প্রাচীন ঘটনাপূর্ণ দেশ ব্রিটিশ
পতাকাধার শোভিত হয়, এবং এইরূপ জনপূর্ণ ও শস্ত্রশালী ভূখণ্ড সর্বোপেক্ষা
কার্য্যকুশল ব্রিটিশ রাজপ্রতিনিধির মনোযোগ আকর্ষণ করিয়া তুলে।

ঈদৃশ অবস্থাপন্ন, ঈদৃশ জনপূর্ণ ও ঈদৃশ বিস্তৃত জনপদের স্বশাসন জন্ত
নূতন পদ্ধতি অনুসারে নূতন সমিতি সংগঠিত হইয়াছিল। লর্ড ডালহৌসী
সৈনিকদলের বিরুদ্ধবাদী ছিলেন না। তিনি অভিজ্ঞ দেওয়ানী কর্মচারী
ও অভিজ্ঞ সৈনিক পুরুষ, উভয়কেই আদরসহকারে গ্রহণ করিতেন। ঐ
উভয় সম্প্রদায়ের প্রতিই তাঁহার বিশেষ আস্থা ছিল, এবং ঐ উভয় সম্প্র-
দায়ই যে, একীভূত হইয়া কোন প্রদেশের শাসনকার্য্য নিরীহ করিতে
পারেন, ইহাও তাঁহার বিশ্বাস ছিল। সুতরাং ডালহৌসী ঐ সম্প্রদায়দ্বয়ের
লোক লইয়াই কার্য্য সম্পাদন করিতে ইচ্ছা করিলেন। উভয় সম্প্রদায়েরই
কার্য্যস্থল নিরূপিত হইল, উভয় সম্প্রদায়ের লোকই যথাযোগ্য স্থলে সন্নি-
বেশিত হইলেন। এই সকলের উপর একটি শাসনসমিতি প্রতিষ্ঠিত হইল ;
তীক্ষ্ণবুদ্ধি স্বল্পদর্শী হেনরি লরেন্স ঐ শাসনসমিতির অধিনায়কত্ব গ্রহণ
করিলেন।

অযোগ্য ব্যক্তির হস্তে এই গুরুতর ভার সমর্পিত হয় নাই, অযোগ্য
ব্যক্তি এই গুরুতর ভার গ্রহণ করিয়া সাধারণের বিশ্বাস নষ্ট করেন নাই।
সমস্ত স্বাধীনচেতা ও তত্ত্বদর্শী ব্যক্তিই উপযুক্ত ব্যক্তির হস্তে উপযুক্ত ভার
সমর্পিত হইয়াছে বলিয়া আত্মাদ প্রকাশ করিয়াছিলেন। হেনরি লরেন্স
প্রগাঢ় রাজনীতিজ্ঞ ও প্রগাঢ় কর্তব্যকুশল ছিলেন, তাঁহার হৃদয় প্রশস্ত ছিল,
ইচ্ছা সাধু ছিল এবং কর্তব্যবুদ্ধি অনমনীয় ও অবিচলিত ছিল। কোন
ব্যক্তি হেনরি লরেন্সের আয় নববিজিত রাজ্যের শৃঙ্খলাবিধানে অধিকতর
সমর্থ ছিলেন না এবং কোন ব্যক্তি হেনরি লরেন্সের আয় পরাক্রান্ত, যুদ্ধ-
কুশল ও তেজস্বী সম্প্রদায়কে আপনাদের বশবর্তী রাখিতে অধিকতর যোগ্য
ছিলেন না।

হেনরি লরেন্সের ভ্রাতা জন লরেন্স শাসনসমিতির দ্বিতীয় সভ্যের পদে
সম্মানিত হইয়াছিলেন। জন লরেন্স কোম্পানির একজন সিভিল কর্মচারী।

তিনি শাসনসংক্রান্ত কার্যে বিশেষ প্রতিপত্তি লাভ করিয়াছিলেন । তাঁহার কর্তব্যপ্রিয়তা বলবতী ছিল, এবং পরিশ্রম, একাগ্রতা ও অধ্যবসায় তাঁহাকে সৰ্ব্বপ্রকার গুরুতর কার্য সাধনের উপযোগী করিয়া তুলিয়াছিল । যদিও জন লরেন্স প্রগাঢ় রাজনীতিজ্ঞ ছিলেন না, যদিও উইলিয়ম পিট, জন ব্রাইট, অথবা প্রিন্স বিস্মার্কের স্থায় লোকাতীত বুদ্ধিমত্তা তাঁহাতে প্রতিভাত হইত না, তথাপি তিনি সুপটু ও সুদক্ষ কৰ্মচারী বলিয়া বিশেষ প্রসিদ্ধ ছিলেন । তিনি কার্যক্ষেত্রে প্রবিষ্ট হইয়া প্রথমে উত্তর-পশ্চিমাঞ্চলের রাজস্বের বন্দোবস্তকার্যে বিশিষ্ট দক্ষতা প্রদর্শন করেন । ইহার পর তিনি দিল্লীর মাজিষ্ট্রেট হন । এই কার্যে জন লরেন্সের ক্ষমতা অধিকতর বিকশিত হইয়া উঠে । তদানীন্তন গবর্নরজেনারল লর্ড হার্ডিঞ্জ লরেন্সের কার্যপটুতা ও তীক্ষ্ণ বুদ্ধি দেখিয়া তাঁহার প্রতি সাতিশয় সন্তোষ প্রকাশ করেন এবং তাঁহাকে উহা অপেক্ষা কোন গুরুতর কার্যে নিযুক্ত করিতে সচেষ্ট হইয়া উঠেন । যখন প্রথম শিখযুদ্ধ শেষ হয়, যুদ্ধের ব্যয় স্বরূপ জলদ্রব দোয়াব যখন ব্রিটিশ-রাজ হস্তগত করেন, তখন জন লরেন্সের প্রতিই সেই প্রদেশের শাসনভার সমর্পিত হয় । ইহার পর হেনরি লরেন্সের অনুপস্থিতিকালে জন লাহোরে বাইয়া তাঁহার অগ্রজের স্থলে প্রতিনিধি রেসিডেন্ট হইয়াছিলেন । যদিও এই উভয় লরেন্সের প্রকৃতিগত বৈষম্য ছিল, তথাপি ইহার উভয়েই স্থিরতা, কর্তব্যপ্রিয়তা ও মানসিক দৃঢ়তায় তুল্য ছিলেন । উভয়েই উপযুক্ত সময়ে উপযুক্ত সাহসসহকারে ভারতের কার্যক্ষেত্রে প্রবেশ করেন এবং উভয়েই বিশেষ যোগ্যতার সহিত আপনাদের কার্য সম্পাদন করিয়া ভারতীয় ইতিহাসের বরণীয় হইয়া উঠেন ।

লাহোরের শাসন-সমিতির তৃতীয় সদস্য চার্লস্ প্রাণবিল মান্সেল । ইনিও একজন সিবিল কৰ্মচারী ছিলেন । ভারতবর্ষের রাজস্ব-সংক্রান্ত বিষয়ে ইহার বিশিষ্ট দক্ষতা ও অভিজ্ঞতা ছিল । মান্সেল সাধুতা ও কর্তব্য নিষ্ঠার সকলের প্রক্ৰাম্পদ ও আদর-ভাজন হইয়াছিলেন । স্থলতঃ বিবেচনা করিলে ঐ নবাধিকৃত রাজ্যের নুতন সমিতিতে সুযোগ্য ও সুব্যবস্থিত কৰ্মচারীই নির্বাচিত হইয়াছিলেন । এই নির্বাচনে লর্ড ডালহৌসীর সুকৃতি ও সুতীক্ষ্ণ বুদ্ধির বিশিষ্ট পরিচয় পাওয়া গিয়াছে, এবং ইহাতে তাঁহার বিশিষ্ট সুব্যবস্থিততাও লক্ষিত হইয়াছে ।

ঐ শাসনসমাজের সদস্যবর্গ শাসন-সংক্রান্ত বিষয়ে পরস্পর দারী

হইলেও বিভিন্ন ব্যক্তি বিভিন্ন বিষয়ের সম্পাদন-ভার গ্রহণ করেন। হেনরী লয়েন্স সর্কারদিগের সহিত সন্ধিবন্ধন, পঞ্জাবী সৈনিকদের শৃঙ্খলাসম্পাদন এবং অপ্রাপ্তবয়স্ক মহারাজের শিক্ষার বন্দোবস্তকরণ প্রভৃতি সমস্ত রাজনৈতিক বিষয়ের ভার গ্রহণ করেন। জন লয়েন্সের প্রতি দেওয়ানী ও রাজস্ব-সংক্রান্ত বন্দোবস্তের ভার সমর্পিত হয়, এবং মান্‌সেল বিচার-কার্যের পরিদর্শক হন। এই সর্বপ্রধান রাজপুরুষত্রয়ের অধীনে কোম্পানির দেওয়ানী ও সৈনিক বিভাগ হইতে কতিপয় কর্মচারী নিযুক্ত হন। সমস্ত প্রদেশ সাত ভাগে বিভক্ত হয়; প্রতি বিভাগে এক একজন কমিশনার ও তাঁহার অধীনে ডেপুটি কমিশনার, সহকারী কমিশনার প্রভৃতি ব্যবস্থাপিত হইয়া যথানির্দিষ্ট কার্যসম্পাদনে ব্রতী হন।

যে সকল কর্মচারী পঞ্জাবের শাসন-কার্যে নিযুক্ত হইয়াছিলেন, তাঁহারা এক এক সময় ভারতবর্ষের রাজনৈতিক ও সামরিক বিভাগের উচ্চতম পদে অধিরূঢ় হন। ডালহৌসী এই নূতন রাজ্যের শাসনকার্যে বিশিষ্ট মনোযোগী হইয়াছিলেন, সুতরাং ইহাতে অনেক উপযুক্ত কর্মচারী প্রবেশিত করিতে কাতর হন নাই। যৌবনের দৃঢ়তা ও শ্রমশীলতা এবং প্রৌঢ়ত্বের দূরদর্শিতা ও স্থিরতা উভয়ই এই পঞ্জাবী কর্মচারিগণের মধ্যে প্রতিভাত হইত। জর্জ এড্‌মন্টোন, ডোনালাড মাক্‌গিভড, রবট মন্টগোমরী, ফ্রেডরিক মাক্‌সন, জর্জ মাক্‌গ্রেগর, রিচার্ড টেম্পল, এডওয়ার্ড থরন্টন, নিবিল চেম্বারলেন, জর্জ বার্নেস্ প্রভৃতি রাজপুরুষগণ পঞ্জাবেই প্রথমে আপনাদের কার্যকুশলতা ও বুদ্ধিমত্তা প্রদর্শনে অগ্রসর হন। এদিকে পূর্ভকার্যের ভার রবট নেপিয়ারের প্রতি সমর্পিত হয়। সামরিক ও বৈজ্ঞানিক গুণ, উভয়ই রবট নেপিয়ারকে পৃথিবীর মধ্যে একজন সর্বোৎকৃষ্ট ইঞ্জিনিয়ার করিয়া তুলিয়াছিল। নেপিয়ারের এই গুণগ্রাম পঞ্জাবক্ষেত্রে বিকশিত হইতে থাকে। এইরূপে সুযোগ্য কর্মচারিগণ ধীরে ধীরে পরাজিত সম্প্রদায়কে বশীভূত করিতে যত্নবান্ হন। দেওয়ানীর কৃষ্ণ বর্ণ ও সামরিক লোহিত বর্ণ, উভয়ই পরস্পর একতান্বত্রে সম্বন্ধ হইয়া এক ক্ষেত্রে বিকাশ পাইতে থাকে। এই উভয় বর্ণে কখনও কোনরূপ বিরোধ ঘটে নাই। লয়েন্সের রাজনৈতিক মন্ত্রে দীক্ষিত হইয়া দেওয়ানী ও সৈনিক বিভাগের সমস্ত কর্মচারীই একাগ্রতা ও অধ্যবসায়সহকারে কার্যক্ষেত্রে প্রবেশ করেন, পার্শ্বে পার্শ্বে অবস্থান পূর্বক স্বকর্তব্য সম্পাদনে উন্মুখ হন, এবং

সর্কান্তঃকরণে আপনাদের কার্য সম্পন্ন করিয়া তুলেন; কোন রূপ প্রতি-
 হ্বন্দিতা বা কোন রূপ বিদেহবুদ্ধি তাঁহাদের হৃদয়গত মহান্ ভাব কলঙ্কিত
 ও কলুষিত করে নাই, কোন গোলযোগ বা কোন বিশৃঙ্খলা তাঁহাদের
 কর্তব্যপথ কণ্টকিত করিয়া তুলে নাই। তাঁহারা নিঃশঙ্কচিত্তে নবাধিকৃত
 রাজ্যে নবাধিকৃত প্রজাসমূহে পরিবেষ্টিত হইয়া অধিবাস করিতেন, নিঃশঙ্ক
 চিত্তে তাঁহাদের আবাস-শিবির চারিদিকে উন্মুক্ত করিয়া রাখিতেন*,
 এবং নিঃশঙ্কচিত্তে তেজস্বী ও যুদ্ধকুশল সম্প্রদায়ের সহিত আলাপ করিয়া
 আপনাদের সাধুতা ও সরলতা প্রদর্শন পূর্বক তাহাদিগকে ক্রমে আয়ত্ত
 ও অহুগত করিয়া তুলিতেন।

এইরূপে রণজিৎ সিংহের জনপদে ব্রিটিশ শাসন বন্ধমূল হইতে লাগিল;
 এইরূপে রণজিতের শাসিত শিখগণ ধীরে ধীরে একে একে ব্রিটিশ-পতা-
 কার আশ্রয়ে সন্নিহিত হইয়া উঠিল। যে সমস্ত পরাক্রান্ত খালসা সৈন্য
 এক সময়ে ব্রিটিশ গবর্ণমেন্টকে শঙ্কাকুল করিয়া তুলিয়াছিল, তাহাদের অদম্য
 তেজ, অবিচলিত সাহস, অক্রান্ত অধ্যবসার-প্রভাবে ব্রিটিশ সৈন্য এক সময়ে
 পরাজিত, বিধ্বস্ত ও পলায়িত হইয়াছিল, গোবিন্দ সিংহের মহামন্ত্রে সঞ্জীবিত
 ও মহাপ্রাণতার উদ্বীপ্ত হইয়া তাহারা ধীরে-সমানাজের বরণীয় হইয়া উঠি-
 য়াছিল, তাহারাও এক্ষণে অদৃষ্টের নিকট মস্তক অবনত করিয়া প্রশান্তচিত্তে
 ব্রিটিশ শাসনের অহুগত হইতে লাগিল। তাহাদের সমস্ত যুদ্ধোপকরণ
 ব্রিটিশ রাজের হস্তগত হইল। তাহাদের কামান, তাহাদের বন্দুক,
 তাহাদের সর্দান, তাহাদের অসি এবং তাহাদের শূন ব্রিটিশ অস্ত্র নামে

* স্তার জন মালকম কহিতেন, নবাধিকৃত রাজ্য শ্বশাসন করিবার একমাত্র উপায় “চার
 দরওয়াজা খোলা” অর্থাৎ চারি দ্বার বিমুক্ত রাখা। পঞ্জাবের কর্মচারিগণ এই বাক্য বিশেষ-
 রূপে হৃদয়গ্রম করিয়াছিলেন। ইহাদের এক ব্যক্তি একদা লিখিয়াছিলেন যে, বৎসরের মধ্যে
 আট নান কাল তাবুই তাঁহার গৃহ ছিল। তিনি অধিবাসাদিগকে ভাল ষাসিতেন এবং আপ-
 নার কর্তব্যসম্পাদনে স্বী হইতেন। সমস্ত লোকেই বন্ধুভাবে তাঁহার সহিত সাক্ষাৎ করিতে
 আসিত, পক্ষ আশ্রয়ী অধিবাসিগণ তাঁহার অরক্ষিত তাবুর দ্বারে উপস্থিত হইয়া প্রত্যহ
 তাঁহাকে উৎকৃষ্ট ফল, সূখাচ্ছ চিনি ও মসলা প্রভৃতি উপহার দিত। যখন তিনি তাহাদিগকে
 আপনার শিবিরে কার্পেটের উপর উপবেশন করিতে অহুমতি দিতেন এবং তাহাদের সহিত
 পূর্বতন কাহিনী ও বর্তমান ঘটনার্বর্গীর সম্বন্ধে আলাপে প্রবৃত্ত হইতেন, তখন তাঁহার এরূপ
 সমস্তোষের আবির্ভাব হইত যে, সে সমস্তোষ তাঁহার অদৃষ্টে আর কখনও ঘটয়া উঠে নাই।

অভিহিত হইয়া সমস্ত পঞ্জাব উত্তাসিত করিয়া তুলিল। যুদ্ধকুশল খাল্সাগণ এক্ষণে ব্রিটিশ পতাকার অধীনে সজ্জিত হইয়া ব্রিটিশ সৈন্যদল পরিপুষ্ট করিতে লাগিল। পঞ্জাবে নূতন শাসন প্রণালী প্রবর্তিত হইল এবং পঞ্জাব নূতন শাসনকর্তার অধীন হইয়া নবীকৃত হইয়া উঠিল।

পঞ্জাব এইরূপ অভিনব প্রণালী ও অভিনব শাসনকর্তার অধীন হওয়াতে একতর সম্প্রদায়ের হৃদয়ে নিদারুণ আঘাত লাগিয়াছিল। প্রাচীন শিখ সর্দারগণ এক সময়ে গৌরবে সমুন্নত এবং সম্মান ও সমৃদ্ধিতে সাধারণের অঙ্ঘ্রস্পদ ছিলেন। এক্ষণে পঞ্জাব ইফরেজ রাজ্যের অন্তর্ভুক্ত হওয়াতে তাঁহাদের সে গৌরব, সে সম্মান ও সে সমৃদ্ধি ক্রমশঃ হ্রাস ও বিলুপ্ত হইতে লাগিল। তাঁহারা দেখিলেন, গবর্ণর জেনেরল অধীরতা দেখাইয়া যুদ্ধের কারণ নিচয় একত্র কবিগেন, এবং পরিশেষে প্রতিশ্রুতি ও সন্ধি ভঙ্গ করিয়া পঞ্জাবে ব্রিটিশ পতাকা উড্ডীন করিয়া দিলেন। তাঁহারা ধীরতাসহকারে সন্ধির নিয়ম রক্ষা করিতে ছিলেন, তথাপি লর্ড ডালহৌসী পঞ্জাবে রণজিৎসিংহের বংশধরগণের আধিপত্য বিলুপ্ত করিলেন। তাঁহারা বন্ধুভাবে ব্রিটিশ গবর্ণমেন্টকে আলিঙ্গন করিয়াছিলেন, গবর্ণমেন্টকে তাঁহাদের অপ্রাপ্ত বয়স্ক মহারাজের অভিভাবক হইতে দেখিয়া ভবিষ্য স্তরের আশায় সন্তুষ্ট হইতেছিলেন, কিন্তু শেষে তাঁহাদের এ আফ্লাদ ও এ ভৃষ্টি দীর্ঘস্থায়ী হইল না। গবর্ণর জেনেরল তাঁহাদিগকে সমরে পরিচালিত করিলেন, এবং পরিশেষে তাঁহাদের মধ্যাদা ও চিরস্তন প্রতিশ্রুতিভঙ্গ করিয়া পঞ্জাব কোম্পানির রাজ্যের সহিত সংযোজিত করিয়া তুলিলেন। এ বিরাগ, এ ক্ষোভ, তাঁহারা হৃদয় হইতে

* পঞ্জাবের শাসনসংক্রান্ত প্রথম বিজ্ঞাপনীতে এ বিষয়ের প্রমাণ পাওয়া যায়। উক্ত বিজ্ঞাপনীতে এক স্থলে লিখিত আছে:—“শ্রেণীবিশেষের অনিষ্ট সাধন না করিয়া কোন গুণতর বিলম্ব সঙ্ঘটিত করা যায় না। যখন কোন রাজ্যের পতন হয়, তখন সেই রাজ্যের অভিজাত সম্প্রদায়ও কিয়দংশে ক্ষতিগ্রস্ত হইয়া থাকেন। যে সম্প্রদায় এক সময়ে রাজনৈতিক উন্নতির আশায় অথবা ধর্ম্মনব্বন্ধীয় একাগ্রতায় পরিচালিত হইয়াছিল, সে সম্প্রদায় সাধারণ লোক ও সামান্য সমাজের সহিত সম্মিলিত হইতে অবশ্যই অসম্মত প্রকাশ করে এবং তাহাদের পরাক্রান্ত বিজ্ঞতার বিরুদ্ধে কিয়দংশে শক্রতা প্রদর্শনে উৎসাহ হয়। সম্ভবতঃ ব্রিটিশশাসনে পঞ্জাবের সাধারণ লোকের স্ববস্থা ক্রমেই উন্নত হইবে।”—Kaye, Sepoy War, vol., I. 58, note.

অপসারিত করিতে সমর্থ হইলেন না । ইহা তাঁহাদের হৃদয় তরলায়িত করিতে লাগিল । কিন্তু হেন্‌রি লরেন্স এই বিরক্ত ও ক্লক শিখ সর্দারদিগকে সম্বলিত করিতে বিমুখ হইলেন না । তিনি তাঁহাদের সৌম্যমূর্ধির প্রতি সম্মান প্রদর্শন করিতে লাগিলেন এবং তাঁহাদের সামাজিক গৌরব ও প্রতিপত্তি অক্ষুণ্ণ রাখিতে প্রয়াসবান্ হইলেন । সর্দারগণ হেন্‌রি লরেন্সের এইরূপ বিনয়-নম্রতা ও উদারতা দর্শনে আপনাদের অদৃষ্টের নিকট মস্তক অবনত করিলেন, এবং হৃদয়ের তুষানল নির্ক্ষাণ বা গোপন করিয়া ক্রমে বিজেতার সহিত সৌহার্দ-স্বত্রে সম্বন্ধ হইতে লাগিলেন ।

কিন্তু পঞ্জাবের এই শাসন-সমিতি দীর্ঘকাল থাকিল না । লর্ড ডালহৌসী ১৮৫৩ অব্দে উহার মূলোচ্ছেদ করিলেন । পঞ্জাবের শাসনভার অনেকের হস্তে না রাখিয়া একের হস্তে রাখিতে তাঁহার বলবতী ইচ্ছা হইয়াছিল, এই ইচ্ছা ফলবতী করিবার জন্তই লাহোরের শাসন-সমিতি উঠাইয়া দিবার প্রস্তাব হইল । যখন গবর্ণরজেনেরলের এই অভিপ্রায় জনরবে প্রচারিত হইল, তখন প্রতি বাজারে, প্রতি গৃহে, প্রতি শিবিরে লরেন্স-ঘরের মধ্যে কাহার হস্তে পঞ্জাবের শাসনভার সমর্পিত হইবে, তদ্বিষয়ে বিভর্ক হইতে লাগিল । সকলেই প্রশ্ন করিতে লাগিল, হেন্‌রি ও জন্ এই উভয়ের মধ্যে কে এই বিস্তৃত রাজ্যের অধিনায়কত্ব গ্রহণ করিবেন ? সকলেই হেন্‌রি ও জনের প্রতি দৃঢ় বিশ্বাস ছিল, সকলেই কাহার অদৃষ্ট প্রসন্ন হয়, দেখিবার জন্ত উন্মুখ হইয়া রহিল । কিন্তু ডালহৌসী মনোমত কর্মচারী নিয়োগ করিতে দোলায়মান-চিত্ত হইলেন না । লর্ড হার্ডিঞ্জ হেন্‌রিকে মনোনীত করিতেন, লর্ড ডালহৌসী জন্কে মনোনীত করিলেন । ইহাতে অনেকে বিস্মিত বা বিরক্ত হইল না ; অনেকে উভয়ের উপরেই সমান বিশ্বাস স্থাপন করিয়াছিল, এক্ষণে উভয়ের একতরকে নিযুক্ত হইতে দেখিয়া নীরব হইল । কিন্তু আবার হেন্‌রি লরেন্স পঞ্জাব হইতে বিদায় গ্রহণ করাতে অনেকে সাতিশয় ক্রোভ প্রকাশ করিতে লাগিল, হেন্‌রি দীর্ঘকাল পঞ্জাবের সহিত সংসৃষ্ট ছিলেন, দীর্ঘকাল পঞ্জাব সুশাসিত ও সুব্যবস্থিত করিতে মনোযোগ ও বহু করিয়াছিলেন, এক্ষণে তাঁহার নাম পঞ্জাবের শাসন-বিভাগ হইতে অপসারিত হওয়ারূপে অনেকেই মনঃকোভে দীর্ঘ নিঃশ্বাস পরিত্যাগ করিল । জন্ লরেন্স ও অগ্রজের প্রাধান্য রক্ষার্থ ভ্রাতৃসৌহার্দের বশবর্তী হইয়া এই কার্য্যক্ষেত্র হইতে অপস্থত

হইবার সঙ্কল্প করিলেন; কিন্তু ডালহৌসী জনের কার্যে অসুরাগ প্রকাশ করিয়াছিলেন, সুতরাং জনই পঞ্জাবের প্রধান কমিশনরের পদে নিয়োজিত হইলেন, এবং হেনরি লরেন্স রাজপুতের গৌরবভূমি রাজপুতনায় হাইদারেসিডেন্টের কার্যভার গ্রহণ করিলেন * ।

হেনরি লরেন্স গবর্ণর জেনেরলের এই নীমাংসার নিকট অবনত-মস্তক হইলেন, কিন্তু উহার সহিত একমত হইলেন না। লাহোরের শাসন-সমিতির উচ্ছেদ হওয়ার্তে হেনরি লরেন্স ক্ষুব্ধ হইলেন। একজনের হস্তে নবাধিকৃত রাজ্যের শাসন-ভার সমর্পণ করা হেনরি লরেন্সের একান্ত অনিচ্ছা ছিল; এক্ষণে গবর্ণরজেনেরলকে তাঁহার মতের বিরুদ্ধে কার্য করিতে দেখিয়া তিনি হৃদয়ে আঘাত পাইলেন। হেনরি যে রাজনৈতিক মন্ত্রে দীক্ষিত হইয়াছিলেন, এবং যে রাজনৈতিক মত এত দিন হৃদয়ে পোষণ করিতেছিলেন, সেই রাজনৈতিক মতের কিয়দংশে মর্যাদাহানি দেখিয়া তিনি দীর্ঘ নিঃশ্বাস ফেলিলেন। হেনরি লরেন্স বৃষ্টিতে পারিলেন যে, তাঁহার মন্ত্র এবং তাঁহার ধারণা অসময়ে শত্রিফুট হইয়াছে। উহা ডালহৌসীর শাসনকালে কার্যে পরিণত হইবে না, সুতরাং তিনি নীরবে দীর্ঘ নিঃশ্বাস ত্যাগ করিয়াই ক্রান্ত হইলেন এবং দীর্ঘ নিঃশ্বাস ত্যাগ করিয়াই আপনার অভিনব কার্য্যক্ষেত্রে প্রবেশ পূর্বক অভ্যস্ত কার্য্যকুশলতার পরিচয় দিতে লাগিলেন।

এদিকে জন লরেন্স পঞ্জাবে আধিপত্য করিতে প্রবৃত্ত হইলেন। তিনি লাহোরের শাসনসমিতির সভ্যের পদে থাকিয়া যে ক্ষমতা ও তীক্ষ্ণতার পরিচয় দিতেছিলেন, সে ক্ষমতা ও তীক্ষ্ণতা এক্ষণে পূর্ণাবয়ব হইল; সুবিস্তৃত পঞ্জাবের এক প্রান্ত হইতে অপর প্রান্ত পর্য্যন্ত তাঁহার নাম প্রতিধ্বনিত হইতে লাগিল। তিনি অক্রান্ত অধাবসায়সহকারে কার্য্যক্ষেত্রে অবতীর্ণ হইলেন, অবিচলিত ধীরতাসহকারে অভীষ্ট কার্য্যে হস্তার্পণ করিলেন,

* হাইদরাবাদের রেসিডেন্টের পদ এই সময়ে শূন্য হইয়াছিল। এই পদে স্তার চার্লস মেটকাক্ প্রভৃতি প্রধান প্রধান রাজপুরুষগণ অধিষ্ঠিত ছিলেন। কে সাহেব অসুস্থান করেন, হেনরি লরেন্স এই পদ তাঁহার জাতা অথবা তাঁহার নিজের জন্ত রাখিতে ডালহৌসীর নিকট প্রার্থনা করিয়াছিলেন। কিন্তু ডালহৌসী সেনাপতি লোকে নিজামের দরবারে প্রেরণ করিলেন, এবং হেনরি লরেন্সকে রাজপুতনায় গবর্ণর জেনেরলের এজেন্ট করিয়া দিলেন। Kaye's Sepoy War. vol. I., 62, note.

এবং অপরিস্রব শ্রমশীলতাপ্রভাবে স্বকর্তব্য সম্পাদন করিয়া তুলিতে লাগিলেন । ভালই হউক আর মন্দই হউক, তিনি বাহাতে হস্তক্ষেপ করিতেন, তাহা সর্বাস্তঃকরণে ও প্রগাঢ় বিশ্বাসের সহিত সম্পূর্ণ করিয়া তুলিতেন । জন লরেন্স ডালহৌসীর মতের পরিপোষক ছিলেন, সুতরাং ডালহৌসীর অভিলষিত কার্যসম্পাদনে তাঁহারই সমধিক ক্ষমতা ও পটুতা ছিল । তিনি পঞ্জাবে কোন্ সময়ে কি প্রকারে কি কি কার্য করিয়াছেন, তাঁহার অধীনস্থ কর্মচারিগণ কি ভাবে কোন্ পথে পরিচালিত হইয়াছেন, তাহা এক্ষণে ইতিহাসের প্রধান বর্ণনীয় বিষয় হইয়া উঠিয়াছে । তিনি সর্ব-প্রকার দুর্বলতা-শূন্য ছিলেন । শরীরের তেজস্বিতায়, মস্তিষ্কের উর্ধ্বরতায়, মনের দৃঢ়তায়, তিনি কখনও কোন বিষয়ে পর্যুদস্ত হইতেন না । কিছুতেই তাঁহার সাধনা বিচলিত হইত না, কিছুতেই তাঁহার নিষ্ঠা কুণ্ঠিত হইত না, এবং কিছুতেই তাঁহার কর্তব্য-বুদ্ধি অবনত হইয়া পড়িত না । তিনি সর্ব বিষয়ে সর্বক্ষণ অবিচলিত, অনমনীয় ও অকুণ্ঠিত থাকিতেন । কর্তব্য-সম্পাদন তাঁহার মূল মন্ত্র ছিল । তিনি প্রগাঢ় ভক্তিব্যোগ-সহকারে যেরূপ ঈশ্বরের আরাধনা করিতেন, সেইরূপ প্রগাঢ় কর্তব্যনিষ্ঠাসহকারে প্রতিপালক প্রভু-রও অভীষ্ট সাধনে ব্যাপ্ত হইতেন । অধিকৃত রাজ্যের শৃঙ্খলা-সম্পাদনে ও অধিকৃত রাজ্যের রক্ষাবিধানে তাঁহার যত্ন, উৎসাহ ও পরিশ্রম, তিনই সমভাবে পরিচালিত হইত । পঞ্জাবের কোন রাজপুরুষ জন্ লরেন্সের শ্রায় একাগ্রতা, দৃঢ়তা ও কার্য-কুশলতার পরিচয় দিতে পারেন নাই, এবং পঞ্জাবের কোন রাজপুরুষ জন্ লরেন্সের শ্রায় ইতিহাসের বরণীয় হইতে সমর্থ হন নাই ।